



МИРМУҲСИН

МЕЪМОР

Тарихий роман



«ШАРҚ» НАШРИЁТ-МАТБАА
АКЦИЯДОРЛИК КОМПАНИЯСИ
БОШ ТАҲРИРИЯТИ
ТОШКЕНТ — 2001

Мирмуҳсин.

Меъмор: Роман. — Т.: «Шарқ», 2001. — 4166.

Ўз2

Ўзбекистон халқ ёзувчиси, Давлат мукофотининг лауреати Мирмуҳсин Мирсаидов бу романнада ўтмиш меъморларининг хаёти, бекиёс санъати ва ўша замон қарама-каршиликларини кўрсатади. «Меъмор» романи XV асрда Мовароуннахр ва Хуросонда меъморчилик санъатининг мислсиз ривожланганини, обидалар ва тарихий ёдгорликларни меъмору муҳандислар билан бирга халқ қурганини кенг ҳикоя қиласди. Меъмор Нажмиддин Бухорийнинг кизи Бадиа мухаббати ҳамда халқ қаҳрамонлуклари ёркин бўёкларда тасвирланади.

© «Шарқ» нашриёт-матбаа акциядорлик компанияси
Бош таҳририяти, 2001 йил.

Биринчи кисм

I б о б.

СУИҚАСД

Рабиуссоний ойининг йигирма учинчи куни, Ҳиротда, жума намозидан чиқиб келаётган Шоҳруҳ Мирзога суиқасд қилинди. Ҳуруфийлар саркори — Фазлуллоҳ Астрободийнинг муридларидан бўлмиш Аҳмад Лур подшоҳга шахсан мурожаат этмоқ баҳонаси билан яқин бориб, пичоқ урди... Аҳмад Лур Жоме масжиди остонасида ушланиб, шу лаҳзанинг ўзида тилка-пора қилиб ташланди...¹

Бу хабар шу куниёқ Ҳирот ахлига маълум бўлиб, уч анчо — подшо чопарлари шитоб билан Самарқанд сари югурди. Уларнинг қўйнида Мирзонинг жароҳатлангани ва бошқа махфий маълумотлар ёзилган нома Улугбек Мирзога борарди. Яна уч анчо Машҳаду Нишопурга, яна уч анчо Балх билан Астрободга олдин-ма-кейин жўнатилди. Кўп ўтмай Хуросону Мовароуннаҳр Мирzonинг қаттиқ жароҳатланганигидан хабар топди. Аммо қўпларнинг хаёли дунёни ларзага солган темурийлар салтанатининг буюк тождорига қарши ўз ўлимини билгани ҳолда тиф кўтарган кимсада эди. Мана, бир неча йилдирки, пойтахт ҳам Ҳиротга кўчган, амирзодалар мирзо туғи остида.

Бундан етти йил аввал Ҳалаб шаҳрида Фазлуллоҳнинг маслакдоши — шоир Сайид Имодиддин Насимий ҳибс этилиб, оғир қийноқ билан қатл этилган эди. Яна ҳуруфийлар бош кўтариб, подшоҳга қарши суиқасд қилгани Ҳиротни ҳайратга солди...

Ҳирот шаҳри Кўҳисиёҳ тоги этакларига жойлаш-

¹ Абдураззок Самарқандий. «Матлаи саъдайн ва мажмаи баҳрайн».

ган. Кўхи сафеддан оқиб келган Херирўд дарёси ундан уч-тўрт чақирим пастдан оқиб ўтади. Дарвозаи Ирок яқинида Низомия мадрасаси, Бозори Қандаҳор ва шу атрофда усти берк ҳовузлар ҳам бор. Ҳиротдаги гўзал бинолардан бири Жоме масжидидир. Бу бино шаҳарнинг шарқ томонида. У ғурийлар хукмронлиги даврида, яъни XII—XIII асрларда барпо қилина бошлаган. Лекин бу бинонинг ҳақиқий санъат ёдгорлиги даражасига кўтарилиши Ҳурисон меъморлари — устод Қавом, устод Нажмиддин Бухорий ва кейинчалик Мир Алишер номи билан боғлиқдир. Навоий бу бинони тубдан қайта ишлатган, биринчи маротаба шарқ наққошлигига хос ранг-баранг нақшин гуллар билан безатган.

Ҳиротнинг диққатга сазовор жойларидан яна бири, Херирўдга қурилган Пули Молон бўлиб, унинг атрофидаги ерлар сайдроҳ эди. Бу ғиштин кўпприк ғоят кўхна. Ривоятларга қараганда, уни Бибинур исмли зоҳид аёл товуқ боқиб сотиб қурган экан... Шаҳар ташқарисида ҳам зиёратгоҳлар кўп. Улардан энг улуғи Гозургоҳ, Кўҳисиёҳга яқин ердаги бу манзилга шоир Анзорий дағн этилган. Шу ердан Ҳирот кафт устида тургандай кўринади.

Сункасад туфайли Ҳирот қамал қалъадек таҳлика ва қўркув ичидаги қолди. Барча дарвозалар беркитилиб, ҳамма ерда навкарлар ва сарой фидойилари ҳозир нозир турарди. Дарвоза фақат элчию анчоларга маҳсус руҳсатнома билан очилар, мансабдор шахслар амирзода Иброҳим Султоннинг руҳсати билан шаҳардан чиқа олишлари мумкин эди.

Шаҳар шимолидаги фалакка бўй чўзган миноралар ҳам, қуёш нурида кўк кошинлари яркираб турадиган Мусалло¹ ҳам хомуш ва хўмрайиб турарди. Кўк гумбазларни чарх уриб учадиган кабутарлар ҳам мадрасаларнинг ғиштин деворлари кавакларига кириб, пусиб ётгандай. Арк рўпарасидаги миноралар, ахра-

¹ М у с а л л о — мадрасалар ансамбли бўлиб, кейинчалик Гавхаршод бегим номи билан аталган. Бу бинолар (XV аср) меъмор Қавомиддин амалидир. 1885 йили уни инглизлар: майор Гольдиг ва Пикок динамит қўйиб портлатиб юборган.

ман девдек бўй чўзиб, ҳамма кўчаларга, растаю ра-
вокларга, карвон саройга, қуюқ кўланка ташлаб ту-
рувчи қалъя деворларига тикилиб турарди. Улар сал-
танатнинг бешафқат сарбозлари каби ҳаммани таъ-
қиб остига олган, ҳамма вақт очик, мовий гумбаз
бағридаги қўк гумбазчалар тепасида булутлар сузар
эди. Гумбазлар ҳамоҳанглиги йўқ — кўзлар гумбази,
Мусалло гумбази, миноралар гумбази, осмон гумбази
фоятда хомуш, улар бир-бирига қовоқ солиб турар,
каппонда, расталарда савдо-сотик давом этарди-ю, аммо
ортиқча бақириқлар, югуриб-елишлар, ёш-яланглар
тўдасидаги гурунглар йўқ, фақат навкару сипоҳилар-
дан чеккада кишилар бир-бирлари билан шивирла-
шиб, сунқасд ва ҳуруфийларга мансуб Аҳмад Лур
ҳақида гаплашишарди. Улар айғоқчилардан фоятда
кўркиб қолишган, сухбатга нотаниш кимса қўшили-
ши биланоқ ҳамма ўрнидан туриб кетар эди.

Шахарнинг Машҳад йўлида юракларга вахшат со-
либ Ихтиёриддин қалъаси қад кўтарган, бу ерга оғир
геноҳ қилганлар хибс этиларди. «Худо ҳеч кимни
бу ерга келтирмасин...» Бу сўз кексалар тилида «ло-
ховла...»дан кейин айтиладиган дуога ўхшаб қолган
эди. Хибс этилиб, Ихтиёриддин қалъасига ташлан-
ган одамнинг бу ердан қайтиб чиққанини ҳеч ким
билмайди.

Қалъага ҳамоҳанг яна бир кўрқинчли ном Ҳирот
аҳлига маълум. Бу ёш амирзода Иброҳим Султондир,
у қаттиққўллиги билан номдор эди. Аммо бари бир
сунқасдни ҳар ким ўзича ҳар хил талкин этарди.

Ширвонга бадарға қилинган ҳуруфиянинг асосчи-
ларидан Фазлуллоҳ Астрободийнинг «Жовадони ка-
бир» китобида фуқаро ҳуқуқи ҳақида бирмунча эр-
кин фикрлар айтилганини сарой аҳли, жумладан, аҳли
фузало билар, оддий фуқарога бу фикрлар «узун
кулок» орқали наридан-бери етиб борган эди.

Ҳуруфийларнинг акидасича, коинот абадул-абад,
илоҳий ибтидо одамда ўз аксини топган, инсон худо-
га ўхшаб яратилган. Коинот харакати, инсоният тари-
хий даври айланишидан иборат. Ҳар бир давр бошида
Одам Ато пайдо бўлиб, охирида қиёмат бўлади. Ило-
ҳий ибтидо пайғамбарликнинг, имоматликнинг илфор

кўришиниларида зохир бўлади... Улар, хар бир араб ҳарфига дунё гардишининг сўфиёна белгилари бор, ҳарфларда инсон юз тузилишининг илоҳий белгилари мавжуд, деб тушунадилар. Бу оқим ҳалқ ичида кенг тарқалади. Улар амирзода Мироншоҳни — дажжол, деб атайдилар. Кейинчалик, Сардрўд яқинида Жало-йир билан бўлган жангда Мироншоҳ ҳалок бўлганидан сўнг, хуруфийлар энди имом Маҳдий пайдо бўлиб, ер юзида адолатли давлат ўрнатади, дейдилар. Улар Маҳдий сардорлигида авом зулмга қарши қурол билан кўтарилимоғи лозимлигини уқтирадилар. Ҳиротда, кейинчалик хуруфийларнинг катта гурухи борлиги, бу гурух уларнинг ишларини давом эттираётганлиги, унга Фазлуллоҳнинг жияни — Ҳожа Аздулдин ва Мавлоно тариқ, Магмур, Ҳорун бўзчи ва яна бир қанча раиятпарвар ахли фузало алоқадор экани маълум бўлди. Шоҳруҳ салтанати кейинчалик шоир Амир Қосим Анварни ҳам хуруфийликда айблайди.

Аҳмад Лур, асли Луристон шаҳридан бўлиб, Ҳирот бозоридаги кичик бир тим ичида истиқомат қиласарди. У ўрта яшар, кишиларни таажжуғба солиб, устига доимо намат ёпиниб юрар, кичик бир ҳужра ичида зар дўппи тикиб тирикчилик қиласарди... Аҳмад Лур ҳақида мукаммал тафсилот наинки саройга, шу ҳафта ичида тилдан тилга ўтиб, бутун Ҳурисонга тарқалди.

Бу ҳодисалар саройда фавқулодда чора-тадбирлар кўришни такозо этди: жароҳатланган подшоҳ ёнида жарроҳ-табиблар билан гаплашиб турмок учинчى ўғли Мирзо Бойсункурга топширилди. Унинг қошида «салтанат кўрки» Гавҳаршод бегим ҳам бор эди. Амирзода Иброҳим Султонга мазкур суиқасдга алоқадор шахсларни тафтиш этиш, ҳибсга олиб, Ихтиёридин қальасига қамаш, жазолаш ишлари юклатилди. Кичик ўғиллари — Суюрготмиш билан Мұхаммад Жўкийлар Журжон вилоятидан дархол Ҳиротга чақириб олинди.

Бу — темурийзодаларга нисбатан биринчи суиқасд бўлиб, салтанатни титратиб юборган эди. Боги Зоғондаги хоналардан бирида жароҳатланган Шоҳруҳ ердан бир газ кўтарилиган ўрнида, тунда тўлғаниб ётарди. Жарроҳларнинг доруий бехуш бериб, жаро-

ҳатни тозалаб боғлагани, оғриқни тарқатадиган дорилар ичиришганига қарамай инграр, тепасида турган табибларни ҳам сезмасди. Атрофида олтин ва кумуш жомларда сув ва совун, юмшоқ оқ матолар, кон тўхтатадиган дори-дармонлар, куйдирилган латта, олтин косада мўмиё, жарроҳлик асбоблари турар, табиблар «Алқонун»ни варақлашар, шайхулислом ва Жоме масжиди имоми дамо-дам дуо ўқиб, дам урар эди.

Суиқасдга алоқадор ҳисобланиб, ҳибсга олингандар ичида машхур меъмор Нажмиддин Бухорийнинг ўғли Низомиддин ҳам бор эди. Бу хабар дарҳол Иброҳим Султон орқали шу куниёқ салтанатнинг «иффату кўрки, оқилаи замон» Гавҳаршод бегим қулогига етди. У ўғли Бойсунқур Мирзо билан гаплашиб, аввал дарғазаб бўлди, сўнг таассуф билдириди. «Не сабабдин шундок доно, бунинг устига салтанатга кўп хизматлари сингган, улуғ султоннинг инъому эҳсонларига сазовор бўлган устод Нажмиддин Бухорий фарзанди «бундок қабих ишга аралашди экан», деб ўйлади Гавҳаршод бегим. Шу лаҳза чукур хаёлга чўмиб, онаси қошида турган Бойсунқур Мирзонинг кўз олдидиа пойтахтда қад кўтараётган янги мадраса ва буюк Мусалло пайдо бўлди. Бу, Хуросон кўркини устод Қавом ва устод Бухорийлар қурган эдилар. Нажмиддиннинг асли ота-боболари Бухородан бўлиб, уруғлари Хурдаки — Бухорийларга бориб тақалади. Амир Темур сарбадорлар ҳаракатига барҳам берганидан кейин, бу ҳаракатга алоқадор одамлар ҳар томонга тарқаб кетган. Нажмиддин ҳам Хуросонга ана шу сабабга кўра келиб қолган эди. Сарой аъёнлари бу тарихдан яхши хабардор эдилар. Бойсунқур Мирзо шуларни кўнглидан кечирди. Унинг кўнглида шубҳа пайдо бўлди. «Нажмиддин Бухорий — ёстиқ остидаги чаён эмасмикан?» деб хаёл қилди ва буни онасига айтган эди, Гавҳаршод бегим ўғлига андек оғир бўлишни, чукур тафтиш, аниқ исбот бўлмагунча мўътабар кишиларга қаттиқ шубҳа билан қараб, таъқиб этмаслик лозимлигини уқтириди. Лекин энг ёмони шу бўлдикси, Мир Қосим Анварнинг ҳайдалиши, мавлоно Маъруф Хаттотнинг ҳибсга олиниши Жаъфар Табризий, Юсуф Андугоний, устод Қавом, устод Нажмиддин Бухорий-

лар юрагига ларза солди. Хаттотлар андуҳидан воқиф бўлган Бойсунқур Мирзо ўз оғаси Иброҳим Султон олдида хомуш бош эгди. Чунки бу «мавлоно»ларнинг барчасига у хомий, унинг паноҳидаги кишилар эканини яхши биларди. Шу сабабли бундан бир йил аввал Мирзога «девони олий амири» унвони берилган эди.

У отаси тепасида турган жарроҳу табибга кўз ташлаб, кейин ичкарига, ўз хонасиға кирди. Оғаси Мирзо Улуғбек Ҳўжа Юсуф Андугонийни сўратиб, одам юборганида форсий икки байт ёзиб, аччиқ ва кибор нома юборгани ҳам ёдига тушди. Бу гап Мирзо Улуғбекка ёқмаган эди...

Мъълумки, Улуғбек Мирзо Мовароуннаҳрда, Суюрготмиш Адоқда, хуллас, ҳар қайсиси ўзи ҳокимлик қилаётган ўлкада фан ва санъат, ободончилиги ишларига эътибор берардилар. Бойсунқур Мирзо ўз қобилияти, ўткир зеҳни, ишбилармонлиги билан биродарларидан ажралиб турарди. Кейинчалик Тус, Машҳад, Астрабод, Журжон вилоятларидан иборат мамлакатга отаси томонидан ҳоким этилиб тайинланди. Лекин у онаси Гавҳаршод бегим ёнидан жилмай, Ҳиротда яшарди...

...Жума куни ярим тунда меъмор Нажмиддин Бухорий ҳовлисига бостириб кирган қурол-яроғли навкарлар ухлаб ётган Низомиддинни турғизиб, дархол қўлларини орқасига боғлашди. Саросимада титраб турган меъморга салтанат буйруғи шундай эканини айтиб, Ихтиёридин қалъаси томон ҳайдаб кетишди. Кекса меъморнинг қалби тилка-пора бўлди. Эндиғина мўйлаби сабз урган, яқингинада Фарғона жангидан қайтиб келган Низомиддиннинг ранги девор бўлиб оқариб кетган эди. У саросима ичида дам отасига, дам онасига қаради; афсус, ичкари хонада, қозикда осиғлик турган дамашкий шамширини ҳам қўлга ололмади. Ҳа-хув дегунча навкарлар уни туртиб олиб чиқиб кетишди. Меъморнинг «Кўйиб юборинглар! Ўғлимнинг гунохи нима?!» — деб қилган илтижоларига ҳам эътибор беришмади. «Мен улуғ ҳазратга устингиздан арз қиласман!» деди ота сарпойчан, сипоҳлар йўлини тўсиб. «Биз, ўғлингизни салтанат номидан

ҳибсга олдик! Ҳар қанча арзингиз бўлса, амирзода ҳазратларига айтасиз!» — деди қилич яланғочлаган шоп мўйлабли сипоҳ. «Бу бир англашилмовчилик! — деди оstonада донг котиб қолган меъмор. — Низомиддин! Бу бир англашилмовчилик, эшитяпсанми, ўғлим, бу бир англашилмовчилик! Мен тонг отиши биланоқ ҳазрат ёнига бораман! Сенинг гунохинг йўқ! Бу бир англашилмовчилик эканини айтаман! Кўрқма, ўғлим...» — деди эшиккача оёқяланг чиқиб. Кейин яна сипоҳларга мурожаат қилди: «Уни уриб озор берманглар, унда гуноҳ йўқ, бу бир англашилмовчилик! Ахир мусулмон фарзандисизлар, унга озор берманглар! Мен тонг отиши биланоқ ҳазрат ёnlарига бораман!..»

«Миясини еган чол! Озор берма эмиш! — деди қилич яланғочлаган навкар. — Аввал ўғлингнинг кимлигини билиб ол! Агар билганингда валдиралас эдинг! Қани, юр тезроқ!» У қўли боғлиқ Низомиддиннинг елкасига туртди. «Отажон, хайр! Онажон, мени кечи-ринг, хайр!..» — деди орқасига қайрилиб Низомиддин. Тўс-тўполондан юраги чиқиб кетган синглиси Бадиа дам акасига, дам токчадаги ханжарга қаар эди. Акасининг «ханжарни олиб бер», деган ишорасини кутарди. Низомиддин ишора қилишга ҳам улгурмади. Бадиа ҳам унга яроғини лип этиб олиб беролмади... Хонадони горат этилган меъмор кийиниб, ҳозирнинг ўзидаёқ саройга бориб, арз қилмоқчи бўлди. Ҳазратга содик, умр бўйи сидқидилдан хизмат қилган бир меъморнинг хонадонига горат солиш — ёлғиз ўғлини хибсга олиш тўғрими!? Қани адолат? Ахир бу англашилмовчиликни келиб, отасидан сўраш, тафтиш қилиш лозим эмасмиди! Ухлаб ётган фарзандининг қўлларини боғлаб, хайдаб олиб кетиш... бу — зулмку! Бу ишлардан улуг беканинг хабарлари бормикан? Бойсункур Мирзонинг хабарлари-чи? Наҳотки улар ўз кишиларининг содик эканлигини била туриб, унга дахл қилишга розилик билдирилар? Қайси гуноҳим учун? Ёки бу икки амирзода ўртасидаги олишувми? Саройдаги икки шаҳзода олишувию ораларидаги фитна бутун бир мамлакат бошини ташвишдан чиқармайди, дедилар. Фитнанинг азобини фуқаро тортади.

Шундок бўлдимикан? Бойсунқур Мирзо билан Иброни Султон ораларида нифоқ бормикан? Подшохга қилинган суиқасд бу нифоқни яна ҳам авж олдириб юбормадимикан? Мавлоно Юсуф Андугонийнинг Сармарқандга, Мирзо Улугбек хузурига юборилмагани ҳам шунинг учун бўлса-я?..

Меъмор ҳовлида, анча маҳалгача қаққайиб туриб қолди. Унинг хаёлидан сарой амалдорлари, саркорлар ўта бошлади. Бу ишларга меъморнинг нима алоқаси бор? Ёш йигитчанинг қўлларини боғлаб олиб кетиш адолатданми?!

У хассасига суюнган ҳолда ҳовли ўртасида қаққайиб, очиқ қолган дарвозага тикилди. Оҳ-воҳ қилиб ўтирган хотини — Маъсума бекага ҳам эътибор бермасди. Бадиа бўлса нима қилишини билмай, ота-онасиға қараб жавдирар, отаси бирон нажотли гап айтадигандай, унинг оғзига тикилар эди. Агар у қаттиқ ухлаб қолмаганида, навкарларнинг кириб келаётганини билганида албатта ичкари хонадаги осиғлиқ қиличини унга тутқазиб, ўзи ханжар билан уларга ҳамла қиласди... Жуда бўлмаганда, акасини қочириб юборарди. Эҳ, аттанг!.. Ҳовли ўртасида қаққайиб турган Меъмор нихоят ҳушини йигиб олди, хозир яrim тунда Арк томон бориш у ёқда турсин, шаҳар кўчаларида юриш ҳам мушкул эканини ўйлади. У қайтиб хонага кирди. Дарвоза ланг очиқлигича қолди, атай ёпмади. Ҳассасини даҳлизга қўйиб, чакмонини қозиқа илди. Индамай ўз жойига келиб ўтирди. Боядан бери уни кузатиб турган Бадиа отаси ёнига келиб, чўкка тушди. Онасига тасалли берди, «Бир нима денг?! Нима маслаҳат берасиз?» дегандек отасига тикилди. Меъмор ўзини қўлга олиб, қизининг сочини силади:

— Сабр қилмоқдан ўзга чорамиз йўқ. Бу бир англашилмовчилик, ҳақ йўлига қарор топади. Худо хоҳласа, Низомиддин тонгда қайтиб келади. Эҳтимол, орага бирон шубҳа ёки чақув тушиб, ўғлимизни ҳисб этгандирлар. Тафтиш қиласидилар, сўрайдилар, ҳакиқатни билгач, бўшатиб юборадилар. Низомиддинда айб йўқ, у нима гуноҳ қилиши мумкин! Низомиддин ёмон йигит эмас, у ҳам худди ўзимдек салтанатимизга содиқ. Олий ҳазрат Амир Темур бинни Тарафай баҳодор

дирга, ундан кейин Мирзо Шохруҳ ҳазрати олийларига сидқидилдан хизмат қилаётган бир уста бўлсам, нечук менинг фарзандим салтанатга ғайр бўлсин?! Йўқ, бу ишда бир англашилмовчилик бор. Ҳакиқатни топадилар, Низомиддинни бўшатиб юборадилар.

— Худододбек билан оралари бузук, деб эшитган эдим, — деди Маъсума бека. — Ёки шу сабаб бўлдимикан?

— Худододбек ҳақида гапирмагин! У одобли йигит, ўғлингнинг дўсти! Иккиласми, у менинг қадрдомум устод Қавомнинг ўғли. Улардан ёмонлик чиқмайди. Қавом ҳазратлари ҳам дўстим, ҳам устозим... Йўқ, Худододбекдан ёмонлик чиқмайди! Ахир улар ёқалашган бўлсалар ёқалашишгандир, лекин ёқалашган йигитларни Ихтиёриддинга қамамайдилар. Тонг отиши билан мен биродарим Қавом ҳазратлари ёнига бораман, маслаҳат сўрайман. У зот ҳамма вакт менга кўмак берганлар, бу сафар ҳам кўмак берадилар. Устодни саройда қаттиқ эҳтиром қиладилар.

— Устод Қавом шу ерлик, бизнинг аслимиз Бухородан...

— Бадзабонсен! Бу гапни сен иккинчи бор оғзинга олма! Айб бўлади, — деди тутакиб Меъмор. — Хуросону Мовароуннаҳр бир туғ остидадирки, биз ҳаммамиз улуғ ҳазратга хизмат қиласми. Биз, меъмору муҳандислар дилида бундок андиша ҳеч қачон бўлмаган. Хусусан, устод Қавомнинг диллари бундок андишадан олис.

Маъсума бека индамай қолди.

— Аммо, Фазлуллоҳ қишиларининг анча вакт ўтиб кетганига қарамай кек сақлаб, бундок саъй ишларга ружу қилмоғи салтанатни дарғазаб қилмай иложи йўқ. Ишқилиб, худойи таоло улуғ султонни ўз паноҳида асрасин, тезроқ жароҳат битиб, ёстиқдан бош кўтарсунлар. Ана ундан сўнг яна осойишталик келиб, дилгирлик кетади. Бобомиз Хурдаки — Бухорийга алоқадор бўлганининг бизга дахли йўқ. Буни мен ўз хизмату садоқатим билан исботлаганман. Буни наинки устод Қавом, ҳамма билади...

То товонигача тушадиган узун ғалабия қўйлак кийиб, отасининг пинжидаги Бадиа хозироқ ака-

сининг кийимларини кийиб, Катвон дашти маҳорабасида эркаклар либосида жанг қилган баҳодир қиз бўлғуси келарди. Қани энди у акасининг ўткир исфиҳонини яланғоч ушлаб, уни олиб кетган, отасига шунча ситам бераётган фанимлар бўйнига қилич солса! Энди у ҳам ёш эмас — ўн олтидан ўн еттига ўтмокда...

У қаноти синган отасига қанот бўлғуси келарди; нега у ҳам ўғил бўлиб туғилмади?

Бадиа бир лаҳза хонадонини ғамхонага айлантириб кетган навкарлардан ғазабланиб, мислсиз ташвишга ғарқ бўлган ота-онасига раҳми келиб ўтираркан, хонага тўшалган гилам устида лойли этиклардан қолган изларга кўзи тушди. Подшо одамлари акасини турткилаб, дўқ уриб, қўлларини боғлагани хаёлида жонланди. У берашм кимсалар инсон билан эмас, худди ҳайвон билан муомала қилаётгандек, акасининг қўлларини бураб боғлашди.

Отаси, онаси олдида саросимага тушиб қолган Низомиддин уларга қаршилик кўрсатишни ҳам, кўрсатмасликни ҳам билмай, факат отасига қараб жавдираб туради. Отадан садо чиқмагач, у индамай туриб берди, бўғизланадиган қўйнинг оёқларини боғлагандек, унинг ҳам қўлларини орқага чандиб боғладилар. Даҳлизда, ланг очилиб қолган кўча эшикка қараб йиғлаб ўтирган Маъсума бека кафтларини очиб, тангрига мурожаат этарди: «Э худованди карим, мушкулимни осон қил! Боламни ўз паноҳингда асра, қолган умримни уқубатга ташлама!»

Бадиа ўрнидан туриб, кўча эшигини ёпиб келмокчи бўлди. Отаси қайтарди:

— Чиқма, қизим! Очик қолса қолсин. Юрагимизни узиб кетищди, яна нимамизни олишарди. Одатда ҳибсга олишганда эшик олдида анча вақтгача айғоқчилар юради... Чиқма, қизим! Ақлим бовар қilmайди, тавба у нима гуноҳ қилиши мумкин? Бу, шубҳасиз, англашилмовчилик бўлиши керак.

Бадиа нам кўзларини отасига тикиди. Акасининг қаршилик кўрсатмагани, жуда бўлмаганда ўзининг унга қилич ёки ханжар узатиб юборолмаганига ич-ичида пушаймон еди. Бир одамни шундок кўз олдиларида қўйдек боғлаб олиб кетсалар-у, у қаршилик кўрсатол-

маса! Акаси бундок одам эмас эди-ку! У жуда жангири, осонликча бўй бермайдиган, кўркмас, дадил эди-ку! Нега у бўшашиб, итоаткор бўлиб қолди? Ёки отонаси олдида улар билан қиличбозлиқ қилишни лозим топмадими? Ҳарқалай, акасининг қаршилик кўреатмай, уларнинг олдиларига тушиб кетгани Бадиага алам қилди.

Узун кўйлаги яшириб турган қадди-қомати, кўзлардаги фусуну лаблардаги латофат ногихоний ҳасрат никобига ўралди, унинг қалдирғоч қошлари, кўзларидаги чақин, юононларга ўхшаш оқ юзу лаблардаги доимий табассум йўқ. У отаси билан онасининг ҳасратига шерик бўлиб, юлдузлар чақнаган қора тунда мунгли ўтирибди. Бу соҳибжамол киз олдида от ўйнатиб баҳодирлигини намойиш қиласидиган Худододбеклар қани? «Марду олижаноб»лигини намойиш қиласидиган бу йигит, унинг ёлғиз акаси ҳибс этилганини билган бўлса, нечун жим? Отаси баъзан хуфия айтганидек, «ҳукмдорлар бир аждадир-ки, яқин юрмоқ ғоятда хавфли...» Устод Қавомнинг ўғли Худододбекдан кўра ҳам кўпроқ ўз дикқатини тортиб юрадиган кўркам Бойсунқур Мирзо бу лаҳза унинг кўзларига аждар, Иброҳим Султон эса, икки елкасидан икки илон ўсиб чиққан Захҳокка ўхшаб кўриниб кетди.

Шаҳар жанубида — баландлик устида қад кўтариб турган қалъяю Арк, шимол қисмидаги Мусаллою миноралар кўрқинчли бир қора тоқقا ўхшаб, Бадианинг юрагига вахшат соларди. Унинг ҳажрида куйиб юрган Худододбек ҳам назарида совуқ бир нарсага айланди. Худододбекнинг ох-воҳларининг миси чиққандай бўлди. Устод Қавом, гарчи отасининг яқин ошнаси бўлса ҳам бу икки донгдор меъмор ўртасида азалий бир яширин рашку ҳасад мавжуд, Маъсума бека ҳам бу тўғрида илгари бир неча бор шама қилган бўлса ҳам, Бадиа бунга ортиқча эътибор бермасди. Энди мана бу воқеалар уни чуқур ўйларга толдирди.

Дарҳақиқат, бир қарашда иноқ, дўсара кўринган Қавомнинг мижозида шуҳратпарастлик унсурлари йўқ эмасди. У бу борада ҳар қандай яқин ошнасининг

ҳам юзига чанг солишдан тоймасди. Аммо устод Қавом ўзининг мислсиз ва узоқ йиллик меҳнату санъати билан Хурсонда донг таратган. Уни Самарқанду Бухоро, Машхаду Табриз усталаригача яхши билишар, Бибихонимга монанд бўлсин, деб қурилган Гавхаршодбеким мадрасаси бу томони Ҳиндистон, бу томони Бағдодгача машхур эди. Лекин ундаги шуҳрат-парастлик, тамаъ олдида подшоҳларга тиз чўкишдан ҳам, ўзгалар манфаатини босиб-янчиди ўтишдан ҳам қайтмаслигини кўпчилик биларди. Шу туфайли яқин ошналари уни: «Ўстод Қавом меъморлар меъмори эмас, подшоҳлар меъмори» дейишарди киноя билан. У асли ҳиротлик бўлгани сабабли, ўз ҳамشاҳарларини сувр, Бухорий, Андугоний, Самарқандийларга унча йўл бермасди. Меъморчилик санъатига алоқаси йўқ, доимо устод Қавом билан устод Бухорий орасини бузиб юрган «юмшоқ супурги» Аҳмад Чалабийни эса қўллаб-қувватларди. Устод Қавомнинг бу феълини сафдошлиари билсалар ҳам билмаганликка, ўзларини унинг феъли ожизлигини сезмаганликка олишарди. Ахир бундай «дард»га мавлоно Шарафиддин Али Яздий ҳам дучор эдилар-ку! Баъзан мавлоноларнинг ўзини билган кимса қилмайдиган номақбул қиликлари бўлади; бу қилиқ ойдаги доғга ўхшайди. Шу доғ туфайли кишилар ойдан қечмайдилар-ку! Денгиз устидаги чўпу қўпикларни эмас, унинг чукур бағридаги дурру жавоҳирни кўра билганлар устод Қавом, устод Бухорийлар қадрига ета олади! Лекин, бари бир, Нажмиддин ва Юсуф Андугонийлар хонадонида устод Қавомнинг «ўлармонлиги», «беш қўлини баробар оғизига тикиши...» ҳақида турли гаплар юради. Бу гаплардан фарзандлар ҳам воқиф эдилар. Бадианинг кўз олдида отасининг шаън-шавкати билан масрур, доимо қамчиндек шай юрадиган, хиндиларга ўхшаш корамағиз Худододбек билан келишган, салласи тепасига жиға тақиб юрадиган Бойсунқур Мирзо келди. Уларга неғадир нажот кўзи билан қаради — наҳотки амирзода, қолаверса, Худодбекнинг отаси — устод Қавом бу ишга аралашмай, унинг отасини бу кулфатда ёлғиз қолдирсалар? Бундай бўлиши асло мумкин эмас! Акаси Низомиддин, эҳтимол, бебошлиқ қилгандир, ёқалаш-

гандир... Эҳтимол, бирон мансабдорни сўккандир, эҳти-
мол... эҳтимол... Бунинг учун Ихтиёриддинга олиб
кетмоқлари шартми?! Бу ишда, дарҳақиқат, ё хусу-
мат ё англашилмовчилик бор! Иккиламчи, Низомид-
диннинг исмини Қавом ҳазратлари қўйғанлари, Бадиа-
ни келин қиласан, деб тилларидан бол томиб гапир-
ғанлари ҳаммага маълум-ку! Шу туфайли унинг отаси
ўзининг яхши шогирдларидан бири бўлмиш Зулфи-
қор Шошийдан шубҳаланиб, уни Бухорога жўнатиб
юборган эди.

Зулфиқорни аввал шогирдим, хунаримнинг тира-
ги, фарзандимдан аъло йигит, деб юрган Меъмор, ўз
кизига мойиллигини сезиб, Ҳиротдан узоқлаштириди.
Бу ҳакда вақтида хабар бермаган иккинчи шогирди
Заврак Нишопурийдан ҳам қаттиқ хафа бўлди. Унинг
нияти устод Қавом билан қуда бўлиш, икки меъмор
«Гавҳаршод бегим» Мусаллосидек абадул-абад ёнма-
ён туриш эди. Гарчи Ҳудододбек билан Низомиддин
толиби илм бўлмасалар, мухандису меъморчиликка
иштиёқ қўймаган бўлсалар ҳам, ҳарқалай, ўзларига
мос бир хизмат топурлар, деб ўйларди. Аммо Зулфи-
қор Шошийнинг ғайрату иқтидорига дилидан қойил
қоларди. Мана, илму қобилият! Устод уни отасига
яхши сўзлар билан номалар ёзиб, яхши саруполар
кийгизиб, сарбонга тайинлаб... жўнатган эди.

Зулфиқор Шоший эса, бу хонадондан асло кет-
гуси йўқ эди. У ҳатто Ҳиротда қолиб, бошқа бир
ерда истиқомат қилса ҳам, устоднинг қўлида хиз-
мат этишни истарди. Наинки ғишт териш, марди-
корликка ҳам тайёр эди. Аммо меъмор хонадони-
нинг ўз ҳатти-ҳаракатидан воқиф бўлиб қолганини
сезиб, хижолат тортди ва жуда баланд дорга осил-
ганини пайқади.

Зулфиқорнинг Бухорога жўнаши ҳақидаги «ҳукм»
устод Қавом берган катта зиёфат куни чиқарилган
эди...

Бу гапларнинг бари Бадианинг хәёлидан ўтди. Ба-
дия назарида бирдан жарликка тушиб кетганга ўхшаб,
юраги орқага тортиб кетди. Бирваракайига шунча
алам — отасининг тираги, ёлғиз акасининг қўллари
боғланиб, олиб чиқиб кетилиши... Қандай оғир! Бу

фожиа катта кемага тушган дарзга ўхшарди. Ишқилиб бу «дарз» тезда беркитилсин, кема фарқ бўлмасин, дерди ўзи Бадиа.

II б о б

МЕЪМОР НАЖМИДДИН БУХОРИЙ КЎТАРГАН ҚАЙФУ-АЛАМНИ ФИЛ КЎТАРСА, БЕЛИ СИНАРДИ

Бадианинг хаёлинни бир лаҳза ўша, Хўжа Юсуф Андугоний келган базм ишғол қилди... Киши баъзан шундай оғир дақиқаларда ҳам рўшнолик кунларини эслайди — бу билан юрак гурбат эмас, шодлик учун яратилганини исбот қилмоқчи бўлади. Бу ҳол — қор қўйнида бош кўтариб турган чечакка ўхшайди! Бегуноҳ Зулфиқор Шошийнинг ногихоний жўнатилиши ёмон бўлди. Ахир у бу даргоҳдан ноилож чиқиб кетган эди. Низомиддиннинг ҳисбсга олиниши ҳам ногихоний бўлди. Бадиа ўй сурар, хаёлларининг поёни йўқ эди... Уни кўргандада эс-хушини йўқотиб қўядиган Зулфиқор ҳам бу ердан жўнаб кетди — дунёнинг иши доимо шундай тасодифларга тўла экан-да! Бадианинг кўз олдига яна Зулфиқор келди, бу йигит Худододбек каби пурвиқор, амирзода каби кўркам эмас, у этик кийиб, бошидаги бухороча дўппини салла билан ўраб оларди. У аслида отасининг билағон ва уддабуро шогирди, бухоролик уста Нусратнинг ўғли бўлишига қарамай, Низомиддинга асло иш қўймас, устод хонадонидаги ҳамма ишларни ўзи бажаарди. Меъмор баъзан менинг тўрт ўғлим бор, бири Низомиддин, бири — Заврак Нишопурый, бири — Зулфиқор Шоший ва бири — Фаввос Мухаммад Ҳирий, дерди. Бирваракайига бу тўрт ўғилнинг иккисидан жудо бўлиши Меъморни оғир бир ҳолга тушириб қўйганини Бадиа яхши сезиб туарди. Зулфиқор Шошийнинг «гуноҳи» маълум... аммо Низомиддиннинг гуноҳини билишмай тун бўйи қовурилишди. Бадиа ҳам, Масъума бекаю Меъмор ҳам эрта билан тўппа-тўғри Бойсункур Мирзо ёнига бориб, бўлган ҳодисаларни батафсил айтишгач,

у олижаноблик кўрсатиб, Низомиддинни кутқариб беришидан умидвор бўлишарди. Меъмор бу англашилмовчиликнинг дарҳол олдини олажагига ишонарди. Наинки, амирзода, бу ишни устод Қавомнинг бир оғиз сўзи билан ҳам тўғриламоқ мумкин, деб ўйларди у. Бадиа ҳам шундоқ бўлишига асло шубҳа қилмасди. Жасур Худододбек ҳам бу ишга аралашади, бу тантинигит ўз ўртоги Низомиддиннинг зинданда ётишига асло йўл қўймайди, деб ҳисобларди у.

Тонг отди.

Тонг отиши ниҳоятда кийин бўлди. Меъмор Нажмиддин умрида бунчалик отиши мушкул бўлган тонгни биринчи маротаба кўриши. У азонгача худога ёлвориб, ичдан йиғлади, тунда янги қурилаётган мадрасаси атрофини айланди, юлдузлар чаманида унга тикилди, гумбаз тепасига келган янги ойнинг ўроғига бефарқ қаради. Булар, назарида, тошдай қотиб қолганга ўхшарди. Ҳозир унинг кўнглига чирок ёқса ёри мас эди. Тонг отиши билан нонушта ҳам қилмай, зинфиллаганича Аркнинг баланд деворлари ёнидан ўтиб Мусаллога, ундан ўтиб, янги қурилаётган мадраса ёнига келди. Баравқт келиб, ганчхок қораётган шогирди Заврак Нишопурнийга юзланди. Устодни бунчалик баравқт кўрган Заврак таажжубланиб, қўли кўксида, салом берди. Бу йигит ҳам дўсти Зулфиқор Бухорога жўнатилган кундан буён қўли ишга бормай юрар, бир нимасини йўқотган одамдек хомуш эди-ю, азбаройи устодга эътиқоди бениҳоя бўлгани туфайли буни билдирамасликка интиларди. У, Нишопурга жўнаб кетишни ҳам хаёл қилди, андиша бунга йўл бермади. Заврак Меъмор юзидағи ғайри одатий бир ҳолни кўриб, қўлидаги белкуракни ерга қўйди. Яқинроқ борди. Меъмор учун бу ерда ишлаётганлар ичida Зулфиқору Заврак, Favvos Мұхаммаддан яқинроқ одам йўқ эди. Шу сабабли, унга Низомиддинни тунда кўлларини боғлаб олиб чиқиб кетишганию ҳозир ўзининг устод Қавом, ундан сўнг амирзода ёнига арз билан боражагини бир йўла гапирди. Бу хабарини эшитган Заврак юракдан куйиб кетди. У кейинги пайтда бошқа ошнасиникнда ётиб юрарди. У бирон гап ҳам айттолмади. У бир нимадан кўркса ёки таъсирланиб

кетса, гапиролмай ғўлдираб қоларди. Меъмор Завракдан корфармо Аҳмад Чалабийга ҳам бу гапни маълум қилишини, ўзининг бунда келолмаслигини, эвини топса, Аркка кириб чиқажагини айтди, кеча хумдондан келтирилган оби фиштларга ҳам қайрилиб қарамади. У одатда фиштлардан бирини қўлга олиб, у ёқ-бу ёғига қарап, чертиб ҳам кўрар, «ганчни эҳтиёт қилиб, оз-оз қоринг», — дер эди. Бу гаплар ҳам йўқ. «Равокқа фишт қўйилаётгани сабабли ганчнинг микдори ҳокка нисбатан оширилсин», — деб қўрсатма ҳам берарди. Бу гаплар ҳам йўқ. Факат «Фаввос Мухаммадга айтинг, кошинларни олиб келиш пайти етди. Кулол Абутолиб билан Васиятиддинларга ложувард хоки, кўргошин, гилвата, лух етказиб бермоқлик керак», деди. «Ҳамма айтганларингизни қиласмиш, устод», —деди Заврак Нишопурый. Меъмор бу ерда кўп турмай, устод Қавом ҳовлисига йўл олди.

Нажмиддин Бухорий олтмиш ёшлардан ошган, паст бўйли, елкалари кенг, серҳаракат одам. Тақа мўйлаб ва иягини қоплаган катта қўнғир соқоли япаски даҳанининг кенглиги юзини кулчага ўхшатиб қўрсатарди. Устод Қавом бунинг акси — чўқки соқол, иягининг торлиги, бошининг катталиги, қирра бурун ва новчалиги билан икки кекса меъмор бир-бирига ўхшамас, уларни сиртдан қараб, дарҳол ажратиб олиш осон эди. Нажмиддин Бухорийнинг чатма қошлари қуюқ, ёноқлари андак мўгулларга ўхшаб бўртиб чиққанига қарамай, асли бухоролик, туркий «юз» уругидан бўлиб, ёшлигига оз вақт Сариосиёнинг Бойбўри, Суфиён, Тоқчиён мавзуларида яшаган. Кейинчалик, замонанинг зайди билан Хурсонга келиб қолган. Бухоро мадрасаларидан бирида таҳсил кўрган, риёзиёт — ҳандаса илмига зехни ўткир, муллаваччалар орасида энг тиришқоқ, баҳс, мутолаани яхши кўриш одати ҳамон, қирқ йил орадан ўтиб кетганига қарамай, хозир ҳам ўз кўринишларини намойиш этарди. Баъзан ўз хонасида, қўлда қамиш — қалам, чуқур хаёлга чўмар. Бу пайтда у қалам орқасини бир чеккадан беихтиёр чайнай бошлар; хонтахта устига ёзиғлик қофозлар, ҳандасавий ўлчов ва рақамлар, кора лас билан чизилган бениҳоя кўп лойиҳа чизиқлари, учбурчаклар ту-

рарди... Баъзан у узундан-узоқ ҳандасавий хисобларни қофозга ёзиб қолар, яна ўйчанлик ва қамишқалам орқасини ғажий бошларди. Унинг чизгичу паргар ва бошқа ассоблари кўп йиллардан бўён тутилар, аммо қамиш-қалам чидамас, тез-тез бозордан ўн-ўн бештаб лаб олиб келиб қўйиларди. Баъзан у кун бўйи хонасидан чиқмай тахта қофоздаги чизиклар устида ўйлар, чизмаларнинг кам-кўстини тузатиш билан кунни кеч қиласарди. Бундок пайтларда унинг ёнига на Бадиа ва на Низомиддин кира олади, фақат зехни ўткир Зулфикор билан Заврак бир нимани баҳона қилиб кириб, ёнида қолиб кетишарди. Олиб кирилган чой ҳам со-виб қолар, аллақандай ўлчовлар — учбурчаклар хаёлини тортиб кетарди. Қофоз устидаги рақамлар одам киёфасига кириб, улар билан гаплашар, тахта қофоз устида уларни юргазар, кўпайтирас ва баъзи рақамлар устидан чизик тортиб ташлар эди.

Шундок илму амалиёт билан кунлари ўтиб турган Меъмор бошига улкан ташвиш тушиб, ўғлиниг ҳибс этилиши ҳаммасини бир томонга улоқтириб ташлади. У қофоздаги ғалат чизикларни эмас, унинг ўзини қандайдир бир куч «ғалат» хисоблаб, ўчириб ташлаёт-гандай бўларди.

Меъмор кўча четидан шошилиб бораарди. Ҳеч қачон унинг ҳовлиққанини кўрмаган кишилар бунчалик ошиқиб бораётганидан таажжубланишар, бир лаҳза тўхтаб, унга бокишарди. Лекин устод буни сезмас, ҳеч кимга қарамай, яқин дўстиникига ошиқар эди. У тезроқ етиб бориш мақсадида тўғри бозорни кесиб ўтди. Эрта биланоқ бозор гавжум — Самарқанддаги катта бозорга ўхшатиб, Ҳиротда ҳам Бозори малик барпо этилган эди. Самарқанддаги улкан бозорнинг бир бошидан кириб иккинчи бошидан чиқиб бўлмайди. Уни яхшилаб айланиб чиқмок учун кишига бир неча кун керак бўлади. Пишиқ фиштдан кўркам қилиб ишланган дўконлар олдида харидору дам олувчилар учун оқ мармар тошлардан курсилар қўйилган. Ошхона ва чойхоналар харидорларга мунтазам хизмат қилиб турарди. Дўконлар икки қаватли бўлиб, уларнинг тепаси бутун кўча юза гумбаз қилиб қопланган, ёруғлик тушиб туриши учун гумбаз саҳнида деразасимон пан-

жарали туйнуклар қўйилган. Бозор ичи шунчалик озода ва кўркамки, тоғдан йўндириб келиниб ётқизилган тошлар кўчаю бозор саҳнини лой-чангдан асрар, пишган фиштдан ишланган ариқлар ҳар қанча сувларни махсус қувурлар орқали ўтказиб турарди. Шунинг учун ҳам бозорга келган кишининг кавушига заррача бўлса ҳам гард юқмасди... Тоқилар остидаги дўконларнинг токчаларига уюлган ҳарир моллар, турли туман рангдаги шойи, атлас, ҳаво ранг бахмал, зарбоф кимхоб ва бошқа ранго-ранг баззозлик моллари бу ерга келганларнинг кўзини ўйнатади... Бозордан дунёдаги энг асл, камёб моллардан тортиб, истаган ҳамма нарсани харид қилиш мумкин эди...

Меъмор Бухорий билан устод Қавом учрашуви файри одатий бўлди; Худододбек дарвоза олдида Меъморни кўриши билан дарҳол ўнг қўли кўксисда салом бериб, ичкарига таклиф этди. Отасининг қадрдони, Ҳиротнинг мўътабар зотларидан бири, Бадианинг отасини ўз эшигида кўриш ринд табиатли йигитни довдиратиб қўйди. У «мўътабар зот»ни бошлаб, меҳмонхонага олиб керди. Меъмор кенг ва кўркам хонага кириши билан андек ўзини қўлга олиб, фотиҳадан сўнг, Худододбекка мурожаат этди:

— Бевакт келганим учун узр. Мухим бир иш устод билан гаплашишни тақозо қилди...

— Ҳечқиси йўқ. Мен ҳозир отамни чакириб чиқаман, — у дик этиб ўрнидан туриб, ичкари ҳовлига кириб кетди.

Бир муддатдан сўнг сарпойчан, елкасига чопон ташлаб олган устод Қавом қўлида тасбеҳ, меҳмонхонага ҳайратомуз кириб, меъмор Бухорий билан қўлсиқишиб омонлашди. Меҳмонни юқорига ўтқазиб, дарҳол ўғлига дастурхон ёзишни буюрди. Худододбек яна илдамлик билан қайтиб чиқиб кетди. Фотиҳадан сўнг, устод Қавом дўстига бокди.

— Хуш келибсиз! — ҳамкасб ошнасининг бевакт келгани уни ўйлатиб турарди.

— Хушвакт бўлинг, — деди меъмор Бухорий андухли бир чехра билан уҳ тортиб. Бу енгилгина уҳ тортиш остида жуда ҳам оғир бир алам борлигини устод Қавом дарҳол сезди. Мадраса қурилишида бир

ишкаллик чиқдимикан, деб хаёл қилди у. Ёки маблағ сарфланиб бўлдимикан? Мухандиснинг хатоси баъзан «гулдаста» билан равоқ оралиғида сезилиб қоларди. Пойdevор ғалат қўйилганмикан?. Устод Қавом хаёлидан бир лаҳзада қанча гаплар ўтди. У қадрдон ошнаси, Мусалло ва бошқа иншоотлар курилишида ўзининг билимдон, донолиги ва ғоятда самимийлиги билан унга кўмаклашган, хизмату эътибори, билими жиҳатидан баробар бўлишига қарамай, доимо ошнасини улуғлаб келган, асли бухоролик дўстига қўлидан келган ҳамма ёрдамни кўрсатишга ҳозир турар эди. Нажмиддин Бухорий бир зумлик сукутдан кейин бош кўтарди:

— Устод! Бошимга кулфат тушди. Тунда ўғлим Низомиддинни Ихтиёриддин қалъасига олиб кетдилар...

— Нечун? — устод ҳайратланиб сўради. — Ихтиёриддинга, дедингизми?! — бу савонни берди-ю, яна ўзи бирдан жим бўлиб қолди. Хуруфия тўдасига мансуб бўлган Аҳмад Лур подшога сунқасд қилган, хуруфийларни тутиб, Ихтиёриддинга ҳибс этилаётгани устодга маълум эди. Демак, Низомиддин бу «ниҳоятда хавфли тўда»га мансуб, улуғ ҳазрат жонига қасд қилганлар орасида бор... Иккиласмчи, сарбадорлардан кўра ҳам, ҳозирги пайтда хавфли бўлган хуруфийлар подшоҳ салтанатининг ичидаги асосий душмани ҳисобланарди.

— Сабаби менга қоронғу... — деди Нажмиддин Бухорий дўстининг юзларига тикилиб. У дўстидан қандайдир нажот сўрагандек бўларди. Устод Қавомнинг бир оғиз сўзини Бойсунқур Мирзо хеч қачон ерда қолдирмаслигини биларди.

— Ёмон иш бўлиби, — деди устод Қавом масалага бир қадар тушуниб. У бухоролик ошнасининг отаси Хурдаки Бухорийларга алоқадор бўлиб, боши кетганини ҳам эшитган эди. Шундай мўътабар зотнинг фарзанди ҳам салтанатга қарши бўлгани, нобакор чиққанига афсусланди. «Нима етмайди? Шундок баобру Меъморнинг фарзанди, ҳамма нарса етарлик бўлса. Бу хуруфийлар йўқолиб-йифиб кетган сарбадорларнинг илдизлариdir, бадкирдорликка ўтиб, ёмон

ишларга ружу қилмоқдалар», деди ичида ўзи устод Қавом. Кейин у бир лаҳзалик жимлиқдан сўнг дўстига қаради: — Устод! Худонинг ўзи мушкулини осон қилсан! Мушкули осон бўлса, ўғлингиз тез кунда озод бўлиб чиқади...

— Бир англашилмовчилик бўлганга ўхшайди, — деди Меъмор Бухорий ич-ичидан куйиб. — Нима гуноҳ қилиби-ки, уни Ихтиёриддинга олиб кетадилар! Ахир бу ерга салтанат душманлари, бадтарин кимсалар, ғоятда хавфли шахслар ташланар эди-ку! Бошим қотиб қолди.

— Худога ёлворинг, Меъмор, худо нажот берса ҳеч гап эмас, ўғлингиз кутулиб чиқади. Тафтиш қилишар, агар англашлмовчилик содир бўлган чорда, уни дарҳол бўшатиб юборадилар. Бундай воқеалар бўлган, эшитганман. Ҳа, худога ёлворинг, оллодан ўзга паноҳимиз йўқ.

— Мирзо билан гаплашиб, агар гуноҳи бўлса сўраб олиб берурсизми, деб келган эдим.

— Мумкин. Аммо бизга ҳали Низомиддиннинг айби нима эканлиги номаълум-ку? Ёки сиз жанобга маълумми?

— Билмаймен.

— Бирон шубҳангиз борми?

— Йўқ, устод. Ҳеч нарсадан шубҳам йўқ.

— Унда сабр қилмоқ даркор. Факат сабр!

Шу дам Худододбек хонага дастурхон олиб кирди. У чўкка тушиб ўтириб, меҳмонга ва отасига хушбўй хинд чойи узатди. Устод Қавом нон ушатиб, дўстига марҳамат қилиб, дастурхондаги ширинликлардан олишга таклиф қилди. Меъморда иштаҳа йўқ эди; у пиёладаги чойдан хўплаб, унинг кўмагини сўрагандек устодга тикилди. Устод Қавом бўлса, бу ишнинг таги ёмонлигини, ҳатто амирзода ИброХим Султоннинг Ҳиротда қаттиқ алғов-далғов қилаётгани, салтанат душманлари ёки бу ишда шубҳаланилган кимсаларга нисбатан қаттиқ жазо берилётганини биларди. Қаҳри қаттиқ бу амирзода ахли нафосатни унча хуш кўрмаслиги, унинг наздида салтанатни беобрў қиласиган гаплар шу фузалою шуародан чиқажагини билиб, баъзида укаси Бойсункур

Мирзога ҳам кулок солмасди. Бобом Мағриб билан Машриқни, Хинду Чинни шамширу маърифат ила мусаххар қилғон, дерди у.

Амирзоданинг феъли устод Қавомга маълум. Шу лаҳза устод юрагига гулғула тушиб, ўрнидан турдиди, ўғлини ташқарига чақириб қулогига охиста шивирлади: «Кўчага чиқиб, у ёқ-бу ёқларга кўз ташла, Меъмор жаноблари изидан айғоқчи тушмаганмикан? Тунда Бухорийнинг ўғлини тутиб олиб кетибдилар. Агар унинг орқасидан айғоқчилар қўйилган бўлса, бизнинг ҳовлига келгани шубҳага сабаб бўлади...» Худододбек ташқарига чиқди. Хона ичига қайтиб кирган устод Қавом Нажмиддин Бухорийни яна дастурхонга таклиф қилди-да, чой узатди. Унга «Фақат худога ёлворинг, сабр килинг...»дан бўлак гапи бўлмагач ва озгина чўчиётганини сезгач, Меъмор ортиқ бунда турмай, ўрнидан кўзғалди.

Устод Қавом ҳам шуни истаб турган эди.

— У ёқ-бу ёққа қарадингизми? — деди у олазарак бўлиб, — бу ёққа келишда мабодо орқангизда айғоқчи бўлмадимикан? Ҳозир «сув илонлар» кўпайиб кетган...

— Устод, мен шу нарсага эътибор бермабмен. Сувга тушган одам сувдан сесканмайди. Айғоқчи қўядиларми, қўймайдиларми, менга бари бир, — деди Меъмор даҳлизда кавушкини кия туриб.

У дўсти билан хайрлашиб кўчага чиқди. Устод Қавом ошнаси кетидан ташқарига чиқмай, ҳовлида қолди. Ўзини одамларга кўрсатгиси келмади. Йўлда кетаётган Бухорий: «Мен-ку алам сувига тушган ким-самен, ҳеч нарсадан қўркмаймен, ошнам нега қўрқар экан? Тавба, — деди ўзига ўзи. — Бировнинг дарди билан бировнинг не иши бор? Нарироқ борганида Худододбек билан ҳам қамти келиб қолди, бек у ёқ-бу ёққа аланглаб, одамларга қараб юради. Нажмиддин Бухорий унинг нима қилиб юрганини пайқади. У харсангтош ётқизилган айланма кўчалардан борар экан, кўнглида бир нидо бор эди: «Менинг тинчгина ишлашимга имконият бермайтилар! Мен ишламоқчимен! Мен Хурсонга кўрк бўладиган яна бир мадраса қуриб бермоқчимен. Унда хурсонликларнинг

фарзандлари илм олади. Мен бу бинони абадул-абад турадиган қилиб қурмоқчимен. Менга на акчаю на инъом керак! Мен уни раият учун қурмокдамен. На хотки менга тинчлик бермасалар?! Ахир асиру қулларга ҳам ишлаш имконияти берадилар-у, нечун менга йўқ! Эй, тангрим, ёлғиз ўзингга сифинаман; меҳнат қилмоғим учун тинчлигу ҳаловат бер! Фарзандимни бағримга қайтар, алам оташида бағримни ёндирма! Дўстга хор, номардга муҳтоҷ қилма мени!».

III б о б

ТАЪКИБ

Меъмор тор қўчалардан ўтиб, Пули Молонга чиқди: Ҳериёрд дарёси устига қурилган бу баланд фиштин кўпrik устида бир нафас тўхтаб, Арк томонга тикилди. Баландликдаги Ихтиёридин қалъасининг баҳайбат деворлари унга дарғазаб тикилади. Пастликда буралиб оқаётган Ҳериёрднинг нариги томонидаги миноралар, қальяю арк атрофидаги асалари инидек бир-бирига тулашиб кетган томлар, айланма тор қўчалар меъмор Бухорий қўзига хомуш ва ғамгин қўринар, улар шунчаки бир суратга ўхшар эди. Бутун Ҳирот Меъмордан юз ўгиргандек.

Машҳад йўлида қовоғини солиб турган Ихтиёридин қалъасида фарзанди Низомиддин қўл-оёқларига кишан урилиб, заҳ ерда ётибди. Аркнинг кун чиқиш томонида Жоме масжид бўлиб, бу томон эрталабдан бошлаб гавжум. Ундан нарида Бозори Қандаҳор ва Бозори Малик. Ундан нарида Инжил ариғи. Кўпrikда Меъмор хаёлга толди. Устод Қавом билан учрашуви унинг юрагидаги аламни яна ҳам кучайтирди. У ўғлининг ҳибсга олинуви «англашилмовчилик» эмас, у жойга оғир жиноятчи, «салтанат душмани тушиши»ни айтиб, юрагини сиқди. На хотки, унинг Низомиддини салтанат душмани? Йўқ, бундай бўлиши мумкин эмас! Низомиддин нега салтанатга душман бўларкан?! У ҳали бўз йигит, сарой олдида катта обрўга эга бўлган Меъморнинг фарзанди. У, ахир, Фарона

жангида қатнашиб, Улугбек Мирзо инъомига сазовор бўлган-ку! Нега у подшохга душман бўларкан?! Бу ҳеч ақлга сиғмайди! Йўқ, бундай эмас! Менинг зотимда жиноятчилар йўқ! Қавом жанобларининг шубҳаланишлари ноўрин!

Меъмор Пули Молон устида девонасифат, у ёқдан-бу ёққа бориб келди. Ҳозироқ, тўппа-тўғри Иброҳим Султон ёнига борсами? Ёки ундан олдин Бойсунқур Мирзо ёнига борсамикан? Бойсунқур Мирзо меъмор Бухорийни хурмат қиласи. Ахир у қанча яхши гаплар айтган. Ҳатто Мирзонинг бунчалик эътиқодини сезган устод Қавом унга бир қадар рашик қиласиди. У тўппа-тўғри Бойсунқур Мирзо ёнига бориб, юрагидаги ҳамма гапларини айтиб, йиғлаб, ёлвориб, агар ўғли гуноҳор бўлса, бир сафар гуноҳидан ўтиб, озод этишларини сўрасамикан? Умр бўйи салтанатга хизмат қиласи, колган умрини ўнта жони бўлса, ҳаммасини Мирзо ҳазратларига бағишляяжагини айтсамикан? У ўйлаб қолди. Пули Молондан ўтиб кетиш Саланг тоғидаги «Мори марг», яъни Ажал йўлидан ҳам оғир бўлди. Мен изтиробдамен, қалбимни алам эзмоқда, дерди у ўзига ўзи. Унинг хаёлидан Арастунинг гапи ўтди: «Бизнинг кулмаган кунимиз — яшамаган кунимиздир...» — Мен — йиғлаётубмен. Демак, мен яшамаётубмен. Бундан чиқди, мен ўлганман. Мен ўлган одамману, лекин қимирлаб юрибмен. Мен соямен. Ҳа, ҳозир менинг факат соям қолган...

Меъмор бир муддатдан кейин Пули Молондан ўтиб, пастликка туша бошлади. Арк томонга бориб, амирзодалар ёнига киришга юраги дов бермади. Унинг қулогига юракни эркаловчи аллақандай бир куй эшилтиди. Бу созу куй ва дилрабо овоз унга таниш... Бу куй уни ўзига чорлагандек ҳам бўлди. Куй иккинчи қадрдон дўсти Хўжа Юсуф Андугонийнинг ҳовлисидан эшитилар эди. У ўша ёққа юрди. Бутун Ҳурросону Мовароуннаҳрга донғи кетган бу бастакор камтару хушфеълиги билан машхур. Мирзолар уни «бастакори замон», авом бўлса, «олтин соз» деб атарди. «Базми Жамшид» Андугонийсиз ўтмас, «базми Жамшид» эмас, «базми Андугоний» дейиларди ва ёки Андуго-

ний бўлмаган базм — «базми Жамшид» деб атал-
масди.

Пули Молондан ўтиб, тор кўчаларга кириб кетган
Меъмор тўғри Андугоний ҳовлисига юрди. Ҳарқалай,
бу ишда унга устод Андугоний кўмак бермоғидан умид-
вор эди. Меъмор ножу — игна баргли дараҳтлари
соясидан кета бошлади. Эрта билан у иккинчи ошна-
сининг эшигини тақиллатди. Ичкари кириб ўтирмай,
дўстига нима боисдан келганини айтди. У, айвонга
ўтириб, фотиха ўқиди-ю тезда қаёққадир бориши ло-
зимлигини айтиб, дастурхон ёзмаслигини таъкидла-
ди. Унинг хуши ўзида эмаслигини, қандайдир дарди
борлигини сезиб, бастакор Меъморга тикилиб ўтирас
эди. У Ҳиротнинг энг эътиборли кишиларидан бири-
ни бу аҳволда кўриб, фоятда ачинди.

— Фарзандларимиз мана шундоқ! — деди аввали-
га айбни ёшларга қўйиб. Чунки унинг хам бир ўғли
узоқ йили жанжалга аралашиб вафот этган саркарда
амир Бирандиқнинг неварасини қилич билан чопиб
ташлаган эди. Бу воқеа Юсуф Андугонийга қанча
ташвиш солиб, ўртага Бойсунқур Мирзо тушиб, ўғли-
ни зўрга жаллод қўлидан ажратиб олиб қолган. —
Бизлар мисқоллаб обрў топамиз, ўғилларимиз бот-
монлаб бу обрўни тўқадилар! Мамлакат осойишта.
Хозирги пайтда жанг жадал, юриш-суриш йўқ. Бу
болаларимиз иши падарини андухга солиб, юртни но-
тинч қилиш, шайтон васвасасига солиш бўлиб қол-
моқда. Устод, ўғлингиз нима иш қилибдики, уни Их-
тиёридинга қамабдилар?

— Бу томони менга қоронгу, азизим.

— Подшоҳ ҳазратларига суиқасд қилишда айблан-
ганлардан бир неча киши тутилган, деган гапни эшит-
дим. Бу ишга алоқаси йўқмикан?

— Билмадим.

— Алоқаси бўлса, сиз билан бизнинг бошимизга
хам Амир Қосим Анварнинг куни тушади. Аҳмад Лур
ўша аснодаёқ ўлдирилган. Аммо унинг тўдаси борли-
ги, улар хуруфийлар — Фазлуллоҳ Астрободий му-
ридлари, демоқдалар. Мен бу гапни амирзоданинг ўз
офизларидан эшитдим. Ҳарқалай, онҳазрат омон қол-

ганлар, жароҳатлари тузалаётир... Низомиддиннинг хуруфийларга алоқаси йўқмикан?

— Билмадим.

— Агар бу ишга алоқадор бўлса, жуда даҳшат. Ўртага тушмоқлик ғоятда мушкул бўлади.

— Тавба! Не кун бошимга тушди, — Меъмор оҳ тортиб, бошини кафтларига кўйди. Бир лаҳза ўғлини эслади. Ўғлининг тилидан «Аҳмад Лур» деган номни эшитгани ёдига тушди. Аҳмад Лурнинг уйида нотаниш йигитлар бўлгани, Низомиддин қурол-яроғларини шунчаки ишқибозлик учун тақиб юрмаслигини, бунинг тагида бир гап борлигини пайқади. Ўғли наинки Аҳмад Лурни, ҳатто Фазлуллоҳ, Хорун бўзчиларни ҳам тилга олар эди. Ўғлини қўлга тушганлардан кимдир сотиб кўйганини пайқади. «Ха, бу «англашилмовчилик» эмасга ўхшайди». Меъморнинг юраги оркасига тортиб кетди. У жаҳаннамий бир жар ёқасига келиб қолгандек чўчиб, бош кўтарди. — Азизим, нима маслаҳат берасиз?

— Аввал гуноҳини аниқ билайлик. Сўнgra Мирзонинг ёнларига бориб, гуноҳини сўраймиз. Ҳозир саройнинг айни дарғазаб чори — Ҳазрат жароҳатли ётибдилар. У зот соғайсалар, бу иш ҳам андек совиди. Тўғри бўлмайдиган иш йўқ.

— Саломат бўлинг.

— Подшоҳнинг хасталиги сабабли мамлакатда тўю маърака, базмлар тўхтатилган. Хонандалар сукутда, сеторлар филофда, — деди Андугоний.

Бир муддатдан сўнг Меъмор дўсти билан хайрхўшлашиб чиқиб кетди. У тўғри уйига қайтиб келдида, бор гапни қизи Бадиа билан хотини Маъсума бекага айтиб, ўрнига чўзилди.

Кун жуда оғир ўтарди.

Эртасига Меъмор нажот тилаб Бойсункур Мирзо ёнига боришдан фойда йўқлигини билиб, ўрнида ёта-верди. Ҳеч ерга тентираб бормади. Кечга яқин шогирди Заврак Нишопурий келиб, қурилишдаги ахволни айтиб, кейин ўз хужрасига кириб кетди. Унинг гаплари Меъморнинг қулоғига кирмади ҳам. Индининг ҳам устод ҳовлидан ташқарига чикмади. Бу куни ҳам ишнинг бориши хусусида гапиргани кирган Зав-

рак, Маъсума бекадан ҳамма гапни муфассал билиб, устоднинг ахволига ачинди. Шу куни у дўсти Зулфиқор Шошийга нома ёзишга тутинди. Биринчи нома Ҳиротдан Бухорога қайтиб кетаётган карвон орқали бериб юборилган эди. Номада асосан устоднинг сиҳат-саломатлиги, ўз ахволи ҳамда исмини очиқ зикр этиб бўлмайдиган бир киши ҳақида ҳам гап кетарди. Зулфиқор устоднинг қизини ниҳоятда яхши кўриб қолганини дўстига айтиб қўйган эди. У қалбидаги ҳамма гапларини Заврак Нишопурийдан яширмасди. Бу гапни ҳам сир тутолмай айтган ва шу куни оламолам қувонган эди.

Шу бўйи бир хафта Меъмор уйдан чиқмади. У кўрпа-тўшак қилиб, хаста кишидай ётиб олди. Мадраса курилишида бораётган ишлар ҳақида факат соғик шогирди Заврақдан эшитиб туради, холос. Меъмор шогирди билан гаплашиб ўтирган пайтларидан бирида, Зулфиқор Шошийни Ҳиротдан жўнатиб юборганига, унга нисбатан адолатсизлик қилганига афсусланди. Заврак унга далда берар, худо хоҳласа, Низомиддин чиқиб келишига умид бағишлар эди. Чол хўрсинар, ўғлим билан юз кўришсак не баҳт бўлади, деб изтироб чекарди. Авваллари ўзини олиб қочадиган, ҳамма билан гаплашавермайдиган Бадиа анча сўлган, аҳён-аҳёнда Заврак билан сўрашар, мабодо бирон иши бўлса уни отаси ёнига бошлаб кирар эди. Ундан ҳамма нарсани сўрарди, аммо юрагида доимо ёниб турадиган бир ном — «Зулфиқор» тўғрисида бирон нима сўрашга ботина олмас, унинг кадрдон дўсти Зулфиқордан нома олганини эшитган эди. Зулфиқор Бадиадан анча узоқлашиб кетса, ёруғ юлдуздек шунча ярқираб кўрина бошлади. У юрагининг бир ерида ловиллаб ёниб турарди-ю, Завракдан уни сўрашга асло ботина олмасди.

Заврак кўрпа-тўшак қилиб ётган Устодга Балхдаги Хўжа Мухаммад мадрасаси таъмир қилинаётгани, унга Бойсункур Мирзо катта маблағ ажратганини, бу ишга устод Қавом бел боғлаб, Балхга жўнаганини айтди.

— Ҳа, амирзоданинг бир қўлларида гул, бир қўлларида ханжар, — деди Меъмор ғазабнок. — Тушун-

майман, асло тушунмайман! Ўзи нима ишлар бўлаётиди? Ёки қиёмат яқинлашган сари шундок бўлармикан; гулзору вайрона, ханжару андава, заҳару асал, ҳаку ноҳақлик ёнма-ён туриди. Мен бундок гапларни айтишга ҳаққим йўқ, мен салтанатдан ёмонлик кўрган эмасман, лекин ўғлим Низомиддин туфайли дилим ўртамоқда! Тури носазо гаплар чиқмоқда. Э, худо, тавба қилдим! Осий бандангни ўзинг кечир!

Иккинчи ҳафтага ўтгач, Меъмор уйда ортиқ ёта-вермай, Бойсунқур Мирзо ёнига нажоту паноҳ тилаб борди. Мирзо Меъморга таассуф билдириб, ўғлининг подшоҳга сунқасдда иштироки борлигини, «ёмон одамлар»га қўшилиб қолганини, жинояти ғоятда оғир эканлигини маълум қилди. Тафтиш ва сўроқ вактида, у ўзининг хуруфия тўдаси ичиди бўлганию, агар Аҳмад Лур бу ишни қилолмаганида, Азд ёки Ҳорун деган киши подшоҳга қасд қилишга тайёр турганини, бордию бу ишни Ҳорун қилолмаганида ўзи бажаражаги-ни ҳам айтиди... Ҳорун деган кимса қидирилаётган эмиш... Меъмор бу гапни эшитиб бошидан хуши учиб, кўз олди қоронfilaшиб кетди. Сув сепиб, уни ўзига келтиришгандан сўнг, амирзода унга, бу оғир жинояти учун ўғли жавоб беражагини, Меъморнинг бунга дахли йўқлигини айтди. Бу ишлар бир ёқлик бўлиб кетгандан кейин Меъморнинг яна обрўсини тиклаб қўяжаги, тезда жароҳат битиб, тузалиб чиққан отасидан Меъморга нисбатан душман назарида қарамаслик, аввалгидек ўз хизматида барқарор туришини ваъда берди. Мирзонинг ҳамма гапларини сукут билан тинглаб турган Меъмор у билан совукқина хайрлашиб, чиқиб кетди.

Бу гапни эшитиб Бадиа ҳам бир сесканиб тушди. Оғасининг ўша Ҳорунбек каби қочиб қолмаганига ачинди. Унинг хаёлига жангари ва ўз жонидан кечиб бўлса ҳам истибоддога қарши курашаётган хуруфийларнинг барчасини тутиб кетмагандирлар, қолганлари не сабабдан ўз дўстларини қутқариб олиш учун ҳаракат қилмас эканлар, деган гап келди. Уларнинг бир-бирига садоқати ҳали шуми? Ёки ҳамма йигитларни тутиб кетишдимикан? Наҳотки қолган-қутганлари бўлмаса?

Бундан ташқари, Ихтиёриддин қалъасини ўттизга яқин сипоҳилар кўриқлайди. Зинданбонлар шалвираған одамлар, улар шоп мўйлабини бураб, маҳбусларга олиб келингандан хўракка шерик бўлиб ўтиришади, дейишишган эди. Наҳотки ўн чорлик азamat йигит шамшир билан қалъага бостириб киромайди?! Йигитлар кўрқоқ бўлиб қолдими? Хуруфийлар учун жон ширинми? Мавлоно Насимийнинг терисини шилишганда ҳам эътиқодидан қайтмаган эди-ку! Ҳа, номардлар! Худододбекнинг қўлидан бу иш келмайдими? Агар Зулфиқор бунда бўлганда, албатта қўлига қилич оларди!

Жума куни эрта билан Бадиа онаси тайёрлаб берган хўракни сопол тобоқقا солиб, дастурхон билан бошига қўйди. Саватдаги офтобда қотирилган нон, қатлама, туршакни Заврак Нишопурий кўтариб, Ихтиёриддин қалъасига жўнашди. Бадиа узун кўйлаги устидан нимча кийиб, бошига онасининг кенг, қорамтири рўмолини ўраб олди. Унинг факат икки кўзию чизиб қўйилгандек қалдирғоч қошлигини кўриш мумкин эди. Оғзи, бурнининг ярмигача рўмоли билан беркитиб юрарди. У ўз гўзаллигини тамоман яширган эди. Уч-тўрт қадамча орқада келаётган Завракка ҳар замон-ҳар замонда гап қотиб қўярди-ю, асосан ҳали шундок кунда ҳол сўрамай жим бўлиб кетган Худододбек ва қоронғи зинданда ўтирган акаси Низомиддинда эди. Отаси номусга қолмай деб, қаҳри каттиқлик қилиб, бундан жўнатиб юборган Зулфиқор ҳам унинг кўз олдидаги турарди.

Ҳаво иссик.

Машҳад йўли жимжит. Ҳар замонда от-уловли киши ўтиб қоларди. Узоқда корайиб турган Ихтиёриддин қалъаси юракка қўркув соларди. Улар қалъа дарвозаси ёнига етиб келиб, зинданбонларга йўлишиди.

— Нима олиб келдинг? — шоп мўйлабли зинданбон одатдагидек дағал савол берди.

— Нон, қатлама, туршак... — жавоб қилди Бадиа.

— Отанг ҳибс этилганми?

— Оғам.

— Бу ким? — зинданбон Завракка ишора қилди.

— У ҳам оғам.

— Оғанг кўп экан?

— Ҳа.

— Эрга текканмисен?

Бадиа миқ этмади. Фазабланди. Зинданбонлар маҳбуслар хонадонидан келган кишиларга шундок дағаллик қилишлари одатий тусга кириб қолган эди.

Бу савол-жавобга кулоқ солиб, Бадиага тикилиб турган бошқа зинданбон ошнасига дўқ урди:

— Ёш қиз экан, сен унга нега дағдаға қиласен! — у сипохи йигит Бадиага яқинроқ келиб тикилди-да, яна шоп мўйлабликка қаради: — Сен уни сўроқ қилма! Унинг оғаси зинданда, бафри ёнади... Қани, менга айт-чи, оғангнинг исми нима?

— Низомиддин.

— Ҳа, тушундим, — афсусланиб бош чайқади ёш зинданбон. — Нажмиддин Бухорий жанобларининг ўғиллари, юзида холи бор йигит...

— Ҳудди шундай! — деди ёш зинданбонга жавдираб Бадиа.

— Сен яхши қиз экансен. Ичкарига олиб кирсам, оғангни кўрасанми?

— Кўраман! — деди Бадиа кўзларига ёш олиб, — сизни ўла-ўлгунча дуо қиласан. Доимо худо сизга ёр бўлсин... — Бадиа боя уйда, агар оғасига жиндек ёрдам беришнинг иложи бўлса, деб олтин билагузукларини тақиб кетган эди. У оппоқ билакларидан чиқариб, кўлларига, очилган юзларига тикилиб турган зинданбонга узатди, — буларни олинг. Сизга.

— Оғанг Низомиддинни кўрганингдан кейин оламан. Қўлингда турсин. Қани, емишларни кўтариб, менинг орқамдан юр! Сен, хей ясовул, бунда тур! Яна одамлар келиб қолиши мумкин.

Йигитнинг буйруқ беришидан, у зинданбонларнинг бошлиғига ўхшарди. Шоп мўйлабли ҳам унга итоат қилиб, ташқарида қолди. Бадиа Заврак кўлидаги саватни олиб, қайтиб чиққанича бунда пойлаб туришини тайинлаб, зинданбон орқасидан қалъя ичига кириб кетди.

Бадиа зинданбон билан қалъанинг коронги, баҳай-бат дарвозаси йўлагидан ўтиб, чап томондаги хоналарнинг бирига кирди. Ундан ҳам ўтиб, яна бир ай-

вонга, ундан яна бир хонага кириб, зиндонбон орқасидан кетаверди. Унинг юрагига қандайдир бир қўркув тушди. Аммо у хозироқ бунда занжирбанд қилинган оғаси билан учрашажаги, агар унинг айтадиган бирон сирли гапи бўлса, тезда отасига етказажагини ўйлаб, дадил қадам ташлаб, заҳ қоронғи хоналардан ўта бошлиди. Ичкарига киргач, зиндонбон йигит яна бир хужра эшигини очди-да, Бадиага ишора қилди.

— Бу хонага кириб, оғангни кутиб тур!

Бадиа ўша хонага кирди. Хона мадрасалардаги ҳужрага ўхшаш кичик бўлиб, тепада икки туйнук бор эди. Хона эшиги ҳам қалин арча ёғочларидан ясалган, ҳалқа-занжирлари жуда мустаҳкам. Хонага обиғиши ётқизилиб, ўртага бир неча бўйра ташланган. Бўйра устида эскигина қўнғир намат тўшалган. Ярим қоронғи хонанинг бир томонида қалин кўрпача, пўстак ва ёстиқ қўйилган. Бадиа ҳамма ёқни кўздан кечиргач, акасининг ҳозироқ кириб қолишини кутиб, хона ўртасида тикка-тик тураверди. Бир муддатдан кейин эшик фичирлаб очилиб, бояги зиндонбон кириб келди. У белидаги қиличини ечиб, ёқа тугмаларини бўшатди. Ичкарига киргач, хона эшигини яна мустаҳкамлаб ёпиб, занжирини ҳам солиб қўйди. Бадианинг юрагига қўркув тушди.

— Оғам қанилар? — деди у жонҳолатда.

Кейин у олтин билагузукларини унга узатди. Зиндонбон олтин билагузукларни ола туриб, Бадианинг қўлларидан маҳкам ушлаб, ўзига тортди ва қучоқламоқчи бўлди. Бадиа иккинчи қўлидаги сават билан унинг юзига шундек урдики, зиндонбон орқасига тисарилиб, Бадианинг қўлини қўйиб юборди. Олтин билагузук намат устига тушиб юмалаб кетди.

— Сен ўжарликни қўйиб, гапимга қулоқ солсанг, бир лаҳзага чидасанг... оғангни ёнингга олиб кираман.

— Яқинлашма! — деди Бадиа титраб, нима қилишини билмай. Уни алдаб, ёмон ният билан бу ерга олиб кирганини фаҳмлади. Ўзининг ниҳоятда соддадил эканидан ранжиди.

— Фақат бир лаҳза... — деди зиндонбон Бадиага яқинлашиб. — Бу атрофда ҳеч ким йўқ. Агар сен дод

солсанг ҳам ҳеч ким эшитмайди. Фақат бир лаҳза... Нимадан қўрқасан, мен бўри эмас, одамман. Ҳеч нарса қилмайди, қучоқлайман, холос. Бир дам чидаб турсанг, оғангни ўзингга қўшиб бериб юбораман. Бундан хурсанд бўлиб чиқиб кетасан. Кел, гўзал қиз, гапимга қулоқ сол! Ўжарлик қилиб, қаршилик кўрсатишнинг фойдаси йўқ. Бари бир сени ҳозир фижимлаб ташлайман. Ундан кўра ўзинг бағримга кир. Мен сени қийнамайман. Секин... Буни ҳеч ким билмайди... Кела қол! — зинданбон камарини ечиб дағ-дағ титрарди.

Бадиа хона бурчагига тисарилди. Рўпарасида турган даҳшатли бўридан кўз узмасди. У баркашни ҳам, саватни ҳам ерга ташлади. Нимчаси чўнтағига қўлтиқиб, титраб, коронги уй бурчагида турарди. Зинданбон ҳозир ўз ўлжасига ташланишга чорланаётган йўлбарсдек, конталашган кўзларида ҳирс, Бадиага тикилиб, секин-аста унга яқинлашиб келарди. Бадиа нимчаси чўнтағидаги кичкина, аммо ниҳоятда ўткир ханжарни суғуриб олди. Туйнукдан тушган нурда ханжар ярқираб кетди. Уй бурчагида турган Бадиага яқинлашиб бораётган зинданбоннинг кўзи ханжарга тушиб, турган жойида қотиб қолди.

Бадианинг кўзлари ёнар, титраб турган қўлидаги ўткир ханжар ярқирап эди...

IV б о б

УСТОЗ ВА ШОГИРД

Билик бирла билинур саодат иўли.
Аҳмад Юғнакий

Фавқулодда бир кучнинг тазиқи билан Зулфиқор Шоший Ҳиротдан Бухорога қайтиб келган эди. Аслида, унинг бу яқин орада Ҳиротдан кетишинияти бўлмаган. Қизи билан «ошиқ-маъшуқ»лиги сабабли Меъмор қаттиқ ранжиб, кутилмаганда уни жўнатиб юборди. Ота-она, қариндош-уруг, ёр-биродарлар бағрида бўлмоқ қанчалик яхшилигига қарамай, орадан бир

хафта ўтар-ўтмас Бухорда юраги сиқилиб, «ёлғизлик» азобини торта бошлади. Ў ўз шаҳрида зерикар, нима бўлаётганини ўзи ҳам билмас, одамларга кулиб, илтифот қиласди-ю, аммо ичи ёнарди... Табассуму жилмайишлар жонга тегиб, аста-секин тонгги тумандай йўқолиб, хомуш, қовоқ солиб юрадиган кунлар бошланди. Ҳижрон панжалари унинг томоғидан бўға бошлади. Аввалига отаси ўғлимнинг ҳамма ишлари жойида, Ҳиротда тез фурсатда меъмордан яхши таълим олиб келди, энди ўз шаҳрида ишлайди, деб юрарди. Уста Нусрат ўйланиб қолди; бу боланинг хаёли жойида эмас, унинг юрагида бир сирру асрор бор...

Зулфиқор бўлса паришон, бир нимасини йўқотиб қўйган кишидек ўзича хаёл суриб, тушларида алаҳисирап, кўнглига ҳеч нима сифмас, сўраганларга ўзининг бетоб эканини айтарди. Ўғлининг меъмор хусусида доимо яхши гаплар айтганини, ҳеч кимдан шикоят қилмаётгани отасининг кўнглини бир оз тинчитган бўлса-да, хаёлпастлигига ажабланарди. Бу хаёлпастлик қаёқдан келди? Нега у ўз она юртида паришон? Нега у илгаригидай отаси ёнида ғайрат билан ишга киришмайди? Кафтларига туфлаб замбар кўтариш, хоҳ ганч кориш, ғишт териш ўрнига баъзан холи қолганида уҳ тортади? Нима гап?

Ҳа, унинг хаёли жойида эмас.

Зулфиқорнинг юраги ўртанаарди... У баъзан соатларча хаёл сурар, унинг кўз олдида яна ўша Хуросон пойтакти, ниҳоятда буюк — кўкўпар миноралари, қалъяю Арк, Мусаллою қанчалаб мадрасалари, Жоме масжидию Бозори Қандахор, Боги Жаҳонорою Пули Молон, гавжум кўчалари билан Ҳирот шаҳри пайдо бўлди. У ўтган кунларини эслади. Бу шаҳри азимнинг кунчиқар томонида, Ҳерирўд дарёсидан унча узок бўлмаган Дорул Ҳуффо маҳалласида унинг устози — кекса меъмор Нажмиддин Бухорий яшайди. Унинг хонадони катта ва foятда эътиборли. Ҳиротда Меъморни танимайдиган кимса йўқ. Устоднинг хизматлари буюк — яқинда Бойсунқур Мирзо мадрасаси ҳам битади, бу йирик маърифат масканининг ғишин деморлари бурчагига, кўзга унча ташланмайдиган жойга: «Амали Нажмиддин Бухорий» деб ёзиб қўйи-

лади. Мадраса биноси асрлардан-асрларга ўтади — устод хотирасини авлодлар фаҳр билан тилга оладилар. Бу мадраса ҳам Мусалло каби Ҳиротга кўрк бўлади. Устод Нажмиддин ҳам мавлоно Лутфий, мавлоно Шарафиддин Али Яздий, мавлоно Давлатшоҳ Самарқандий, Мухаммад Авфий, устод Қавом, устод Андугоний каби Ҳурносону Мовароуннахрнинг ўлмас сиймолари бўлиб туради. Меъмор Нажмиддин Бухорий хонадонида доимо ярқираб турадиган бир юлдуз бор: бу Бадиа...

Зулфиқор ҳаёлан Ҳирот қўчаларида чопиб юрарли...

Бундан уч йил муқаддам отаси билан у «Соҳибқиён Амир Темур салтанатининг давомчиси, пойттахти Самарқанддан Ҳиротга кўчирган Шоҳруҳ Мирзо туғи остига» эмас, «Шахри меъморон, мухандисон, пажжорон, сангтарошон, шоирон...»га келишган эди. Бундан ташқари, отасининг айтишича, бухоролик меъмор Нажмиддин Бухорийни паноҳ тортиб, йўлга чиқишган эди. Бир ойга яқин карвон билан йўл юриб, канча манзилу мароҳилни тай этиб, «рўйи замин жаннати» — Ҳиротга кириб келишди. Карвон сарой атрофидаги мусофирихоналардан бирига жойлашиб олишгач, янги либослар кийиб Бозори Қандаҳорга боришли — уста Нусрат юз тиллони камари қатига тикиб кўйган эди. Бундан ташқари ҳамёнида, ўғли Зулфиқор белида кўпгина «кебаки», «шоҳруҳия» тангалари ҳам бор эди. Бозорда кўп юрмай, намози жумага этиб бориш учун Жоме масжидга йўл олишди. Мингларча ҳиротликлар орасида уста Нусрат ҳам ўғли онлан ёнма-ён турарди... Намоздан сўнг улар Мирзо мадрасаси қурилишига боришли. Корфармо-уддабурро Аҳмад Чалабийдан меъмор Нажмиддинни сўрашди. У одам устоднинг андак бетоб эканликларини, Дорул Ҳуффо маҳалласида туришликларини айтиб, ҳамонки Бухородан келибсиз, ҳовлиларига борганингиз маъкул, деди мусофири кишиларга яхшилик қилган бўлиб.

Ота-бала ортиқ қидириб юришмай Нажмиддин Бухорий ҳовлисини топишиди. Ҳовлида нимадир иш билан машгул бўлиб юрган Меъмор эшик тақирлаши онланоқ ўзи келиб очди.

— Ассалому алайкум!

— Ваалайкум ассалом! — Меъмор эшикда турган уста Нусрат билан Зулфиқорга тикилди. Бир лаҳзадаёк уларнинг ота-бола эканини, ўғлиниң юзлари отасига жуда ўхшашлигини ҳам, нима мақсадда келишганини ҳам тушунди. Аксар ҳолларда фарзандларини шогирдликка оталари бошлаб олиб келишини биларди. Бундан ташқари йигитчаниң бошидаги каллапўшдан унинг хиротлик эмаслигини ҳам сезди.

— Устод, сизни зиёрат қилгани келдик, — деди уста Нусрат.

— Марҳамат, ичкарига киринглар, — деди Нажмиддин Бухорий уларни таклиф қилиб. Сўнг ўзи йўл бошлаб, ҳовлига олиб кирди. Отаболани ташқари ҳовлидаги меҳмонхонага ўтқазиб, фотихадан сўнг ўғли Низомиддинга дастурхон келтиришни буюрган эди ўшанда.

— Қалай, саломатмисиз?

— Шукур.

— Биз, Бухороданмиз. Бу — ўғлим Зулфиқор.

— Хуш кўрдик! — деди Нажмиддин Бухорий. У аввалига унча рўйхуш бермай, ҳовлида қилаётган иши чала қолгани учун bemavrid келган меҳмондан дилида унча мамнун бўлмай турган эди, «Бухоро» сўзини эшлиши билан чехраси очилиб кетди. — Мен ҳам асли бухороликман. Қалай, Бухоройи шариф обод бўлиб кетгандир?

— Жуда обод, — деди уста Нусрат ҳам очилиб, — янги бинолар тушяпти. Сиз ҳазратнинг асли Бухоройи шарифдан эканлигингизни биламиз. Сизни паноҳ тортиб келдик, устод. Мақсад, мана шу ўғлимни шогирдликка қабул қиласангиз, хизматингизда бўлса. Мен ўзим нажжорман, сангтарошлиқ ҳам қиласман... Айбга буюрмайсиз, ўғлим меъморликни ўргансин, отасидек сангтарош бўлиб қолмасин, дедим. Сиз ҳазратнинг номи-шарифингиз Бухорода машхурдир. Умидимиз сиз устоддан. — Уста Нусрат ёнидан тилло танга солинган ипак халтачани олиб, Меъмор ёнига қўйди. Меъмор аввал ҳайрон бўлиб, ўйланиб, кейин бухоролик уста Нусратга қаради:

— Ҳа, дарҳақиқат, менга шогирдлар келиб тура-

ли. Шогирдларим бор. Сизнинг фарзандингизни ҳам кабул қиласан. Аммо шартим бор. Мен ақча олмайман, — у хонтахта устидаги халтачани уста Нусратга қайтарди. — Имтиҳон қиласан. Агар фарзандингиз имтиҳондан ўтса, шогирдликка оламан. Йўқса, мендан хафа бўлмайсиз.

Уста Нусрат ялт этиб ўғлига қаради. Бу гап Зулфикорга ёққани, аввал хомуш ўтирган йигитчанинг чиройи очилиб кетганини кўрган ота, шу лаҳза Меъморга бокди.

— Маъқул, устод.

— Имтиҳон жуда қалтис бўлади, — деди Нажмиддин Бухорий, — мабодо бир шикаст етса, мендан домонгир бўлмайсиз. Мен ҳаммани ҳам шогирдликка ола бермайман. Шогирдларим етарли. Сизлар Бухоройи шарифдан келганлигингиз учун... Аслида ҳозир мен шогирдга муҳтоҷ эмасмен.

— Ташаккур, устод! Агар энг баланд минора тепасига фишт қўйсин, десангиз ҳам биз рози.

— Дастурхонга қаранглар, мана бу шириналликлардан олинг. Бухорода шакарпазлар кўп, шундоқми?

— Шундоқ, устод.

— Тоқи заргарон, тоқи телпакфурушон, китобфурушон... доимо гавжуму обод бўлса керак?

— Худди шундай, устод.

Ота-бала Меъморнинг вақтини кўп олмай, ундан руҳсат сўраб, дастурхонга фотиха ўқиб ўринларидан туришди. Меъмор Нажмиддин Бухорий уларни эшиккача кузатиб, фарзандингиз эртага келсин, имтиҳон оламан, деб қўйди. Ота-бала хурсанд бўлиб, карвон саройга қайтиб келиб, ўз хужраларида ўтириб, таом едилар. Ундан сўнг Зулфикор қалам ва давотини олиб, ҳандасадан машқ қилди. Магоки Аттори, Масжиди Намозгоҳ, Минораи Калон ва яна бир мадраса лойиҳаси чизилган қофозни олиб, анча вактгача отаси билан сухбатлашиб ўтириди. Ҳазрати Сайфиддин Баҳорзиний, Буён Кулижон, Исмоил Сомоний мақбаралари ҳақида баҳслashiшди. Морпеч, ангоб, шикофта, пештоқ, равоқ, «гулчамбар», гумбазлар, морпечга ганчхок қуюқ қилиниши ва унинг ҳандасавий тузилиши ҳақида, ўлчовлар, мувозанат ҳамда мадрасанинг китиба, қанос,

тимнаувлари¹ тўғрисида гаплашишди. Зулфиқор шу куни кечгача меъморчиликка оид ҳамма билганларини яна бир-бир хотирлади, ундан сўнг кўчага чикиб, Арқдан унча нари бўлмаган чала миноралар тагида юрди. Минораю Мусалло кошинлари, гумбазу куббалар ўн тўрт кунлик ой нурида ярқираб, мислсиз бир гўзаллик кашф этган эди. Улар Хуросон пойтахтининг шаъну шавкатини яна ҳам улуғлаб туради. Ундан сўнг, ҳали битмаган Мирзо мадрасаси атрофида ҳам айланиб юрди. У карвон саройга қайтиб келганида отаси хужрада ухлаб ётарди. У ҳам ётиб, ухламоқчи бўлди, аммо эртанги имтиҳон унга уйку бермади, у яна хаёллар наҳрида оқди. Унинг бошида ҳеч нарса йўқдек, у ҳеч нарсани билмайдигандек туяларди. Мактабда олган билимию отаси билан бирга янги ҳаммом ва тим қурилишида ишлаб, орттирган тажрибаси ва умуман, меъморчилик ишига жуда қизиққани пойтахтга катта обрўга эга бўлган Нажмиддин Бухорийга шогирд тушишга унади. Меъморчиликни ўрганмоқчи бўлди.

Зулфиқор Шоший тонг отгунча ўйлаб чиқди. Унинг рўпарасида ўша машҳури замон, аллома меъмор Нажмиддин Бухорий риёзиёт, ҳандаса, меъморчиликка оид саволлар бериб, тикилиб турғандай бўларди. Зулфиқор бўлса тутилиб, саволларга жавоб беролмай бўғилар, хижолат бўларди. У тонг отишга яқин, чарчаб, ухлаб қолди. Эрта билан отаси ўғлини уйғотиб, ноңушта қилишди. Шундан сўнг, Зулфиқор бир неча китобларини қўлтиклаб, устод ховлисига жўнади. Зулфиқорни устод очик чехра билан кутиб олиб, яна ўша хонага таклиф этди, ўзи юқорига чикиб ўтирида, рўпарасидаги чиройли йигитга бошдан-оёқ тикилиб, ўтиришга таклиф этди. Зулфиқор чўкка тушди. Китобларини ёнига кўйди. Ҳозир берилажак саволни кутиб турди. Аммо Меъмор хол-ахвол сўрай бошлади.

— Қалай, отангизнинг кайфиятлари яхшими? Ҳирот ёқдими?

— Отамлардан сизга салом! Ҳирот муazzам ша-

¹ Мадраса пештокидаги кошин тасвиirlар ва дарвоза тепаси.

хар... Отамларнинг кайфиятлари чоғ. У киши бозорга кетдилар...

Меъмор яна бир лаҳза Зулфиқорга тикилди.

— Менга бирор газал ўқиб беролмайсизми?

Хозир риёзиётдан ёки ҳандасадан бирон савол кутиб турганида бу гап Зулфиқорни ўйлатиб қўйди.

— Мумкин, устоз, — деди Зулфиқор кулимсираб.

— Ўқинг.

— Газал ўқишимни сўраяпсизми, устоз?

— Ҳа.

Бир лаҳзалик сукутдан кейин Зулфиқор айвоннинг ганч деворларидаги ўймакор токчаларга қараб, газал ўқий бошлади:

Гуфтам: Эй, султони хубон, раЖим кун бар ин ғариб,

Гуфт: дар дунболи дил рах гум кунад мискин ғариб.

Гуфтамаш бизгар замоне! Гуфт: маъзурам бидор,

Хонапарварде чи тоб орад ғами чандин ғариб.

— Офарин! — деди қулоқ солиб ўтирган Меъмор,— Ҳофизи Шерозийдан ўқидингиз.

— Шундай, устоз,— деди уялинқираб Зулфиқор,— отамларда «Мунтахаби девони Ҳофиз» бор, мен шу мўътабар китобдан ўқиб, бу газални ёд олганман.

— Мана қофоз, давот... — деди Меъмор, — Ҳофизи Шерозий ва унинг «Мунтахаби девони»ни ёзинг. Мен хатингизни кўрмоқчиман.

— Ҳўб бўлади, — у қофозга чиройли қилиб ёзди.

— Офарин, — Меъмор Зулфиқорнинг хусниҳатига кўз ташлаб, кейин йигитчанинг юзига қаради, — Шайх Саъдийдан ҳам ёд биларсиз?

— Биламан.

— Туркий газаллардан ҳам биласизми?

— Биламан, устод. Туркий забон — она тилим. Биз хонадонимизда туркий сўзлашурмиз. Биз асли Шошданмиз...

— Ўқинг!

— Хозир ўқийман, — Зулфиқор яна айвоннинг ганчин деворларидаги шинам токчаларга тикилди:

Эй жафочи, тут ғанимат кўркнинг давронини,
Ким, киши топмайдурур бу давр йили поёнини.

Онт ичибсен гўёким аҳди ҳуснингда бегим,
Килмагайсан бир жароҳатлик кўнгул дармонини.
Бу жамолу юзу кўз ким сенда бордир, англадим,
Ким тан ичра қўймағайсан ҳеч ошиқ жонини.
Ишқ учун ошиқни тангри ярлақаб ҳеч сўрмағай,
Ким яратмиш кўзу қошу ғамзай фатонини.
Раҳм эмастур улки кўз ёш етти ошиқ охидин,
Ғамзанинг тогина сув бердик, тўkkай қонини.
Не кетурдунг десалар маҳшарда Лутфий дунядин,
Кўргузай бағримдаги новаклар пайконини.

— Бу ғазал «Девони Лутфий»дан.

— Офарин!

— Мавлоно Лутфийнинг устозлари Шаҳобиддин
Хиёбонийдир. Мавлоно саройда хизмат қиласурлар
ва ҳамда онҳазратнинг лутф-эҳсонларига сазовор
бўлмишлар.

— Офарин, офарин! — деди кекса Меъмор Зул-
фиқорнинг ўйчан, мулоҳазакор кўзларига тикилиб,—
айтинг-чи, бўтам, Мусаллони кўрдингизми? Унинг меъ-
мори ким?

— Кўрдим, устод. Мен бу бекиёс уч мадрасани
кўриш орзусида эдим. У амали устод Қавомдир.

— Офарин! Сизга рухсат. Мана, танишиб олдик.
Энди кеч, намозгар пайтига етиб келасиз, имтихон
оламан.

— Хўб бўлади, — Зулфиқор ўрнидан туриб эгилиб,
кекса Меъморга таъзим қилиб ҳовлига тушди. Низо-
миддин уни эшиккача кузатиб кўйди. Ҳовлида рўпара
келиб қолган Бадиа «бухоролик йигит»га шундоқ бир
қараб кўйди-ю, назар-писанд қилмай ўтиб кетди. Зул-
фиқор эшик олдига Низомиддин билан хайрлашиб,
карвон сарой томон жўнаб кетди. Уни кичик ва қоронфи
бир хужрада отаси бетоқатлик билан кутиб ўтиради.
У хужрага кирибок ҳамма гапни бир йўла айтди. Устод
Нажмиддин Бухорийнинг фақат ғазал ўқитгани отани
таажжубга солди. Имтихон кечқурун бўлишини ҳам
маълум қилди. Уста Нусрат ҳайрон бўлди: «Эҳтимол
фурсатлари бўлмагандир, шу сабабли кечқурунга кол-
дирилган». Зулфиқор яна қўшиб кўйди:

— Мен устод ҳовлиларида тунаб қолар эканман.

— Маъқул, — деди ота.

Ҳарқалай устод уларнинг қўкрагидан итармай им-

тиҳон билан шогирдликка олмоқчи бўлгани, қаттиққўл ва талабчан экани маълум бўлди. Унинг шогирдлари Бухоро меъморлари ичидаги эъзозланарди. Меъморчиликнинг Самарқанду Ҳирот мактаби, наинки Хурросону Мовароуннахрда, бу меъморчилик мактаби асосан устод Самарқандий, устод Қавом, устод Нажмиддин Бухорийлардан ташкил топиб, бу усул Лаҳор, Бағдод, Ҷеҳли, Дамашқ, бу томони Бухоро, Машҳад, Хивага гарқалиб равнақ топмоқда эди. Мадрасаю миноралар, кўппригу ҳаммомлар тез суръат билан қулай ҳамда кўркли курилаётган бир пайт эди. Шу сабабли ҳам мулкдор кимсалар ва ёки беку амирлар ўз болаларини мутаассиб қори қилишдан кўра кўпроқ ҳарбий киши қилиш мақсадида Самарқандда Амир Сулаймон Ҳаш ёки Амир Бирандик тузган ҳарбий мактабга берардилар, баъзилар авом ичидаги ниҳоятда обрўли ном хисобланган — муҳандис ва меъморлар бўлишга қизиқарди. Тибб ва тижорат ишларидан ҳам меъморлар юкори туради...

Кечқурун, қош қорайганда Зулфиқор оёғига этигини, тўнини кийиб, бир даста китобу дафтарларини қучоқлаб устодникига келди. Нажмиддин Бухорий ҳовлида кутиб олиб, ундан, бу ерда тунаб қолишлигинизни отангизга маълум килдингизми, деб сўради. Зулфиқор отасига маълум қилганини айтди. Устоднинг таклифи билан Зулфиқор иссиқ ҳонада ўтириб, бирга овқатланишди. Овқатдан сўнг, Меъмор Зулфиқорни ҳовли четидаги бир чукур совуқ ертўлага олиб тушди. Бунда катта бир хона бўлиб, ниҳоятда совуқ — ерда на намату ва на бўйра бор эди. Аксинча қуруқ ерга сув сепилиб, баъзи ерлар яхмалак бўлиб музлаган эди. Баҳайбат, улкан хона ўртасида каттакон бир юмалоқ тўнка туради — токчадаги шам ёруғида бу кесилган ёнғоқ дарахтининг катта тўнкаси эканини билди. Ёниқ шам ёнида яна ортиқча икки шам туради. Хона эшиги жуда мустаҳкам бўлиб, ҳовли орқаси — майдон томонга чуқурликда дераза очилган, ойналари кир босиб кетган. Ҳонанинг бир бурчагида меъморчилик асбоблари: ўлчовлар ва шулар билан бирга андаза, курак, теша, табар, чўқморлар ҳам тўплаб қўйилган. Хона, ютаман, деб ҳувиллаб ётарди.

— Мана шу ерда тунайсиз. Қолган гапларни эрта билан гаплашамиз, — деди меъмор Нажмиддин Бухорий Зулфиқорга тикилиб. — Мабодо тунашни иложи бўлмаса, совқотиб қолсангиз, мана шу аргамчини тортсангиз қўнғироқ жаранглайди, келиб эшикни очамиз.

— Хўп бўлади, — деди таажжубланиб Зулфиқор.

Меъмор Нажмиддин Бухорий Зулфиқорни хона ичидаги қолдириб, эшикни қулфлаб, юқорига чиқиб кетди.

Зулфиқор ҳайрон бўлиб қолди. Юрагига қўркув тушиб, бориб эшикни итариб кўрди — қулф. Баланд дераза ёнига борди — кўча томонга қараган, нур тушадиган ёлғиз дераза. Хона бўм-бўш, ўртада тўнка. Бу нима? Бу — қамоқ эмасмикан? Бегона шаҳарда қамалиб ўтириш ва умуман, меъмор Нажмиддин Бухорийдек бир мўътабар зотнинг бу иши қандок бўлди? Уни бекордан-бекорга қамаб қўйиши қизиқ-ку! Ёки, уни жосус, амирзода Султон Абу Саид томонидан юборилган кишилардан деб шубҳаланишдимиликан? Нажмиддин Бухорий ҳазратлари подшога жуда яқин киши эканлигини, Лутфий, Андугонийга қилинган шохона инъомлар Бухорийга ҳам берилганини эшитган эди. Бу кеча карвонсаройга ҳам навқар юборилиб, отасини ҳам ҳибсга олган бўлсалар-чи?! Меъмор билан сипоҳ ўртасида фарқ катта-ку, нечук меъмор сипоҳлар ишини қиласди? Ёки у бир лаҳзада жаллодга айландими? Наҳотки ота-боладан шубҳаланишиб, қамоққа олишса?

Зулфиқорнинг хаёлидан Самарқандда аҳвол ёмонлашиб фитна авж олиб, Халил Султонни сарой аъёнлари: амирлар, саркардалар тахтдан тушириб, хибс этишгач, подшоҳнинг катта қўшин билан Самарқандга боргандилиги, Халил Султонни озод этиб, ўзи билан Хуросонга олиб кетганлиги, Самарқанд ҳокими этиб ўз ўғли — Муҳаммад Тарагай Улуғбек Мирзони тайинлагани, Халил Султон воқеаси муносабати билан Самарқандда ҳам, Ҳиротда ҳам дастлабки кунлар қаттиқ сиёсат юргизилиб, айғокчилар қўйилганлиги, Сарбадор ёки хуруфия одамлари эмас, амир Сорибуға, амир Сулаймон Ҳаш тарафида турғанлар ҳам қаттиқ таъқибга олингани бирма-бир ўтди.

Бир лаҳзадан кейин Зулфиқорнинг оёғидан зах ўта бошлади. У бир ерда туролмай, бориб токчадаги шамларни кўздан кечирди. Бўй-бўш, кимсасиз хонада у ёлғиз бир ўзи эмас экан — шам атрофида айланаётган парвоналарга тикилди. Митти капалаклар қанотларининг куйиши, ўзининг жизғанак бўлиб қулашига қарамай, оловга кўксини уради. Эшик тепасидаги аргамчини тортиб, қўнғироқни жаранглатсинми? Эҳтимол, ҳозиргина бу ердан чиқиб кетган кекса Меъмор яна тушиб, ха, туролмадингизми, ертўла ёқмадими, леб таъна қилар. Ёки у тушмас, Зулфиқор яна хаёлга толди; нима қилмоқ керак? У бир оёғини кўтариб, бир оёқ билан турди. Бу оёғидан ҳам зах ўтгач, иккинчи оёғини қўйди. Бу ҳам бўлмади — оёғи остига китоб, дафтарларини қўйиб устида турмоқчи бўлди. Йўқ! Бу асло мумкин эмас. Китоб оёқ ости қилинмайди! У Ҳиротга келган кунидан бошлаб, аввало, Мусалло тасвирини ўз дафтарига туширган. Ҳерируйд дарёси устидаги кўприк, Аркнинг кунгуруларию пештоқи, Жоме масжид тасвири, нимаики қўнглига ёқкан бўлса, уни тошқалами билан дафтарига чизиб олган эди. Биноларнинг баландлиги неча газ эканлигини ҳам, номларини ҳам ёзиб қўйган. Бу дафтарда Бухородаги бир неча мадрасаларнинг ҳам тасвири бор бўлиб, уни доимо ўзи билан бирга олиб юради. Нахотки у шу дафтару китобларни оёғи остига қўйса! У ярим коронғи хона ўртасида турган каттакон тўнка ёнига бориб, устига минди. Унинг оёқлари ердан узилди. Хўш, аzonгача бундай ҳолда туролмайди-ку! У бирон бурчакдан жой топиб ётиши керак. Меъморчилик асбобларини ерга ёйиб, устига чопонини ташлаб ётсамикан? Йўқ! Бу ҳам бўлмайди! Устод Нажмиддин Бухорий уни бу хонага қамашида бирор хикмат бор бўлса-керак, бўлмаса нега бегуноҳ бир одамни тўсатдан зах ертўлага қамаб қўяди? Садоқат учун қамоқни мукофот қилмайдилар, бу ишда бир сир борлигини Зулфиқор аста идрок эта бошлади. У совуқ ва кўрқинчли хонани яна бир карра айланиб чиқди. Хона ичидаги катта тўнка, шам, меъморчилик анжомларидан бўлак ҳеч вақо йўқ. У яна эшик ёнига келиб, зинапояга — ҳовли томонга қулоқ осди. Жимжитлик. Фақат ҳар

замон ҳар замонда қадам товуши эшитилар, уй тепасида сичқон пайдо бўлиб, қитирлатиб, бир нимани кемираради. Негадир кутилмаганда унинг хаёллари яна устод Нажмиддин Бухорий сари учди. Мўғуллар Сирдарё ёқасидаги Ўтрор, Зернук ва Нур шаҳарларини изини қолдирмай ер юзидан йўқотганликлари, шаман ва мажусий қабилалари кўп обидаларни ер билан яксон қилганликларини устоддан сухбатда эшитган эди. Бундоқ олижаноб аллома кимса Бухородан яхши ният билан келган йигитни совуқ ертўлага ташлагани таажжуб?! У ҳам мана шу парвонадек Меъмор зиёсига учиб келган эди-ку. Демак, у ҳам парвонадек куйиб, шамдон тагига қулаши керак экан-да?!

Зулфиқорнинг бошини узундан-узоқ хаёллар чулфади; Бир томонда, шарм, бир томонда, қўркув... У шам ёнида турганича, хона бурчагига тикилди; назарида аллақандай бир нарса қимиirlab, ердан бош кўтараётгандек бўлди. Унинг аъзойи-бадани жимирилашиб кетди. Нима, бу жинми? Кафанлари чулғаниб, аллақандай бир мурда ердан бошини кўтариб, уй бурчагидан тикилиб турди. Унинг қовурға суюклари кўриниб, кўзлари шокосадек чақчайиб, Зулфиқорга тикилди. Зулфиқор кўзларини юмиб очди; мурда шу он ғойиб бўлди-да, бир дамдан кейин яна уй бурчагида секин ердан бош кўтарди. Энг ёмони, хона гоятда совуқ эди. Зулфиқорнинг бадани жунжиб, оёқлари ачиша бошлади. Бухорода, узоқ йили бетоб ётганида ҳам кўзига шундай мурдалар, алвастилар... кўринган эди. У бир лаҳза шам ёнида турди-да, ичиди «ёсин»ни ўқиб, ўзига дам солди. Шу лаҳзада унинг назаридан ваҳима солиб қўрқитиб турган «мурда» йўқолди. Шам ёруғида шундоқ кўриниб турган тўнка иттифоқо унинг диккатини тортди. Нега у уй ўртасида турибди? Нега шундоқ катта тўнканни ертўлага тушириб кўйишган? У ёнғоқ тўнкаси бўлиб, юмалоқ эди. Яна кўзларига кафандарини чулғаган бояги мурда кўринмаслиги учун тўнка ёнига келиб, ўзини алаҳситди. Унда бир ҳикмат борлигини сезиб, тўнканинг у ёқ бу ёғига қаради. Итариб, ўрнидан кўзғатди. Зилдек оғир тўнка. Оёқлари ачиша бошлади. Агар болта бўлганида тўнканни ёарди. Ярим қоронғи хонани кўздан кечирди —

болта, арра, теша деган гап йўқ. Унинг юрагида ҳам қўрқув, таажжуб. Нима бўлаётганига тушунмасди. У тўнкани куч билан итарди; у ниҳоятда оғир бўлишига қарамай, осонликча юмалай бошлади. Бу ерда қакка-йиб туравермай; катта хонани бир айланниб чиқди. Ундан сўнг қўнғизга ўхшаб, хона ичида улкан тўнка-ни думалатиб айлантира бошлади. Бир муддатдан сўнг, қаддини кўтариб, тўйиб нафас олди. Унинг совқотиб, ачишаётган оёқлари ҳам исигандек бўлди. Бурчакдан бош кўтарган «мурда» ҳам ғойиб бўлди. У яна совқо-тиб қолмаслик учун тўнкани ўтариб, хона ичида ай-лантира кетди. Бундан ўзга яна нима ҳикмати бўлмоғи мумкин, деди у ўзига ўзи. Зукко чолнинг имтиҳони энди бошланганини пайқади — демак, совқотиб, жун-жиб ўтираслик учун тўнкани айлантириш керак! Ҳаракат қилмоқ керак. Ҳаракат — иссиқлик, иссиқ-лик — ҳаёт демак. Ҳаракату тадбиру файрат — иқбол... Бу, ёш Зулфиқорнинг ўз фалсафаси эди. Отаси бу гапни доимо такрорларди. У, тўнкани қалдиратиб ду-малатиб, бояги «мурда» бош кўтарган бурчакка ҳам олиб келди — баданни жимиirlатиб қўрқитган мурда-ни янчиб ўтмоқчи бўлди. Мурда йўқ. Демак, уни жинлар қўрқитган. У ҳеч нарсани ўйламай, липиллаб ёнаётган шамга ҳам қарамай, тўнкани думалатиб, уй ичида айлана бошлади. У терлаб, совқотиш нимали-гини ҳам унуди. Тинмай айлантириди, ҳар замонда бир тўхтаб, қаддини ростлаб, нафасини ростларди-да, яна тўнка думалатишга тушиб кетарди. У ярим кеча-гача думалатди. Тугаб қолган шамдонга ёнида турган янги шамни қўйиб ёкиб, яна тўнка думалатишга туш-ди. У ниҳоятда чарчаб, деворга суюнди. Бир лаҳза мизғиб олмоқчи ҳам бўлди. Йўқ! Бу асло мумкин эмас! Қотиб қолиши турган гап! У яна тўнка думала-тишга тушиб кетди. Шу тариқа Зулфиқор совқотиши-ни унутиб, тўнканинг ҳикматини тушунди. Аллома-лар ҳандасаю риёзиёт ва ёки шифо илмида эмас, оддий бир жисмдан ҳам ҳикмат топадилар; баъзан мўмиё эмас, оддий сув билан ва ёки сўз билан ҳам беморни даволайдилар, деди ўзига ўзи. Тўнкани қол-дираётган Зулфиқор хаёлинни кўз қорачиғига «алиф» тортилган Айниддин Аълам олди. Отасининг айтиши-

ча, бодапараастлика берилиб кетган тарроҳ¹ Айнiddин Аълам Мадрасаи Пирмуҳаммад лойихасини хато чизиб, кунботар равоқлар қулаб тушгач, подшоҳ амри билан икки кўзига «алиф» тортилган экан. Бечора тарроҳ кексалигида кўр бўлиб ўлган экан. Аммо «вақт ўлчагич» — соат кашф этган Ҳожи Муҳаммадга Соҳибқирон Амир Темур бир хуржун олтин инъом этган экан. Ана буни қаранг, деди ичида Зулфиқор, бирорвинг бошида Ҳумо, бирор Азройил кўлида... Фалакнинг гардиши шундок дерди, баъзида унинг отаси тош йўниб ўтириб. Зулфиқор хаёlinи яна меъмор Нажмиддин Бухорий тортди. Бу чол мени ертўлага ташлаб, совқотсанг тўнкани юмалат, бошқа иложинг йўқ, демади-ку. Унинг бирдан ғазаби қайнаб, арқонни тортиб, Меъморни чақирмоқчи бўлди. Бу қандоқ зулм! Бу бегуноҳ одамни кийнаш эмасми?! Бу ҳақорат-ку.

Унинг ёшлиқ қони қайнаб, ўзини камситилган, ҳақоратлангандек хис этди. У яна шам ёнига келиб, бурчакка қаради. Йўқ, бу гал на «мурда» ва на «алвасти» кўринди. Хона ичида катта тўнкадан бўлак ҳеч нарса йўқ эди...

Тун. Жимлик. Фақат узоқ-узоқларда итларнинг вовиллаган товуши эшитилади. Баъзан шипда сичқон бир нимани кемириб китирлатади. Зулфиқорнинг юрак уриши ҳам ўзига эшитилиб турарди. Баъзан уста Нусрат ўғлининг ортиқча югуриб-елишларини, ҳовлиқишлиарини, жizzакиликларини хуш кўрмасди. Меъёрдан ошган хатти-ҳаракатларидан энсаси қотар, буни Зулфиқор сезар эди. «Юрган ҳам, юргурган ҳам кун ўтказди — бас, шундок экан, нега ҳовлиқиш?» дерди отаси. Отасининг бу гапи билан Зулфиқор асло келишмасди. Осойишталик, босиқлик, камгаплик меъмор Нажмиддин Бухорийга ҳам хос экан. Лекин шогирд бўлмоқчи бўлган бир одамга бундай «илтифот» нечук? У «Боғи сафед», «Боғи жаҳоноро»ларни, Мусаллою Арк, Жоме масжидию минораларни томоша қилмоқчи эди. Таажжуб! Вакт ярим тундан оғиб кетди. Зулфиқор бадаёндаги тери қотиши билан яна

¹ Тарроҳ — кириладиган катта биноларнинг тархини (loyihasini) чизиб берувчи.

тўнкани юмалата бошлади. Бир муддатдан кейин шам-донга янги шам ўрнатиб, уни эскиси билан ёқди. Жунжиб, совқотмаслик учун яна тўнкани юмалатди. Негадир унинг уйқуси ҳам ўчиб кетди. Ҳамма ухлаб ётганида ёлғиз Зулфиқор бедор, совуқдан қотиб қолмаслик учун тинмай тўнкани думалатиб, ҳаракат киларди; Дарвиш Мухаммад ўзининг «Рисолаи қавонди хутут» ва «Фазоилул хутут» китобларини зах ертўлада ёзгани, умуман, бу машҳур ҳаттот ўз асарларини ертўлада ёзгани унга маълум эди. Давлатшоҳ Самарқандий, Нишопурий, соат ясаган Ҳожи Мухаммад Садр ҳам осуда канорада ишлаганлар...

Тонг отишга яқин зинада қадам товуши эшишиб, қалин эшикнинг темир илгаклари шакирлаб очилди. Қалпоғу тўнини қозикка илиб қўйиб, кўйлакчан, терлаб, тўнка юмалатаётган Зулфиқор бир лаҳза тўхтаб, эшикка қаради. Ланг очилган эшиқдан эрта тонг нури тушди, Меъмор рўпарасида терлаб, ҳаллослаб турган бухоролик йигитга қаради. Зулфиқор салом берди. Шу лаҳзанинг ўзидаёқ Меъмор «Ваалайкум ассалом!» деб Зулфиқорга жавоб қилди. У тун бўйи тўнкани юмалатиб чиққанини ердаги издан кўрди. Аслида Нажмиддин Бухорий худди шу ертўла устидағи хонада китоб мутолаа қилиб ухламаган экан.

— Тўнингизни кийиб олинг, — деди Меъмор Зулфиқорга, — энди юкорига чиқамиз. Менинг кетимдан юринг.

Зулфиқор қалпоғини бошига кийиб, тўнини елкасига ташлади. Туйнук тагидаги китоб-дафтарларини ердан олиб, шамни пуллаб ўчирди. Ундан сўнг, Меъмор орқасидан битта-битта қадам ташлаб, юкорига чиқди.

— Имтиҳондан ўтдингиз, Шоший жаноблари, — деди ховлига чиқишиганда Меъмор Зулфиқорга қайрилиб қараб, табассум билан, — Имтиҳон бир оз фалат. Сиз буни кутмагансиз. Начора. Мен, бўтам, сизнинг тадбиру саботингизни синаб кўрмоқчи эдим. Менга ҳам бу амални ўргатган устозларим даставвал бешафкат бўлган. Шуни ҳам сизга айтиб кўяйки, ёш Амир Ҳайдар, ҳазратнинг набиралари Алауддавла, Амир Бирандик саркарданинг икки набиралари ва яна бир

нече «толиби амал»лардан келиб, бу имтихондан ўтол-мадилар. Уларнинг тўнкани юмалатиб, совқотмасликка идроки етмай, бир муддатдан сўнг арқонни тортиб, боз устига боз «Эшикни очинг!» — деб бақиришиб, чиқиб кетдилар... Улар мендан ранжиганлар ҳам. Аммо мен шартимни бузган, чидами йўқ, кам идрок шогирдлар билан иш қилолмайман, дедим. Насиб қисса кўрасиз, Заврак Нишопурӣ, Favvos Муҳаммад Ҳирий деган шогирдларим ҳам бор. Мен уларни шогирд демайман, ўғлим дейман... Китобларингизни токчага қўйиб, юз-қўлингизни ювиб келинг, бирга нонушта қиласиз. Ундан сўнг, ухлаб дам оласиз ва бориб отангизга хабар берасиз. Мен ҳамشاҳарим билан гаплашмоғим керак.

Тун бўйи ухламай чиқкан Зулфиқор наридан-бери ювиниб келиб, устод билан бирга нонушта қилди. Уни уйқу босарди. Лекин устоднинг сўзлари бекиёс қувонч бағишлагани учун унинг юрагида бир дунё қувонч бор эди. Устоднинг рухсатидан сўнг дарҳол карвон саройга — отаси ёнига бориб, ҳамма гапни айтмоққа ошиқарди. Учишга талпинаётган қушдек, юраги ҳапқираётган Зулфиқорнинг ҳаяжонини Меъмор яхши сезиб турарди. У Зулфиқорни ортиқ ушлаб турмай, фотиха берди. Зулфиқор устод билан хайрлашиб, карвон сарой томон чопиб кетди. Бетоқатлик билан кутиб ўтирган отасига бўлган воқеанинг барини айтиб берди. Аввал ҳайрон бўлиб турган уста Нусрат охирида тиззасига уриб кулди: «Оббо чол-е, мен у зотнинг баъзи қилиқлари борлигини эшитган эдим. Ҳатто Бойсунқур Мирзо ҳам унинг ўжарликларини кечирар экан. Билағонликда устод Қавомдан юқори туради, дейишади. Мусалло қурилишида устод Нажмиддин Бухорий ҳам устод Қавом ёнида бўлган. Бухоройи шарифда бўлсак ҳам бу гапларни эшитганимиз. У пайтда сен турилмаган эдинг...»

Шундай қилиб, бир яrim ойча Ҳиротда турган уста Нусрат эски ҳамшаҳари аллома меъмор Нажмиддин Бухорий ўз ўғлини шогирдликка олганидан мамнун бўлиб, белига боғлаб олган халтачадаги тилла тангаларига бола-чакаларига совға-саломлар харид қилиб, яна карвон билан Бухорога жўнади...

V б о б

ФАРИБ

Қиши чилласи қора совук кунларининг бирида кечга яқин нотаниш бир киши меъмор Нажмиддин Бухорий эшигини қоқди. Югуриб чиқиб эшик очган Заврак Нишопурий рўпарасида юпунгина кийинган ориқ бир одам дилдираб турарди. У қуюқ саломдан сўнг, Меъмор ҳазратларига гапим бор эди, агар чақириб берсангиз миннатдор бўлардим, деди. Заврак у одамга бошдан-оёқ тикилгач, ниятини фаҳмлагандек бўлиб:

— Агар гапингиз жуда муҳим бўлса, унда мен кекса отамизни кийинтириб олиб чиқай. Бўлмаса, овора қилманг. Агар ёрдам сўраб келган бўлсангиз, менга айта қолинг, — деди.

— Худди шундай, — деди нотаниш киши Завракка мўлтираб, — мусофиридан. Узокдан келиб, бунда noctor ҳолга тушиб қолдим. Саховатли Меъмор ҳазратларининг олижанобликларини эшитганман. Атай келдим. Мен гадо эмасман!

Заврак нотаниш кишига яна бошдан-оёқ тикилди. Енги ичида, қўйнида пичоқ йўқмикан, деган шубҳа билан қаради. Бундан бир неча ой муқаддам нариги маҳаллада шунаقا бир кимса нуфузли беклардан бирига пичоқ уриб ўлдириб кетгани бутун шаҳарга тарқалган эди. Завракнинг юрагига ғулғула тушди.

— Эрталаб келинг, бўлмаса ўшанда гаплашамиз.

— Карвонсаройдан ҳам чиқариб юборишди. Пулим йўқ, қорним оч...

— Унда бир лаҳза сабр қилинг, мен ичкарига кириб чиқай, — Заврак йўл-йўлакай Зулфиқорни огохлантириб, ичкари ховлига кириб кетди. У аввал бу гапни Низомиддинга айтди. Ундан сўнг Бадиага. Ганжинада сандалга бағрини бериб ўтирган Меъмор Завракни чакириб, нима гап, деб сўради. Заврак ҳамма гапни лўнда қилиб устодга айтди-да, негадир бу мусофир кўзига шубҳалироқ кўринганини қўшиб қўйди.

— «Меъмор ҳазратларини қидириб, Дорул Хуффо маҳалласига келдим» деяпти. У бу ерга карвонсарой-

дан атайин келган эмиш. Ҳарқалай, шубҳали, — деди Заврак.

— Мен чиқиб бир кўриб келай!

— Сабр қил! — деди Меъмор ўғли Низомиддинга. — Айб бўлади.

— Шубҳали одамларнинг ёнига чиқаверманг, ота! — деди Бадиа Завракнинг фикрини қувватлаб. — Шахримизда ҳар хил фирибгарлар кўпайиб кетган. Сизнинг соддалигингиздан фойдаланиб, шилишади. Ўрганиб қолишган, илгари ҳам неча бор ақча сўраб келишган эди. Мехнат қилсалар ўладиларми! Танбаллар!

Шу лаҳза Маъсума бека ҳам гапга аралашди:

— Шубҳали одам бўлса, эҳтиёт бўлиш керак.

— Совқотиб турибдими? Усти юпунми? — Завракдан сўради Меъмор.

— Ҳа, дилдираб турибди.

— Үндоқ бўлса, олиб киринглар. Сандалда исинсин, таом беринглар. Мусофирик одам бўлса, унга шубҳа билан қараш яхши эмас! Жойи бўлмаса тунаб қолсин, мен эрта билан гаплашаман!

Бу гапни эшитган Заврагу Низомиддин, Бадиаю Маъсума беканинг тарвузи қўлтиғидан тушди — кекса отанинг буйруғини иккиланмай бажариш шарт! Заврак, хўп бўлади, дегандек қайрилиб ташқари хотана чиқиб кетди. Хонадан чиқиб, эшикда турган нотаниш одамни гапга солиб турган Зулфиқор Шоший ҳам устоднинг буйруғига таажжубланди. У ҳам нотаниш одамни орқасига қайтариб чиқариб, эшикни занжирлаб олмоқчи бўлиб турган эди. Заврак нотаниш одамни бошлаб олиб кирди. Бу лаҳза унинг кетидан келиб, ҳовлида турган Низомиддин билан Бадиа Зулфиқорга юзланишди. Нотаниш одам чоригини зинада ечиб, ичкарига кириб кетаётганида Зулфиқор Низомиддин билан Бадиага шивирлади.

— Қарашлари жуда хунук-ку.

— Низом оға, уни гапга солиши керак! — деди кўркув ва хаяжонда Бадиа, — ёнингизга ҳанжар солиб олинглар. Ухлаш керак эмас!

Киши чилласи уйга қамалиб, зерикиб ўтирган ёшларга иш топилиб қолди. Бадиа гарчи нотаниш одам

ёнига жуда ҳам киргиси, унга баъзи саволлар бергиси келаётган бўлса ҳам, Низомиддин рухсат бермади. Бадиа ичкари ҳовлига, ота-онаси ёнига кириб кетди. Уч йигит сандалнинг оёқ томонига ўтириб, дилдираётган нотаниш кишини ўраб, гапга солишиди. У таом еб, исиниб олгач, йигитларнинг ҳамма саволларига жавоб берди, гап орасида Меъморнинг ҳақига дуо қилди. Қорни тўйғач, унинг кўзлари чалишиб, ўтирган срида ухлаб қолди. Аммо уч давангир йигит, ҳар эҳтимолга қарши ёnlарида ўткир ханжар, тонг отгунча ухламай чикишиди.

Тонг отди. Нотаниш меҳмон барвакт туриб, юваниб кийимларини кийиб, сандалда Меъморни кутиб ўтиради. Заврак нонушта тайёрлаб, у одам кутиб ўтирганини Меъморга хабар қилди. Устоднинг кириб келаётганини кўрган мусофири дарҳол ўрнидан туриб, унга таъзим этиб, салом берди.

— Хуш келибсиз, — деди Меъмор нотаниш одамга. Бундай сўзни Ҳиротга келганидан бери биринчи маротаба эшитган мусофири довдираб қолиб, устодни дуо қила бошлади.

Нонушта пайтида у ўзи ҳақида яна бошқатдан гапирди: исми — Али эканини, бошига оғир бир савдо тушиб, Сабзавор шахридан келиб қолганини, отаси Сабзаворда уста — нажжор эканини, ёз бўйи мешкобчилик қилиб юрганини, ҳозир эса, карvonсаройда карздор бўлиб қолганини айтиб, қиш чикқанича мадраса қурилишида хизмат қилсан... деб илтимос қилди.

— Марҳамат, — деди Меъмор, — Мадрасага бориб, уста Ҳасанбекка йўликинг, мен билан учрашганингизни айтинг. Ишонаманки, уста Ҳасанбек сизни ўз ҳимоясига олар. Қарзингиз қанча? Қанча ақча кепрак?

— Йигирма динор қарзим бор, устод.

Меъмор қўйнидан ҳамёнини олиб, эллик динор санаб берди. Мусофири хурсандлигидан довдираб қолди. Отанинг ишораси билан Низомиддин югуриб ичкари ҳовлига кириб, эски қалин чопон, этик, лозиму кўйлак ҳам олиб чиқди. Улар Меъморнинг эски кийимлари эди. Одат бўйича у ҳар йили қиш ойларида

эски кийимларини ғариб-ғураболарга бериб юборар эди. Бу сафар мусофири ўз оёғи билан кириб келгани айни муддао бўлди.

Мусофири ҳаяжонланиб йиглаб, Меъморга қай йўл билан ташаккур айтишни билмасди.

— Хижолат бўлманг, — деди Меъмор, — биз, албатта, ҳаммага мурувват қилишга қурбимиз етмайди, аммо бизни паноҳ тортиб келган софдил кишилардан боримизни аямаймиз...

— Илохим... мартабангиз бундан ҳам баланд бўлсин, ғарибларга қилган карамингиз худойи таолодан минг бўлиб қайтсан, бола-чақангизнинг роҳатини кўринг... О-омин!

Ҳаммалари юзларига фотиха тортдилар.

Мусофири киши иссиқ тўн кийиб хурсанд бўлиб чиқиб кетгач, хонага кирган Маъсума бека шогирдлар юзидағи мамнуниятни кўриб, гап ташлади.

— Маккадан ҳожи келганда ҳам бунчалик қилинмайди...

— Ўтган ҳафта Насриддинбек тўйига эллик динор сарфлаб, сарпо олиб бординг, — деди Меъмор хотинига қараб, — бу акча дарёга томчи ҳам бўлганий ўқ. Кўчаларда ғариб-ғурабо, хужраларда муллаваччалар оч, аммо беклар сассиқ кекирдак... Нуфузли бекларнинг ас-аса, дабдабаларига шерик бўлгандан кўра, бир бор ўтин бўлиб, бир ғарибнинг қумғонини қайнатган савоб!

Хона ичидаги ҳаммалари жим бўлиб қолишли. Бир лахзадан кейин жимликни Бадиа бузди:

— Бу мусофири уста Ҳасанбек ёнига бориб хизмат қиласмикан ёки дом-дараксиз кетармикан? Шуниси қизик!

— Ҳа, сенинг учун «қизик» ишлар кўп. Сиз, тўртволон кўлингизга ханжар ушлаб, ухламай чиққанингизни ҳам биламан! Бу ғариб бечора корнини тўйғизиш мақсадида юрибди-ю, сизлар уни қароқчи гумон қилиб пашшадан фил ясадинглар. Офарин! Мана, кўрасиз, у шу бугунок уста Ҳасанга йўлиқади.

Дарҳақиқат, мусофири Али мешкобчи шу куниёк уста Ҳасанбекка йўлиқиб, у ерда ишлаётгани Меъмор хонадонига маълум бўлди.

VI б о б

ГЎЗАЛ БАДИА

Зулфиқор Шоший отасини кузатиб қўйгач, дастлабки кунлари серҳаракат пойтахтда зерикди, гарчи бўш вақти оз бўлса ҳам, атрофидаги одамлар ва иш унинг зерикишига йўл бермасдию, лекин ўзга шаҳарга ўрганолмай қийналарди. Биринчи бўлиб унга ўзининг илиқ сўзлари билан меҳрибонлик кўрсатган киши — Заврак Нишопурий бўлди. У жуссаси кичик, корача, лаблари қалин йигит бўлиб, чап кўзида оки бор, ниҳоятда серҳаракат, хозиржавоб — гап билан сингиб бўлмайдиган кимса эди. Бадиа билан бирон иш юзасидан гаплашишга тўғри келиб қолса, ўнг томон юзини кўрсатиб турар, оқ тушган кўзини беркитишга харакат қиласарди. Кувноқ Бадианинг кўз ҳақидаги хар қандай учирма гапига шу лаҳзанинг ўзидаёқ жавоб берар, жисмоний нуқсонидан кулса ҳам, у билан узокроқ гаплашишни истарди. Зулфиқорнинг келиши бир томондан яхши, иккинчи томондан, ёмон бўлди; ишчан мусофир йигит доимо ёнида бўлгани, Бухоро ҳақидаги ажиб ҳикоялари яхши, аммо бу қадду қомати келишган, кўркам йигитнинг Меъмор ҳовлисида юриши, фавқулодда имтиҳондан мукаммал ўтиб, устоднинг диққатини ўзига жалб этгани андак рашкини келтиради. Дастлабки кунлари Бадиа ташқари ҳовлиларида юрган бухоролик шогирдни кўрмаганга олиб, парво қилмай юрди. Унинг диққатини гўё ҳеч ким тортмас, шогирдлар ичидан Завракни чақириб, унга иш буюарар, Заврак эса устод буйругини эшитгандай, «Хўп бўлади, бекам!» деб зинфиллаганича кетарди. Бадиа гўё бошқа йигитларни кўрмагандек виқор билан яна ичкари ҳовлига кириб кетарди. Аслида у отасининг қўлида ишлаётган деярли ҳамма йигитларни яхши танирди, аммо «Хиротнинг таниғлик арбобларидан бири» — меъмор Нажмиддин Бухорийнинг ёлғиз қизи бўлганлиги, ўзининг ҳусну камолда тенги йўқ эканлиги туфайли у арши аълода эди. Буюк, стук одамлар ниҳоятда қамтар, камсуқум, дилбару меҳрибон бўлишини ҳам, камтарлик унинг гўзаллиги

устига яна хусн бўлиб тушишлигини ҳам бу доно қиз яхши биларди. У подшоҳнинг энг кичик қизи Гулгун ақонинг ҳам ғоятда гўзаллигини, Хуросонда машҳурлигини биларди. «Маликул қалом» — мавлоно Лутфий Нажмиддин Бухорий қураётган мадрасага тикилиб туриб; «ҳам буюк пурқомат, ҳам бадиа...» деган экан. Иттифоко Меъмор ўша куни қиз кўриб, унга Бадиа деб ном қўйди. Устод Қавом хонадони бу қиз туғилиши билан Маъсума bekaga шода дур армуғон этган эди. Бадиа балоғатга етгач, баъзан ўша шода дурни бўйнига тақиб юради. Заврак Нишопурий, баъзан ҳазиломуз гап отар, Бадиа хандон ташлаб кулар, ўша атрофда ўралишиб юрган Худододбекка хаёли кетиб, юзларидан табассум қочар, дарҳол жиддийлашар эди. Бу сарбознамо йигитга у тегиши керак... Отасининг яқин ошнаси — меъморлар «малики» — устод Қавом билан Нажмиддин Бухорий кўнгилларида кариндош бўлиш нияти ҳам йўқ эмасди. Устод Қавомнинг Бадиани ўз ўғлига сўратганини Бадиа яхши биларди. Баланд бўйли, пурвикор, отда яхши чопадиган, подшо сарбозларидан бири бўлишга интилаётган Худододбек аввал вазир Шуджа Арғун хонадонига яқин бўлиш мақсадида, унинг қизига совчи юборишни онасига маълум қилган эди. Кейинчалик, вазир бошқа бир вазир билан қуда бўлажагини билган устод Қавом «даража ба даража...» бўлибди, биз ҳам Нажмиддин Бухорийга қуда бўламиз, унинг асли мовоарууннаҳрик, манғит уруғидан, деди. Бу гап ўғли Худододбекка ҳам маъқул бўлиб, Бадиага кўз тикди. У баъзида башанг кийиниб, белида заррин камару исфихони ханжар, бинокорлар ёнида пайдо бўлар, меъморлар билан бир лаҳза умумдунёвий гаплардан: айниқса, Муҳаммад Мирзо Хуросонга кўз тиккани, Самарқандга, кейинчалик Балхга юриш қилажаги маълум бўлиб қолганини, Шоҳруҳ Манғит томонга юриш қилмоқчи эканлиги ҳақида гаплашарди. Баъзан у шундай гапларни мақтаниб кишилар ичida ошкор қилаётганида отаси ўғлига тикилиб туриб лабини тишлар, холи пайтда кекса ота, ахир бу салтанатнинг сири-ку, ҳадеб вақиллайверма, ҳар хил одамлар бор, ҳатто менга ҳам гапирма, анави деворнинг ҳам қулоғи бор;

устод Ҳусайн Домогоний воқеасини эшитгандирсан! Ахир у зотнинг бир оғиз сўз учун боши кетди. Тилга эҳтиёт бўлиш керак! — деб танбех берарди.

Худододбек мадрасага кириб, бир-икки ойдан сўнг талабаликдан қочиб кетди. Отаси ҳам, онаси ҳам ўғилларининг раъйига қарашибди: ха, олим бўлмаса сипоҳ бўлар, деб ўзларига тасалли беришибди. Дарҳақиқат, Худододбекнинг риёзиётга асло тоқати йўқ, отда чопиш, килич солиш, базм... кўпроқ қизиқтирарди уни. Бўйи етган нозанин қизлар йигитнинг мана шунағанги мардини ёқтиради, «аммамнинг бузоги» бўлиб юрганларни хуш кўрмайди, — дерди у ўзига ўзи, — йигит бўлсанг шўх бўл деган гап ҳам йигитлар йигитини танловчи дилбарлардан чиккан. Дунёда зўрлар яшайди, талошлардан енгилганлар, ожизлар йўқолиб кетади. Дунё фақат кучлилар учун гўзал, кучсизлар учун — вайронга. Зару зўр доимо кучлилар томонида. Илму маърифат ҳамма вақт кучлилар хизматида бўлади. Ҳусну латофат, майшату базм, шухрату ғуур зўрларники! Ожизлар фақат тобе бўлиб, кучлиларга хизмат қилмоғи керак!.. Бу — Худододбекнинг дунё-қарashi эди. Заврак Нишопурий бу гапларга аста ми-йиғида кулиб қўя қолди. Кейинчалик буни Зулфиқор Шоший ҳам сезди. У аввал устоднинг ўғли билан жиддий баҳсга тушган эди, имо-ишора билан уни Заврак «тўрт энлик» пастга туширди. «Ўзингизни қўлга олинг, Шоший, устод ўғилларининг фикри кўпдан шундок, уни ўзгартира олмайсиз. Сарбозлар, сипоҳларнинг фикри аксар шундоқ бўлади. Подшомизнинг ҳам йўллари шу — тортишиб ўтиришнинг ҳожати йўқ!» деди. Зулфиқор қизищди: «Бу нодоннинг гапига қарангки, дўстим Нишопурий, илм ҳам мансабдорлар хизматини қиласмиш! Демак, донолар нодонларга хизмат қиласмиш!?!» Заврак кулди: «Ҳа, баъзан шундок ҳам бўлади. Дўстим, сиздан илтимос қиласман, Худододбек ёнида қизишманг, ўзингизни, босинг. Устод бу йигитни жуда ёқтирадилар, куёв қилмоқчилар...» Зулфиқор бу гапни эшитиши билан тилини тишлиди, сукут қилди. Шу кундан бошлаб, устоднинг шўх, гапга чечан, шаддод қизига унча қайрилиб қарамайдиган, унга тикилиб, ҳазил-мутойиба қилишни ўзига

гуноҳ ҳисоблайдиган бўлди. Иккиламчи, меъмор Нажмиддин Бухорий билан устод Қавомлар катта даргоҳ — Ҳиротнинг устунлари экани, Зулфиқор билан Заврак сингари шогирдлар факат илм олишлари, ҳунар ўрганишни кўзламоқлари керак. Бу ерларда шу сабабли юрганликларини асло унутмасликлари лозим! Бу гап Бадиага ер тагидан қараётган Зулфиқор Шоший устидан гёё совуқ сув куйғандек бўлди. Биринчи кўришидаёқ бу қизнинг жозибаси унинг юрагини «жаз» этиб ёндирган эди.

Зулфиқорнинг диққатини биринчи куниёқ устоднинг ўғли Низомиддин ҳам ўзига жалб этиди. Низомиддин билан Худододбек ўрталарида қандайдир бир ўҳашашлик зоҳир; бири сарбозлар тўпида, иккинчиси бу тўдада расмий хизмат қилмаса ҳам, қиличга ишқибозлардан эди. Низомиддин билан Худододбек ўзларини лочин ҳисоблаб, оталари хизматидаги шогирдларни «муллабачча», «кўрқорилар» ҳисобларди. Бу икки йигит феълидаги муштараклик ташқаридан қараган кишиларга сезилиб турарди. Аммо, негадир, улар бирбири билан кам учрашарди. Низомиддиннинг ошналари бошқа йигитлар эди. У кўп вақт «Боғи жаҳонаро» қолиб, Бозори Қандаҳор томонларда юрарди. Зулфиқор ҳаммадан кўра кўпроқ Низомиддиннинг мавхумлигига таажжубланар, шундок отанинг касб нуридан баҳраманд бўлмаётган ўғилдан норизо эди. У дарё бўйида чўллаган одамга ўхшарди. Наҳотки Низомиддин илм дарёсидан бир пиёла ичмаса! Офтоб нури ҳамма ёққа баробар тушгани билан бир ерда гулурайхон, бир ерда ажрику алаф битаркан-да!

Бадиа янги келган меҳмоннинг негадир ўзига беътибор эканини пайқади. Кунлардан бир куни жўрттага ташқари ҳовлига чиқиб, унинг йўлида рўбарў бўлди. У бир лаҳза тўхтаб, отасининг шогирдига бошдан-оёқ тикилди. Ўзини четга олиб, келгиндиларга эътибор бермайдиган гўзалнинг иттифоқо йўлида қамти келиб, тикилгани Зулфиқорни ҳайратга солди. Бадиа бекам бирон иш буюрсалар керак, деб ўйлади Зулфиқор. У шошиб, қизга салом берди ва негадир андек қизарив кетди. Атрофда ҳеч ким йўқлигини сезгач, унга мурожаат этиди:

— Мухтарама Бадиа бекам, менга бирон иш буюрасизми?

— Йўқ.

— Унда, мен хонага кирсам майлими?

— Йўқ! Мен сизни яхшироқ кўрмоқчиман.

— Марҳамат! — бир лаҳзадан кейин Зулфиқор ўзини тутиб олиб, Бадианинг оху кўзларига тикилди,— калай, сурат ёмон эмасми?

— Сурат харқалай текис чизилган... Лекин мазмунни...

— Сиз, мухтарама бекам, бу «сурат»нинг мазмуни билан қизиқманг, эътиборингизга арзимайди... — Зулфиқор бу гапни эҳтиёткорлик билан айтди.

— Эҳтимол?..

Зулфиқор индамай ерга қаради.

— Сизни йўлингиздан тўхтатдим, узр.

— Йўқ, мухтарама бекам, узр сўрашнинг ҳожати йўқ. Сиз менга илтифот қилиб гаплашганингиздан ниҳоятда мамнунман.

— Ундоқ бўлса, келганингизга анча бўлди, нега миқ этмайсиз?!

— Сизда шундай бир куч борки, кўрганимда ўзими ни йўқотиб қўяман. Бу, сизни кўрган биринчи кунимдан бошланган. Киши офтоб нурига тикилиб боқолмагандек, сизга, мухтарама бекам, тикилиб боқолмайман...

— Гапга ҳам уста экансиз, — деди Бадиа Зулфиқорнинг кўзларига ўткир тикилиб. Бугунча шу гап етади, дегандек, Бадиа гапни бошқа томонга бурди:— корнингиз оч эмасми? Овқат олиб чиқайми?

— Йўқ, бекам, қорним оч эмас.

— Заврак Нишопурий келгандарида ичкари ҳовлига кирсинлар, овқат сузиб бераман...

Бадиа қайрилиб, ичкари ҳовлига кириб кетди.

«Гаплашаркансан-ку, — деди ичиди Зулфиқор, — бир ойдан бери оғзимни очолмай кўркиб юрган эдим». Дўстларидан бири, Бухорода, қизлар билан гаплашганда дадиллик, факат дадиллик даркор, инчунун, бир чеккада колиб кетаверасан, деган эди.

Бадиа билан танишиш мана шундоқ бошланди.

Бу воқеа ошналари Заврак Нишопурий билан Fav-

вос Мұхаммаддан гоятда сир тутилиб, юрагига тушган оташ унга мислсиз шодлик бағишилади. У қандай қилиб Бадиа дикқатини жалб этганига таажжубла-нарди; у ахир Худододбеклар каби күркем ва номдор эмас-ку! У бир мусофир. Меъморнинг зебо қизи наинки Худододбекни, бу хонадоннинг азиз меҳмони Бойсунқур Мирзо дикқатини ҳам жалб этган эди. Кимдир: «Бу қиз амирзодалардан бирининг бοғини обод қилғуси» деганида Маъсума бека: «Йўқ, менинг қизим амирзодаларга канизакмас, фукарога малика бўлади», деган эди.

Чарчаб келиб, хонада ётган Зулфиқор хаёлан яна Бадиа атрофида чарх урди: «Ёки бу қиз мени зериккани учун эрмак қилиб, илтифот кўрсатяптими?! Ёки бу илтифот соҳтами?» — деб ҳам ўйлади. Ҳиротлик қизларнинг анча очиқ бўлишини эшитган эди. Аёлларни бухорочалик ўраб-чирмаб ташлаган шаҳар дунёда бўлмаса керак, дерди у ўзига ўзи.

Орадан бир соатча вакт ўтгач, Бадиа ташқари ховли ўртасига келиб, шогирдлар хонасига мурожаат қилди.

— Оғайи Заврак! Ҳо, оғайи Заврак!

Уни чақирганининг сабаби бу шогирд отасининг ишончини тамоман қозонган, ичкари ҳовлига ҳам бемалол кириб юраверар, Низомиддин қилиши лозим бўлган хамма ички ишларни бажаарар эди. Бадиа уни ўз оғасидек чақирап ва тортинмай юмуш буюра берарди. Ҳозиргина кўчадан келиб турган Заврак Нижопурий Зулфиқор Шоший билан Фаввос Мұхаммадга лофт уриб айтиётган гапини чала қолдириб, отилиб, хонадан ташқари чиқди. У Бадианинг чақириғига сусткашлик, лоқайдлик билан карашдан жуда эҳтиёт бўларди, чунки Меъморнинг эрка, яккаю ягона қизи Бадианинг сўзини икки қилишини истамас эди.

— Лаббай, Бадиа бекам! — Бадиа ўз исмига «бекам» сўзини қўшиб айтганни ёқтирас, чунки подшонинг гўзал кенжа қизи Гулгун Ақонинг номига ҳам «Бека» қўшиларди.

— Бу овқатларни олинг! Қўлим толиб кетди! Энди мен сизларни гўдак болаларга ўхшатиб, алдаб овқат едираманми?!

— Узр, бекам, ғофил қолибман.

— Анави бухоролик бизнинг таомимиздан кам ейди. Айтинг, ҳиротликларнинг бемаза таомидан ҳам есин! — Бадианинг бу гапларини Зулфиқор хона ичидан бемалол эшишиб турарди.

— Ундоқ деманг, Бадиа бекам, сиз пиширган таом шу даражада ширин, лаззатли бўладики, ҳали мен вакти-соати билан Нишопурга кетиб қолсан, ҳолим не кечади. Мен бунда ширин таомларга ўрганганман. Мен устодимдан ҳеч ажралмайман, билмайманки менинг Қамаруззамон бекамни биронта бек (Худододбекка ишора қиласди) ёки биронта мирзо олиб кетса, мен унда худога йиғлайман, бир садоқатли ит каби қидириб бориб, охир бекамни топаман, оstonага бoshimni қўйиб, йиғлаб, шу оstonанинг посбони бўлиб қоламан...

— Тошдан ҳам садо чиқди, — деди қаҳ-қаҳ уриб Бадиа, — Нишопурий, мен сизни дарди йўқ кесак дердим. Бу, бухоролик келиши билан таажжуб, сизнинг ҳам товушингиз чиқиб қолди.

— Муҳтарама бекам, аслида сиз ўзингиз ҳам Бухородансиз. Туғилган ерингиз Ҳирот, ота-боболарингиз Бухородан...

— Тушунтириб қўйганингиз учун ташаккур! Сиз, оғайи Нишопурний, ўз фурурингизни ерга ураверманг. Мен сиз айтган бек-мекингизни билмайман! Мен фаяқат отамнинг қизиман. Тўғри, одамзод нурга интилганидек донолик, инсонийлик, мардликка қараймиз...

— Шу уч фазилат, бекам, сизда мужассам.

— Ана энди сиз ўзингизга, илгариги Нишопурийга ўҳшадингиз! Боринг, овқатни олиб киринг! — деди кулиб Бадиа... У жуда мамнун, ўйноқлаб, ичкари ҳовлига кириб кетди. Унинг юришлари, кифтларининг ҳаракати нихоятда чиройли эди. Ҳовлида серрайиб қолган Заврак Нишопурийдан ташқари хона ичидаги Зулфиқор билан Favvos Муҳаммад ҳам деразадан қизни кузатиб туришарди. Ичкаридаги икки йигит ўзини кузатиб, орқасидан боқиб турганини Бадиа ҳам пайқаб юрарди. Зотан, унинг ҳозирги гуфтигўси Заврак Нишопурийдан кўра ҳам кўпроқ ичкарида ўтирган бир йигитга қаратилган эди.

Зулфиқор баъзан бу қиз нима демокчи, дегандай хаёлга чўмар, Бадианинг хатти-ҳаракатлари, қилиқлари, гапларидаги ишора уни чукур ўйлашга мажбур этарди.

VII б о б

МАДРАСА ҚУРИЛИШИДА

Меъмор барвакт туриб, уч шогирди билан бирга ташқари ҳовлида нонушта қилди. Сўнг кўчага чиқишиди — йўл-йўлакай корфармони ҳам олиб, тўппа-тўғри кулоллар маҳалласига боришиди. Кошинпазлар ишида қусур кўп бўлаётгани, ложувард билан зард-қўроғшин гулларини вактида етказиб берилмаётгани ҳақида корфармо Аҳмад Чалабий устодга хабар қилган эди. Бир нимадан норизодирларки, бундай кўнгилсиз ишлар содир бўлмоқда. Илгари мурожаат қилмасалар ҳам, доимо кошинларни вактида етказиб берадиган кулоллар бу сафар нима сабабданdir ишни судрашаётганини Меъмор пайқаган эди. У корфармо Аҳмад Чалабийга ақчадан ёнига кўпроқ солиб олишни тайинлади. Йўл-йўлакай шогирдларига кулол Абутолиб ниҳоятда серзарда, аммо ишига пишиқ одам экани, ортиқча сўз айтмаслик, факат унинг ўзи сўзлаяжагани таъкидлади. Меъморнинг айтишича, Абутолиб ўзидан ўн ёш кичик бўлиб, асли бухоролик экан. Бухородалигида у устодга шогирд тушган. Ўша пайтда ҳам устод ўз шогирди билан эҳтиёт бўлиб гаплашган, ноўрин сўз, нафсониятига тегадиган кичик бир ҳарарат Абутолибни дарғазаб қилиши мумқин экан.

Аммо у раъий келган кишисига жонини берарди, ишлаб чарчамасди. Бунинг устига кўп тақводор, мутаассиб киши эди...

Кенг ҳовли майдонига ёйиб қўйилган сопол идишлар, кошин сополчалар ичида ўтириб, гилвата қуяётган кулол эшикдан меъмор Нажмиддин Бухорийнинг ўзи кириб келаётганини кўриб, ҳангуманг бўлиб қолди. Ҳар гал корфармо келиб ақча бериб, битган ашёларни аравага ортиб кетарди. Меъморнинг пиёда ҳал-

пиллаб эшикдан кириб келаётганини кўрган Абутолиб дархол ўрнидан туриб, истиқболи сари юрди.

— Омонмисиз кулол, бола-чақаларингиз саломатми?

— Худога шукур! Ўзингиз саломатмисиз? — у гилваталик қўлини этаги барига артиб, Меъмор билан омонлашди. Меъморнинг шогирдлари билан ҳам кўришди. Орқароқда турган серсавлат корфармо Аҳмад Чалабийга хўмрайиб бир қараб қўйди-ю, у билан негадир совуқкина сўрашди. — Қани, айвонга марҳамат!

Улар олдинма-кейин, ҳаммалари айвонга ўтишди. Фотихадан кейин кулол Абутолиб идишларга гул со-лаётган шогирдларига чой, дастурхон олиб келишни буюрди. Юқорига чиқиб, чордана куриб ўтирган Меъмор кулолнинг ота-боболарини, айниқса унинг бултур қазо қилган оғаси — Абу Шаҳбозни эслаб, ҳаққига дуо қилди ҳамда унинг беназир усталиги ва худонинг раҳмати одам эканлигини шогирдларига айтди. Кулол кўзига андак ёш олиб, Меъмор унинг оғасини эслаганидан фоятда мамнун бўлди.

— Худойи таоло инсонни ҳамма жониворлардан азизу мукаррам этиб яратди, жонивору ҳайвонотга тўрт оёқ, саккиз оёқ, қирқ оёқ ҳам берди, ва лекин инсоннинг олдинги икки оёғини қўл қилди. У ҳайвонлардан фарқ этарок, тўрт оёқлаб эмас, қад кўтариб, икки оёқлаб юрадиган қилди, — деди Меъмор ўртадаги сукунти йўқотиб. Бундай ривоятларни кулол Абутолиб фоятда ёқтиради. — Бир кичик бола қўлига юз тевани қатор боғлаб берсангиз, унинг орқасидан эргашиб кетаверади. Жониворни инсон учун яратди — сўйиб есак ҳам шикоят қилмайди. Инсоннинг қўли не мўъжизалар яратмоққа қодир, чунки худойи таоло ва таборак уни шундай азизу мукаррам қилиб яратмиш...

Бу гапларни эшитиб ўтирган шогирдлар ҳам, кулол ҳам, корфармо ҳам Меъмор оғзига тикилиб, таажжубланиб ўтиришарди. «Арастуйи замон» — Ибн Сино эмас, меъмор Нажмиддин Бухорий, — дерди ҳамма вакт Заврак Нишопурний.

Кулолнинг шогирдлари меҳмонлар олдига дастур-

хон ёзиб, чой узатиши. Чой устида Меъмор билан кулол ўтмишни эслашиб, «як пуф» воқеасини тилга олишиди.

...Абу Шаҳбоз билан Абутолибни қадим Бухорода, оталари етаклаб келиб кошин пишираётган Нажмиддин Бухорийга шогирдликка бериб кетган эди. Улар занжиларга ўхшаш лаблари қалин, қора болалар эди. Ака-ука уста қўлида уч йил ишлашибди — тезроқ ва тажанг Абутолиб уч йил деганда уста Нажмиддин Бухорийнинг розилигини олмай, ўз ҳовлисида хумдон қуриб, кошину идиш ясай бошлади. Бир ой деганда бу серғайрат, чандаст Абу Толиб ҳамма ёқни кошину идишларга тўлдириб юборди. Акаси Абу Шаҳбоз эса устадан ажралмади. Укасининг қилаётган ишига ҳавас билан каради. У укасини тез кунда бойиб кетади, деб ўйлади. Нажмиддин Бухорий ҳам тажанглик қилиб ажралиб чиқиб кетган Абу Толибга ҳеч нима демади. «Ҳа, энди уста бўлди, кошинни яхши ясайди, кучкудрати танига сифмай, мана ҳамма ёқни молга тўлдиради. Бу яхши! Бухородек шаҳри азимда юзта кулол бўлса ҳам оз. Бозорларда идишлар кўпайсин, янги биноларга сирли сополлар кўпроқ етказиб берилсин», — деди. Шу сабабли акаси хижолат бўлмасин, деб, Абутолибнинг мустакил иш тутаётганига уста монелик кўрсатмади. Аксинча, «палапон қанот ёзиб, парвоз этмоғи қандай яхши», деди. Кошинпаз учун карноб тупроғи, оқ қум, ангоб лойи, лух, жўша ҳамда тоғ жисмлари бўлмиш — малгащ, магил ҳам, мис тўпони, қўрошин тўпони керак. Булар етишмаганда, Нажмиддин Бухорий Абутолибга хом ашё бериб, карашиб ҳам турди. Лекин иш бошқачароқ бўлиб чиқди: бир ойдан кейин боши қотиб уста ҳовлисига хомуш чиққан Абутолиб, Нажмиддин Бухорий олдига бир даста ложувард кошинларни қўйди.

— Уста, ясаган бу кошинларимни икки бор хумдонга қаладим, — деди Абутолиб устодга мурожаат этиб, — икки сафар ҳам улар жилвасиз қўтириб бўлиб чиқаёттир. Салкам уч йил қўлингизда ишладим, бунда ҳам ўзим неча бор хумдонга қалаб, ўт ёқдим... Шу ҳовлида қилган ишимни ўз ҳовлимда килдим, аммо менини қўтириб бўлиб чиқаётгани фоятда таажжуб! Буни

каранг, ложуварду зардлар усти ғадир-будир. Шаккоклик қилдимми, бир ишим ёқмадими, меҳнатларим зое кетмоқда. Қартайган волидамизга, укаларимга ёрдам беролмай, андуҳдаман. Мана бу мингдан ортиқ кўтири молни бозорга олиб боролмайман...

— Бўтам, сиз кошинпазлик ҳунаридаги ҳамма сирларни дикқат билан ўрганганмидингиз?

— Ҳа, — деди Абутолиб.

— Йўқ, бўтам, сиз шошдингиз! Сиз устани рози килмай, ажралиб чиқиб кетдингиз. Кошинпаз кулолларни тўпламадингиз. Сиз кошинпаз гул солиб, охири «қўрғошин» бўёғи қўйишда бир пуфлаб юборишини унутдингиз. Бунда кошин гули устидаги ғубор учиб кетиб, хумдондан ойнадек текис ялтираб чиқиш сирини фаҳмламадингиз. Мана, барчаси кўтири бўлиб қолди. Мана шу як пуфни сизга айтмаган эдим, — деди.

Абутолиб учинчи хумдонни мен айтгандай қилди. Кошинлари текис, ярқираб, бизникidan ҳам аълочиқди. Шогирдим жонлик сўйиб, пиrimизга бағишилади. Мана, шундоқ воқеалар ҳам бўлган, — деди оғзини очиб ўтирган Зулфиқору Завракка Меъмор.

Абутолиб бўлса меҳмонлар олдида завқланиб, фахрланиб ўтиради. Бир пиёла чойдан кейин Меъмор асосий гапга ўтди.

— Азизим, не сабабдан кошинларни вақтида ясаб бермадингиз, равоқда ишлаётган усталарнинг қўллари тўхтаб қолди? Мана, корфармо Чалабий жаноблари менга шикоят қилдилар. Ҳабарингиз борки, рабиул аввал ойига оз кун қолди, бу ерга Мирзо келиб, ишларни кўрмоқчилар. Мен ўйлайманки, яна катта маблағ берадурлар...

— Тўғри, устод, — деди бошини кўтариб Абутолиб, — кошин, «гулдаста» учун кўрғошин бўёқ, чўян бўёқ, ложувард... ясаб бериш бизга идиш ясашга нисбатан ҳам қиммат, ҳам қийин. Лекин биз бунга қарамасдан, азбаройи сиз устод учун ишламоқда эдик. Мана, икки ойдирки, корфармо жаноблари бизга бир танга ҳам берганлари йўқ. Биз бозордан лух, оқ кум, кўрғошин, ўтин олишимиз даркор. Хонадонимизда тошу тарози ҳам кўтарилиб кетган...

— Мен кулолга айтган эдимки, — дея қизариниб

корфармо Ахмад жавоб қилаётган эди, Меъмор ишора билан уни тўхтатди. Корфармо бир гувраниб, бўзариб, жим бўлиб қолди.

— Дарҳақиқат, пулсиз ҳеч иш қилиб бўлмайди, кулолнинг гаплари ўринли. Айб бизда. Маблағнинг кўпчилиги фишт қуяётганларга, ганчга мардикорларга бериб юборилибди. Кошинга шошадиган еrimiz йўқ, деб корфармо жаноблари хато қилганлар, буни эътироф этамиз. Қани, Чалабий жаноблари, пулни чиқаринг!

Корфармо ёнидан тилло ва кумуш тангалар солинган халтачани чиқарди.

— Бу уч юз шоҳрухия, — деди Меъмор корфармонинг қўлидан халтачани олиб, кулол Абутолибга узатиб, — буни сарф қилиб туриңг. Яқин кунларда, худо хоҳласа, ўзим яна пул олиб келаман.

— Ташаккур, ташаккур! — кошинпаҳ ниҳоятда, хурсанд бўлиб кетди. — Э, устод, сиз ўзингиз овора бўлманг, мана бу шогирд укаларим хабар қилсалар, ўзим бораман. Сиз безовта бўлманг.

— Кошинларнинг сифатига эҳтиёт бўласизлар.

— Албатта.

— Қани, турдик! — Меъмор юзига фотиха тортди.

— Шошманглар, овқат қилиб юбораман, — деда мулозамат кўрсатди кулол мамнун халтачани чўнтағига соларкан.

— Азизим, вакт жуда ўлчоғлик. Ишни бир оз жадаллаштириб юборасиз.

— Худо хоҳласа.

— Устод Қавом кишилари ҳам иш буюрганми?

— Йўқ. У зот аксар Васиятиддин, Насриддин кулолларга буюрадирлар. Бизлар ясаётган кошиннинг ложувард бўёғини кимёгар Мухаммад Сабзаворий тайёрлаб берганлар. Мухаммад Сабзаворийни ўзингиз яхши биласиз, Шаҳобиддин Дулдайнинг уруғлари...

— Жуда маъқул, — деди Меъмор кулол билан кўча эшик томон юра туриб, — бола-чақаларингиз доимо саломат бўлсин, ўзингиз соғ бўлинг, хунарингизга ривож тилайман!

— Саломат бўлинг, устод!

Улар хайрлашиб, жўнаб кетишли.

Меъмор корфармо Аҳмад Чалабий билан ёнма-ён, ўч шогирд орқада, мадрасага келишди. Янги мадрасаси нинг пештоқлари ҳам фалакка бўй чўзиб турарди. Пойтахт салобати кундан кунга ошиб, Мирзо мадрасаси ҳукуматни эмас, Ҳирот ахлиниг ҳам диққатини торта бошлади.

Кулоллар билан тил топишиб, ложувард кошинларни ўз вақтида етказиб беришажагига ишонган Меъмор жини ёқтиримайдиган, амалпарст Аҳмад Чалабий билан ҳам очилиб, қувнаб гаплашарди. У кета туриб, бу ерлик машҳур мунажжим Алоуддин Али ибн Мухаммад ал Кушчини Улугбек Мирзо Самарқандга чақириб олиб, не-не иззату икром кўрсатганларини ўйлади. Кешдан келган меъмор дўсти ҳамма бўлган воқеани жуда муфассал айтиб берган эди. Улугбек Мирзо аҳли илмга бениҳоя ғамхўрлик қилаётгани, меъмору мунажжимлар, муҳандису табобат мутлақо таъқибдан йироқ экани, инъому эҳсонлар олаётгани Мовароуннаҳрдан ўтиб, Ҳурросону Ирокқача етган.

Мунажжим Али Кушчи Кеш ва Китоб шаҳарларига яқин Қутчи қишлоғида туғилган бўлиб, унинг Самарқанд жанубидаги Кўҳак тоғи этакларида кичик расадхонаси ҳам бўлган. Унинг отаси Фозил Қутчи илму маърифатга берилган киши бўлиб, Мирзо хизматида бўлган. Ўғлининг Салоҳиддин Румий қўлида шогирд бўлиб, алжабр ва мунажжимликни ўрганганигини эшифтган Мирзо Улугбек Алоуддинни дархол Самарқандга чақириб, олимлар орасига киритади, ҳовли-жой қилиб бериб, доимо ўз атрофида тутади. Али Кушчининг донғи мавлоно Лутфий каби ҳамма скни қамрайди... Меъморнинг ҳам Али Кушчига ҳаваси келиб, вақти соати етиб, уни ҳам эъзозу икром қилишларига ишонарди. Али Кушчига «Фисоғурси замон» леган ном ҳам берилгани унга етиб келган эди. Аммо Субудой Мовароуннаҳр ва Ҳурросон ҳалқини гиёҳу кўкатни кўп ейди, булар инсон эмас, молга яқинроқ, леб баъзи шаҳарларни тамоман қириб-йўқотиб ташлагани, улуғ сulton шу сабабли ҳам мўғул хоқонларини йиққани ҳақида Улугбек Мирзо хўб айтганини ўлади. «Бизлар кўкат емаймиз, кўкат ейдиган молларни еймиз. Бу элатлар чўп ейдиганларни эмас,

чўпнинг ўзини еркан. Демак, булар ҳам мол. Шу сабабли биз икки оёқлаб юрадиган бу молларни қириб ташлаб, отларимиз хўрагини улардан асрамоғимиз лозим...» деган Субудой ўзининг ярим ёввойи, йиртқич қўшинига. Дараҳту экин-тикин қилмайдиган мўғул аймоқлари асосан гўшт, сут, ёф... истеъмол қилиб, ердан униб чиқадиган гиёҳ, ноку шафтоли, узуму анору анжирни кўрмаган, емаган, эдилар. Яъжуҷ-маъжуҷдек ёпирилиб келган, отда чопиб, қилич кесишга уста мўғуллар Мовароуннаҳр ва Хурсоңда қалъаларнинг нечоғлик мустаҳкам турганига, баъзан саркардаларнинг заковату қаҳрамонлик кўрсатганига қарамай, мўри-малаҳдек ёпирилиб кирадилар. Улар қальяю арклардан ташқари, масжиду мадрасаларгача ер билан яксон қиласдилар. Не-не бинолар кунпаякун бўлди. Самарқанду Ҳирот, Бухорою Машҳад хозирги пайтда қурилаётган бинолар — йиқилган Хурсоңу Мовароуннаҳр мамлакатларининг бошқатдан қад кўтариш даври эди. Бу давр, меъмор Нажмиддин Бухорий таъбирича, Амир Самарқанд таҳтига чиқишидан бошланди. Бу давр, мўғул Илёсхўжа қўшини билан беомон жанг қилиб, Самарқандни сақлаб қолган сарбадорлар давридан бошланди. Мана, тараққиёт даври келиб, шаҳарлар қайта қурилмоқда, деди ўзига ўзи Меъмор. Аммо Афросиёбу Сиёвуш ҳам, Искандар ҳам, Чингизу Доролар ҳам ўтди... Подшоҳлар ўтаверади, аммо биз солган иморатлар доимо қад кўтариб тураверади. Биз меъморлар ўлим билмаймиз, мадрасалар пештоқидаги ложувард кошинлар бизнинг кўз кора-чиғимиздирки, доимо ярқираб туради, биз авлодларни кўраверамиз...

Меъмор баъзида шундай узоқ хаёлларга борарди.

VIII б о б

ТУТҚУН УСТА ЖЎРЖИЙ

Одатдагидек Меъмор эрта билан уч шогирдини олиб мадраса қурилишига келди. Кичик маҳкамада Аҳмад Чалабийни кўрмагач, мадраса ҳовлисига ки-

риб, зина ва ҳавозалардан кўтарилиб, «гулдаста» пеш-
тоқига кошин ёпиштираётган усталар ёнига чиқди.
Ишлаётганлар бошида қизриш, малла ранг салла, этик,
одми чопони устидан камар боғлаб олган. Улар Меъ-
морга кўзлари тушиши билан бир дақиқа ишни тўхта-
тиб, бошт ирғаб салом беришди. Орқасида фишт кўта-
риб келаётган йигитлар ҳам «Ассалому алайкум, ус-
тод!» деб камоли эҳтиром билан ўтиб кетишарди.
Чехраси очиқ, хушмуомала Меъмор учраган киши-
ларга аввалоқ салом беришга ошиқар, кишилар би-
лан илиқ омонлашар эди. Тенгқурлари билан бир
лаҳза ёнида тўхтаб, саломталигини, бола-чақалари-
нинг аҳволини сўрарди, ўраб олган тахта қофозларни
ўир муддат қўлтиғига қисиб, ошнолари билан қўл
беришиб омонлашар, бирпас тўхтаб, ишнинг бориши,
кам-кўсти бор бўлса, ёрдам беришга тайёр эканини
айтар эди. Ҳамма нарсадан саломатлик қиммат эка-
ни, ҳавозаларда эҳтиёт бўлиб юришни, Мирзога ваъ-
ла қилинган муддатда бу иш интихосига етиши ло-
зимлигини қўшиб кўярди. Қурилиш ишига янги кел-
гани кишилар Меъморга тикилишар, унинг келаётга-
нини кўриб, йўл бериб, чеккада қўл қовуштириб ту-
ришар эди. Баъзилар зиналарга сочилиб қолган фишт
бўлакларини, кесакларни дарҳол йиғишириб олиб таш-
лардилар. «Дил ба ёру даст ба кор» нақлини машо-
ниҳлар эмас, меъморлар айтганлар. Мехнат қилгин —
снодат топасан, дейди халқ. Унинг отаси ҳам бу гап-
ни — мехнат кишига камол беришини, танбаллик,
совуққонлик кишини охири хор қилишини ўғлига так-
рор тақрор айтар эди. Унинг кўз олдидан серғайрат,
тиришқоқ йигитларни кўрганда қувнаб, «Баракалла!»
тенидиган отаси ўтди. Меъмор мадраса томида юриб,
шунларни кўздан кечирди; ганчхок қориб, фишт тераёт-
санлар ёнида тўхтаб, қурилиш бошлаган кун — ер
клинидан то хозиргача ғайрат кўрсатиб ишлаётган
Ҳасанбек, Ҳусайнбек деган aka-укалар билан омонла-
ниб, уларга омад тилади.

— Аввалимбор, — деди Меъмор уларга, — сиз-
ни худо ярлақасин, бунчалик инсофу оқибат би-
лни хизмат қилаётганингиз бизни қувонтиради. Икки-
чимни, биз, корфармо билан сизлар хусусингизда Мир-

зога яхши сўзлар айтдик, у зот лутфу эҳсонидан сизларни баҳраманд қилгай.

— Миннатдормиз, — деди Ҳасанбек, — танжонимиз соғ экан, хизматимизни аямаймиз. Сиз мухтарам устоднинг меҳрибончиликларингиз бир файратимизга ўн файрат кўшади. Дил ба ёру даст ба кор...

— Хизмат ҳақини вақтида олиб турибсизми?

— Ҳа, оляпмиз...

— Тўғрисини айтмоқ керак, — деди Ҳусайнбек акасига қараб, — устод, анчадан бери бизга ҳақ тўланмади!

— Сиз хижолат бўлманг, — деди Ҳасанбек Меъморга, — биз ўзимиз корфармо Аҳмад Чалабий жанобларига айтиб, ишлаган кунларимизни ҳисоблатамиз.

— Мен ҳам корфармога айтиб қўяман, — деди Меъмор, — вақтида ақчаларни бериш керак. Кечикириб бермоқлик учун ҳеч бир асос йўқ, ақчаларни хазинадан сўралган муддатда олинмоқда.

Гапга диққат билан қулоқ солиб турган Заврак Нишопурий бу гапни тош қалами билан дафтарига қайд этиб қўйди. Меъморнинг илтимоси билан у доимо бундай гаплар ёддан кўтарилимаслиги, устодга эслатиб туриш мақсадида қайд этиб қўярди. Меъмор aka-ука билан хайрлашиб, ҳавозалар орқали яна ҳам баландга — мадраса томига кўтарилди. «Ҳа, хунгарзор!» — деди ичида корфармодан ранжиб. Меъмор кетидан уч шогирди — Заврак, Зулфиқор, Favvoslar келарди. «Иш билганга бир танга, гап билганга минг танга» бўлибди, — деди Меъмор Зулфиқор билан Завракка қараб, — корфармо жаноблари тушуниб бўлмайдиган одамлар-да!»

Мадраса томи киррасида туриб, пастдан пакирда арқон билан сув тортиб олаётган жингала сочли, кирра бурун йигит ўзидан уч-тўрт қадамча нарида ришт тарошлаб ўтирган кекса одамга ўзга тилда бир нима деди. Кекса одам бир оз ўғирилиб, пастдан эҳтиёткорлик билан чиқиб келаётган Меъморга қаради. У қараашга қарадиую пинагини бузмай ўтираверди. Ёш йигитчага бир нима деб, қисқагина ғўлдиради. Меъморнинг сезишича, бу уларнинг ўз она тилида эди.

Тахминан: «Кўзингга қара! Эҳтиёт бўл!» дегани бўлса керак. Бундан икки кун илгари бир одам мадраса томидан кулаб тушиб, шу лаҳзанинг ўзидаёқ тил тортмай ўлган эди.

— Уста Жўржий, ассалому алайкум! — деди Меъмор унга яқинлашиб. Унинг асл номи ўз тилида Георгий бўлиб, қурилишдагилар Жўржий деб атардилар.

— Келинг, Меъмор, ассалом! — деди у кавказликларга хос викор билан наридан-бери ўрнидан туриб. У Амир Темур вақтида Кавказ жангига асир олиниб, бу томонларга келиб қолган мингларча усталарнинг бири эди. Кейинчалик қайтиб кетишнинг иложини тополмай, Ҳиротда қолиб кетди. Катта ўғлининг асли оти Иосиф бўлиб, бу ерда абжир ва кўркам йигитчани Юсуфбек, деб аташарди. Ота-бала туркий тилни ҳам билишар, ярим қул сифатида ҳуқуклари чегараланган бўлишига қарамай доно ва дўсара, сермуқолот бўлганликлари сабабли таъқибу камситишлардан мустасно ишлашар эди. Улар ўз динларига мустахкам бўлиб, оиласда фақат гуржи тилида сўзлашар, ўзларининг урф-одатларини батамом ўрнига кўйиб яшашарди. Гуржистондан ҳайдаб келинган асирлар Ҳурносон шаҳарларида кўп бўлиб, оғир ишларга ташланарди. Улар, айниқса, Мовароуннаҳрда кўп эди. Самарқандда эса, ўзларига алоҳида «Даҳаи насарон» тузиб яшардилар.

— Хол-аҳволингизни сўрай деб келдим, — деди Меъмор, — ишлар қалай? Бардаммисиз?

— Бардамман, Меъмор. Ишлар ёмон эмас, — деди серсокол уста Жўржий Меъморга рўбарў туриб, унинг кўзларига тикилиб. — Биз, гуржилар ҳеч қачон ишимиз ёмон деб айтмаймиз. Тангрининг буюргани шу ёкан. Локин, Меъмор, сиз яхши одамсиз, дилимга ёқасиз. Шу сабабли, сизни кўрсан кўнглим ёришади. Мана, мадраса ҳам битишга яқинлашяпти.

— Худди шундок яхши фикр менинг кўнглимда ҳам бор. Қисмат экан, бу ерларда юрибсиз, уста Жўржий. Бу томонларга ризқингиз сочилган экан. Сизнинг кўп инсофли одам эканингизни биламиз. Шундок. Қани, менга айтингчи, сизга ҳақ тўландими?

— Ҳақ тўланади, Меъмор. Биз фарибларнинг ҳақимизни хеч ким ололмайди. Мусулмонлар бирорнинг ҳақини емаслигини биламиш. Аммо сиз менга амирзода билан гаплашаман, деб ваъда берган эдингиз?

— Ёдимда.

— Етмишдан ошдим.. Она ерим Гуржистонни бир кўриб, ўша ерда ўлай. Мана, ўғлим Иосиф она ватани — Гуржистонда қолиб яшасин. Ўз она ютидан ажралган кишининг «бардамман», «ишларим яхши», деганига ишониб бўлмайди. Ўзимиз кулсак ҳам, дилимиз йиғлайди, Меъмор. Сиз зукко одамсиз, буларнинг барини яхши тушунасиз. Бойсункур жаноби олийларига марҳамат қилиб, биз ҳақимизда яхши сўзлар айтинг, токи бизлар мадрасани битказиб, она ютилизга кетайлик.

— Хафа бўлманг, дўстим Жўржий, мен Мирзо билан албатта гаплашаман.

— Саломат бўлинг! Сиз — фикри тиниқ зиёли бўлганингиз учун ҳам биз чекаётган айрилиқ ситамини сезяпсиз. Амирлар, сардорлар, сарбозлар буни қаёқдан билади! Бизнинг майда-чўйда ҳокимларимиз бир-бири билан иноқ бўлмагани, бирлаша олмагани сабабли катта кучга эга бўлган истилочининг ҳамласига дош беролмадик. Тоғ чўққиларидағи метин қалъалар ҳам дош беролмай қулади. Хотинларимиз, қизларимиз олиб кетилди. Бундан ортиқ ҳақорат борми, Меъмор! Гуржи ҳалқи ниҳоятда доно ва уста ҳалқ, яхшиликни биладиган, тарихан бой ҳалқ. Буни сиз яхши биласиз. Тутқунлик азоби хеч кимнинг бошига тушмасин!

— Уста Жўржий, мен сизнинг изтиробларингизни қалбан сезиб турибман. Мана, шогирдларим ҳам сешиб турибди. Худо ниятингизга етказсин, о-мин! — Меъмор юзига фотиҳа тортди. Гуржи чол бўлса кўзиға ёш олиб, христиан одати бўйича, ўз тангрисига сифинди. — Дунё шундок экан, Жўржий, мана гўё биз мовароуннахрликлар, хурносонликлар зобиту сиз забт этилгансиз. Дунё тенгсизликдан иборат. Сизларни тутқун қилган султон Амир Темур саройидаги бир элчи — «Бу янги оламда кўзга ташланган, оврўполик саналмаган ҳар қандай кимсанни инклар деб атаймиз»,

деб ёзибдир. Демак, сиз билан биз ҳам сахройи «инк»-миз. Бу гап Бойсункур Мирзони ҳам, устод Қавомни ҳам дилгир қилган. Сиз ўзингизни мағлуб атаб, бизни ғолибу зобит деб атаяпсиз. Иккинчи бир кимса борки, у иккимизни ҳам тан олмайди. Дунё шунаقا, уста Жўржий. Фақат хафа бўлманг, сабр қилинг, сабр таги раҳмон...

— Ташаккур! — деди гуржи устаси.

Меъмор уста Жўржий ёнидан хайрлашиб жиларкан, хаёлидан ялт этиб ошнаси устод Қавом ўтди. Жўржий илгари ўғли билан бирга унинг қўлида ишларди. Димоғдор ва ниҳоятда кибор устод Қавом гуржиларга ёқмади; меъмор ёнида бир-икки шартта сўзлик қилган Жўржийни ҳайдаб юборди. Бундан ортиқ жазо беришдан ўзини тийди, сабаб, устод Қавом бошка тутқун кишиларнинг қаҳрли нигоҳларидан ҳайикди. Катта хизматлар қилган, Ҳиротнинг энг мўътабар зотларидан бўлган устод Қавом ўз манфаати йўлида ҳеч кимни юз-хотир қиласлиги, унга сояси тушадиган ҳар қандай кимса юзига чанг солиши Меъморга маълум эди. Ошнасининг бундай димоғдор ва мансабпаст феълини билган Нажмиддин Бухорий баъзан ундан нарирокда юрарди. У билан яқинлашган чоғларида дарранда ёнида турган жонивордек ўзини эҳтиёт сақларди.

IX б о б

ТУЯДЕК ҚОМАТ БЕРМА, ТАРИҚДЕК АҚЛ БЕР

Ҳасад — занглаған ханжардирки, жарохати маддалаб кетади. Одамзоднинг сиртидан ҳеч нарсани пайқаб бўлмайди, дерди Меъмор баъзан ўзига ўзи, зару шуҳрат ўлсин, унинг кетига тушган инсон мана шундай ҳасадгўй, икки юзламачи, ўз манфаати йўлида ғоятда йиртқич бўлиб қолади. Бойсункурнинг Меъморга кўрсатган бир илтифоти устод Қавом ҳаловатини бузди; Нажмиддин Бухорий жizzаки, қулларга ҳам, давлат душманларига ҳам ён босади, деган гапларни

амирзода қулогига етказиб, неча вақтгача Меъморга ола қаратиб юрди.

Аммо мавлоно Лутфий амирзодага: Меъморга шубҳа билан қарамаслик кераклигини ишора этиб, унга ўз қўлидаги ниҳоятда чиройли кўчирилган «Калила ва Димна» китобини берди. Қунт билан ўқиб чикишини, айниқса, «вазири аъзам» — Ҳўқиз билан Қоплон ўртасидаги фитнага алоҳида эътибор беришини маслаҳат кўрди. Бу гаплар кейинчалик меъмор Нажмиддин Бухорий қулогига ҳам етган эди. Энг ёмони шу бўлганки, кирқ йил тажриба қилиб, «бинонинг кунгайлик сурори» кашфиёти меъмору усталарга маълум бўлганида, шу кирқ йиллик ошнаси бу ишни ўз номи билан боғлашга уринди. Гўё меъморчиликдаги бу мўъжиза қадимдан маълум; «Самарқанд, Бухоро, Ҳирот, Хива меъморлари буни аввалдан қўллаганлар. Қорахонийлар ва юнонлар салтанати даврида ҳам бу ишга катта эътибор берилган», — деб, Бойсунқур Мирзонинг ҳаяжонини босиб қўйган эди. Меъмор Нажмиддин Бухорий бино ҳовлиси ва хужраларга офтоб тушмай салқин бўлишилиги эмас, аксинча, панжара ва эшик орқали хужраларга офтоб тушиши, лекин саратонда ҳам салқин бўлиши, эрталаб ва кечга яқин офтоб нурларида мадраса биноси ниҳоятда серфайз ва сурурлик бўлишини кўзлаб, пойдевор қўйишни тор кўчаларга мўлжаллаб эмас, кунгайлиги, катта биноларнинг бир-бирига мутаносиблигининг хандасавий ҳисобини аниқлаб, кейин ишга тушар эди. Катта бино атрофида очиқлик бўлишини лозим топарди. Мирзо Улугбекнинг таҳтга ўтириши билан Ҳўжайи жаҳонда, Бухорою Самарқандда мадраса куриш ниятини эшитган меъмор Нажмиддин Бухорий ҳамкасб ёр-биродарларига нома йўллаб, бу олижаноб ниятни жон-дили билан қўллаб-қувватлашни, бу мадрасани Жоме масжиду Минораи Калондан узокда бўлмаслигини, «кунгайлик сурори»га алоҳида эътибор бермоқ зарурлигини айтган эди. Нажмиддин Бухорийнинг Бухоро билан алоқаси ошнаси Қавомга унча ёқмасди. Булар ҳам ҳолва, лекин Меъморнинг баъзида қизишиб кетиши, гўзаллигу сифат борасида маҳкам туриб, усталилар билан қаттиқ тортишуви, умум манфаатини

қўзлаётгани, пулни ортиқ исроф қўлмаслик... бу ортиқча хатти-харакатларини устод Қавом «исёнкорлик» деб биларди. Нажмиддин Бухорийнинг ота-боболари сарбадорларга алоқадор бўлганлиги уни кўкрагидан эзib турар, бу «то қиёмат ювиб бўлмас гуноҳ» кўпдан бери азоб бериб келарди. Қачонки у қизишиб ортиқча харакат қилса, ошнаси шу мозийни қайси йўл биландир эслатар эди.

Меъмор икки фарзанди — катта давлати билан ҳам фаҳр этарди. Айниқса, гўзал қизи Бадиани кичикигидан эркаларди, у ўзининг сезгир ва ҳозиржавоблиги билан отасига тортган. Қизи бўйига етганида ҳам унинг наздида тўрт яшардек кўринарди. Баъзида туғилиб ўсган Бухороси хаёлини тортиб кетар; ота-боболаридан эшигтан шаҳар тарихи, чеккан жабру жафолари кўз олдидан ўтарди; Чингизхон от солиб келиб, Минори Калон тагида фалакка бўй чўзган бу обидага маҳлии бўлиб қолибди. У бармоқларини тишлаган ҳолда минора тепасига тикилиб, бошидан тумоғи ҳам тушиб кетибди. У атрофдаги бош эгиб турган кекса бухороликлар сафи олдидан от солиб ўтиб, Жоме масжиди ичига кирибди. Бош эгиб турган имомнинг соколидан ушлаб, ҳакорат қилибди... Имом «Шаҳримиз вайрон бўлмасин, одамлар кирилмасин, деган мақсадда бизлар бош эгиб, сенга таслим бўлган эдик. Сен бизни ҳакорат қилдинг! Сен босқинчисан!» — деган экан, мўғуллар шу лаҳзанинг ўзидаёқ унинг бошини кесишибди. Юздан ортиқ бош кесилиб Жоме масжиди ичидағи қудуққа ташланибди. Бухоро аёллари, қизларини мўғуллар булғаб, кўпларини ўзлари билан бирга олиб кетибдилар. Не кунларни бошдан кечирган менинг бечора Бухором, деди Меъмор ўзига ўзи. У ҳозир жуда узоқдалигига қарамай миноралари, кўкўпар мадрасалари шундоқ ўзига кўриниб кетгандай бўлди. Доимо қакроқ бу азим шаҳар атрофидаги Шахри Ҳайбара Ворзанза билан Варахша харобаларини ҳам хаёлига келтирди. У Мовароуннахр тупроғини кўмсади.

Ховлида иш қилиб юрган Бадиа кекса отасининг хаёлларидан тамоман бехабар эди. Отанинг кўзи фарзандида эдию, хаёллари она шаҳри Бухорода, ёшлик йилларида эди.

Нажмиддин Бухорий кечкурун уйга ғамгин қайтиди, уни Бадиа чарчаган хаёл қилиб, хонтахтага таом қўйди. Меъмор ҳар кунги одати бўйича оила аъзолари ёки ташқари ҳовлига чиқиб, шогирдлари билан буқунги қилинганд иш ва эртанинг режаси, одамлар ҳақида гаплашиб ўтиrmай, ётиб ухлаб қолди. Кейинги пайтларда кўп тажанг бўлиб турарди. Бадиа ҳам, онаси ҳам устод Қавом ёки Аҳмад Чалабий яна бир нима деб отасининг феълини айнитдими, деб ўйлашарди. Ёки мадраса қурилишидан нуқсон топилдилими? Ҳар хил хаёллар она-бола фикрини қуршарди. Низомиддин бўлса тамоман парвойи фалак. Отанинг андухи эрта билан нонушта чоғида маълум бўлди; ганчхок қориб, юқорига олиб чиқиб берадиган бир аёлманд, камбағал мардикор бошига кулфат тушибди. Боласи кўп бу мардикорнинг ўн бир яшар қизи кичик укаларини уйи рўпарасидаги тезоқар Инжил анҳори бўйида ўйнатиб юрганида, икки яшар укаси югуриб келганича, думалаб сувга тушиб кетибди. Қизча дод деб, чапак чалиб анхор бўйида у ёқдан-бу ёққа югурибди, лекин укасини кутқариб ололмабди. Нима қилишини билмай чинқириб ўтирган қизча «дадам келсаллар мени урадилар», деб ўзини сувга ташлабди. Икки яшар боланинг ўлигини буқун топишибди, аммо опасини топиша олмабди... Бу воқеани эшитиб, Меъморнинг юраги санчиб кетди. Бултур минора — «гулчамбар»га кошин ёпиштираётган киши қулаб тушганида ҳам худди шундок бўлган эди. Меъмор корфармога мардикорнинг уйига бориб, акча бериб келишини тайинлади. Бир иморат битганича неча одам бу дунёдан ўтишини, қанча фожиали воқеалар бўлишини, бундай аянчли ҳоллар кўп бўлаётганини эслаб юраги сиқилди. Ситамгар фалакнинг гардишидан нолиди. Фариб-ғураболар кўп ситам чекаётганини ўйлаб, хафа бўлиб кетди... «Дунёнинг ҳамма ташвиши сизда, отаси, — деди Маъсума бека Меъморга тасалли бермокчи бўлиб, — бу иш ҳам худонинг иродаси. Бандасининг қўлидан ҳеч нима келмайди. Кейинги пайтларда асабингиз кўп бузилмоқда, ўзингизни қўлга олиб, эҳтиёт бўлинг». Қизи Бадиа ҳам онасининг гапларини тасдиқлади.

Корфармо Аҳмад Чалабий кирқ ёшларга борган, йўғон, қаншари паст, кўзлари ўйнаб турадиган сергап одам. Ўзининг фоятда киришимлиги, мансабдорлар олдида сертакаллуфлиги, серҳаракатлиги билан эътибор козонган. У илмдан мутлақо бебахра бўлишига қарамай, Улугбек Мирзо олиб бораётган ишлардан энсаси қотарди. Тахсил кўролмай, мадрасадан ҳам кетиб, Бозори Қандаҳорда отаси дўконида мол сотди. Кейинчалик устод Қавом эътиборига тушиб, унинг тавсияси билан Мирзодан иш олган эди. Шаҳар четида — дала жойда бўлган бир йигитда «танҳорат» учун холи жой қидириб, бир тўнка орқасида ўтирган Бойсунқур Мирзога юзини тескари қилиб бориб, кесак узатган. Шуши, жуда муҳим иш қилганлигидан ўзи ҳам шод бўлиб, устод Қавомнинг ёрдами билан янги курилаётган мадрасага корфармо этиб тайинланди.

Курилиш Меъмор лойиҳаси ва унинг бевосита ражбарлиги остида бўлгани билан, моддий манба — одамларни ишлатиб ҳақ тўлаш, иншоот учун ғишту ганч, ёвочларни келтириш — унинг зиммасида. Корфармо курилишда бевосита ишлаётган юзга яқин мардикору усталар билан бирга аравакашларни ҳам ўз измида сакларди. Ўзи асли Чалабий хўжа деган сарроғнинг ўғли. Мадраса курилиши ёнида икки хонадан иборат унинг ихчамгина маҳкамаси бўлиб, бу ерда баъзи кунлари меъмор Нажмиддин Бухорий ҳам қорозларни ёзиб, лойиҳани мадрасанинг баъзи бўлак тасвирларини кўздан кечиради. Ёнидаги муҳандису усталар, шогирдлари билан муҳокама қиласади. Оби ғишт, ложувард кошин, ганҷхоннинг нисбатини, мустаҳкам қотишини кўздан кечирмоқ мақсадида улардан намуна олиб келиб кўришарди. Бундек маслаҳат мажлисларда маҳкамама соҳиби, аммо илму фандан узок Аҳмад Чалабий ҳам бир чеккада эснаб ўтиради. У, Меъморнинг муҳандис билан равоқ ва баланд девор бурчаклари, гумбазнинг ҳандасавий уч бурчак, тўрт бурчак чизикларини ҳисоб қилиб чиқаётганларини кўриб ўтиради-ю, лекин ҳеч бирига акли етмасди. Кўнглила, «ҳа, бу ҳамма ҳисоб-китобларнинг отаси ҳам, онаси ҳам акча. У менинг чўнтағимда. Ақча бор экан, бу ҳандасавий чизикларинг чизилаверади, деворлар ҳам

кўтарилаверади. Бу ақча тугар экан, фиштин деворлар ҳам кўтарилган жойида тўхтаб қолаверади. Тилло тангаларнинг қудрати зўр», дерди. Бундек маслаҳат мажлисларни ҳам уюштириш ўз вазифаси, гўё хумдондан фишт келтиришдек бир гап, деб ўйларди. Мирзо бу мадрасани барпо этишни гўё унга топширган, у мардикорларни ишлатётгандек, муҳандису Меъморни ҳам ўшалар қатори... деб биларди. Меъмурнинг хаёли тилло тангалардан кўра ҳам қад кўтараётган мадрасада эканини кўпдан пайқаб юрган Аҳмад Чалабий, баъзида тилла тангалардан бир қисмини ўз ҳамёнига ҳам уради: мардикору усталарнинг ҳақига хиёнат қиласарди. Меъмор унинг ҳаром ишларидан андак воқиф эди-ю, лекин бу шахсни ўз мансабидан четлатишга мутлақо қурби етмасди. Баъзи зарур масалалар билан Бойсунқур Мирзо ёнига боришга ҳозирлик кўраётган устодни пайқаб қолгудай бўлса, ундан олдин ўзи қасрга бориб, Мирзо қабулига кириб чиқар, бу гапни кейин Меъморга маълум қилиб, тарвузини қўлтиғидан туширади. «Ахир менинг амирзода га айтиладиган зарур гапларим бор эди, нега ўзбoshимчалик қиласиз?» — деса, у худди баъзи димоғдор мансабдорлардек гердайиб, «муҳтарам амирзода ҳозир мадраса қурилишидан кўра бошқа зарур ишлар ҳам бор, деганлар», — деб кўзини лўқ қилиб турарди. Меъмор илгари бир неча бор лойиҳалари йўқолгани сабабли қорозу тасвир-чизиқларини, ҳандасавий ҳисобларни жуда эҳтиёт қиласарди. Пайшанба куни эрта билан ишлаётган одамлардан сал четроқда Меъмор билан корфармо қамти келиб қолди. Уларнинг бўғилишиб гаплашаётганини одамлар узокдан кўриб туришарди. Устод тажанг бўлиб, Аҳмад Чалабийга: «Энди лўттибозликни ташланг, йўқса, сизни корфармолик лавозимидан бекор қилиш керак! Сиз ўзингиз бир оми одамсиз, меъморчиликдан тамоман узокдасиз, лекин бунда қиморбозлар ҳам қилмайдиган ҳаром ишларни қиляпсиз! Қўлингиз эгри, бармоқларингизни кундага қўйиб табар билан чопиб ташлаш керак!» — дерди бўғилиб.

— Исбот борми? — кўзларини чақчайтириб Аҳмад Чалабий Меъморга ўқрайди.

— Бор! — деди заҳарханда билан Меъмор, — шу ерда ишлаётган ҳар бир одам буни исботлайди. Сиз кўпларнинг ҳақини бермай, ўз чўнтағингизга уряпсиз!

— Устингиздан ҳазратга, ундан сўнг амирзодам Иброҳим Султонга шикоят қиласман! — атай бақириб гапирди Аҳмад Чалабий.

— Қилаверинг! Ҳазрат ҳақиқат қилиб, салтанат пулини ўғирлаётганларни жазолайди! Бу дўқ-пўписани бошқа одамга қиласиз! Мен — меъморман! Сиз бундай қаллобликни илгари ҳам қилган эдингиз! — деди Меъмор катъият билан.

Ранги оқариб кетган Аҳмад Чалабий бир лаҳзадан сўнг ўзининг тамоман бурчакка тиқилганини сезиб, «вой юрагим,вой-вой...» деб, атай ерга ағнаб, оғзидан оқ кўпик чиқара бошлади. Унинг ўйин қилаётганини Меъмор сезиб турарди. Атрофига тумонат одам йифиди. Юқорида, иккинчи қаватда, минорада, «гулдас-та»ю равоқларда ишлаётганлар ҳам югуриб пастга тушишди. Заврак Нишопурӣ билан Зулфиқор Шоший Меъморни тўполондан четга олиб чиқиб «Устод, хафа бўлманг, бу очикдан-очиқ қилинган айёрик! Бу одам ҳар хил пасткашликлар қилишдан тоймайди. Шундок игво билан сизнинг тилингизни қисиқ қилиб, бошингизга чиқиб олмокчи. Буни ҳамма билиб турибди...» — дейишди.

Меъморнинг капалаги учиб, ранги ўчди. У нима қилишини билмай, бир чеккада шогирдлари Фаввос, Зулфиқор, Завраклар билан гаплашиб турарди. Баъзилар аҳволга яхши тушунмай, айни Меъморга қўйиб, унинг тепасида ачиниб туришар, ерда ётган корфармо дамо-дам оғзини каппа-каппа очар, кўзларини олакула қилиб, юрагини чанглаб: «ўламан, ўламан...» «оҳ, оҳ... кетдим» деб қўярди. Меъмор баттар хижолат тортарди.

У, Аҳмад Чалабийнинг тепасига келиб, «Хой, корфармо, сизга нима бўлди? Тулинг...» деди. Ерда ётган Аҳмад Чалабий «Кетинг; кетинг!» деб Меъмордан юзиин ўгириб, одамларга мурожаат этди: «Чопар юбориб, Мирзо Бойсунқурни олиб келинглар! Тезроқ! Ҳазратга хабар қилинглар, мен ўляпман... Анави бухоролик мени шу ҳолга солди, оҳ...»

Ҳамма ҳайрон. Нима қилишни билмай Чалабий тепасида туради. Кимdir бир коса сув олиб келиб ичирди. Тагида қолганини унинг юзига сепди. Заврак Нишопурий Меъморни уйига бошлади. «Сиз бунда турсангиз, у ҳар хил қиликлар қиласверади, кетиш керак, — деди, — Зулфиқор билан Favvos уни уйига олиб бориб кўйишади», — дея қўшиб кўйди у.

— Уйига олиб боришин, ана арава! — деди Меъмор бир оз жонланиб. — Зулфиқор Шошийга айтинг, табиб чақирсин.

Favvos тайёр аравалардан бирини олиб келди. Одамлар Аҳмад Чалабийни оҳиста кўтариб, аравага солишиди. Унинг ёнида Зулфиқор билан Favvos ўтирган ҳолда корфармо ҳовлиси томон жўнашди. Шундан сўнг тарвузи қўлтиғидан тушган одамдай бўшашиб, Меъмор ҳам Заврак билан бирга уйига кетди. Бунда тўплланган одамларнинг бир қисми яна ўз ишлари билан шуғулландилар, бальзилар уйларига кетдилар. Аммо тепада «гулдаста» гумбазига ғишт тераётган усталар тушишмади. Бунга икки сабаб бор эди: бири, қорилган ганчхокларнинг тезда қотиб яроқсиз бўлиб қолиши, иккичиси, корфармонинг бундай «ўйини» биринчи эмаслиги. Меъмор уйга қайтиб келгач, шогирдларини ташкарида қолдириб, ўз хонасига кирди-да, кўрпачага чўзилиб, болишини қучоқлаганича ётди. Дархол унинг олдига қизи Бадиа билан хотини кирди. Отасини бетоб кўрган Бадиа югуриб чиқиб чой олиб кирди. Яна қайтиб чиқиб обдаста, дастшўй, совун олиб кирди. Меъмор ўтирган жойида юз-кўлини ювди...

Меъморни бошлаб олиб келган Заврак йўл-йўлакай ўз хонасига бирров кириб чиқди-да, яна мадраса томон кетди...

X б о б

ФАРГОНА УСТИГА БОСҚИНЧИЛИК ЮРИШИ

Турли вилоятларда ҳокимлик қилаётган амирзодалар Темур вафотидан сўнг, Хурсон подшохи Шоҳруҳ туғи остида бўлиб, унга бўйсунишлари керак эди.

Шу муносабат билан салтанат пойтахти Самарқанддан Ҳиротга кўчирилди. Шоҳруҳ мамлакат бутунлигини сақлаш ва ўзига содик амирзодаларни ўрни-ўрнига қўйиш мақсадида жиянларига ортиқ ишонмай вилояту ўлкаларга кўпроқ ўз ўғилларини юборди. Шу йўсинда ўз оғалари Жаҳонгир, Умаршайх ва Мироншоҳ насли билан кураш бошланиб кетди. Катта ўғли Улуғбекка — Самарқандни, Иброҳим Султонга — Шерозни, Суюрготмиш Мирзога — Қобулу Фазна, Қандаҳорни, Бойсунқур Мирзога — Астрободни берди... Лекин бу тадбир ҳам ўзини окламади; анча кейинроқ невараси Султон Мухаммад (Бойсунқурнинг ўғли) бобосига бўйсунмай, Эронда мустақил иш юритди. Катта қўшин билан борган Шоҳруҳ уни тобе этолмай, қайтиб келди. То умрининг охиригача Шоҳруҳ Фарбий Эронни Ҳиротга тобе этолмади. Бу воқеалардан илгари, ўз мавқеининг пасайиши, улкан мамлакатнинг парчаланиб кетишидан чўчиб, хижрий санасининг саккиз юз ўн олтинчи йили (1413 милодий) Улуғбек Мирзони катта қўшин билан Фарфона устига юборди. Бу, Самарқанд ҳокими, ёш амирзоданинг биринчи юриши эди.

Мухаммад Тарагай — Улуғбек чақалоқлигида Сароймулхоним тарбиясига берилган эди. Гавҳаршодбегим қўлида камдан-кам бўларди. Темур юришларида кичик амирзода бувиси билан угрук¹ аравада қўшин билан баъзан Ҳазор, баъзан Амударё, баъзан Қобул томонларда юради. Улуғбек ўн ёшга тўлганида, уни Мухаммад Султоннинг қизи Ақобегимга уйлантиришиди. Қиз она томондан Олтин Ўрда ҳокими — Ўзбекхон уруғидан бўлганлиги сабабли, Улуғбек ҳам бобоси каби «Кўрагоний» номини олишга сазовор бўлди. Самарқанд ҳокими этиб тайинланган амирзоданинг ғоятда ёш эканини хисобга олиб, отаси ўзининг энг содик мансабдорларидан бўлмиш Шоҳ Малик тархонни унга маслаҳатгўй ва химоячи этиб тайинлади.

Ҳарбий юришлар, бос-бос, шаҳар қамаллари, чопди-чопдилардан ғоятда зада бўлиб қолган фуқаро юрагига эрта баҳор кунларида яна ғулғула тушди. Авва-

¹ У г р у к — подшо оила аъзолари юрадиган аравалар.

лига пойтахт аҳлидан пинҳон тутилган уруш тезда ҳаммага аён бўлди. Эрта баҳор ойининг серфайз кунларидан бирида катта қўшин Ҳиротнинг шимолий дарвозасидан чиқиб, Балху Кеш орқали Самарқандга жўнаб кетди. Бу қўшинга Амир Довуд барлос сардорлик килиб, ёш Мирзога кўмаклашмоқ ва унинг қўшини билан Фарғона устига бормоқ учун уч ой тайёргарлик кўрган эди. Улуғбек Мирзо амакиси Умаршайхнинг ўғли — Амирак Аҳмад билан беомон жангга отланди. Ҳироту Самарқандга бўйсунмай, мустакиллик даъво этаётган Амирак Аҳмадни йўқотиб ўрнига ўз ўғилларидан бирини қўймок, Фарғона вилоятини тобе этмоқ Шоҳруҳ салтанати мавқенини кўтаришда фоятда муҳим масала эди. Шу сабабли ўзи ёш бўлса ҳам, катта ҳарбий кучга эга бўлган Самарқанд хокими жангга отланди. Бундан аввалроқ Амирак Аҳмадни кенгаш баҳонаси билан чақириб, ўлдирмоқчи бўлганларини ҳам сезган эди. Ёш Улуғбекнинг тажрибасизлик қилиб қўймаслиги учун отаси содик мансабдорларидан, «тархон» унвонига сазовор бўлган Шоҳ Маликни унга йўлдош қилди. Мирзонинг шахсий ишларидан қатъи назар, салтанатга алоқадор ҳамма фармонлар унинг аралашувисиз бўлмасди.

Икки амакивачча темурийзодалар «сен каттами, мен катта» қабилида бир-бири билан жангга тайёрланаардилар. Икки томонда ҳам мингларча кишилар курол ушлаб, ҳарбу зарбга шайланарди. Самарқанд сарбозлари юрагида Фарғонани талаш, ўлжа олиш, ғалаба билан Самарқандга кириб келгач, подшонинг Катта ер инъоми — «суюргала»сига мушарраф бўлиш нияти ёнарди. Яна ўша Катвон даشتни, бу даштда қиёмат қойим, чопди-чопдида қанчалаб каллаларнинг узилиши, отларнинг кишнашию ярадор бўлиб ерга қулаганларнинг оҳ-воҳи...

Қўшин орасида Нажмиддин Бухорийнинг ёлғиз ўғли Низомиддин ҳам жанг яроғ-анжомларини осиб, йўрға отда борарди. Амир Довуд барлос, Амир Сорибуға ва Амир Сулаймон Ҳашлар аслида Темурнинг саркардларидан бўлиб, Халил Султондан юз ўгириб, кексайиб қолганликларига қарамай, Шоҳруҳ хизматида эдилар. Бу мубориз туфайли Меъмор хонадонининг ҳар

йили эрта баҳорда Кўҳисиёҳ этакларига равоч сайлига бориши ҳам қолди — ёлғиз ўғлини жангга йўллаш, Меъмор хонадонининг диққат марказида эди. Ўғил болаларга ўхшаб, чалвор кийиб, белини камар билан боғлаб олган шаддод Бадиа акасининг димишқий ис-фихонини камариға осиб кўрар, ҳовлида боғлоғлик турган отга минмоқчи бўлар, онасининг эътиrozи билан бир оз тортиниб отдан узоқлашар, лекин бўйи чўзилиб, кўкраклари бўртиб чикқан гўзал қиз ҳовлида қандайдир ғалаба завқи билан чарх айланиб юрарди. Ичидаги ғайрату сарбозларга хос шиддаткорлик танига сифмасди. Темур сарбозларидек қилич чопиш, рақиб бошини сапчадек узиб ташлаш, енгиш, катта ўлжалар билан қайтиш Хуросону мовароуннаҳрлик сарбозларнинг қон-қонига сингиб кетган. Чунки Темур «Камар бар миён ва сано бар забон», деган.

«Ганимни ўлдириш савоб». Отасининг салтанат олдиди катта хурматга эга экани — Бадианинг қалбига ҳам фидойилик туйғуларини солган эди. Агар у йигит бўлганида, ҳеч шубҳасиз подшо учун жангларга борарди. Салтанат учун қурбон бўлишга тайёр; чунки «шаҳид бўлиш — у дунёда азиз бўлиш», демакдир. У бўйи етиб бирон ёш лашкарбошига берилишини жуда истарди. Бадианинг бундай хатти-харакати онасини ҳам, отасини ҳам кўпдан ўйлатиб кўйган. Сарбаст, кучга тўлган Низомиддинда бунчалик шаддодлик йўқ, у фактат оила шарафини, отасининг салтанат олдидаги обрўсига путур етказмасликни кўнглига тугиб, жангга отланди. Аслида бу ўз сўзлик ўғил на подшоҳни ва на амирзодаларни хуш кўрарди — баъзида уларни қонхўрликда айблаб, номларига носазо сўзлар айтиб юборарди. Бундай пайтда Меъмор жуда хижолату индухга тушиб, ўғлига ёмон гапларни тилга олмаслик кераклигини такрор-такрор тайинларди.

Мехтарбоди Ялдоий Самарқандийи соний деб аталмиш, ота-боболари айёрлик хизматида бўлган Муҳаммад Арғун ўз одамлари билан Работ, Куркат, Нав, ундан кейин Хўжанддан ўтиб, Кўчқак, Конибодомга-ча борди. Йўлларни обдан тафтиш этиб, довону кўприкларни кўриб, дафтариға белги чекди. Саркардаларга маълум бўлишига қарамай, шахсан амирзода-

нинг топшириғига биноан йўлидаги кудуклар, окар сувлар оралиғи неча фарсанг эканлигини, атроф-жонибда душман томонидан пистирма қўйилган-қўйилмаганигини, отлар учун бедаю хашак, серкўкат ерларни ҳам ўз дафтариға қайд этиб, чўпон, савдогар, баъзан шу атрофлик дехқон сифатида «Ўратепага — инисиникига кетаётган» бўлиб, лашкар ўтажак йўлларнинг ҳаммасини кўздан кечирди. У катта мансабдор бўлишига қарамай, муҳориба туфайли шахсан ўзи бошига қулоҳ кийиб, хизматга тушган эди. Мирзо ҳам, шоҳ Малик тархон ҳам, Амир Довуд барлос ҳам Самарқандда Муҳаммад Арғунга уч хафта муддат беришган эди. Ўзининг тўққиз нафар навкари билан, ўткир ханжару доруйи бехуш, сунъий соқол-мўйлаби, тилло танглар ва турли анжомлар билан оту эшакларга миниб олган Муҳаммад Арғун сардорлигидаги айёрлар Навдан ўтгач, учга бўлиниб, Фаргона йўлларини синчковлик билан текширишди. Бозорларга кириб, харидору мусоғир сифатида одамлар билан сухбат этиб, кўп сирру синоатларни билиб олишди. Мамлакатда қаттиқ сир тутилган бу юришдан Амирак Аҳмад давлатидаги Муҳаммад Арғун одамларининг вактвакти билан Самарқандга, Ҳиротга хабар бериб турганликлари маълум эди. Аҳмад Мирзо саройидаги баъзи аламзада мансабдорларнинг хизмати ҳам бор. Атай қўйиб қўйилган ҳиротлик Шарафиддин Мурғобий Аҳмад Мирзонинг сиёсати Ҳироту Самарқандга зид эканини хабар қилиб турарди. Подшоҳни менсимай ғайр ишлар қилаётгани, ўз амакиси ҳақида носазо гаплар айтиётгани ҳақидаги маълумотлар аниқ исботу далиллар билан бу томонга этиб келиб турарди. Муҳаммад Арғуннинг таги зил маълумотлари Шоҳрухни ҳам, Ўлуғбекни ҳам оёққа турғизди.. Бу иш тезда бартараф қилинмаса, салтанат обрўсига путур етади, таназзулга олиб боради, деб ўйлардилар. Шоҳ Малик тархон бу ишни «Мамлакат шарқидаги дарз» деб атади. Кейинги кунларда Конибодом, Кўчқак, Исфара оралиғида юрган айёрлардан Аҳмад Мирзо хабар топди; ортиқча ҳаракат қилиб юборган бир навлар Конибодомда қозихонага кириб, ўзининг самар-

қандлик эканини беихтиёр ошкор қилиб қўйган эди. Самарқанд томонга йўлга чиққан Амирак Аҳмад айёлари бу ерда «Самарқандлик одамлар» борлигини сизиб қолиб, тезда саройга хабар қиладилар. Ўзлари асло келгиндиларга тегмай, атрофдан кузатадилар. Бу иш шу куни кечаси Навда турган Мұхаммад Арғунга маълум бўлиб, Яйпан орқали Хўқандга кириш режасидан воз кечиб, шитоб билан орқаларига қайтадилар. Улар назарларида, ҳамма нарса аниқ, лашкар сафари бехатар бўлади, деган қарорга келишган эди. Исфарадаги воқеа Самарқанд яқинидаги Хушдала, Оқтепа деган жарларда кўлга тушган кимсалар, Даشت-ти Қипчоқ кишилари, Бароқхон, Пирмуҳаммад одамлари билан боғлиқ, деб ўйлашади. Улар ҳам изғиб қолган эди. Лекин бунинг жангга алоқаси йўқ. Аҳмад Мирзо ҳам бу ишга лоқайд қарайди, қолаверса, қайси подшоҳ ўз айёларини қўшнисига юбормайди, фармоналиклар табиатан хотиржам, ўзича бек, сир бериб кўйилганига унча эътибор бермайдилар, деган тушунчага орқа қилишди. Мұхаммад Арғуннинг шахсан ўзи кўп вақт Хўқанд, Ахсикент, Марғинонларда юриб, буни сезган эди. Мұхаммад Арғун изидан Қораилон деган кимса шахсан амирзода томонидан жўнатилган эди. Бу одам ғоятда ўткир ханжарбоз бўлиб, Мирзоин кўриқловчи фидойилар гурухининг сардори эди. Унинг иши ғоятда махфий, айёларни ҳам, анchorларни ҳам тафтиш эта олар ва изидан тушиб жазо бера олар эди. Қораилон деган одам борлигини Мұхаммад Арғун билар эди-ю, ким эканлигини ва унинг сиёки қанақалигини шунча уннагани билан билолмас эди. Мұхаммад Арғуннинг билмоқчи бўлиб интилишини сезган Қораилоннинг ўзи сафарда бир куни вазият наражасидаги Мұхаммад Арғун овқатига доруи бешкүш кўшиб, ўз чодирида ухлатиб, бир томон мўйланни устара билан қириб, ғойиб бўлибди. Унга хат колдириб «Эй, айёлар сардори Мұхаммад Арғун, Қораилонни кўрмоқ истаган экансан, мана, мен чодирингга келдим. Мехмонингни хурмат қилиб, кутиб олмоқ ўрнига ухлаб қолиб, сўйилган хўқиздек оёқ-кўлларинг тарвақайлаб ётибди. Менга хурматсизлик кўрсатганинг учун бу сафар бир томон мўйлабинг

кетди. Агар яна Қораилоннинг ишларига аралашиб, уни танимоқчи бўлсанг, бошингнинг ҳам бир томони кетиб қолишидан қўрқаман. Камоли эҳтиром билан, Қораилон», — деб ёзиб кетибди.

Ўшанда, эрта билан кўз очган Муҳаммад Арғун бу ишдан ёқасини ушлади; амирзодага шикоят ҳам қилмади, одамларга айтмади ҳам. Қораилоннинг устунлигига тан берди. Исфара воқеасини ҳам у билса керак, деб кўрқиб юрди. Қачон йўлга чиқмасин, хуқуқининг ниҳоятда катталигига қарамай, икки таъқиб уни чўчишиб турарди: — бири — душман айёрлари, иккинчи — Қораилон... Бу номи бору ўзини ҳеч кимса кўрмаган, қўшин ичиди бошқаларга ўхшаб кийиниб юрган, билиб бўлмас одамдан саркардалар ва ҳатто Амир Довуд барлос ҳам чўчирди. Қораилон фақат икки кишига маълум; уларнинг бири — Мирзо, иккинчиси Шоҳ Малик тархондир.

Фарғона устига қўшин тортган шахзода Жиззахдан ўтиб, Зомин йўли билан Ўратепа томон бораради. Кечга яқин Баландчақир сайҳонлигига боргоҳ қурилиб, тўхташди. Лекин Муҳаммад Арғун кишилари Ўратепа ва Ганчи томонларда энига икки-уч чакирим йўл атрофларини кузатиб юришарди. Арғун томонидан Мирзога берилган маълумотлар — йўлларнинг хавфсизлиги ва баъзи белгию маълумотлар Қораилон томонидан тасдиқлангани, айёрлар иши пишиқ эканини эшишган Мирзо беҳадик йўл босиб, фақат кекса Амир Довуд барлосга сарбозларнинг руҳини кўтариш, бу юриш боболари юриши каби музafferият билан якунланишини айтмоғлиқни тайинлади. Лекин Мирзонинг Самарқанддан қўшин тортиб келаётгани, ҳозирги пайтда Баландчақирда боргоҳ тузиб, дам олаётгани хақида хабар топган Аҳмад Мирзо ҳам тезликда Андижон, Марғилон беклари билан қўшин тўплаб, Ахсиқентдан Ҳўқандга тушди. Яна шитоб билан бу қўшин Яйпану Шўрсув томон юрди. Рафқон ва Шўрсув даштида душман билан тўқнашувни хаёл қилиб Рафқон текислигига боргоҳ қурди. Аҳмад Мирзо амакиси салтанатининг буюклиги, унинг катта қўшинидан ҳайикардию аммо ўзидан ёш амакиваччаси Муҳаммад Тарағай — Улугбекка тобе бўлишни истамасди. Ик-

кинчи амакиваччаси бўлмиш Халил Султоннинг Самарқанддан Хурросонга олиб кетилганлигидан норози ёди...

Баландчакир сайҳонлигида боргоҳ ёзган самарқандликлар бир неча фарсанг ерга ёйилиб, қозонлар осишди...

Хиротдан чиққандан буён бир-бирига суюниб, ёнмаби келаётган уч ошина — Меъморнинг ўғли Низомиддин, кулолнинг ўғли Абуали, уста Ҳасанбекнинг ўғли Шодмонбеклар ҳам отларининг эгар-жабдууни ечиб, ўтлатишиди. Қозонларда эт қайнатаётганлар ёнидан ўтиб, отларини сойга олиб тушиб суғоришиди. Шундан сўнг яна уларни серкўкат ерга боғлашиб, то таом нишгунича отлари ёнида ўтиришиди. Майса устида ёнбошлаб ётган Низомиддин аллақандай соҳибжамол кизни севиб қолгани ҳақида ошналарига гапиради. Мана, Хиротдан чиқиб кетишганига ҳам икки ой бўлганига қарамай, ҳамон у қиз кўз олдida турганини, кечаси тушларига ҳам кирганини сир килиб айтди. Үрушдан соғ-омон қайтиб, ўша кизни яна бир марта кўрса, армони қолмаслигини, агар боши кесилиб, ўлиб кетса, жуда армон бўлажагини ҳам кўшиб қўйди.

— Фарона ахли адув йўлига тушиб, дини ислом йўлидан чиқиб кетди, деганлари ёлғон, — деди Низомиддин ёнбошлаб ётган ерида, — аслида икки амакивачча бир-бири билан жанжаллашяпти...

— Дўстим Низомиддин, ундоқ деманг! Фарона-ликлар дини ислом йўлидан чиқиб кетган. Подшоҳимизнинг гапи — вожиб. Бу сўзга шак келтиринаслек керак, — деди чордана қуриб ўтирган Шодмонбек.

Тик турган Абуали филофидан суғуриб олган ўткир исфихонининг тиғига тирноқларини тегизиб, уни томоша қилас, қиличини ҳавода бир-икки селпиб, худди ўзини жангга чоғлаётгандай бўларди. Саркардалар сарбозларнинг тез-тез қилич селпишини, қуролга меҳр кўйишини ерга новдалар суқиб, отда чопиб келиб, уларни қилич билан қирқиши жуда ёқтиришарди. Қиличини филофифа занглатадиганларни ёмон қўришар, хириллаб қулишар, «сендан сарбоз эмас, қиморбоз чиқади», дейишарди. Шу сабабли бўлса керак, Абу-

али элликбоши, юзбошилар кўрсин, дегандек гир айланиб, қиличини селпирди. Умрида қўлига қилич ушламаган кулол ўғлининг юрагида жанг ва ғалаба сурури түгён уради.

— Ошналар! — деди Абуали. — Мен ғанимлардан бир ҳамлада беш-ўнтасининг калласини узиб ташламай, ёнимга қарамайман! Подшоҳимиз туфини баланд кўтариб, душманни кувамиз!

— Иншоолло! — деди эндиғина мўйлаби сабза урган Шодмонбек кексаларга ўхшаб. Унинг бу сўзи ўзига ярашмади.

— Мен ҳам ғалаба қозониб, душман устига бостириб боришни истайман, — деди Низомиддин, — чунки шундай бўлмаса, мен қайтиб бориб, ўша севикли қизни кўролмайман. Мен отамнинг ёлғиз ўғлимани. Мен подшо ҳазратларини ҳали кўрганим йўқ. Шоҳ Малик тархон ҳазратларини ҳам. Фақат ўзимизнинг Амир Довуд барлоснигина кўрдим. Подшоҳларнинг иши жанг қилиб, кон тўкиш, базм, айшу ишрат ва шуҳрат... Отамлар Мирзони ғоятда маърифатпарвар, дейдилар. У ҳазратнинг укалари Бойсунқур Мирзо отамларни ва устод Қавомни ўз химояларига олганлар.

— Фазлуллоҳ ким? — сўради Абуали.

— Буюк мутафаккир. Аналҳақ... пир эдилар. У зот Мироншоҳ вақтида қатл этилганлар. Бизнинг ҳозир ўз тўдамиз бор. Агар истасанг, биз жангдан қайтгач, сени ҳам сардоримиз хузурига олиб бораман.

— Олиб бор. У зотларни кўришни истайман.

Низомиддиннинг чехраси очилиб кетди. Ётган еридан туриб, у ҳам ўз қиличини Абуалига ўхшатиб ҳавода селпиди. Элликбошилар кўзига гўё машқ қилаётгандай бўлиб кўринди.

— Отамлар айтдиларки, — деди яна Низомиддин, — Мирзонинг ёнларида доимо икки зот юрадир; бири — мансабдор Шоҳ Малик тархон, иккинчиси — Ҳазрат Исимиддин. Бу зот «Ҳидоя» китоби муаллифининг авлодларидан бўлиб, кўп маърифатпарвар эканлар. Ҳазрати Исимиддин мадрасаларга ривож тилаб, маърифатдан четда қолмаслик хусусида Мирзога таъкидларканлар. Бу гапларни отам айтганлар. Аммо би-

ринчиси — Шоҳ Малик тархон қонхўр одамдирки, хуруфийлар бир куни унинг бошини танидан жудо қилсалар ажаб эмас...

— Хой, ошна, бундок деманг! — деди чўчиб кетган Шодмонбек, — бундок дейишнинг фойдаси йўқ. Қораилон шу атрофда юрган бўлса нима дейсиз?

— Ия, — деди хаяжонини босиб Низомиддин, — бу ерда Қораилон нима қиласди? Агар Қораилон бунда бўлса, ё сен Қораилон, ё мен. Иккимиздан бири миз.

Улар хаҳолашиб кулиб юборишли. Кулишди-ю, зада қушлардек атрофларига олазарак кўз ташлаши. Яқин атрофда шубҳалик одам кўринмади. Демак, Қораилон йўқ. Уч ой муқаддам бир сарбоз бўғиб олиб чиқилиб, ҳамманинг кўз олдида кўксига ханжар урилиб, қазилган чуқурга итариб юборилган эди. Бу ишда Қораилоннинг кўли бор эди.

Эрта билан қўшин яна йўлга чиқиб, Ўратепани сиртлаб, Нав томон юрди. Индинига Ганчидан ўтиб, Оксув бўйида боргоҳ ёзилди. Яна ўша илгаригидай, ўнг қанотда Мирзонинг олабайроқ, кўркам чодирлари... Аслида бу чодирлар ихоталанган бўлиб, унда Амир Довуд барлос одамлари билан, Мирзо орқароқда, сиртдан қараганда, кўримсиз бир чодирда ётарди. Бу чодирни ҳам сарбозлар ихота қилиб, атрофида Қораилон кишилари юрарди. Шайхулислом Исомиддин ҳазратлари ҳам шаҳзода ёнидаги чодирлардан бирида. Лекин бутун қўшиннинг диккати туғ остидаги олабайроқ чодирда — Мирзони ҳамма шу чодирда, деб ўйларди.

Уч оғайни яна бошқалардан чеккароқ, серўтрок ерга отларини боғлаб, ўzlари сал нарироқка, Оксув қирғонига бориб ўтиришиди. Низомиддин ёнидаги Абуали билан Шодмонбекдан кўра Меъмор ўғли сифатида ўзини «маърифатпарварроқ» қилиб кўрсатарди. Унинг билағонроқ бўлиб, мақтаниши Абдуалига унча ёқмасди. Низомиддиннинг бу мақтаниши ўзини маърифатли қилиб кўрсатишидан кўра ҳам, уларни «ҳақгўй, фуқаропарвар хуруфийлар» тўдасига диккатини тортиш, пир айтганларидай, «амирзодалар фуқаронинг жаллоди», «Куръонда ҳар бир битик ҳарфнинг

ўз илоҳий маъноси бор, подшоҳ унга амал қилмаяпти», деган сўзни айтмоқчи бўларди. Лекин бу гапларни очиқ айтмоқдан ҳайиқар, хиротлик ошналарининг таъкидлашича, ножинс кимсалар олдида бу гапларни зинхор-базинхор айтмаслик, токи Иброҳим Султон бу тўдадан воқиф бўлса, ҳамманинг боши дорда эканлигини биларди. Қораилон ҳам асли Иброҳим Султон измида бўлиб, ҳарбу зарб пайтида лашкар ичидаги пайдо бўлар, лекин уни амирзодадан бўлак ҳеч ким танимас экан. У подшоҳни лашкар ичидаги ишончисиз шахслардан огоҳ этар, уларни жаллод қўлига топширасарди. Қораилон ваҳшати юрагига ларза солган Низомиддин ошналарига, ҳуруфия тўдаси ҳақида аниқ бир гап айтмай, Мирзонинг пири — Исомиддинга қўл бергани, ёш амирзода Жалолиддин Румийнинг «Маснави маънавий» асарини ўқигани, у ҳазратни ўз устози деб билиш шарафига мұяссар экани, Абу Райхон Берунийнинг «Ҳиндустон», Абу Али ибн Синонинг «Ал-Қонун» китобларини қаттиқ мутолаа қилиши, отаси баъзида Мирзо билан унинг укаси Бойсунқурни мұкояса қилиб, оғасига катта баҳо бериши, Жалолиддин Румий асли хоразмшоҳлар авлодидан бўлиб, тақдир тақозоси билан Истанбул, Анқара томонларга кетиб, Куния шаҳрида истиқомат қилгани, «Румий» таҳаллусини ҳам ўша ерда олгани, у самарқандлик Шарафиддин отлиқ кишининг Гавҳар исмли қизига уйлангани, ўғиллари Султон ва Аловуддинлар туркий тилда разаллар ёзувчи шоирлар бўлганини айтиш билан чекланди.

— Отамларнинг устод Қавом билан сухбатларида ўлтириб; — деди Низомиддин, — Исомиддин ҳазратларининг Саид Барака ҳазратлари каби амирзодага йўл-йўриқлар кўрсатиб туришликларини эшитганман.

Уларнинг сухбати айни қизиган бир чоғда ориққина, рангпар, чўқки соқол, фоятда хушмуомала бир киши тавоқда устидан буғи чиқиб турган эт кўтариб келиб, йигитларга тутди.

— Азиз иниларим, сизларга олиб келдим.

Қизғин сухбат қилишаётган йигитлар хушфеъл кишига ялт этиб қараб, миннатдорчилик билдиришиди.

— Э, овора бўлманг, биз ўзимиз бориб олиб кела-
миз. Бизни хижолат қилдингиз, — деди ўрнидан сап-
чиб туриб Абуали.

— Биз, кичиклар хизмат қилмай, сизни овора
қилибмиз, оғо, — деди Низомиддин.

— Ширин сухбатларингизни бузмай дедим. Ҳава-
сим келди, мен кексани ҳам сухбатларингга қўшинг-
лар, — деди ўша одам мулойимлик билан.

Хижолат бўлган Шодмонбек билан Абуали сопол
идишларини кўтариб, қозон бошига кетишди. Низо-
миддин ўша хушфеъл кекса билан ёлғиз қолди. Сар-
бозларга ўхшамаган, сердую ва сертакаллуф бу одам
Низомиддиннинг наслу насабини суриштириб, билиб
олди. Отаси мельмор Нажмиддин Бухорий ғоятда мўъта-
бар одам эканлигини айтиб, ҳақига дуо қилди. Низо-
миддиннинг кўз олдида бу нотаниш одамнинг эътибо-
ри яна ошди. Ошналари шўрва, чапати олиб келган-
ларида, у «ўзларинг яхшилаб овқатланиб олинглар,
ҳали йўл узок, омон бўлинглар» деб ўрнидан туриб
орқа томонга йўл олди.

— Юзбоши Абдуллобек ўлгудай қўпол одам, —
деди Абуали, — бу одамни қаранглар, қандай хуш-
феъл, отамиздек меҳрибон. Сафарда шундок бўлиши
лозим. Доно одамлар хушфеъл бўлади.

Низомиддин ҳам, Шодмонбек ҳам тавоқда эт олиб
келган чўққи соқол, рангпар киши ҳақида яхши гап-
лар айтишди. Йўлга чиққанларидан бери улар билан
бирдан бир ширин мулоқотда бўлиб, ҳол-аҳвол сўра-
ган ҳам мана шу «хушфеъл» одам эди.

Эрта тонгда боргоҳлар йифиб олиниб, саркарда
Амир Довуд барлос олдинда, қўшин яна йўлга тушди.
Оз-оз тўхтаб, икки кечаю кундуз йўл юриб, Хўжанд
биқинида — Сайхун ёқасида тўхтаб, яна боргоҳ ёзиш-
ди. Мирзо Фарғона устига бораётгани ҳақида Ҳирот-
дан маҳфий нома олган. Хўжанд беги мирзога пешвоз
чиқиб, боргоҳда бир муддат гаплашиб, юз чоғлиқ ўз
сарбозини Ёқуббек сардорлигида катта лашкарга
кўшди. Музafferият байроғини баланд кўтариб қай-
тишда Хўжанднинг азиз меҳмони бўлинг, деб илти-
мос қилди. Бек хайр-хўшлашиб, отига миниб ўз ки-
шилари билан жўнаб кетгач, майдон четидаги тикан-

зорлар орасида қазилган чуқурлик ёнига кўллари ор-қасига боғланган икки йигитни олиб келишди. Бу чекка ерда кетмон билан чуқур қазилаётганига боядан бери Низомиддин билан Абуали: агарда қозон куриш учун ўчоқ қазилаётган бўлса, нега чекка янтоқзорга қазилади? Бунинг устига, ўчоқ бунчалик чуқур қазилмас эди-ку? — деб ҳайрон бўлиб туришган эди, қўли боғлоқлик икки йигит чуқур ёнига олиб келингач, юзбоши сарбозларини бу ерга чакирди. Ҳамма ёпирилиб келди. Низомиддин, Абуали, Шодмонбек ҳам қўли боғлиқ йигитларга яқин бориб, ҳайрон бўлиб туришди. Ўтган куни шу икки йигитни қозон тепасида эт олаётгандарида кўрган эдилар. Иккалови ҳам қилич такқан, хурсанд юришган эди. Сарбозлар катта доира ясаб, чуқурлик атрофини ўрашди. Қўли боғлиқ йигитлардан сал нари, дўнглик устига чиккан мингбоши сарбозларга мурожаат этди. Бу ерда Амир Довуд барлос билан шайхулислом Исомиддин ҳам туришарди.

— Подшоҳ ҳазрати олийларининг содик сарбозлари! Ҳаммангиз эшитинг! Бу икки ярамас, самарқандлик Истроилхожи деган савдогарнинг ўғиллари бўлиб, йўлда музaffer лашкардан ажралиб, қочиб кетмоқчи бўлганлар. Бу хатти-харакатлари билан пахлавон сарбозларга иснод келтирдилар. Бу ярамаслар ўлим жазосига ҳукм этилди!

— Йўқ, бундоқ эмас! Қочганимиз йўқ! — деди икки йигитнинг кўзлари ола-кула бўлиб.

— О-мин, оллоҳу акбар! — шайхулислом юзига фотиха тортди.

Шу лахза, ҳамманинг кўзи олдида ака-уканинг ёқасидан ушлаб турган икки барзангি жаллод этиги кўнжидан пичогини суғуриб олиб, кўллари боғланган йигитларнинг кўксига тикди. «Оҳ» деб, бир томонга қийшайётганида иккинчи, учинчи бор пичок тикиб, буради. Иккала йигит ҳам букчайганича чуқур ўрага қулаб тушди. Кетмон ушлаб турган икки киши чуқурга наридан бери, чангитиб тупроқ торта бошлиди. Чанг кўтарилганида бу ерга тўпланган одамлар хомуш ва кўркув ичидаги ўз жойларига қайтиб келишди.

Ошналари билан чақчақлашиб, ҳазил-мутойиба гаплар айтиб юрган Низомиддин билан Абуалининг хам таъби тиррик, ғоятда хомуш бўлиб, ўтлаб юрган тушиовли отлари ёнига келишди.

Бу кеча ҳеч кимнинг кўзига уйку келмади. Ҳамманинг кўз олдида кўксига пичоқ тиқиб, чуқурга ташланган ака-укалар турарди. Шу орада Қораилон ўралашиб юрганини, бу факат унинг иши эканини ҳамма найқади.

Қораилон, Қораилон!..

Эгар-жабдуқларга бош қўйиб, осмонга қараб чалканча ётган йигитлар ўн тўрт кунлик ой томон сузиб бораётган узун қора булатга тикилишар, бу қора булат ҳам улар кўзига ваҳшат соларди. Уларнинг назлида Қораилон ҳам худди шундок даҳшатли. У, қора илон эмас, қора аждардир! Сузиб бораётган узун қора булат ой юзини қоплагач, йигитлар бир-бирига беихтиёр қарашибди:

— Қораилон ой юзини қоплади, — деди Низомиддин.

— Буни қара, мен ҳам шу гапни айтмоқчи бўлиб турган эдим. Дилемдан шу гап ўтган эди, — деди Абуали.

— Дилингиздан ўтган бўлса ҳам, тилингизга чиқарманг, — деди Шодмонбек, — қалпоқнинг тагида одам бор.

— Мунча кўрқасан? — деди Низомиддин, — шу юрак билан жангга кирасанми?

— Бизнинг ишимиз — ғаним бошига қилич солмоқ! — деди Абуали, — худо хоҳласа, душманни кунпаякун қилиб қайтамиз!

— Балли, баходирлар! — деди чой қўтариб ўтиб кетаётган кечаги рангпар, чўқки соқол, хушфеъликни...

Мирзо Улуғбек лашкар тортиб, Самарқанддан чиқиб кетиши билан, подшоҳ иккинчи ўғли Иброҳим Султонни яна Шероздан Ҳиротга чақириб олди.

— Урушнинг каттаси ҳам, кичиги ҳам қимордек гап, — деди у ўғлига, — баъзан қўлимиз баланд

келади, баъзан паст... Бу жанг узоққа бормайди, лекин Хуросон қўшини шай бўлиб турмоги шарт!

У Иброҳим Султоннинг қаттиққўллик, заҳартабиат одам экани, ота измидан чиқмаслигини билиб, Самарқандда қолган — Шоҳ Малик тархоннинг ишончли мансабдор кишиси Васиятиддин Дулдай ёнига ўзининг ишончли мансабдорларидан Фулом Бадр тархон деган кишини шитоб билан жўнатди. Фулом бадр тархондан икки кун аввал саройдаги хизмати маҳфиядан Корайлонни одамлари билан Самарқандга жўнатган эди. Иброҳим Султон маълум вақтга Ҳиротга келиши билан барча маҳкама бошлиқларини ўз хузурига чакирди, хазина эшиги маҳкам беркитилиши, ортиқча чиқимлар тўхтатилиши ҳақида подшоҳ номидан бир неча фармонлар берди. Ҳирот дарвозаларига дарвозабонлардан ташқари яна отлик сарбозлар қўйди; шахарга кириб келган савдогарлар, чиқиб кетаётган кишилар қаттиқ назорат остига олиниши, ҳар қандай шубҳалик кимса дарҳол ушланиши лозим, деб буюрди. Солиқлар заминдорлардан, фуқародан тезда йиғиб олинсин, қурилишларга ҳам пул сарф этиш муваққат тўхтатилсан, деди. Иброҳим Султоннинг қаттиққўллиги подшоҳга ёқарди. Унинг жанг пайтлари мамлакатда қаттиқ сиёsat юргизишни ўрганиш ниятида ҳам Шероздан чакириб олган эди. Темурхон юришларида кўп вакт Самарқандда қоладиган Шоҳруҳ отасининг тайинлашича, мана шундай тадбирлар кўтарди. Бойсунқур, Суюрғотмиш, Мухаммад Жўқийлар ёш бўлганлиги сабабли, Иброҳим Султон подшоҳнинг ўнг қўли бўлиб хизмат қиласарди. Ёш бўлишига қарамай, димоғдор ва маккор амирзодадан Ҳиротнинг катта мансабдорлари чўчириди. Унинг, бошқа амирзодалардан кўра ҳам, бўй-бастлари, юзлари, гапиришлари бобосига жуда ўхшаб кетарди. У олимушоирлардан кўра ҳарбийларни иззат қиласарди. Аммо ҳарбийлар бўлмаса, мавлонолар китобу ҳассаси билан мамлакатни қўриқлолмайдилар, салтанат оёқ ости бўлади, дерди. Амирзодадаги мана бу кайфиятни сезган уламою фузало кўпроқ подшоҳнинг ўзига ва қолаверса, Самарқанд султони Улугбек Мирзога сұянарди. Саройнинг «хизмати маҳфия»си — сарбози ҳарди.

бий мансабдорлар амирзодага катта умид боғлаб, «Соҳибқирон Амир Темур тузган салтанатнинг вориси Шоҳруҳдан кейин Иброҳим Султонга ўтишига умид боғлашарди.

XI б о б

ХАЗИНАЛАР ЭШИГИ БЕРКИТИЛДИ

Уруш сабабли маданият ва маърифат ишлари учун сарфланадиган харажатларга чек қўйилиб, хазиналар эшиги беркитилди. Корфармо Аҳмад Чалабий кунлардан бир кун мадраса томида юрган Меъморга, ишнинг чала қолаётганига афсусланаётгандай бўлиб, таассуф билдириди. Энди нима қиласиз, Гавҳаршодбеким хузурларига ёрдам сўраб кирсанакиан, деди. У яна хазиналардан бир танга ҳам бундок ишларга чиқармаслиги хақида фармон борлигини таъкидлади. Иброҳим Султоннинг Шероздан Ҳиротга келиши ҳам аҳли фузало фойдасига эмас, аксинча, зарагига, деб қўшиб қўйди. Корфармонинг ўз орқасидан эргашиб юрганига энсаси қотиб турган Меъморнинг «бундок ишларга» деб меъморчиликни паст уриб гапиргани ҳам разабини қўзғади. Унинг ҳамма гаплари оғзидан чиқмасданоқ Меъморга маълум бўларди.

— «Бундок ишлар» тўхтамайди! — деди Нажмиддин Бухорий юриб кета туриб. У атайн «бундок ишлар» сўзига урғу берди.

— Кишиларга қандай қилиб ҳақ тўлаймиз? — Аҳмад Чалабий бу савонни бердию Меъморнинг «бундок ишлар» киноясини тушунмади. Меъмор зеҳни пўстак корфармодан хафа бўлмай, ичиди кулди. Чунки киши доно одамлардан хафа бўлади. Нодондан хафа бўлмоқ — эшакни мунажжим дейиш билан барабар, деди ичиди ўзига ўзи.

— Кишиларга мен ўзим ҳақ тўлаймен. Аммо сизнинг оладурған хақингиз кўпроқ бўлгани сабабли, мен уни тўлолмаймен.

— Бу сўз билан хизматимдан кет, демоқчимисиз?!

— Тушунибсиз...

— Мен кетмаймен!

— Мен сизнинг хизматингизга ҳақ тўлолмаймен,— деди Меъмор унинг чақимчилигига ишора қилиб. — Умуман, сизнинг бу ерда қиласидан ишингиз йўқ; ганчхок қормасангиз, фишт термасангиз, кошин қўймасангиз... Сиз бунда нима қиласиз!?

— Мен қарзга ишлаймен. Дориламон бўлгач, амирзоданинг ўзлари менинг ҳакимни берадилар.

— Ихтиёргиз. Аммо шу кунгача баъзиларнинг ҳақига хиёнат қилинди. Ҳисоб-китобда улар ўз ҳақларини талаб этадилар. Мен у акчаларни қаердан тоғиб беришга ҳайронмен.

— Уша одамлар билан юзлаштиринг! — деди корфармо титраб. Кейин у Меъмор ёнида ортиқ туролмай, ранги оқариб, томдан пастга тушиб кетди.

Меъмор одатдагидек яна бурчак томонга бурилди — бунда хонақоҳ гумбазига фишт ётқизаётган уста Жўржий ишларди.

— Ҳорманг, уста Жўржий!

— Келинг, Меъмор! Бардаммисиз?

— Шукур! Ўғлингиз кани?

— Пастга тушиб кетди. Бугун гуржиларнинг ҳайити. Ул-бул олгани бозорга кетди. Кечқурун бизнинг уйимизга марҳамат қилинг. Шу атрофдаги бошқа гуржистонликлар ҳам меникига келишади.

— Ташаккур!

— Жаноб Аҳмад Чалабийнинг ҳамма гапларини эшилдим. Бу одам нихоятда бадкирдор...

— Қандоқ қилай, дўстим Жўржий, у ўзи ишламагани ишламаган, кишилар ҳақига ҳам хиёнат қилмоқда. Яна бунинг устига бориб бизни амирзодага чақади. Бу одамни корфармо қилиб тайинлашгани таажжуб!

— Таажжуланманг, Меъмор, Аҳмад Чалабий саройнинг «кўзи». Шунака ҳаром одамлар ўз эгаларига яхши хизмат қиласидилар. Подшохингиз энди ўз жиянига қарши уруш очди. Ўз жиянини ўлдириб, молмулкини талаб келади. Қиёмат яқин, Меъмор, агар қиёмат яқин бўлмаса икки амакивачча бир-бирига тиф кўтарадими?! Бу келишмовчиликда минг-минглаб авомнинг боши кетади, болалар етим колади... Шавомнинг боши кетади,

харлар вайрон бўлади... Мана буни қаранг! Мана, сиз билан биз, икки кекса ҳам бу урушнинг мاشаққатини чекаётирмиз. Подшолар обрў талашади, бизлар жон берамиз... Биз, Хурросондаги гуржиларнинг тутқун, кул бўлишимизга ҳам уруш сабаб. Темурнинг беаёв ўткир қиличи бизларни ватандан жудо қилди. Дунёда ҳамма нарсадан азиз, шафқатли Гуржистонни бир кўриб ўлсам, рози эдим, Меъмор. Юртимни кўрап-миканман?

— Худога ёлворинг, Жўржий, ўзи йўл берсин.

— Албатта, эртаю кеч худога сифинаман.

— Дунёда бир бағри бутун киши йўқ экан-да, ҳар кимнинг юрагида бир андух.

— Шундок. Бу ўткинчи беш кунлик дунёда биз ёқалашамиз, кон тўкамиз, бир-биримизни ҳакоратлаймиз. Еримиз берган нозу неъматлар ўзимизга етадику, одамлар тинч ишласа, нима қиласкин!

— Э, Жўржий, ҳамма гап шунда. Пиримиз Хўжа Абдулхолик Фиждувоний ҳазратлари ҳам, ҳазрати Сulton Орифин ҳам шу гапни айтадурлар...

— Чидаймиз. Чорамиз ҳам йўқ...

— Хазина эшиги беркитилди. Салтанат душман билан жанг қилмоқда.

— Меъмор! — деди қуюқ соқол Жўржий йўғон овозда Нажмиддин Бухорийга яқинроқ келиб, — Ишни тўхтатмаймиз! Иш оз қолган. Биз бу мадрасани темуррийлар учун эмас, Хурросон фуқаросига соляпмиз. Кейинги бола-чақалар, Кофқоздан қилич кучи билан олиб келинган бир тутқун гуржи устаси ҳам бу мадрасага ништ қўйган, деб эслашар, ҳакқимизга дуо қилишар... Мана шу бизга ҳамма нарсадан қимматлироқ. Хафа бўлманг, биз ҳақ олмасдан ҳам ишлаймиз. Ахир биз қулмиз-ку, ҳақ талаб қилишга ҳаддимиз борми!

— Ундоқ деманг, Жўржий. Сизнинг инсофли одам эканингизни бунда ҳамма билади. Яхши истак учун ташаккур! Сизга худо ёр бўлсин, тезда ўз юрtingизга — қавму қариндошларингиз ёнига омон-эсон боришингизга худойи таолонинг ўзи йўл берсин, омин! — Меъмор юзига фотиха тортди.

Жўржий ҳам ўз христиан удумича худога сифинди.

Корфармонинг кайфияти бузилиб юрганини кўрган

Меъмор, эртасига эрта билан ёнига уч шогирдини олиб, мадрасага келди. Бугун хаво фоятда яхши — баҳор қуёши ҳамма ёққа нур сочмоқда. Офтоб-оламтоб майса-гийёхларга, новда-ниҳолларга жон бағишилаб, оламни яшартирумокда. Кўхи сафед чўққилари тиник феруза осмон бағрида ўзининг доимий қорлари билан серкирра олмосга ўхшаб ярқираради. Херирўд дарёсидан эсаётган насим тунларга ором бағишилар. Кушлар кўкда ўйин кураган, улар олисдан жанг таҳликасидан томоман узоқ...

Меъмор ўз одатича, аввал рўпара келган одам юзига бокди; ганчхок қораётган йигит Меъморга илгаригидай салом бериб, таъзим этди. Аммо бугун, негадир, одамлар ишга кеч келаётгандай кўринди. Акаука Ҳасанбек, Ҳусайнбек, томда ишлаётган гуржи ва пастдаги икки йигитни ҳисобга олмагандан, курилишда одам йўқ эди. Жўржий ҳам ўғли билан Меъморни кузатди-ю, ҳамма гапга тушуниб, индамай ишини давом эттираверишди. Корфармо ишга келмади. Келмагани ҳам маъқул, деди ичида Меъмор. Асосий одамлардан яна ўн чоғлиқ киши йўқ. Бу эса Меъморнинг юрагини қисди. У шогирдлари билан бирга ҳамма ёқни айланиб, кичик маҳкамага кирди. Бошидаги салласини қозиққа илиб, бундаги жомакорини кийди. Тепасида ҳайрон бўлиб турган Зулфиқор Шоший, Заврак Нишопурий ва Favvos Мухаммадларга қараб илжайди:

— Энди биз ўзимиз ишга тушамиз.

— Маъқул, устод! — деди Зулфиқор дарҳол қўлидаги жилдни, лойихаларни токчага кўйиб. — Биз, учовимиз ишга тушамиз, сиз овора бўлманг, иш биздан қочиб кутулмайди.

— Шундок, устод, сиз қўяверинг, — деди Заврак.

— Майли, чарчагунимча ишлайман. Аммо, сиз болаларим, ишнинг оғирини ўз зиммангизга олинг. Бундан бу ёғи — сирчиларга, кошинпазларга ёрдам қилиш; кўпи кетиб ози қолган. Манави гуржи устага қаранглар. «Мен подшолар учун эмас, Ҳурросон фуқароси учун мадраса соляпман. Авлодларимиз буни билади», — дейди. Бу тутқун одамнинг олижаноблигини кўриб, ҳайрон қоламан. У-ку, бегона, ўзимизнинг кор-

фармо бўлса одамларни ишдан айнатиб олиб кетди.
Мен уни кеча хизматдан холи қилдим. Болаларим,
энди ўзимиз ишлаймиз!

— Ташвиш тортманг, устод, — деди енгларини
шимириб Favvos Муҳаммад. — Ўша келмаганларнинг
ўрнини босамиз, уялтирумаймиз.

Шогирдлар ишга тушиб кетишиди.

Меъмор Нажмиддин Бухорий «гулдаста» ҳавоза-
сида туриб, кошин ўрнатаётган aka-ука Ҳасанбек ва
Ҳусайнбеклар ёнига борди.

— Саломатмисизлар!

— Келинг, устод! Ўзингиз саломатмисиз? — деди
Ҳасанбек ҳеч нимани билмагандек, хар кунги одати-
ча.

Одамларнинг хизматга келмагани — бундан буён
акча бўлмаслигида. Бу гапни корфармо ҳаммага айт-
ган эди. Лекин улар Меъморни қўзи қиймай, унинг
оғзидан бирон тайинли сўз эшитмагунча, бир қарорга
келишмай, ишлай беришажагини айтишган эди. Эрта-
лаб, вақтида хизматга келишганидан ҳам хурсанд
бўлишиди. Меъморнинг «Бир тутқун гуржича ҳам
бўлмадингизми?» — дейишидан чўчишарди.

— Уруш бошланиб, ортиқча харажатлар тўхтати-
либди. Мадрасага мўлжалланган акча ҳам берилмас
ёкан, корфармо шундай деди. Ўзи ҳам бир неча киши
билан хизматни ташлаб кетди. Ҳа, албатта, ҳақ тўлан-
магандан кейин ким ҳам ишларди. Ахвол шунақа,
биродарлар...

— Ўзингиз нима қилмоқчисиз, устод? — дея Ҳу-
сайнбек сўради.

— Мен нима қилардим. Шогирдларим билан кет-
ган кишилар ўрида ишлай берамиз. Ишлаганларнинг
хақини ўзимиз тўлаймиз, хавотир бўлманглар, иншо-
олло, кишиларни беҳақ қўймаймиз.

Меъморнинг хаёлидан ялт этиб хотини Маъсума
беканинг олтин болдоқлари, ём билари, бўйнидаги тўрт
шода дури ўтди. Ундан сўнг, Мирзо ҳадя этган Ни-
шонпур-феруза қўзлик тилла узуги ўтди. Бу узук қўзи-
га Ҳорун ар-Рашид хафа бўлган пайтида қўлидаги
олмос узук қўзига ёзилган «инаш гузарат» деган сўзга
караб кўнгли таскин топганидан, Меъмор ҳам узукка

туркий сўз билан «Бу ҳам ўтар» деб ёздирган эди. Мана шу узугининг ҳам баҳридан ўтишни кўзлади.

— Устод, — деди бир лаҳза андаваю ганчхокини тогорага қўйиб Ҳасанбек, — мана, икки ойдан ошди, ўғилларимиздан дарак борми? Ҳеч нима эшитмадингизми? Зора амирзодалар ярашишса, жуда маъқул иш бўларди-да. Менинг ўғлим Шодмонбек отда юрмаган, қилич чопишни ҳам машқ қилмаган... Ҳайронман. Эртаю кеч худодан икки амирзоданинг ярашишларини тилаб ётибман. Ҳар куни сахарлаб ўн бир марта, кечқурун ўттиз бир марта болам ҳаққига «Ёсин...» ўқийман. Амир Довуд барлос Самарқандга етиб борганмиканлар?

— Ҳа, — деди Меъмор, — балки лашкар Фарфона йўлида бўлса ҳам ажаб эмас. Саройга яқин кишиларнинг сўзига қараганда, амирзодаларнинг тўқнашуви Сайхун бўйида бўлса, эҳтимол. Ҳарқалай, музafferият Мирзо туғида дейишади.

Уста Ҳасанбек ўйланиб қолди:

— Яраш-яраш бўлмасмикан? Жанг бўлади, деб ўйлайсизми?

— Худо билади, иним. Олдиндан бир нима дейиш қийин.

Меъмор ўз шогирдлари билан кетиб қолганлар ўрнида ишга тушиб кетди. Заврак билан Зулфиқор юкорида фишт теришарди. Favvos сув олиб чиқиб, Меъморга ганчхок қориб берар, Меъморнинг ўзи ўнг «гулдаста» тепасидаги гумбазга фишт терарди. Улар тўртовлон жон-жаҳди билан ишга киришиб кетишиди. Туш пайтигача отасидан дарак бўлмагани — уйда ўтирган Бадиани ҳам ўрнидан кўзғатди. У онасиға айтиб, зинфиллаганича қурилишга келди. Отасининг баланд гумбаз устида зағчадек бўлиб ўтирганини кўриб, таажжубланди. Бир муддатдан сўнг ҳамма гапга тушуниб, яна уйига қайтди-да, ишлаётгандарга овқат олиб келди. Шаддод қиз чиройли гуржи йигит Иосиф билан гаплашиб, Зулфиқорнинг ҳам, Завракнинг ҳам энсасини котирди. Зулфиқор Завракнинг кулоғига Бадианинг тезроқ уйига кетишини, ғашига тегиб халақит бераётганини айтди. Сезгир Заврак фишт кўтариб кела туриб, белини ушлаб турган Бадиага ҳазил-му-

тойиба гап отди. Бадиа факат унинг ҳазилини кўта-
рар, кўнглига олмас эди.

— Офтобнинг жамолига қарайман, деб оёғимга
ништ тусиб кетди!

— Нима дедингиз? — Бадиа ялт этиб Завракка
боқди. Унинг киноясига тушуниб, дарҳол жавоб қил-
ди: — бир кўз билан-а?

— Ҳа, — деди кулимсираб Заврак Нишопурӣ, —
кatta офтоб осмонда турса-ю, кичик офтоб севикили
оналари ёнига бориб, кечки овқатга қарашсалар, кўп
яхши бўларди! Чунки бу ерда шундок фикр бўлмок-
ла.

— Ҳамманинг фикри шундоқми? — Бадиа отаси-
дан ҳам ҳайиқмай, қулиб, чақнаб Завракка тикил-
ди, — ёки битта Нишопурӣ жанобларининг фикрла-
рими, бу?

— Афв этасиз, бекам, бу жаноб Нишопурийнинг
фикри эмас, жаноб Шошийнинг фикри!

— О-о! Бундок денг? — Бадиа ялт этиб Зулфи-
корга боқди. Бирдан у қизариб кетди. — Тушунар-
ли... Мен, жанобларининг фикрларини хурмат қила-
мен! Кетдим! Ойимларга қарашамен, — у тезда жўнаб
кетди.

XII б о б

ЧИРОЙЛИ ЎЛИМ

Риёкор Аҳмад Чалабий қурилишга қайтиб келди...
У бетини тагига босиб, орқаворатдан Меъморнинг
иидизига болта уриб юрган пайтда, иттифоқо, мадра-
са қурилишида яна янги қилиқ чиқарди, кимдантир
нишанг олиб, Меъмор атрофидаги содик кишиларга
ӯлағайладиган бўлиб қолди. Унинг учун одамлар-
нинг мадраса қурилишида қандай ишлаётганликлари
эмас, ўзига ким таъзиму мулозамат кўрсатиб, ким
чеккада — Меъмор атрофидаги юрганини кузатиш му-
ҳим эди. Мана бу гап уни жуда қизиқтиради. У
баъзан одамларга илжайиб, амирзода илтифот қилаёт-
ганликлари, ақча беражаклари ҳақида, бу ақчани

яхши ишлаётгандарга беринг, деб таъкидлаганини ҳам айтарди. Ўзининг амирзодага яқинлигини кўрсатгандай, пул бериш, тақдирлаш Меъмор кўлида эмас, ўз кўлида эканлигини таъкидларди. Илгари ўз ҳовлисида узоқ вакт ишлатиб, сиқиб ёғини олган, камгап, ишдан бошқа нарсани билмайдиган хокисор уста Абдуғафур деган мўмин одамнинг кейинги пайтларда, меъморга суяниб, атрофига ўтиб олгани сабабли унга дағдага қилиб, арзимаган нарсадан сабаб топиб, бақириб кетарди. Уста Абдуғафур ҳам «корфармо ахлатдан мунчоқ топдилар», деб кўя қоларди. Меъмор, Ҳасанбек-Хусайнбек, уста Жўржийлар бир-бирларига қараб: «Ёмоннинг кучи япалоққа етар...» дейишарди. Гап билмас мўмин уста Абдуғафурга бирор келиб: «Уста, энди кеч бўлди, уйга бориш керак», — демагунча ишлайверарди. Шу одам ҳам Аҳмад Чалабийнинг риёкор, икки юзламачи кимса эканини билиб, аввалига индамай юрди, кейинчалик ундан тамоман юз ўғирди. Унга қайрилиб қарагиси ҳам келмасди. Бу ҳолни сезиб юрган Аҳмад Чалабий: «Уста Абдуғафур «пес» дардига мубтало, унинг кўлидан таом еб бўлмайди...» деган гапни тарқатди.

Жума куни эрта билан дарвоза пештоқи устида иш бошлаган уста Абдуғафур бирон соатлардан кейин ёнида гишт узатиб, ганчхок қораётган шогирд йигитга, шундоқ ёнгинасида турган Аҳмад Чалабий қолиб, ҳовлида, пастки қават хужраларидан бири олдидаги турган Меъморни чақириб чиқишини илтимос килди. Йигитча зинфиллаганча пастга тушиб кетди. Уста Абдуғафур хеч маҳал бирорни ўз ёнига чақирилмаган, ғоят камсукум одам эди. Меъмор ўзини Уста Абдуғафур негадир юқори қаватга чақирирганидан таажжубга тушди. Хабар келтирган йигитча билан олдинма-кетин коронри зинапояларда туртиниб юқорига кўтарила бошлашди. Тинчликми, деб сўради йўлда Меъмор, халлослаб. Йигитча тинчлик, деди. Демак, уста бинонинг бирор ерида дарз ёки чатоқликни кўргану юрагига сифдиrolмай мени чақирирган, хаёл қилди Меъмор. Улар мадраса томи устига чиқишигач, Аҳмад Чалабийни кўришдию индамай ёнидан ўтиб кетишиди.

— Ҳа, уста, тинчликми? — деб сўради Меъмор уста Абдуғафурдан. У қўлидаги ғиштини ташлаб, андавасини ушлаб, ганчхок тогораси ёнида оёқларини кериб ўтирар эди.

У ўтирган жойида Меъморга қараб жилмайди: ранги ўчиб, лаблари оқарган эди. Нарироқда белини ушлаб ёўдайиб турган Аҳмад Чалабий уларга бир қараб қўйди-да, пастга тушиб кетди. Уста Абдуғафур уйқуси келиб мудраётган одамдек кўзлари чалишиб, боши қийшая бошлади:

— У-сто-з, рози бўлинг...

— Ҳай-ҳай, сизга нима бўлди?! — деди Меъмор югуриб бориб. У уста Абдуғафурни қучоқлаб, бошини кўксига босди. — Уста, азизим, кўзингизни очинг! — Ла-а-илаҳа иллалоҳу Мухаммадур расулуллоҳ...

Йўқ, уста Абдуғафур дунёдан ўтган эди. У то Меъмор пастдан чиқиб келгунича чидам билан ўзини тутиб турган экан. Меъмор келиб, кучиб бошини кўксига босиши биланоқ жон берди. Бечора шунга илҳақ бўлиб турган экан.

Меъмор ҳам, шогирд бола ҳам бир муддат индамай қолишиди. Меъмор дамо-дам унинг илтимосига кўра, калимаи шаҳодатни ўқиб, устага дам солиб турди. Бир муддатдан сўнг Меъмор уни ерга ётқизиб, белидаги белбоғи билан энгагини танғиди. Шогирд йигит имлаб Зулфиқорни, Завракни, Ҳасан-Хусайнbekларни чақирди. Улар томга югуриб чиқиб, ерда ётган уста Абдуғафурни кўриб ҳайрон бўлиб қолишиди.

— Бир лаҳзада жон берди, — деди Меъмор, — эрта билан келиб, туппа-тузук ишлаб турган экан...

Ҳаммалари юзларига фотиҳа тортишиди:

— Менга бирон марта ҳам тобим йўқ демадилар,— деди шогирд йигит, — аксинча бугун эрталабдан шоширтириб, файрат қилиб ишлайтган эдилар...

— — Бир лаҳза-я!.. — деди Меъмор, — «рози бўлинг...» дедилар-у, кетдилар. Ё, қудратингдан!

— Чиройли ўлим, — деди уста Ҳасанбек, — яна бунинг устига, бугун жума. Худо раҳмати эканлар.

Ишни тўхташиб, уста Абдуғафурни шу куни намо-

зи жумага чикаришди. Эрта билан мадрасанинг баланд томида ишлаётган уста Абдуғафур шу куни кечкурун ўз уйида эмас, пастда, ер бағрида ётарди...

Шундай килиб, мадраса қураётган яхши одамлардан бири «фоний дунё»дан «бокий дунё»га кетди. Ҳамма ачинди: устанинг дунёга келганидан бошлаб, кўргани заҳмат бўлди. Бошқа хеч нарсани кўрмай кетганига ачинишиди...

Аммо Меъморнинг «қанотлари бир чеккадан си-наётгани»ни кўриб ичдан қувонаётган Аҳмад Чалабий устанинг вафотидан сўнг буқаламундай тезда ўз тусини ўзгартирди: «Уста Абдуғафурнинг қадрдон дўсти мен эдим, доимо менинг ҳовлимга бориб туарарди, унга кўп яхшиликлар қилганман, Меъмор билан иноклаштириб қўйган ҳам ўзим...» — деган гапларни тарқатди. Қадрдон кишиси ўлган одамдек унга аза тутиб юрди. Аслида уста Абдуғафур унинг ҳовлисида ишлаган кезлари «Меъмор ёмон одам, унга ҳатто амирзодалар ҳам ишонмайди, ўғли — хуруфияга мансуб каллакесар...» деган гапларни айтган эди. Бу гапларни уста Абдуғафур хеч қачон Меъморга айтмаган-у, аммо Аҳмад Чалабийнинг кўп фитна ва юраги қора киши эканини билиб, ундан ҳазар қилиб, ўзини четга тортган эди. Аҳмад Чалабий мана шу гапларни Меъморга айтиб қўйишидан чўчир, шунинг учун устани руҳан эзиб, умрини эговлаб юрарди. Уста Абдуғафурнинг тўсатдан қазоси — кор ёғди, излар босилди бўлди.

Икки жумадан кейин мадрасага Бойсунқур Мирзо бир неча навкарлари билан бирга келиб, у ёқ-бу ёкларни кўрди. Жой солиниб тайёрланган «дарсхона»да Меъмор раислигида барча усталарни тўплаб, ишни яна ҳам тезлатиш ва шаъбон ойигача қурилишни та момлаб, рамазонга хурсандчилик билан киришни таъкидлади. Меъмор ишнинг бориши ҳақида унга ахборот бериб бўлгач, гап орасида яқинда тўсатдан қазо қилган уста Абдуғафурнинг сафир қолган болаларига ёрдам кўрсатишни илтимос қилди. Бу илтимосга амирзоданинг мойиллиги борлигини, «Ҳа, албатта...» деб бош қимиirlатганини сезиб турган корфармо дархол таъзим қилиб ўрнидан турди:

— Дарҳакиқат, уста Абдуғафур покиза одам эди. Зуккою аллома эди, — «аллома», «зукко» сўзларига урғу бериб, кўз қирини Меъморга ташлади, — устанинг қазоси бизнинг бошимизга тушган оғир мусибат бўлди. Курилиш ишларимизнинг анча орқада қолаётгани, сифатсиз ганчхоку кошинлар ёпишираётганимиз ҳам шу туфайлидир. Худо хоҳласа, ишни тезлашиб юборамиз. Алалхусус, уста хонадонига амирзодам ҳазратларидан мурувват кўрсатишларини илтимос қилиб сўраймиз. Менда тежалган ақчалар ҳам йўқ эмас...

Салқин хона ичида ўтирган усталарнинг биронтаси ҳам Бойсунқур ёнида Аҳмад Чалабийнинг риёкорлик билан айтиётган гапларига жавоб тариқасида бирон сўз айтиша олмади. Меъмор ҳам сукут саклади, устани ҳозир «пок» деб турган кимса яқиндагина «у пес, унинг қўлидан таом еб бўлмайди. У — болачақаларини оч ташлаб қўйибди, ярамас одам..., деган иғволарини эшлишган эди. Унинг мунофиқлигини ҳозир яққол кўриб, ичларида «астағуриллоҳ» деб истиғфор айтишди.

Мажлисдан сўнг мадраса ховлисидағи курсига келлиб ўтирган Меъмор икки чаккасини кафтлари билан қисиб, бир муддат ерга қараб ўтириди. Унинг икки чаккаси санчиб оғирриди. Томда, хужраларда, пештоқу гулчамбарлар, ҳавозаларда турган одамлар Меъморнинг дикқат бўлаётганини сезиб туришарди.

XIII б о б ЖАНГ

Ўша оқшом дарё бўйидаги янтоқзор тепаликда самарқандлик икки навкар йигитни барчанинг кўзи олдида «булар қочмоқчи бўлдилар», баҳонаси билан кўксига пичоқ тикиб, ўлдириб, кўмиб ташланган «лашкар интизомини яна ҳам маҳкам қилиш»да кўрилган чоралардан бири бўлса-да, аслида ҳамманинг дилини сиёҳ қилган эди. Мағлубиятга учраган қўшиндек, сарбозлар руҳан синик, қовоқлари солик тусга киришди.

Лекин Қораилон даҳшати уларни бир-бирлари билан очилиб-сочилиб гаплашиб, эркин муҳокама қилишга йўл қўймас эди. Қўшин руҳияси унча баланд эмаслигини сезган Мирзо, фарғоналиклар билан тўқнашув они жуда яқин қолганини ҳисобга олиб, эрта билан нонушта пайтида сарбозларга биттадан тилло танга улашишни буюрди. Йигитлар «хамир учидан патир» — чиройли тилло тангани кафтларига қўйиб томоша қилишди. Ундан сўнг, эҳтиёт қилиб ёnlарига солиб қўйишди. Нонуштадан кейин, шайхулислом Исомиддин жанг онининг жуда яқин қолгани, ҳар бир мусулмон хурросонлигу мовароуннарликлар Аҳмад тарафидаги ғанимлар билан бўлган жангда «ўлса — шаҳид, ўлдирса — ғозий» эканини таъкидлаб, юзига фотиха тортди. Қилич-яроғлари шай, чўққайиб ўтирган сарбозлар ҳам юзларига фотиха тортиб, ўринларидан турдилар, отларини яхшилаб эгарладилар.

Муҳаммад Арғуннинг хабар беришича, душманнинг катта қўшини Рафқондан ўтиб, Конибодом сари келаётгани, тўқнашув Яккатут қишлоғи атрофида, Сайхун ёқасида бўлиши ҳамма жиҳатдан мўлжалга яқин эди; Улугбек Мирзо Шоҳ Малик тархон билан Амир Довуд барлос олдида Муҳаммад Арғундан душман қўшинининг нуфузи, сарбозларининг кайфияти қандайлиги ҳакида сўради. Ёш амирзоданинг босиклик билан кераклик саволларни бераётганига Амир Довуд барлос аввал ҳайратланиб туриб, кейин бу гаплар унинг бобосидан мерос экани, барлоснинг ўзи ҳам бобоси қўшинида хизмат қилганида, Амирнинг саволлари мана шундай бўларди, деб қўнглидан ўтказди. У яна, душман томони қир орқасига пистирма қўймаганмикан, деб ҳам суриштирди. Муҳаммад Арғун маълумотидан душман пистирма қўймагани, сарбозлар орасида пиёдалар ҳам борлигини билиб каноат хосил қилгач, дарҳол ўз чодирига саркардаларни чақирди.

Шайхулислом Мирзонинг ўнг томонида ўтиради. Сўл томонида Шоҳ Малик тархон билан Амир Довуд барлос. Ундан пастроқда Муҳаммад Арғун. Мирзо саркардаларга мурожаат этди:

— Фарғона устига лашкар бораётганидан Аҳмад Мирзонинг хабари бор. Биз Баландчақирга етмаси-

мизданоқ улар ҳам тайёргарлик кўрган. Мирзо саройидан бизга етиб келган маълумотлар шуни кўрсатадики, фаргоналиклар биздан кам, иш кўрган сарбозлари оз — кишилари кўркувда... Лекин биз то шу кунгача Ахмаднинг элчисини кутдик, дарак бўлмади. Элчини Самарқандда ҳам кутған эдик. Номаларга жавоб қилмади. Ахсиентда, Хўқандда, Андижонда отамнинг энг содик кишиларини ўлдириб юборди. Бир неча мансабдор шахслар Самарқандга қочиб келди... Бу ерда ўтирган мингбоши Иброҳим Дулдайнинг оталари Абдулқаҳор Дулдайни ҳам ўлдириб юборди. Бу сўзларни айтмоқдан мақсад — Ахмад кўп ёмон ишларни саъй этиб, охири бизнинг сабр косамизни тўлдирди. Отамнинг амри ила мен сизларни жангга олиб бораёттимен...

Шайхулислом шу лаҳза хутба ўқиб, амирзодага ва саркардаларга дам урди. Ҳамма сукутга чўмди. Мирзо Улуғбек давом этди:

— Саркарда Иброҳим Дулдайнинг учкур чавандозлари билан мен ўртада борадурмен, биз то Яккатут даштида душман қораси кўринмагунча сиполик билан юриб, душман кўрингач, менинг фармоним билан унинг устига ўқдек отиламиз. Амир Довуд барлос сарбозлари менинг ўнг қанотимда бўлиб, ярим чақирим кейинда, менинг ҳамламдан сўнг иккинчи зарбани беради. Шоҳ Малик тархон сўл қанотимда, саркарда Ёқубек сарбозлари билан биргаликда охирги зарбани беради. Иншоолло, пайдар-пай зарба билан душманни пароканда қилиб, тор-мор этамиз.

— Амирона режа! — деди Шоҳ Малик тархон, — ҳеч қандоқ ислоҳ киритмоққа ҳожат йўқ. Фоятда мукаммал ва оқилона. Аммо амирзода ҳазрати олийларидан бир кичик илтимосим бор.

— Айтинг, — деди Мирзо унга қараб.

— Иброҳим Дулдайнинг зарбдор лочинлари билан биринчи галда мен борай, Мирзо, сиз саркарда Ёқубекнинг бургутлари билан сўл қанотда борсангиз. — Бу таклифни дарҳол Муҳаммад Арғун маъқуллади. Амир Довуд барлос яна қўшиб кўйди: — Бу таклиф, менга отангизнинг топшириқлари. Бобонгиз ҳамма вақт сўл қанотда бўлардилар. Бунинг моҳияти катта. Би-

ринчи хужумга ўтган саркардани трандозлар нишонга олади. Тўхтамишхон билан жангда ҳам, Боязид, хоразмшоҳлар билан бўлган жангда ҳам бобонгиз сўл қанотда борганлар...

Мирзо мамнуният билан кулди. Бу таклиф тархоннинг садоқатидан дарак берарди. Мирзо Шоҳ Малик тархонга садоқати учун ташаккур айтди.

— Келишдик, жойимизни алмаштирамиз.

Саркардалар ўринларидан туриб, ўз сарбозлари ёнига боришиди. Орқада қолиб, жойларни йифиб олувчи кишилар шитоб билан ишга киришиб, анжомларни араваларга юклашарди. Кенг дала отлиқлар билан тўлган. Ҳамманинг кўзи ёш амирзоданинг отга минишида. У отга миниши биланоқ беадад лашкар дарё ёқалаб, дашт билан Конибодом сари силжиди.

Навкарлар Мирзога «Йўлбарс» деб аталмиш тўриқ отни тутишиди. Бу отнинг бўйи баланд, кўкраклари кенг, қорни кичик — олд томондан қаралганда йўлбарсга ўхшарди. Доимо ғайрати ичига сиғмай сўлиғини чайнар, ер тепинганида чачағлари кенгайиб, йўлбарс панжасига ўхшарди. Бу отнинг бошқа отлардан яна бир фарки шунда эдики, у жангга кирганида рўпарасидаги отга икки оёқларини кўтариб ташланар, тўғри келса тишларди. Бу ҳаракат йўлбарснинг сапчиганига жуда ўхшарди. У мутлақо ерга йиқилган одамни босмас, устидаги ўз эгасини йиқилишдан саклар эди. Баъзи сарбозлар «Йўлбарс»нинг баҳосини ўн минг тиллодан ҳам ортиқ ҳисоблашарди. Аслида бу отни Улуғбек Мирзо Самарқанд тахтига чиқкан пайтида Бухоро беги тухфа этган экан. «Йўлбарс» жангга кириш учун мўлжалланган от, аммо «Оқ кабутар» деган серёл, викор билан қадам ташлайдиган оқ от — Мирзонинг тантанавор юришлари, шаҳар олингандан сўнг бош эгганлар олдидан ўтишга мўлжалланган оти эди. Ҳозир «Оқ кабутар»ни Ёқуббек қўшинида, орқароқда бир сарбоз етаклаб келарди.

Катта қўшин уч бўлиниб, дарё ёқасидаги дашт билан Кўчак томонга бурилмай, тўғри Конибодом сари йўл олди. Конибодом ёқалаб ўтиб, қуёш тик келганида, Муҳаммад Арғун хабар қилганидек, Яккатурт даштида шарқ уфқида чанг кўтарилиди.

— Бу нима? — сўради Мирзо ёнида келаётган Ёқуббекдан. — Бу қорамол подаси эмасмикан? Чанг кўтаряпти.

— Аъло ҳазратлари, — деди Ёқуббек, — дарҳақиқат, чанг кўтарган қорамоллар подаси.

— Пода эмас! — деди дархол эътиroz билдириб Мухаммад Арғун, — бу Аҳмад Мирзо!

— Худди шундай, — деди чўкки соқолли, орик, рангпар бир киши амирзодага қараб.

— Янгишяпсизлар, бу дарҳақиқат пода! — деди қаҳқаҳ уриб амирзода. — Ёқуббек тўғри айтди. Кўзи ўткир одамлар яна бир қарасин, бу — пода!

Мухаммад Арғун ҳам Мирзонинг ҳамма нарсага тушуниб туриб, атай ҳазил қилаётганини сезди. Мирзо сарбозлар кўрқмай дадил хужумга чоғланишлари учун «Йўлбарс» устида кулиб келарди.

— Тушундик... — деди Арғун.

— Тушунган бўлсангиз, зудлик билан Шоҳ Малик тархон жанобларига айтинг, яна бир неча дақиқадан сўнг пода устига бургутдек тезлик билан ҳужум қилсин!

Мухаммад Арғун шитоб билан от чоптириб кетди. У етиб бориб, шаҳзода фикрини айтиши биланоқ, Иброҳим Дулдай сарбозлари кенг саҳрода бўрондай чанг кўтариб, қийқириб, ваҳшат билан фарғоналиклар устига от қўйишиди. Бир муддат ўтар-ўтмас даштла тўс-тўполон кўтарилиди, отлар кишинар, қиличу қалқонларнинг шарақ-шуруғи, бақириқ-чақириқлар авжга чиқди. Отлар оёқларини кўтариб кишинашар, қиличлар офтоб нурида ярқиради. Дарёдаги гирдобга ўҳшаб, икки қўшин бир-бири билан аралашиб, қилич солишарди. Ерга ағанаб тушган сарбозларга хеч ким қарамас, яраланган отлар ўрам ичидаги чўлоқланиб, кишинаб юрарди. Бир муддатдан сўнг амирзоданинг ишораси билан Мухаммад Арғун қир орқасидаги Амир Довуд барлос томон от чоптириб кетди. Бетоқат бўлиб, Мирзони кузатиб турган барлос от чоптириб келаётган Арғунни кўриши биланоқ, душман устига ёпирилди. Шу муддатнинг ўзида Мирзо билан Ёқуббек ҳам ҷап қанотдан ҳужум бошлишди. Пистирма қўймай, катта куч билан келган Аҳмад Мирзо бир ярим соат-

лар чамаси орқада жангни кузатиб туриб, ўз қўшининг мағлубиятга учраётганини сезди. Яна бир соат жанг давом этса, сарбозлари тамоман қирилиб кетишини сезгач, атрофидаги бир неча сардорлари билан орқага қочди. Аҳмад Мирзо кетидан юзга яқин сарбозлар ҳам коча бошлишди. Биринчи зарбани берган Иброҳим Дулдай, юз ҷоғлиқ навкари билан Аҳмад Мирзони қувиб кетди. Ўз сардорларининг жангни ташлаб қочаётганликларини кўрган фарғоналиклар ҳар тарафга сочилиб қоча бошлишди. Баъзилар отдан тушиб, қилич ва қалқонни ерга ташлишди. Аҳмад Хўқанд қолиб, Ашт томон қочди. Кўп ўтмай, Иброҳим Дулдай Аҳмад Мирзони тутиб олиб келди. Жанг тугагани ҳамон учга бўлинган лашкар яна бирлашиб, шитоб билан Хўқанд сари силжиди...

Иккинчи мушт, яъни ўнг қанотдаги Амир Довуд барлос сарбозлари орасида қилич яланғочлаб юргурган Низомиддин бир соат чамаси тўс-тўполон ичидаги қолди; кимгадир қилич солиб, отдан йиқитди. Яна бир сарбоз билан анча вақтгача олишиб, бир-бирига тиғ тегизишолмади. Орқаси билан тисарилиб келган бир отлиқ сарбоз, уларни ажратиб юборди. У, ҳамма нарсани унутган — қиёмат қойим ичидаги, нима бўлаётганини билмай қилич солар, чопонида Самарқанд лашкарининг белгиси бўлмаган суворий сари ташланарди. Ундан беш қадамча нарида отдан қулаб тушган бир сарбоз яна ўрнидан туриб, этакларидағи тупроқни қоқа бошлади: бир лаҳза ўтар-ўтмас унинг боши орқасига осилиб, танаси ерга гуппа ағанаб, питирлай бошлади. У уйқусираётган одамдек жонхолатда яна бир ўрнидан турди. Низомиддин у одамнинг бўйиндан қон тирқираб чиқаётганини кўриб, кўзини бошқа ёққа олди. Бу одамнинг елкасида Самарқанд белгиси кўринмасди. Соқолининг мош-гуручлигидан кекса одам эканлигини пайқади. Ўзининг ҳам бўйнига қилич тушиб қолишидан қўркиб, атрофига олазарак қараб, нарироқда бир-бирига қилич солишаётган самарқандлик билан фарғоналик томон югурди. У бехос ёндан келиб, фарғоналикнинг елкасига қилич уриб, отдан кулатди. Ҳоли танг бўлиб турган шериги унга мам-

нун бокди. Улар иккови дархол чап томонлариға бурилиб, шарақа-шурук қилич солишаётганлар тўпига ўзларини уришиди. Низомиддин қилич солар, ора-чора ўз ошналари Шодмонбек билан Абуалиларни қидиради. Бир муддатдан кейин қочиб кетаётган сарбозларни кўриб, фарғоналиклар енгилганини пайқади. Отининг жиловини тортди. Йигирма қадамча нарида отдан сакраб тушиб, қилич-қалқонини ерга ташлаб турган навкар ёнига от чоптириб бордию, унинг бош эгиб, таслим бўлиб турганини кўриб индамай қолди. Кўлида ярқираб турган қиличини ҳам эгар қошида тутди. Қиличи дамида котиб қолган қонни кўрди. Пешанасидан иссиқ тер окқандай бўлди. От жиловини кўйиб юбормагани ҳолда сўл кафти билан пешанасини артган эди, қўли қип-қизил қон бўлди. Қалпоғини кўтарди — ҳа, қалпоқнинг таги жиққа қон... ўзининг ярадор бўлганини сезгани ҳамон, боши, елкаси ачиша бошлади. У отда туриб, рўпарадаги одамга қаради; у Низомиддининг чаккаси, бурни устидан окиб тушаётган қонни кўриб, ерга қаради. Улар — голибу мағлуб бир лаҳза бир-бирларига ўқрайиб қараб туришди! Шундан сўнг Низомиддин отининг бошини кайириб, Хўқанд йўлида кетаётган сарбозларга етиб олиш учун шошилди. Сал юрмасиданоқ йўлда белида энлик қизил кумушкамар бир одамнинг тўнкарилиб ётганини кўрди. Юраги шиғ этиб, орқасига тортиб кетди. Атрофида айланди — тўнида Самарқанд белгиси бор! У дархол отдан сакраб тўшиб, тўнкарилиб ётган одамни ағдарди; бу — Шодмонбек эди. Дўстидан жудо бўлиди... Кўзи тиниб, юрагига тиф санчилгандек бўлди. Юз қадамча нарида кетаётган сарбоз, Низомиддинни кузатиб турарди: «Қани, юринг! Улар анча олислаб кетишиди!» Низомиддин «хўп» дегандек бош қимирлатди. Шу лаҳза йигирма қадамча нарида оҳ-воҳ қилиб ётган яна бир киши ердан бошини кўтарди. «Хой, иним, самарқандликман, мени олиб кетинг! Мен бу ерда қолмай, кечкурун қашқирлар, чиябўрилар келади...» Низомиддин отини етаклаб, унинг тепасига борди, «белимдан қилич едим, туролмайман...» Низомиддин бир лаҳза унинг тепасида турди.

— Отимга мингашолмайсизми?

— Йўқ, иним, туролмайман.

— Бир оз сабр қилинг. Ҳозир аравалар келиб сизларни йигиштириб олади.

— Шу илтифотингизга ҳам раҳмат! Арава келгунiga чидаб туролмайман. Асли бухороликман, отим — Кудратулло. Ҳаққимга бир дуо ўқиб қўйинг.

— Хўп, оғо, — деди Низомиддин маъюс.

Низомиддин Абуалининг ҳоли не бўлди экан, деб анча олислаб кетган қўшин орқасидан от чоптириб кетди. Бошидан сирқираб чиқаётган қон бурни учидан чак-чак томаётганини сезмасди. У анча ерга бориб, орқада чўкка тушиб, йиғлаб ўтирган мағлуб сарбозга қаради. Шодмонбекнинг калласини узган шу эмасмикан? Агар шу бўлса, нега унинг калласини олмадим? Нега у отида қочмади? Қочиб улгуриши мумкин эди-ку?

Ёмон туш каби кўрқинчли, чалкаш хаёллар Низомиддиннинг қон сирқираб турган бошини қуршаб олган эди. Олдинлаб кетган ошналарига етиб олай, деб у отини никталардию хаёлида боши учиб кетган Шодмонбек билан бели синиб инграб ётган бухоролик сарбоз турарди.

Кеч кириб қолган. Қуёш ғарб уфқига ботмоқда. Сўнгги нурлар даштга тушиб, тик турган кишининг сояси бир терак бўйи чўзилиб кетарди. Яккатут, Рафқон, Конибодом оралиғидаги кимсасиз даштда одамлар ва отлар сочилиб ётиби. Даштни кесиб ўтган арава йўлидан бирорта суворий ўтмайди. Бу ердаги тўқнашув — қиёмат қойим даҳшати атроф ёқдаги қишлоқларга тарқалган эди. Боши кетиб, жони узилганлар ваҳшатдан тамоман кутулган. Аммо тиф тегиб қўл ёки оёғи узилганлар оҳ-воҳ уриб, мадад кутиб ётарди. Қуёш ботиши билан мис баркашдек ярқираб, дашт устида ой кўтарилиди. Кечаги қоп-кора тужа булатлар йўқ, осмон мусаффо эди-ю, аммо ой қонга белангандай қизариб турарди. У кенг даштда, янтоқзорда сочилиб ётган кишиларни қўрарди. Бироқ ёрдам кўлини узатолмасди. Сахрода ойдан бўлак ҳеч вақо йўқ. Бели синиб ётган сарбоз ҳам ойга тикилар, ундан најжот йўқ; у баланд қаср туйнугидан жамолини кўрсатиб турган маликага ӯхшарди. Бели синган сар-

боз ойдан юзини ўгириб, пиллақуртдек сурилиб бориб, хар эҳтимолга қарши, ерда ётган ўткир қилични олди. Ёнидаги ўлик белидан ханжарини ҳам сууриб, ёнига қўли етадиган жойга қўйди.

Ярим тунда бу ерга орқадаги бир гурух навкар ихотасидаги аравалар етиб келди. Ярадор кишиларни, қуролларни териб олиб, араваларга жойлаштиришди. Шу орада, яна бир гурух сарбозлар ихотасида «Угрук» аравалар ҳам музafferият дарагини эшитиб, амирзода орқасидан жадаллаганича, Хўқанд томон кетишиди. Шаҳид бўлган сарбозларни эртага эрта билан шу ерларга кўмишни айтган карвонбоши, ярадорларни тезда шахарга олиб киришни одамларга тайинлаб, ўзи отга қамчи босиб, «Угрук» арава кетидан Хўқанд сари чопди. Бу обдан чиройлик қилиб безатилган аравалар ичидан Мирзонинг хотини — Ақобегим, ҳамда унинг бир неча хизматкорлари ўтирарди. «Угрук» аравани қўриқлаш, мабодо мағлубият хавфи турилганда орқага қайтариш энг содик сарбозларига топширилган эди.

Хўқандликлар ҳамма дарвозаларни очиб, Мирзони шодиёна билан кутиб олди. Шаҳардан бир фарсанг ташқарига чиқиб турган оқ саллали, Жоме масжиди имоми; қози калон ва бир тўда казо-казолар катта йўл устида Мирзони кутиб олиб, саройга олиб келишиди. Дарҳол ичкариларни кўздан кечирган Мухаммад Арғун одамлари атрофга ясовулу навкарлар қўйишди. Арғундан аввал шаҳарга Қораилон кириб, саройни ва шу атрофни кўздан кечирган эди. У, Мирзога Мухаммад Арғун ҳамма ишни кўнгилдагидек ҳозирлади, деб хабар берганидан сўнг, Мирзо саройга кириб борди. Шу муддат иккинчи топқир анчолар Самарқандга ва ундан сўнг Ҳиротга музafferият ҳақида нома олиб кетдилар. Биринчи топқир тўрт анчо фала ба қозонилган чоғ — жанг майдонининг ўзидан Самарқандга жўнатилган эди.

Хўқанд саройининг кўркам хоналаридан бирига кираётган Мирзо кетидан Шоҳ Малик кела туриб, унга мурожаат этди:

- Амирзодам, гапим бор эди.
- Марҳамат! — у Шоҳ Маликка қаради.

— Ҳордик оласизми ёки Аҳмад Мирзони сўрок қиласизми?

— Аҳмад Мирзо билан гаплашиб олиш керак.

— Тушундим.

— Саркардаларга айтинг, шаҳар таланмасин! Ҳазинага кирилмасин, ҳазинабоннинг ўзи бунда келсин! Биз ўзимиз, эрта тонгдан бошлаб, саркардаларимиз устига заррин хилқат ёпамиз, тиллолар улашамиз. Ҳеч кимни хафа қилмаймиз...

— Тушундим, — Шоҳ Малик ташқарига чиқиб кетди. Саройнинг ҳамма ерига, асосий эшикларга қуролли навкарлар қўйилган эди. Бир муддатдан кейин Мирзо сарой ҳовлисига чиқди: қўллари боғланган Амирак Аҳмад ҳовлида тик туарди. Атрофидা Самарқанднинг саркардалари, мансабдор шахслар. Устига духобалар ташланган курсига Мирзо келиб ўтиргди. Оёғи остида йўлбарс териси. Рўпарасида амакива-часи Аҳмад Мирзо бош эгиб туарди.

— Қўлларини ечиб юборинг! — деди Мирзо Муҳаммад Арғунга ишора қилиб. Арғун белидаги ханжарини суғуриб олиб, чилвир арқонни узиб ташлади. Амирак Аҳмад увишиб қолган қўлларини осилтириб, уқалади.

— Ҳа-а, амирзода, ҳолингиз қалай?

— Биз енгилдик, сиз енгдингиз!

— Сиз, мамлакат ҳокими эмас, шаҳват ҳокими бўйдингиз! Офарин! Мунажжимлар кўзига «алиф» тортмоқ бир томонда, шахвоний хирс бир томонда! Биз бу ишга йўл қўёлмаймиз! Нега Ашт томон кочдингиз? Боисини билсак бўладими?

— Мағлубият ва саросималик кишини не ҳолга солмайди. Киши енгилгач, тўғри келган томонга қочади.

— Йўқ, очикроқ айтинг! Сиз қочиб жон сақламоқчи бўлсангиз, Шўрсув орқали тоққа чиқиб кетишингиз мумкин эди. Ҳўқанд ёки Марғинонга шу сабабли кирмадингизки, сизни ўз кишиларингиз ушлаб берарди. Ашт орқалик юқорини кўзлаб қочишингиздан мақсад нима?

— Мақсад ўйқ, фақат янглишиш...

— Сиз, содда кишилардан эмассиз! Сизнинг са-

ройингизда менинг одамларим бўлган, феълу атвонгиз, мақсадингиз, мағлубият келгудай бўлса, нима чора кўрмогингиз бизга маълум! Бу томонга юриш бошлишдан аввал, сиз қочажак ковакларнинг ҳаммаси бекилган. Энди, Мирзо, очикроқ гапиринг! Ҳақиқатни айтсангиз — омон қоласиз. Бўлмаса, хукм — битта! Қон тўкилади! Фуқаро қирилди, мен сизни омон қўймайман! Подшоҳни беҳурмат қилдингиз! Ҳақ гапни айтинг, амаким Амир Умаршайх арвоҳини хотирлаб, сизни омон қўямен! Бўлмаса, йўқ.

— Ҳақ гапни айтаман, амирзода, сўзингизга ишонаман. Аштдан тоғ йўллари орқали Сайхун бўйига, Сифноқ ва Шоҳруҳия шаҳарларига чиқиб олиб, Даشتி Қипчоққа бормоқчи эдим. Биз билан яхши алоқада бўлган туғли Темур авлоди Мухаммадхон билан аҳдлашувимиз бор эди. Мухаммадхон Ўрусхоннинг набираси — Бароқ ўғлон билан келишмай, жанжал устига жанжал бўлмоқда. Сайхун бўйларидағи Даشتி Қипчоқ хонлари Ҳирот ва Самарқандга қарши бўлиб, менга мадад беришга тайёр эди. Бароқ ўғлонни паноҳ қилиб Даشتி Қипчоққа қочаётган эдим...

— Мана энди ўзингизга келдингиз, — деди ўрнидан туриб Мирзо, — сизни ўлим жазосидан сақлаб қоламен. Сиз эрта билан хотин ва болаларингизни олиб, Ҳиротга жўнайисиз. У ерда аввало подшоҳдан, ўз амакингиздан қилган гуноҳларингиз учун авф сўрайсиз. Кейин, мана бу гапларни: Бароқ ўғлон, Мухаммадхон билан тузган аҳдларингизни подшоҳга мукаммал айтиб берасиз! Бу жуда муҳим гап.

— Ҳўп, — деди Аҳмад Мирзо ўлимдан қолгани учун қўли кўксисда, амирзодага таъзим қилиб.

Эртасига эрта билан Аҳмад Мирзо бола-чақалари билан аравага ўтқазилиб, Мухаммад Арғун кишилари ихотасида Самарқандга, ундан Ҳиротга жўнатилди.

Анчолар ғоятда муҳим ва махфий номани олиб Самарқанд сари чопдилар; ундан Хурросонга ўтишади. Лекин Аҳмад Мирзо устидан қозонилган ғалаба хабари эртасига ёқ Ҳиротга маълум бўлди. Хўжанддан пайдар-пай учирилган кабутарлар Жиззахга, Жиззахдан Самарқандга жўнатилди. Самарқанддан учирилган ка-

бутарлар Шахрисабзга, ундан Балх, ундан Маймана, ундан Ҳиротга етиб келди. Биринчи хушхабар олиб келган Маймана кабутарини подшоҳ ўз кафтида ушлаб, оёғидаги ипак қозозни очиб олди, ҳиротлик кантарбозга ўн тилло ва қимматбаҳо сарупо беришни буюрди. Ҳўжанддан тортиб, то Ҳиротгача бўлган ма-софадаги кабутар ўргатувчиларнинг ҳаммаси ақча ва сарупо беришларини тайинлади. Муҳим хабарларни тезда етказишда кабутарбозларнинг санъати анчолардан ҳам, тепаликлардаги ўт ёқувчи қоровулхоналардан ҳам қулайдир, деди Шоҳруҳ.

Катта қўшинни шайлаб, мабодо бирон кори-ҳол бўлса, шитоб билан Самарқанд сарига йўлга чиқишига ҳозирлик кўриб турган Иброҳим Султон бу хушхабарни эшитиб, бўшашибди. Отасини зафар билан муборакбод қилиб, сарой аъёнлари юзидағи севинчга шерик бўлиб кўринди. Лекин аслида соҳибқиронликдан кўра ҳам, «соҳиби илм» оғасининг шаъну шавкати унга ёқмасди. Аҳмад Мирзо бир савалаб, «патини тўзитиб» юборишини, шундан сўнг отаси Самарқанд таҳтига бирон «қаттиқўл» ўғлини юборишини умид қиласади. Умуман, у ўз оға-иниларидан Мухаммад Тарагай билан Бойсунқур Мирзони давлат ва сиёsatга, ҳарбга аралаштиргиси келмас, укалари — Суюрготмиш Мирзо билан Мухаммад Жўқийларни келгусида ўзига тобе — Мовароуннаҳр ҳокимлари қилиб тайинлашни кўзларди... Қаҳри қаттиқ амирзода Шерозга қайтиб келмай оғасининг Самарқандга қайтиб келишини кутди. Шу хурсандчилик кунларининг бири Шоҳруҳ Иброҳим Султонни ўз ёнига чорлаб, яқин кунларда Аҳмад Мирзо Ҳиротга етиб келиши, гуноҳкор амакивачасини унинг ихтиёрига юборажаги, ўз қўл остидаги бирон шаҳарга ҳозирча ҳоким қилиб қўйишини тайинлади. У, сиртда бўлгандан кўра кўз остида бўлгани маъқул, деди. Қораилон кишиларига ундан асло кўз узмасликни тайинлаб қўймоқ кераклигини ҳам айтди. Иброҳим Султон амр бажо келтирилишини, мабодо амакиваччаси яна фитнага ружу қилса «айб ўзида» деган гапни кўнглидан ўтказди. Чунки отасининг «Қораилон» номини тилга олиши ана шу нарсадан далолат берарди. Бир ҳафталардан кейин у отасидан рухсат олиб, Ше-

розга жўнади. Ўзига нисбатан хар бир кичик хатти-харакатларгача диққат билан кузатадиган «чакказарб» амирзодани укаси Бойсунқур Мирзо бошчилигида сарой аъёнлари кузатиб қолишиди.

Оқ кабутарлар олиб келган мужда ва бунинг устида шахзоданинг пойтахтдан «калтис» чиқиб, Шерозга кетиши Ҳирот аҳлига қўшқувонч бўлди. Рамазоннинг охирги ҳафтаси қолиб, катта ҳайитнинг баҳор ойла-рига тўғри келгани ҳаммага севинч бағишлиарди. Жангнинг тез тугаллангани, Аҳмад Мирзонинг Ҳиротга бош эгиб келаётгани, Фарғонада қатли ом у ёқда турсин, бирон кишининг ҳам бурни қонамагани меъмор Нажмиддин Бухорийни ҳам, кулол Абу Толибни ҳам, уста Ҳасанбек ва Ҳусайнбекни ҳам хурсанд қилди. Жанг тўполонида қон тўкилди-ю, ичкарида бу иш бўлмади. Ҳарқалай Улуғбек — Улуғбек, Иброҳим — Иброҳим, дейишди улар бир-бирларининг қулоғига, маърифату илм кишиси жанжални кўпроқ ақл-идрок билан ечади. Бунга чори келмаган ҳокимлар муаммо-ни қилич билан ҳал қиласидар... Фарзандларимиз, ҳудо хоҳласа, эсон-омон кириб келишади, деб умид қилишди улар. Лекин «меъморлар меъмори!» устод Қавом ўз ўғли Худододбекни Амир Довуд барлос қўлидан олиб қолгани, бу билан ўз фарзандини бошқалар-никидан азиз кўргани ва шунга ўхшаш баъзи хатти-харакатлари билан, мана бир неча ойдирки, Нажмиддин Бухорий билан учрашолмай юради. Корфармо Аҳмад Чалабийнинг қилган фитналари, Меъморнинг тажанг юргани, мадрасада шогирдлари билан ўзи енг шимариб ишлаётганидан ҳам хабардор эди. Аҳмад Чалабийнинг «бухоролик Меъмор салтанатга ноҳайриҳоҳ кимсалар» билан ошначилик қилаётгани хақида (ағиригандан (гуржи устаси Жўржий билан иноклигини кўзда тутади) устод Қавом юзини тескари қилиб, бурнини жийирди. Илгари бунақа гапларга жон қулоғини тутадиган устод Қавомга бу сафар гап ёқмаётгани, Чалабийни совук карши олгани хайратга солди. Со-нуққина хайр-хўшлашиб чиқиб кетаётган Аҳмад Чалабий устодга: «бу ҳақда Иброҳим Султонга шипши-тажагини» айтганида, устод Қавом наридан-бери юзиға фотиҳа тортиб ўрнидан турди.

— Бундоқ иғво гапларга амирзода бурнини қокади!
— Нима дедингиз?

— Меъмор Нажмиддин Бухорий салтанат учун жуда кўп яхши ишлар қилган. Бунинг устига, ёлгиз ўғлини жангга йўллади. Яна нима қилиб берсин?! Салтанатнинг мўътабар кишилари орасига тушиб, тагин бошингиз узилиб кетмасин, Чалабий жаноблари!

Аҳмад Чалабий ўзининг Қавом томонидан ғоятда совук қарши олинганига, устоднинг ўзгариб қолганига таажжубланди. Агарда Иброҳим Султон Шерозга кетиб қолган бўлса, Бойсунқур Мирзо Ҳиротда, унга арз қилишни ўйлаб қўйди.

XIV б о б

НАВРЎЗИ ОЛАМ

Ҳирот шимолидаги Кўҳисиёҳ этаклари, яssi кирлар, жилғалар, бутун бир воҳа яшиллик билан ўралди. Кўхи сафед билан Кўҳисиёҳ оралаб юзларча катта-кичик сойларни бирлаштириб оқаётган Ҳериёрд дарёси ҳам яшилликлар оралаб, Мурғобу Жайхун томон интилар, аммо уни бехудуд ва ташна қумликлар йўл-йўлакай шимарив қўярди. Унинг жануброғидан оқадиган Фараҳрӯд Ҳашрӯд ҳам ташна ерларга сингиб кетарди. Наврўзи олам бўлиб, тоғ атрофлари яшилликлар билан ўралгач, Ҳирот ҳалқи тоғ бағирларига равочу лола сайлига отланишар, биргина Ҳирот эмас, Гургон, Қалъян Нав, Қароҳ шахарларининг ахолиси ҳам равоч сайлига чиқишарди. Кўҳисиёҳ орқасида яна ҳам баланд тоғлар силсиласи диққатни тортар — то Банди Туркистон тизма тоғларигача бу силсила давом этарди. Ҳиротдан анча узок Боло Мурғоб, Оби Қайсар бўйларида ҳам бу сайил навбаҳорга файз қўшарди. Ҳатто жанубдаги Намаксор кўли бўйидан ҳам одамлар Кўҳисиёҳ этакларига келишарди.

Ҳеч кутилмаганда Нажмиддин Бухорий ховлисига устод Қавом кириб келди; дарвоза олдида уни Зулфиқор кутиб олди. «Ҳиротнинг ғоят эътиборли одами»га кўзи тушиши биланоқ у озгина довдираб қолди. Ке-

йин югуриб бориб, отининг жиловидан ушлаб, устодни оҳиста отдан туширди.

— Ассалому алайкум!

— Ваалайкум ассалом!

— Марҳамат, устод!

— Бисмилло... — Қавом олдинда, Зулфиқор отстаклаган ҳолда ташқари ҳовлига киришиди. Ҳовли ўртасигача келиб қолган устод Қавомни хоналардан югуриб чиққан Заврак билан Favvos яна қуюқ салом билан кутиб олиб, меҳмонхонага — ҳовлининг кунчиқар томонидаги дангиллама ўймакор, ганчин катта хонага олиб киришиди. Заврак шу лаҳза бу хабарни ичкари ҳовлига етказди. Меъмор Нажмиддин Бухорий дархол ўрнидан туриб, меҳмонхонага сарпойчан кирди.

— Э, марҳамат, келсинлар! Ассалому алайкум!

— Ваалайкум ассалом! Соғиндим, кўргим келди. Биз, кексалар бир-биримизга суюнишиб қолганмиз... — деди илгаригидай димоғдорлик, пишқиришлардан жиндак бўлса-да, асар кўринмай устод Қавом. У ҳозир мутлақо бошқача, анча самимий бўлиб қолган эди. Үнинг «Биз кексалар бир-биримизга суюнишиб қолганмиз» деган сўзидан Нажмиддин Бухорий Қавомнинг подшолардан кўра ҳам ўз дўстлари, ҳамкасларига суюнишиб қолганини пайқади. Ўлими яқинлашгач, киши ўз ошналарига ўюр бўлиб қолади — оғир кунига ярамайдиган, тобуткаш бўлолмайдиган амирзодалардан не фойда! Бунинг устига, яқинда тенгқурларидан ҳаттот Абдураззок Машҳадийнинг вафоти улар сафига тушган кучли бир зарба эди. Устод Қавом қўлини фотихага очди: — Қадам етди, бало етмасин!

— Хуш келибсиз!

— Соғ-саломатмисиз?

— Шукур...

Шу дам учала шогирд ҳам ўринларидан туриб, дастурхон тайёrlашга киришишиди. Заврак юрганича яна ичкарига кирди. Устод келганини сезган Маъсума бека каттакон жез патнусга қанд-курсларни қўяётган эди. Негадир меҳмон келса ҳам бепарво турган Бадиа, ташқари ҳовлидаги молхонада отларнинг тепишиб, кишнашлари эшитилиши билан югуриб кета туриб, Зулфиқорга қаради:

— Бир ўзими?

— Ҳа, устоднинг бир ўзлари, — деди Зулфиқор.

Бадиа отхонага кириб, акасининг «Кўк капитар»ига қаради. Чопқир «Кўк капитар» бегона отни ёқтирмасди — у четлаб ўтиб, ўз отининг жиловини ечиб, нарироққа олиб бориб боғлади.

— Бу ишларни менга буюринг, бекам!

— Сизни аядим, хурматли Шоший, — деди от бошини нозик қўллари билан силаб Бадиа. — Сиз отамга жуда кераксиз. Отамлар бошқалардан кўра хам сизни қобилиятли дейдилар. — Бадиа Зулфиқорга қараб жилмайиб турарди. Унинг бу гапи камси-тишми ё одатдагидай ҳазилми — билиб бўлмасди. Аммо унинг кулгиси ниҳоятда ўзига ярашиб турарди. Зулфиқор довдираб қолди.

— Мен айтмоқчиманки, бу ишлар...

— Мен айтмоқчиманки, бу от фақат мени, ундан кейин акамни йўлатади ёнига. Мен йўғимда унга яқинлашманг, шикаст етказиши мумкин. Унга қаранг, отга ўхшамайди!

Шундан сўнг Бадиа отини эркалади, сўнг Зулфиқорнинг ёнига келди, кўзларига тикилиб, жилмайди.

— Боринг, устодингизга қарашинг! — у чопиб, ичкари ҳовлига кириб кетди.

Зулфиқор қизнинг елкаларига, соchlарига қараб қолди: эҳтимол, устоднинг бу келиши тўй ҳақидадир! Ҳали, Бадианинг акаси жангдан қайтмай туриб, тўй бўлиши мумкин экас-ку! Эҳтимол, тўй ҳақида масла-ҳатлашиб олмок учун келгандир?

Зулфиқорнинг юрагига қандайдир шубҳа тушди. Наҳотки, Бадиа ўша тўрсайган Худододбекка хотин бўлади? Наҳотки, узумнинг сарасини ит ейди? Пулу давлат, обрў... нималарга қодир эмас! Эй, сен бухоролик, чучварани хом санаб юрибсан! Бу кулгию қарашмалар, бу топилмас ширин лаҳзаю, ноёб табасумлар — шунчаки гап. Улар бирорвники. Ўша лаблари тўрсайган, қимору қўчкор уриштиришдан ўзга ишни билмайдиган Худододбек буларга бир йўла эга бўлади. Бу гўзалликлар ўша сўтакнинг қўйнида йўқ бўлиб кетади.

Шундок бўлармикан-а? Дунёнинг ишлари доимо

тескари. Шунча шаддодлиги, фикрининг тинклиги, чакқонлиги билан Бадиа Худододбекка хотин бўлармикан? Ҳамма нарсани ўзгартириш мумкин, аммо инсон феълини ўзгартирмоқ амри маҳол, деган эди устод. Осмонда чарх уриб ўйнаб учган бу оқ кабутар Худододбек қафасида ётармикан?

Зулфикор шундай хаёллар билан банд эди. У ўз шериклари ёнига келди. Устодларга дастурхон ёзиб, ҳамма нарсани муҳайё қилиб беришгач, ўз хоналарига киришди. Чунки устод уларни ҳоли қўйишни истагандек бўлди.

— Мавлоно Жаъфар Табризий, Хўжа Юсуф Андугони ҳам ҳоҳиш билдириб, агар сиз бир ишга бош бўлсангиз, бизлар измингиздамиз, дедилар, — устод қавом Нажмиддин Бухорийга қаради, — азизим, наврўзи олам, ҳаммамизнинг димогимиз чоғ. Бунинг устига кичик ҳайитнинг баҳор фаслига тўғри келгани яна ҳам нур устига аъло нур бўлди. Агар ҳоҳиш билдирсангиз, болаларимизни олиб, араваларда Кўхи-сиёҳга, равоч сайлига борсак. Шунга нима дейсиз?

— Сиз, устод, бир нима десангиз, биз бўйин бурган эмасмиз, — деди Меъморнинг чехраси очилиб,— айни муддао!

— Фисофурс (Пифагор) ҳакимни бир авлиё наддофлар¹ дўконига олиб борган экан, — деди гапни узоқдан айлантиришни яхши кўрадиган устод Қавом,— ҳаким бу ерда кўрибдиларки, чийратма иплардан овоз чиқибдир. Ундан сўнг, даштдаги ўлган тошбақа суюгидан ҳам овоз чиқибдир... Фисофурс ҳаким оҳангни ана шундай ўрганиб, мусиқий суурулар кашф этибдилар. Мусика инсон танасига жон киритибди. Хўжа Юсуф Андугоний танимизга жон бермоқчилар...

— Кўп хикматли гап айтдингиз, — деди Меъмор. Устод Қавом «донолиги»ни тан олиш унга жуда хуш ёқарди. — Хўжа Юсуф Андугоний ҳазратларининг муборак овозларини анчадан буён тинглаганимиз йўқ, танимизга жон бўлсинлар.

— Бойсунқур Мирзо ҳам шу куни сайилга чикурлар. Лола сайли киши дилидаги фуборни йўқотур,

¹ Наддофлар — пахта титувчи, ип йигириувчилар.

равоч медани тозалайди... Бу — «Ал-Қонун»да ёзилган.

— Қачонга мўлжаллагансиз?

— Пайшанба куни чиқиб кешиб, жума куни кечки пайт қайтамиз. Агар сайдимиз яхши бўлса, жумани ҳам унда ўтказмоғимиз муддао. Кароҳдан ўтиб, Шўрак томон борсак. Лолаю равоч у томонда кўп.

— Мавлоно Андугоний «Рисолаи мусиқий» ёзибдурлар, деб эшитдим. Бу, тахсинга сазовор, — деди Меъмор Нажмиддин Бухорий, — у зотнинг қавл, рехта, савт, сажъ, амал, нақш¹...ларини тинглаганмиз. Танбури бекиёсларига монанд соз йўқ.

— Балли! — деди ўз сухбатларидан мамнун бўлиб устод Қавом, — Аъло ҳазрати муаззами хумоюний устод Андугонийни бутун Ҳиндистонга алишмайман, дебдилар. Бундан ортиқ тавсиф борми! Аммо устод Андугоний бундан бир неча ой илгари қаттиқ дилгир эдилар. Сабаб, Мирзо катта лашкар билан Фарғона устига боргани, Аҳмад Мирзонинг номуносиб ҳаракати сабабли Хўқанд, Ахсиент, Андижон раияти устига тушадиган шўриш у зотнинг дилига алам берди. Лекин ишнинг бежанжал, бекирғин бўлгани у зотни яна оёқка турғазди. Устод юрагидан андух кўтарилиди — у зот ҳам Аҳмад Мирзонинг ўзи айбдор эканини тан олдилар...

— Хайрият!

— Яна бир гапни сизга айтмоғим даркор: Аҳмад Мирзо Ҳиндистону Чинга сафар қилиб, Ахсиентга қайтиб келгач, расадхона қуриш иштиёқида юрган Ҳакимхон Водилий деган бир мунажжимнинг кўзига «алиф» тортирибдир. Ҳакимхон Водилий аввал Бухоро, кейин Самарқандда таҳсил топган мулло одам экан. Самарқанду Ҳиротда илм-маърифатга ривож берилаётгани, Мирзо Улуғбек ахли фузалога меҳрибонлик кўрсатаётгани, агар унга эътибор қилишмаса, Самарқандда, илмпарвар амирзода хизматига келиб қолишини бир неча бор айтган Ҳакимхон Водилийни «бировнинг хотинига зўрлик қилмоқчи бўлди», деган бўхтон билан тутиб олиб келинган. Аҳмад Мирзо-

¹ Мусика асарлари.

нинг фармони билан икки кўзига «алиф» торттириб, сўкир қилиб қўйишган. Мирзо Аҳмад бир базмида: «Мана энди у мунахжим бўлиб, осмонга тикилолмайди! Ўзи яратган мавжудот сирларини худойи таолодан ўзга хеч кимса билолмайди. Энди у на хиротлик, на самарқандлик паноҳларини ҳам кўра олади!» дебди. Коронги хужрада оху надомат билан ётар сўкир мунахжим хусусидаги хабар ҳам Мирзо Улуғбек кулоғига етибди. Ахир бу зулм-ку!

— Агар Мирзо Аҳмад шундай ёмон ишларга саъй этган бўлса, унинг тахтдан олингани мақбул бўлибди, — деди Нажмиддин Бухорий.

— Мирзо Аҳмад Бароқ ўғлон билан ҳам тил биритирган, деган гап бор.

— Бу ҳам жуда хунук гап.

— Таксир, сиз менга «Ал-Мажистий» китобини бериб турмоқчи эдингиз. Ёдингиздан кўтарилигани йўқми?

— Асло, — деди Нажмиддин Бухорий, — агар истасангиз ҳозир олиб чикаман.

— Абулвафо билан Тусий хусусида бир-икки маълумот айтсангиз.

— Абулвафо ал-Бузжоний Хуросонда таваллуд этганлар. Кейинчалик Бағдодга бориб, қадимги юон олимларининг ал-жабр ҳамда фалакиётга оид асарларини таржима қилдилар ва илмий шарҳладилар. Ҳисобу ҳандаса соҳаларида янги илмий масалаларни илгари сурдилар ва талай рисолалар яратдилар. У зот Бутлимуснинг «Ал-Мажистий» китобини янги фикрлар билан тўлдириб қайта ишладилар. Бағдоддаги расадхонада янги жадваллар тузишда ҳам қатнашдилар. Ой ҳаракатини ўрганишга доир муҳим тадқиқотлар ҳам олиб бордилар. Муҳаммад Насриддин Тусий Мараг шаҳрида расадхона барпо этдиларки, бу расадхона ўз замонининг улкан илмий маркази бўлди. Расадхона олимларининг кўп йиллик тадқиқотлари сифатида «Эбхон зижи» жадвали тузилди. Тусийнинг ҳандасавий илми ривожланишида муҳим аҳамият касб этган «Таҳрир уқлидус» китоби битилди. Унинг «Шоклул Гита» китоби туфайли ясси ва айланма ҳандаса мустақил ал-жабр фани бўлиб қолди. Насриддин Ту-

сий булардан ташқари жабр, тиб ва мантиқ назарияси билимларининг бошқа соҳалари бўйича ҳам кўпгина китоблар ёзган.

Икки меъмор аллавактгача ширин сухбатлашиб ўтиришди. Улар яқин анча вақтдан бери бундай кўнгилли ва дилбар сухбатда бўлмаган эдилар. Улар Зулфиқор олиб кирган таомдан тановул этишди. Аммо майга ружу қилишмади, сабаб, эртанги «равоч сайли» bemai ўтмасди. Кечга яқин устод Қавом қалингина «Ал-Мажистий» китобини қўлтиқлаб, Меъмор билан хайр-хўшлишиб, ўз ҳовлисига жўнади.

XV б о б

ЙЎЛДА

Олмосдек серқирра, офтобда чўққилари ярқираб турган баланд қорли тоғлар кўзни олади. Бу — Кўҳисиёҳ. Унинг остида яланғоч қўнғир қоялар силсиласи. Ундан ҳам пастда яшил гилам тўшалган бехудуд тепаликлар кўринади. Чукурликларда илон изи бўлиб сой оқиб ётибди. Шағал тошлар устїда шарқираб оқаётган тоғ суви — билур, у нафас олиб турганимиз ҳаводан ҳам бефубор. Киши ҳовучлаб ичган сари яна ичгиси келади. Сой бўйига тушган киши беихтиёр тепага — осмонга бигиздек кириб кетган чўққиларга қарайди; баландликларда осилиб турган улкан харсанглар ҳозироқ узилиб тушаётгандай ваҳима солар, тепалиқда қатлам-қатлам тошлар орасидан ўсиб чиқкан кўкатлар, баъзан унда-бунда чироқдек ёниб турган лолалар ўзини кўз-кўз қилиб, завқ бағишлар эди. Табиат мўъжизаларга нақадар бой; тошларга урилиб, шарқираб оқаётган шаффоф сув ичиди оқимга қарши сузиб бораётган балиқларнинг кумуш тани ярқираб кўриниб қолар, бир дақикада қайроқ тошлар орасига кириб яширинарди. Сой шов-шуви орасида асаларилар зувиллаб чексиз майсазорлардаги ўт-ўланлар дастурхони томон ошиқишарди. Сой бўйида турган киши тепасидаги баҳайбат чўққиларга беихтиёр боқар, бошдан қалпоқ тушиб кетгудай тик баланд-

ликларга қарап эди. Негаки, инсон табиати юксакликларга интилади. Төғ ҳавоси нақадар сўлим — чарчоқ асабларга ором, юракларга мадор, танларга қувонч бағишилар, иноклик ва ширин мулоқотларга сабабчи бўйларди. Улкан қоятошлар остидаги жимлик, тошдан тошга урилиб оқаётган сой шовқини, асаларилар финифлаши кишини аллалар, киши ўзини тетик ва енгил ҳис этарди, Меъмор айтганидек, киши дарду аламдан холи, бемалол юрарди...

Кўхисиёҳ этакларидаги кенг майсазорлардан бири Равоч дараси деб аталарди. Ҳар навбаҳор бу кўкламзорга хиротликлар от-аравада чиқиб, бир-икки кун саир этиб, хордик чиқариб қайтишарди. Сайил кунларида шахардан ҳолвачию шакарпазлар, аттору кабобназларгача аравада бу жойга келишар, савдо-харид, баъзида курашу дор, кўчкор уриштириш ҳам авж оларди. Баландликларга чодир тикилиб, аёллар, болачақалар ҳам яшил майсазорларда саир қилиб, хордик чиқарарадилар. Сипоҳ табиат, ринд йигитлар ўзларининг чопқир, гўзал отларини ясатиб, йўрғалигини, тез чопишини намойиш қиласидар; баъзида ўттиз-қирқ отлик ихотасида амирзодалар ҳам саирга чиқади. Аллақандай бир саркарданинг топшириги билан ёни амирзода бежига, кўзга ташланмайдиган либосда юради — аммо унинг атрофида парвона бўлаётган забардаст сарбозларнинг фужон уриши ёш амирзодани дарҳол элга маълум қилиб қўя қоларди. Қачонлардир бу Равоч дарага Гулгун Ақо ҳам йигит кийими кийиб келган экан. Уни ҳеч ким сезмаган. Кенгликда савлат тўкиб чопиб юрган отликларга ҳамма тикилар, улар викор билан чопишарди. Ҳарқалай, ҳамма саийлда, ёш амирзоданинг рухи кайфиятини хушлашга қаратилган бўлар. Баъзан битта-яримта девонаю қаландарлар ҳам одамлар орасида юрарди, уларнинг гилларидан «Султоним» мисралари тушмасди.

Ўғил бола кийимини кийиб олган Бадиа то Пули Молон ва Херирўд дарёсидан ўтиб, адирларга етгунча соябон аравада, ота-онаси ёнида ўтирди. Яшил кирларга етгач, орқада акасининг тўрик отини мишиб келаётган Зулфикорни отдан тушириб, ўзи минди. Боядан бери ғаши келиб, юрайми-юрмайми, деб

арава ортида келаётган тўриқ ҳам устига Бадиа ми-ниши билан дикиллаб юриб кетди. От жониворнинг мамнун бўлганини бемалол сезиш мумкин эди. Бу тўриққа Низомиддиндан кўра Бадиа кўпроқ меҳри-бонлик қилар, вақтида ем-беда, сув берар, эркалаб пешаналарини силар, ёлларини тараар эди. Бадиа от-хонага кириши биланоқ тўриқ пишқирар, ётган бўлса дарҳол ўрнидан туради, Низомиддин отга ишқибоз бўлгани билан унинг бокувига кўп эътибор бермасди. Жангари отини миниб кетиб, бир қадар ювош тўриқ-ни уйда қолдиради. Яхшиям отнинг баҳтига Бадиа бор экан. У Бадиани кўриши билан жонланиб кетарди. Бу сафар ҳам шундай бўлди. Бадиа унинг жило-вини қўлига олиши билан жонланиб, пишқириб ўртиб кетди. Бадианинг ўғил бола эмаслигини фақат тўрт киши биларди, холос. Унинг қилиқлари ўғил бола-ларнига жуда ўхшарди. Сочларини ихчам турмак-лаб, Низомиддиннинг духоба дўпписини кийиб, усти-дан Ҳирот йигитларига хос ихчамгина салла ўраб олган, салланинг зар чизиқли печи елкасига тушиб турар эди. Акасининг жез тўқалик қайиш-камари билан этигини, қўйлаги устидан унинг юпқагина қизил чопонини кийиб олган эди. Бир дамдан сўнг тўриқ араванинг олдига тушиб олди. Бадиа Заврак Нишон-пурыйга қўзини қисиб қўйиб, олдинда кета бошлади. Ота-онаси унинг қилиқларини мутлако кўришмас, фа-қат ҳар замон, ҳар замонда Зулфиқор арава орқаси-дан бош чиқариб, Бадианинг қилиқларини кузатиб борарди. У, қўримсиз бўлса ҳам, Завракдан Бадиани қизғанар, унга нисбатан майли борлигини ҳали журъ-ат этиб айттолмаган бўлса-да, Бадиа бу бухоролик йигитнинг шайдолигини биларди. Шу сабабли ўзини қўз-қўз қилас, қилиқлари ўзига фоятда ярашар эди.

Бир муддатдан кейин арава олдида бораётган «ўғил бола» отнинг жиловини сал тортиб, орқага ўтиб хо-муш қолаётган Зулфиқорга кулиб қўйди:

— Отингизни тортиб олганимдан хафа эмасми-сиз?

— Асло! — деди ўтирган жойида тавозе билан Зулфиқор. У бирдан қизариб кетди. Дам Бадиага, дам унинг онаси Маъсума бекага қаради. Шаддод қиз

жўрттага ота-онаси ёнида эркаланаарди. У тўсатдан берган ўз саволига ўзи изоҳ бера бошлади:

— Бу тўриқ менга жуда ўрганган. Акамлардан кўра мени яхши кўради. Ҳатто акамларни йиқитган вақти ҳам бўлган... Чунки акамлар бир куни уни урган эдилар. От қўполликни хеч унутмайди. Сизни ҳам ётсираб, йиқитмасин, дедим-да. Ҳайвонлар, айникса, от билан фил ўз эгасининг гапига тушунади. Ҳозир мана шу гапимизни ҳам тўриқ билиб турибди. Лекин жонивор гапира олмайди. — Бадиа яна қиқирлаб кулди.

— Тилга тушунишини билган эдим, — деди кулиб Зулфиқор, — сиз бир куни овқат емаётганида гаплашиб, унга вактида хўрак емоқни тушунтирган эдингиз. Ўз қулоғим билан эшитганман.

— Бу гапингиз рост!

— Ҳамма гапларингизга тушундим. Жуда тўғри, — деди Зулфиқор жилмайиб. — Сиз минганингиздан кейин, кўриб турибман, от ҳам яшнаб кетди.

— Мен-чи? — сўради Бадиа ота-онаси олдидаги Заврак Нишопурый билан гаплашиб турганларида бехосдан.

Зулфиқор унга дафъатан жавоб қайтаришга журъат этолмай, сукут сақлади.

— Сизни Бухорода уйланиб келган дейишади, шу ростми?

— Лаббай?

— Бухорода хотинингиз борми?

— Йўқ, — деди Зулфиқор секин бош қимирлатиб.

— Нега отангиз шу пайтгача уйлантириб қўймалилар? Бухороликлар ёш уйланадилар, деб эшитган эдим.

— Сиз ўзингиз ҳам бухороликсиз-ку?

— Нега эрга беришмади, демоқчимисиз? — у яна қаҳ-қаҳ уриб кулди, — кўрқманг, отамлар яхши эшитмайдилар. Улар жаноб Нишопурый билан гаплашяптилар. Жаноб, мен Ҳиротда туғилганман... Ҳиротликлар бу борада унча шошмайдилар. Ҳарқалай, сиз Нишопурий эмассиз, анча шубҳалик одамга ўхшайсиз. Сизнинг юрагингизда қандайдир киши билмайдиган ширлар бор. Мен одамни тез билиб олардим, негадир

сизни билмаяпман. Юрагингизни очишни истамаяпсиз...

— Унчалик эмас, Бадиа бекам.

— Ҳо-ой, қизим, энди отдан туш! — деди Маъсума бека ўз диққатини сергап Завракдан олиб, соябон араванинг ён томонида ота-онасига кўринмай Зулфиқорга яқин келаётган қизига, — анови ерда кўприк, жарлик борга ўхшайди. Йўл жуда тор, ана кўряпсанми? Бир томон тикка тоғ, бир томон чуқур жарлик. Кўзингга қара!

— Хўп, ойижон, — деди Бадиа. Кейин у яна паст овоз билан Зулфиқорга мурожаат этди: — Бари бир билиб оламан!

Ҳамма ёқда баҳор севинчлари. Бадиа ғоятда кайфи чоғ; навбаҳорнинг сарин еллари унинг юзларига қанот уриб учар, у осмонда чарх уриб учайётган қушларга, баланд қояларнинг гўё очилиб қолган қизғиши бағирларига дўнг қирлар устида гилам бўлиб турган лолаларга кўз ташлар эди; гўё табиат буларнинг барини Бадиа учун яратгандай. Гўзал қиз ҳамма ёққа сукланиб тикиларди: остида суюкли оти, аравада меҳрибон ота-онасию шогирдлар... Заврак Нишопурининг баъзан қизиқчилик қиласидаги одати ҳам бор эди...

Дарҳакиқат, бухоролик йигит унинг юрагига қўл сола бошлади: наҳотки яхши кўриб қолган бўлса?! Худододбек-чи? Аммо бу пурвиқор, сирти ялтирок, димоғдор йигитнинг жангга бормагани, ўз отини бошқа бировга бериб, амирзода аралашувида бунда қолгани Бадиага ёқмаган эди. «Бўлгуси куёвининг гўдаиши ва бунинг устига ҳалигача бир ҳунари бўлмай, отасининг давлатида айш қилиб юриши... Йўқ, катта хонадоннинг пурвиқор ўғлидан кўра бухоролик келгинди йигит унинг кўз олдида яркирай бошлади.

Чуқур жарлик устидан ўтадиган кўприкка яқинлашганда, Маъсума бека Бадиага отдан тушиб, аравага ўтишни буюрди. Бадиа итоат билан тўриқдан сакраб тушди-да, жиловини Зулфиқорга тутқазди. Зулфиқор Бадианинг аравага чиқиб олишига ёрдамлашгач, ўзи сакраб отга минди-да, секингина бир қамчи уриб, арава олдига ўтди. У «Шайтонкўприк»дан ўтиб,

от жиловини тортиб, араванинг ҳам ўтишини кутиб турди. Орқасидан етиб келиб, Зулфиқорга яқинлашган Заврак унинг Бадиа билан ҳадеб гаплашаётганига ғаши келиб кинояли гап отди

— Тўра йигит, мана бу отга ҳам бир минсалар! Шунда иккита отга минган бўладилар. Бу отга минганингиз учун Нишопурий сизга ҳеч нима демайди, аммо нариги отга минганингизни Худододбек эшилса — каллангиз кетади...

— Қизиқчилик қилишга ҳам устасиз-да Нишопурний, — деди Зулфиқор қулимсираб. — Сизга бу отни бериб бўлмайди, чунки бир томон тоғ, бир томон жар; жарни кўриб борарсиз-у, аммо тоққа пешанангизни уриб оласиз, деб кўрқаман. Бу ҳам майлию, тўриқ сизни миндирмайди-да! Яхшиси тагингиздаги байталдан ажралманг!

— Ҳо-ҳо-ҳо-ҳо-ҳо, — Заврак Нишопурний беихтиёр қулиб юборди. — Майли, эшак тепкисини от кўтаради, лекин каллага эҳтиёт бўлинг.

— Калламни узадиган қилич Ахсикатда юрибди...

— Ҳамма нарсадан хабарингиз бор-а, Шоший?

— Қани, тўриққа ўтинг, Нишопурний, кўнглингиз ўксимасин! — Зулфиқор отдан сакраб тушиб, аравага қўшииeliқ байталнинг жиловини ушлади. Икки йигит ўринларини алмаштиришгач, арава тоғ ёқасидаги тор йўлда қалдираб жадал юриб кетди. Бадиа Зулфиқорнинг шижоатидан, атай бу ёққа ўтиб олганидан завқланарди. Маъсума бека чукур жарликларга қараб, «Субҳонолло!» деб кўксига туфлар, Меъмор бўлса икки шогирдининг сал қуюшқондан чиқиб, талтайишашётганидан энсаси қотиб келарди: қани, шундок яхши соатларда, унинг ёнида ўғли Низомиддин ҳам бўлса! У ҳозир икки йигитга ҳам от бермай лочинdek учиб юрарди. Ҳарқалай, жангнинг ғалаба билан тугагани унинг юрагига таскин берса-да, аммо урушнинг хар қанақасида ҳам қурбон берилмай илож йўқлигини ўйлаб, юраги орқасига тортиб кетарди. Шодмонбек билан Абуали ҳам саломатмикан?

Меъмор Нажмиддин Бухорий тушган аравадан анча олдинда бораётган устод Қавом, устод Табризий аравалари ва улар олдида от ўйнатиб бораётган Худо-

додбек ҳам довондан ошиб, тоғ оралиқларига киргач, кўздан ғойиб бўлишди. Худододбек ўзини кўрсатишни, ҳаммадан олдин бўлишни кўзларди. Лекин анчадан бери Меъмор аравасидан орқада келаётган қизил чопонлик уч отлиқ шитоб билан юриб, улардан ўтиб кетди. Меъмор ҳам, Зулфиқор ҳам анчадан буён бу отлиқларнинг тезда ўтиб кетмай орқада келаётганига ҳайрон бўлишди. Кейинчалик бунга эътибор ҳам бермай қўйишиди. Чунки наврўзи олам, сайил! Айниқса, бу сайилга ўзига тузук бадавлат оиласалар, мансабдорлар, қариб қолган лашкарбошилар келишаётган эди...

XVI б о б **РАВОЧ САЙЛИ**

Эрта билан олдинма-кетин йўлга чиқкан уч арава қош қорайишига яқин Кўхисиёҳ этакларидағи сайилгоҳга етиб келди. Зулфиқор билан Заврак кенг сайхонлик чеккаси, тоғ тагига — харсангтошлар оралаб оқаётган беором сой бўйига тушишиб, устод Қавом билан мавлоно Табризий мўлжаллашган ердан унча узоқ бўлмаган майсалар устига чодир тика бошлишди. Устод Қавомнинг шогирдлари ҳам юз қадамча нарида ишга тушиб кетган эди. Лекин Худододбек отининг жиловидан ушлаганча, худди хода ютгандай ғўдайиб турагар эди. Бадиа эса Зулфиқор билан Завракка ёрдамлашар, Худододбек аввал уни «ўғил бола» деб эътибор бермадиую бир лаҳзадан сўнг тикилиб қаради. Бир неча қадам яқинроқ келиб, яна тикилди. Кимгадир ўхшатди... Бадиа ҳам уни ер тагидан кузатарди. Худододбек ўзга чодир атрофида ўралашиб юришга фурури йўл бермай, ўз чодири томон кетди. «Жуърат этолмади, — деди ичида Бадиа, — энди мен «куёв»ни боплайман!» Зулфиқор нарироқда, чодир кураётганлар тепасида ғўдайиб турган Худододбекка кўзи тушдию Бадиага ғалати қаради. Бадиа бу кинояли қарашни тушунди, аммо пинагини бузмади. Ҳеч нимани сезмагандек ишини қиласерди. Оқшом сурмасида унинг юзларидаги ўзгаришни ҳам сезиб бўлмас-

ди. Бир лаҳзадан сўнг Бадиа катталар тўдасига ҳам қўшилолмай, фўдайиб турган Худододбекни кўрсатиб, Зулфиқорга мурожаат этди:

— Унга қаранг, жаноб Шоший, юмонга ўхшаб қаққайиб турибди!

— Кимни айтяпсиз, бекам? — деди Зулфиқор ёнида турган Завракдан ҳайкиб.

— Устод Қавомнинг ўрилларини...

— Ундоқ деманг, тоғдек қоматини тик тутиб туриби-ку.

— Ҳа, тик тутиб туриби! Бир туп тут бир туп турупни тутиб туриби, туруп тутни тутиб туриби, ха-ҳа-ҳа-ҳа-а!

Кулгидан сўнг ўртага жимлик тушди.

— У киши устод Қавомнинг ўғли бўлгани учун ишламай, фўдайиб туришлари керакми?! У киши устод Қавомнинг ўғли бўлгани учун жангга ҳам бормасликлари керакми?!

— Бекам, сиз ортиқча гапларни кўп гапиряпсиз,— деди Заврак Нишопурий. У Меъмор оиласида ўз садоқати билан катта обрў қозонган бўлиб, шаддод қизга эркин танбех берса оларди. Меъмор ҳатто ўз ўғли Низомиддиндан кўра ҳам Завракнинг гапларига ишонарди. — Агарда устод Қавом ҳазратлари хонадонига яна бир нима деб тил тегизсангиз, муҳтарама пямларга айтиб бераман!

— Кўрқмайман!

Заврак Зулфиқорга хўмрайиб қараб қўйди: гўё у «Сен чалғитяпсан! Бўлғуси күёв ҳақида шундай носа-ю гаплар айтиш яхши эмас!» дегандай бўларди.

— Сиз ҳеч кимдан кўрқмайсиз, бекам!

— Мен ҳеч кимдан, ҳеч нарсадан қўрқмайман! Аёл билан эркак баробар эканлиги муқаддас китобда айтилган, келиб-келиб сиз, жаноб Нишопурий, мени камситасизми?! — у хандон ташлаб кулди, — бари бир сизга тегмайман!

Заврак Нишопурийнинг ранги оқариб, атрофига олазарак қаради. Бу гапларни ё Низомиддин, ё устод юнитсами, дарҳол думи туғилиши аниқ эди.

— Тавба! Сиз жинни бўлиб қолдингизми, бекам!— у қўрқа-писа Зулфиқорга хўмрайиб қўйди.

— Йўқ, соғман!

— Сизни Маъсумә бекам ўғил бола қилиб туға қолсалар нима бўларди!

— Кўнглимдагини топдингиз, Нишопурий! Мен ҳам шуни истардим. Лекин мен сизга ёмонлик қилмайман, сиз ёмон одам эмассиз. Аммо эски хунарингизни қилиб, отамга чақсангиз унда мэндан шафқат кутманг! Бир марта чақиб акамга калтаклатгансиз, эсингиздами? Ўшанда «Қиз болани уриб бўлмайди, тушган жойида бахтсиз бўлади», деб аям ўртага тушмаганларида...

— Ҳали ҳам эсингиздан чиқмаган экан-да!

— Йўқ!

— Бўлмаса ўзингизга эхтиёт бўлиб юринг.

— Нима, сиз менга ота эдингизмики...

— Бўлмаса билганингизни қилинг, эътибор қилмаганим бўлсин!

— Эътибор қилганингиз билан кўролмайсиз, Нишопурий!

Бадиа, Заврак, Зулфиқор бирдан ҳаҳолаб кулиб юбориши. Бу портлашни нарида турган кексалар; устод Қавом, мавлоно Табризий, меъмор Бухорий, ундан нарироқда турган хотинлар, Худододбек ҳам эшишиб, бу томонга ялт этиб қаращди.

— Дўстлар! — деди қозик қоқаётган еридан бош кўтариб Бадиа, — гапни бир ерга қўйиб олайлик, мана, каттарофимиз — Зулфиқор Шоший жаноблари, ундан кейин, сиз Нишопурий, ундан кейин учинчи бўлиб, мен, ўртамизда ихтилоф бўлмасин! Билиб қўйинглар, мен отамнинг ўғлимани! Эрта тонгдан саъил бошланади. Ҳар қандай вазиятда ҳам бир-бирилизни ранжитиб қўймайлик! Кимда-ким сиримизни ошкор этса, у — хоин!

— Бекам; бизнинг сиримиз йўқ! — деди Заврак кулиб. — Ҳамма сир сизда. Бўпти, сизнинг сирингизни очсак, хоинмиз!

— Келишдик! — деди Бадиа тантанавор. Бугун унинг ғоятда кайфи чоғ, сергап ва қандайдир қаҳрамонликлар қилгиси келарди.

— Жуда шўх... — деди Заврак Бадиага сездирмай Зулфиқорнинг кулоғига, — устод буни тезроқ узатиб

юбормасалар, ҳаммамизнинг энка-тенкамизни чиқарили. Қиз боланинг бунчалик шўх бўлишини биринчи кўришим. Ё, тавба, ақли ҳам жуда тиник... Устод аввал Низомиддинни уйлантирмай туриб, хеч қачон буни узатмайдилар. Ўғилларидан кўра шу шайтон қизни яхши кўрадилар.

— Ростдан-а?

— Ҳа. Қаранг, мана бу сўлақмон күёвнинг аҳволини! Бу ўғил болача кийиниб юрибдию, у бўлса таниб ололмаяпти... Киши яхши кўрган одамини минг ўраб ташланмасин, битта қилиғидан билади, тўғрими, Шоший?

— Жуда ҳам тўғри.

— Сўлақмоннинг аҳволига қаранг, сувга бўккан нондай ивиб ётиби. Отангнинг давлатида тезроқ тўйни қилиб, бу таранг қўғирчоқни тезроқ бағрингга босмайсанми, ландавур! Сизга аталгани ҳам Бухорода бўлса керак-а Шоший? Бизники Нишопурда...

Зулфиқор индамади.

— Жаноб Шоший, мана бу арқонни тортиб туринг! — деди Бадиа Зулфиқорга яқин келиб.

— Мени «жаноб» деманг, бекам, мен устодимнинг шогирдиман, — деди Зулфиқор.

— Нима деб атай? — Бадиа бир лаҳза Зулфиқорнинг кўзларига атай тикилиб қаради.

Унинг фусункор кўзлари ғоятда чиройли жилмайни. Бу сўзни анчадан бери айтмоқчи бўлиб юрган Зулфиқорнинг бирдан аъзойи бадани жимирилаб кетли. У ўзини йўқотиб, Бадиага тикилди. Ёнида бу хаяжонли ҳолатни кузатиб турган Завракдан ҳам мутлақо ҳайиқмади.

— Мени Зулфиқор, деб атайверинг.

— Хўп. Лекин бундай дегани уяламан, — деди Бадиа, — сиз каттасиз. Кўпдан бери бир нарсани уйлаб юрибман; Низомиддинни — оға, сизни ўрта оға, анави Нишопурини кичик оға, деб атасам-чи?

— Маъқул, — деди Заврак, — лекин Favvos Мұхаммад Ҳирий жаноби олийларини қаёққа қўясиз?

— Favvos жанблари ҳаммангиздан катта, мен у кишини «катта оға» дейман.

— Йўқ, кимдир ортиқчага ўхшайди! — ҳазил қилди Зулфикар.

— Ҳув, анави! — деди Бадиа Худододбекка ишора қилиб.

— Бекам!

— Дўстлар! — деди Бадиа бирдан Зулфикарнинг гапини бўлиб. Ўзининг «ўғил бола» экани ёдига тушди. — Биз энди гапни қўйиб, тезроқ чодирни қурайлик-да, йўл юриб чарчаган кексаларга хордик берайлик. Ойимларга бунақа узоқ йўл юришни табиблар ман этган. Қани, бўлинглар!

— Мана, энди ақлингиз кирди, — деди Заврак.

Кексалар йўл юриб чарчаганларига қарамай, хотин-халаждан, ёшлардан ажралиб нарироқда сухбатлашишар, кенглик ва тоғ ҳавоси уларга кайфи-чоғлик, сурур баҳш этган эди. Қуёш ғарбга, Кўҳисиёҳ чўққилари орқасига ошикар, сайҳонликда турганларнинг сояси чўзилиб, қурилаётган чодирларгача етган, отлар ер тепиниб кишинашар эди. Меъморнинг икки кўли орқасида, ошналарининг сухбатига қулоқ солиб тургандек бўларди-ю, кўзлари юз қадамча нарида чодир қураётган шогирдларида, ўғил бола кийимини кийиб олган шаддод қизида эди. Сойга яқин ерда катта бир олабайроқ чодир қад кўтариби. Бу амирзодалардан бирининг чодири бўлса керак: темурий-зодлардан бўлмаса ҳам, кам деганда лашкарбошию сарой амалдорларидан бириники бўлса, эҳтимол.

Меъмор бир лаҳза ўша йўл-йўл олабайроқ чодирга тикилди. Унинг кўз олдида «шахриёри иқтидор» Шоҳруҳ Мирзо гавдаланди. У фуқаропарвар, маърифатпарвар бўлиб, Меъморга меҳрибонлик кўрсатиб, пешанасини силагандек бўлди. Ҳа, Меъмор Бухорий ўз меҳнату садоқати билан бундай хурматга лойик. Ахир у ёлғиз фарзандини ҳам подшоҳ учун қонли жангта йўллади. Шунинг учун ҳам Меъмор бошқа устоду мавлонолар қатори салтанат олдида катта хурматга эга. Меъмор шуларни хаёлидан ўтказар экан, ўзича мамнун бўлиб қўйди. Мана, фуқаро сайлу фароғатда, илму маърифат ривожу тараққиётда. На Хорун ар-Рашид, на Жамшид ва на Фаридун бундок салтанат тузган! Темурхон болалари катта муҳораба-

лар қилиб, ягона салтанат тузиб, маърифатга эътибор берган, улар абадул-абад Хурносону Мовароуннахр таҳтида ўтирадилар. Меъмор хаёлида ҳамма ёқ гулистон, ҳамма одамлар бир-бирига меҳрибон, ҳамма ерда мўл-кўлчилик бўлиб туюлиб кетди...

У баъзан ўғлининг соғ-саломат жангдан қайтишини тилаб, фуқаро боши узра соябон бўлиб турган Шоҳруҳни дуо қилас, юртда тинчлик бўлса, умри боқий бинолар қуриб беришни ўйларди. У қўлларини орқага қилиб, шуларни ўйлаб турарди-ю, нигоҳи чодир тикаётган шогирдларида эди; Зулфиқор Шоший билан ғоятда қобил Заврак Нишопурнийни ўз иши, ўз касбининг давомчилари деб санаради. Уларни ўз ўғлидан ҳам зиёдроқ кўярди. Лекин Зулфиқор бошқаларга қараганда ҳам ўткир ва дадил эди. Меъморчиликда фақат зеҳну иқтидорнинг ўзи кифоя эмас, унинг дадил ва оғишмай иш кўриши ҳам ғоятда муҳим. Аммо Нишопурийда дадиллик етишмасди. Қилиб турган иши ҳақида жиндак эътиroz эшилса, дарҳол йўлидан қайтиб, бошқатдан иш бошларди; чунончи, мадраса хонақосидаги равоқнинг ҳандасавий ўлчовини унча тўғри олишмаганда шундай бўлган эди. Бу гапни Аҳмад Чалабий ҳазил тарзида айтганига қарамай, Заврак Нишопурий, устод олдида гунохор бўлмай, деб уч газ деворни бошқатдан кўтартирган. Меъмор бу гапни эшитиб, холи бир вактда текшириб кўриб, Нишопурийнинг ортиқча меҳнатига ачинган эди ўшанда.

Меъмор ҳамма ёққа мамнун нигоҳ ташлади — жаннат шу бўлса керак-да, деб ўйлади у ўзича.

— Ана, чодирларимиз ҳам тайёр! — деди устод Қавом.

— Чодир эмас, кошона фирдавсул ягона! — деди ҳаяжон билан Меъмор, — бундок жаннат ерда қурилган ҳар бир чайла ҳам кошонадан афзал. Бекиёс табиат бағридаги ҳар бир чодир — бир Оқ Саройдир...

— Дўстимнинг кайфлари чоғ, — деди устод Қавом, — жуда шоирона гап айтдингиз. Офарин! Мен сиз жанобни қистамаганимда, бу гўзалликлардан баҳра олмаган бўлурдингиз: Сизнинг мамнунлигиниз бизнинг мамнунлигимиздир. Аммо мавлоно Лутфийни ҳам чорладик. У зот бедармонликни важҳ этиб, чиқмади-

лар. Афсус. Ахир биз билан чиққанларида кайфи чоғлик яна яхши бўлур эди ва эҳтимол, ҳазратнинг биринки фазалларининг дунёга келишига сабабчи бўлур эдик...

Кексалар ўз боргоҳлари томон юриб, ичкарига кириб кетишиди. Ёш-яланг бўлса шарқ осмонида ярқираб турган ўн тўрт кунлик ой нурида аллапайтгача сайр этишиди. «Алиф лайло ва лайло»да тасвирланган Бори Эрамдан ҳам аъло деб ҳисобланаётган бу ерларнинг тайину тафоришини келтириб, ёшлар тўда-тўда бўлиб ўйнашар — гийбат йўқ, Меъмор наздида, дарҳақиқат, Бори Жаҳонаронинг катта кўриниши эди. Беғуборлик фақат табиатда эмас, кишилар кўнглида ҳам мавжуд эди.

Тонг...

Кўҳисиёҳ этакларида субхи козиб эмас, субхи со-дик¹. Тунда, ғарби-жануб томонда қизғиш бўлиб кўринган муштарий² тунда аллақачон пастга чўкиб, кўздан ғойиб бўлган. Шарқ осмонининг ёришиб келаётганига қарамай Ноҳид³ юлдузи фалакда ярқираб турар, у гўё Шамсул қамардан кейин учинчи менман дегандай бўлади. Ёшлар уйқуда, сахархез кексалар таҳорату намозга тайёргарлик кўришарди. Меъмор дасторини бошига қўндириб, қиблага юзини тўғрилади. Эрта тонгда турмай, намоз ўқимай, «ҳоқони сайид давлатпеноҳ» номига дуо қилмайдиганларни ақли қосир⁴ атари-ди. Меъмор тангрининг эҳсонидан маҳрум бўлмаслик ва умуман, рух тетикликни юракка жо қилмоқлик ниятида доимо сахарлаб турарди. Бу унга болалиги-дан одат. Ҳатто Бухорода мадраса эҳзорида⁵ талаба эканида ҳам шундай қиласарди. У бомдодни адо этгач, харсангтошлар оралаб шарқираб оқаётган сой бўйига тушиб, табиатнинг мислсиз жамолини томоша қилди. Шундан сўнг, ухлаб ётган шогирдларини безовта қилмай, чодирга кириб чиқди. Бу пайтда атроф ёришиб, кун тиф уриб қолган эди. У «Шоклул Гита» китобини

¹ Субхи козиб — ёлғон тонг, субхи содик — чин тонг.

² Муштарий — Юпитер.

³ Ноҳид — Зухро.

⁴ Ақли қосир — калтафаҳмлар.

⁵ Эҳзор — мадраса курслари.

олиб, ўқишга тутинди. Зулфиқорга «Тахир Эглидус» китобини ҳам ёдан чиқармай, жилдга солиб олишни буюрган эди. Уни безовта килиб ўтирмай, «Шоклул Гита»ни ўқишга тутинди. Китоб қатидаги букланган қофозни очиб, тошқалам билан унга янги чизиқлар тортди. Меъмор анчадан буён янги бир мадраса лоғиҳаси устида бош қотириб юрарди. Кунларнинг бирида унинг оғзидан: «Ўғлим Низомиддин омон-эсон келгач, катта ғалаба шарафига яна бир мадраса курамиз — бу мадраса Хуросондаги энг кўркам мадраса бўлади...» деган гап чиқсан эди. Меъмор ўз чодири ёнида елкасига пешматини солиб, унча ҳарорати бўлмаган офтоб нурида китоб ўқир, баъзан-баъзан шабада учирмасин, деб тош бостириб қўйган катта ихлит қофозни олиб чизиқлар тортар, хаёл сурар эди. Меъморнинг саҳарлаб туриб чодирдан ташқарида китоб ўқиётганини таҳорат олиш учун сой томон ўтиб кетаётган устод Қавом ҳам кўрди.

Меъморнинг дикқатини кенг ва ям-яшил дала, фирғир эсаётган шабада, адирлардаги қип-қизил гилам-лолалар, шапалоқ барглари чайқалиб турган равочлар, тоғ манзаралари тортса ҳам, «Шоклул Гита»дан кўз узмасди, у ахён-ахёнда чодирдан ташқарида ухлаб ётган йигитчаларга қараб қўярди: янги авлод ўсиб етилмоқда... Мана ўзи ҳам энди кексайиб қолди. Йиллар шу даражада тез ўтардики, ҳа-хув дегунча у олтмишдан ошиб, пайғамбар ёшига яқинлашмоқда — икки фарзанд кўрди, аммо хали невара қучиб эркалаш муяссар бўлгани йўқ. У невара кўришни жуда орзу қиласди. Инсон қариб, ўзининг кетар вақти яқинлашганини сезади; шунча узоқ йилларни ўтказган инсон яна уч-тўрт йилдан кейин тупроқ орасида ётади. Ҳеч ким дунёга устун бўлолган эмас, бу уч-тўрт йил — бир лаҳза, кўз очиб юмгунча ўтиб кетади. Лекин инсонда эртанги ўлимни хаёлига келтирмай, агадулабад яшайдигандек буюк бир ҳис бўлиб, унинг хужай-раларигача сингиб кетгандир. Бу одатий ҳис мақсад сари сузиб бораётган катта бир кемага қиёс этилса, инсоннинг кексайгани сари молу мулкка хирс қўйиб, борган сари хасислашуви — шу катта кема четига ёпишиб, у билан бирга сузиб бораётган майдада ши-

лимшиқ чираноқларга ўхшайдики, шилимшиқларнинг ҳаммасини қириб ташлаб бўлмайди, улар инсоннинг гўригача борадиган нарсалардир. Меъмор яна ўзини мажбур қилиб, «Шоклул Гита»га кўз ташлади.

Йўқ, ундағи юксак орзулар китоб ўқитгани қўймасди — унинг бир куни бемехнату бемашк ўтса, дарду фикри коронги бўлиб кетарди. Тиниб-тинчимас Меъмор тонг сурори олдида асир бўлди. Хату чизикларга тўла китобини ёпиб, ўрнидан турди. У сув тўлдириб тайёрлаб қўйилган кумғон тагига олов ёқди. Ҳушёр шогирдлари ҳатто тутантириқ ҳам тайёрлаб қўйишган экан.

Устоднинг чой қўяётганини сезган Зулфиқор Завракни тутиб уйғотди. Улар ётган еридан бош қўтаришди-ю, тўну дўппиларини, этикларини кийиб, мис кўзани ҳам қўтариб, сой бўйига кетишли.

Ҳамма ёқка офтоб ёйилганда ҷодир ичидаги ётган Бадиа ёстиқдан бош қўтарди; онасининг эътирозига қарамай, яна ўша шаҳардан кийиб келгани — ўғил бола либосини кийиб, белини камар билан маҳкам боғлади. Сочларини наридан-бери ўраб, қалпоқ билан бостириди. Қодирдан чиқиб, у ёқ-буёққа қаради, отасига салом берди. Юз ювмай туриб салом берадиганини сезса ҳам, отаси бош қимирлатиб қўйди. Бадиа тўппа-тўғри қозикларга боғлоқлик отлар ёнига бориб, ўз тўригини эркалаб, юзларига уриб, сочилиган хашакни тўплаб, отнинг кусур-кусур хашак еяётганига тикилиб турди. Бир лаҳзадан кейин ўйноқлаб, сой томонга жўнади. Тепалиқда унга жуда ўткир тикилиб турган икки нотаниш давангир йигитга кўзи тушди, бу лаҳза ўзининг «ўғил бола» эканлигини эслаб, улардан чўчимади, бўртиб чиқиб турган кўксини билинтирмаслик учун камарини ҳам ечиб олди. Сойга тушаверишда у Зулфиқор билан Завракка қамти келди.

— Ассалому алайкум, оғалар! Яхши ётиб турдиларингми?

— Ваалайкум ассалом, бекам! Ташаккур!

— Кўриб турибсизки, мен «бека» эмас, Бадриддинман. Нишопурликларнинг ақли тушдан кейин киради, дегани ростми дейман-да! Қани, кўзадаги сувдан қўлимға қўйиб юборинглар!

— Хўп бўлади, укажон! — деди Заврак илжайиб, Зулфиқорга кўз қисиб қўйди-да, Бадианинг оппок, чиройли қўлларига сув қуиди. Бадиа шу ернинг ўзида юзларини ҳам ювиб олди. Рўмолчаси билан билакларини, юзларини артаётганида, Завракнинг кўзи оппок билагидаги тилла билагузукка тушди. У дархол таъна билан жавоб қайтарди, — ҳой, ўғил бола, анави билагузуми?

— Танбеҳингиз тўғри, — деди Бадиа билагига қараб. Билагузукка Зулфиқорнинг ҳам кўзи тушди. Бадиа шу лаҳзанинг ўзидаёқ уни ечиб олиб, Завракка узатди, — ўз қўлингиз билан ойимга топширинг!

— Йигитча! Хув, анави тош орқасига ўтиб, ўзингизни бир кўздан кечириб олинг...

— Нишопурликларнинг ақли секин кира бошлади.

Бадиа ўйноқлаб нарироқдаги тошлар орасига кириб кетди.

— Юринг, биз кетдик, уялмасин, — деди Зулфиқор Заврак билан олдинма-кетин чодир томон йўл олиб.

— Анави хўқизни қаранг манави парини! — деди Заврак анча нарида ўз чодири ёнида турган Худододбекни яна қўрсатиб, — бири жавоҳир, бири харсангтош. Узумнинг асилини ит ейди — бу бийрон ва шаддод қиз ўшанинг қўлига тушяпти.

— Касби кори нима?

— Касб нима қиласди! Хўроз, кўчкор уриштиради... Қимор...

— Унда қийин экан. Устоднинг шўри...

— Ҳе-е-ей, жаноблар! — бир лаҳзадан сўнг Бадиа орқадан етиб келди, — дарҳакиқат, бўйнимда марваридим ҳам қолган экан.

— Нишопурликларнинг ақли пешиндан кейин эмас, эрта билан кириб, пешиндан кейин чикади...

— Ҳа-ҳа-ҳа-ҳа. Таслим бўлдим, оға!

— Мана бу-сўзингиз йигит сўзи! Қани, қўлингизни тутинг! У мис кўздан Бадианинг қўлига сув қуиди.

— Ҳозир қўлимни ювдим-ку, мунча тақводорсизлар?

— Икки марта ювса, камайиб қолмайди.

— Жаноблар! Анави тоғларга қаранглар! Эрта би-

лан тоғлар қандай чиройли-а! — деди Бадиа, — хув, анави лолаларга, тошларни ёриб чиқкан гиёхларга қарантлар! Бу тоғларнинг орқасида яна сайҳонликлар, сойлар бор, шундокми, Зулфиқор оға?

— Бу кўриниб турган тизма тоғлар орқасида яна баланд тоғлар бор, Кароҳ шаҳри ҳам, — деди Зулфиқор. — Ундан нарида Туркистон тизма тоғлари, ундан нарида Мурғоб дарёси ва қумликлар. Шунақаси Самарқанд, ундан сўнг Бухоройи шариф...

— Бухоро шу томондами?

— Ҳа, бу ерга нисбатан шимолда.

— Бухорони соғиндингизми?

— Янги келган кунларим жуда соғинган эдим...

— Энди-чи?

— Энди ўрганиб қолдим, — деди Зулфиқор Завракдан андек ҳайиқиб. Аслида у «сенинг муҳаббатинг бу соғинчдан минг маротаба юкори... Сен турган ер мен учун ҳамма нарсадан азиз...» демоқчи эди. Бу, савқи табиий ҳол бўлдими, Бадиа бошқа савол бермай, Зулфиқорнинг кўзларига ўткир тикилди-да, ерга қаради. У ўзининг «ўғил бола» эканини яна унутиб, қизларга хос нафис ва жон олғучи қилиқ килди.

— Жаноблар! Сайил қачон бошланади? — деди Бадиа, яна «ўғил болалик»ка қайтиб.

— Мана, сиз билан биз турдик, бошланди ҳисоб...

— Ҳазилингизни қўйинг, Нишопурий! Бозор қани? От чопиш — улок, кураш, айқ ўйнатадиган жой қани? Шакарпазлар қани? Равоchlар уюлиб кетади дейишган эди, қани?

— Сабр қилинг, укажон, ҳаммаси бўлади, — деди Заврак.

— Фор ичида бир авлиё киши бор, дейишган эди. Уни зиёрат қилиб келмаймизми?

— Ўша авлиёни мен ҳам эшитганман, — деди Заврак мис кўзани чодир ёнига кўйиб. — Лекин у форга, менимча, биз ҳаммамиз бирга борамиз. Маъсума онамиз назр ҳам олиб келганлар. Тутунни ўзим кўтариб аравага олиб чиқканман. Ошиқманлар, ўша форга ҳаммамиз бирга борамиз. Эҳтимол, устод Қавом, Табризий, Андугоний ҳазратлари ҳам бирга боришар...

— Форга, менимча, ҳаммамиз бирга борамиз, — деди Зулфиқор.

— Йўқ! — деди кескин эътиroz билдириб Бадиа. — Мен у ҳазратлар, калла-саллаликлар билан боришини истамайман! Дўстлар, биз бу ерга равоч сайлигами ёки мўътабар зотлар ёнида қисилиб, қўл қовуштириб ўтириш учун чиққанмизми? Биз Жоме масжидига келганимиз йўқ-ку!

— Тўғри, — деди Зулфиқор Шоший кулиб, тезда Бадиа фикрига қўшилиб.

— Сизга-чи? — Бадиа Завракка қаради.

— Жуда тўғри!

— Етар, шаҳарда юрагимиз сиқилиб, дикқинафас бўлиб ётганимиз!

— Вой-бў, мана бу «юраги сиқилган»ни қаранглар! — деди Заврак ёқасини ушлаб, — ҳой, «йигит»ча, акаси жонидан, тўрт энлик пастга тушинг! Сизнинг Гулгун Ақодан фарқингиз йўқ!

Бадиа хандон ташлаб кулди. Зулфиқор ҳам. Лекин унга «акаси жонидан» деган сўз ёқмай, ўзини тутди.

— Дўстлар, қўйинглар, ўша улуғларни! Ўзимиз кетаверамиз.

— Худододбек-чи? У ҳам биз билан бирга борсан, — деди Заврак.

— Керакмас! — деди қизариб Бадиа ва беихтиёр яна Зулфиқорга қаради. — У ўз отаси билан бирга бораверсин! Биз билан нима қиласиди? У борса, ҳамма ёқ музлаб кетади. Тақводорларни жуда ёмон кўраман. Мен бугун тўриғимни роса чоптироқчиман. У ҳам яйрасин...

— Сиз, йигитча, факат тўриқни эмас, бизларни ҳам тоза ҳаллослатмоқдасиз!

— Ҳа, жаноб, сиз ҳали тўриқнинг кетидан тилингизни осилтириб югурасиз.

— Иложим қанча! Шу осилган тилгинам ўлгур бир куни бошимга бало бўлмаса, деб қўрқаман.

— Тўғри сезибсиз. Ташвиш қилманг, бошингизни омон-эсон кетказиб олганингиздан кейин у ташвишу балолардан тамоман кутуласиз.

— Йигитча, сиз нима деяпсиз? Агар сиз мени

бундай қўрқитаверсангиз ёнингизда юрмайман. Шаҳарда ҳам жуда ишим кўп эди, менга равоч сайлига чиқиши ким қўйибди! Мен нодон шаҳарда қолиб, Фаввосни чиқарсам бўлмасмиди!

— Ана, энди айнидингиз! — деди Бадиа жиддийлашиб. Яна у ялт этиб Зулфиқорга қараб қўйди, — дўстлар, мен ҳозир ойимларнинг рухсатларини оламан, ундан сўнг форға борамиз.

— Биз нонушта қилишимиз керак, — деди Заврак Бадиага тикилиб. — Шундай қорним очдикি, тўрикка ташлаган хашакни ҳам егим келиб кетяпти.

— Сиз, Нишопурий жаноблари, шундай сайилда ҳам ва бунинг устига устозингизнинг қизи олдида ҳам яхши гапларни бир ёққа қўйиб, овқат тўғрисида гапирасиз!

— Биринчидан, сиз устодимнинг «ўғли» бўлиб олгансиж, иккинчидан, мен Юсуф, сиз — Зулайҳо эмасиз, уяладиган ерим йўқ! Менга ҳозир бунақа ақлли гаплардан кўра бир бурда нон яхши!

— Балли Нишопурий! — деди Бадиа, — оғалар, қани юринглар бўлмаса, нонушта қиласиз!

XVII б о б ФОРДАГИ АВЛИЁ

Бадианинг хоҳишига кўра, Маъсума бека устодни ўз ошналари билан қолдириб, Зулфиқору Заврак йўлдошлигига Кўҳисиёҳ этагидаги ворга жўнади. Фор икки фарсангча йўл бўлиб, сайҳонликдан шундок кўриниб турарди. Бадиа авлиёга аталган бир баркаш қатламани ўзи кўтариб олди. Уларга Худододбек кўшилди. У негадир ўзига ярашмайдиган сохта камтарлик кўрсатиб, бошини эгиб, Маъсума bekaga илтифот кўрсатгандай бўлди. Зулфиқор ва Заврак билан омонлашди.

— Таажжуб! — деди Худододбек Бадиага кинояли илжайиб. У яна бошдан-оёқ тикилди, — муборак бўлсин!

— Салтанат учун жангга мен ҳам оғам Низомид-

дин билан бирга бораман деб, саркарда Амир Довуд барлос ҳазратлари ёнига кирган эдим, бари бир олиш мади... — деди Бадиа жўрттага.

— Тасанно! — деди Худододбек бўйик бир овозда. Бир зумдаёқ унинг кайфи бузилиб, нафаси ичига тушиб кетди. — Шунинг ўзи ҳам жасорат! Таҳсинга сазовор! Жангнинг ҳам равоч сайлига ўхша什 файзи бор... Икки томон бир-бири билан ҳазиллашиб, қиқирлаб кулишади, ҳикоялар айтиб беришади, равочу ширикликлар улашади...

— Жангга кетган баҳодир йигитлар шаън-шавкат билан кайтиб келишгач, — деди Бадиа бўш келмай, — бу ерда қочиб юрганларнинг калласи узилади, деган гап бор! Аъло ҳазратнинг саройларига яқин одамлардан эшиздик. Урушда узилган шунча каллалар етмасмиди! Энди бунда ҳам узилса, жуда ачинарли хол бўлади-да!

— Бунақа совуқ гапларни қўйиб, яхши гаплардан гаплашинглар, — деди Маъсума бека мулойимлик билан. — Жанг тугабди, Мирзо Мухаммад Тарагай ҳам, саркарда Амир Довуд барлос ҳам келишашётган эмиш. Үғлим Низомиддин ҳам, худо хоҳласа, тез кунда етиб келади.

Дабдаласи чиққан Худододбекка ер остидан қараб бораётган Заврак, уни юпатиш, мулзамликдан қутқариш маъносида гап қотди:

— Бек! Қалай, Пули Молон, Ҳерирўд томон бориб турибсизми? Устод Қавом улуғ ишга саркорлик киляптилар экан.

— Ҳа қарашибман... — деди Худододбек бўшшиб қолган танбур торидек икки-уч хил товуш чиқариб. Аслида у қўприк қурилишига эмас, қўчкор уриштириш учун борарди.

Худододбек Бадиадан «шапалоқ» егач, анча ўзига келиб, мулойим бўлиб қолди. У чап ёнда, Завракдан ҳам орқароқда келарди. Фор оғзида, баланд ясси тош устида Яланғоч авлиё — ориқ бир кекса одам гулхан ёқиб ўтиради. Тутаб ётган тутундан форга кираве-ришдаги тошлар қорайиб кетган. Ҳар замонда «авлиё» пулфлаб, кора кумғонини суриб қўярди. Зиёратга келгандар қовоқ солиб ўтирган Яланғоч авлиёга салом

беришиб, унинг ёнига назр-ниёзини қўйиши, эскиги-на сопол товоқقا биттадан кумуш танга ташлаши, сўнг авлиёнинг рўпарасига — гулхан атрофига чўкка тушиб ўтириши. Яланғоч авлиё қўлинин жуфтлаб ҳаммани бир йўла дуо қилди-да, ўрнидан туриб фор ичига кетди. У ичкаридан катта бурама қўчқор шохини кўтариб олиб чиқди. Маъсума бекадан бошлаб, ўтирган-ларнинг ҳаммаси шохни ўпиши. Шундан сўнг, шохни яна жойига олиб кириб қўйди. Авлиё соқовга ўҳшарди, гапирмасди. Буни ҳамма зиёратга келганлар биларди. Мабодо бир нима сўралса, қисқа жавоб қиласди. Бундай савол камдан-кам берилиб, зиёратга келганлар назрини бериб, факат ўша қўчқор шохини ўпиди қайта берардилар. Авлиё атрофида яна бир кекса одам ҳам ўралашиб юради. Бадиа сопол косага яна бир кумуш танга ташлаб, Яланғоч авлиёга мурожаат этди:

— Жангга кетган оғам Низомиддинни дуо қилсангиз... у ҳақда, ўзим ҳақимда бир нима айтсангиз...

Маъсума бека Бадианинг гапидан донг қотиб қолди. Ҳамма қилт этмай, авлиёга тикилиб ўтирарди.

— Оғанг тез кунда келади, — деди авлиё ва шу лаҳза пичирлаб дуо ўқиб, ғозига фотиха тортди. Кейин Бадиага тикилиб-тикилиб қаради. — Сен яхши хонадонга келин бўлиб тушасан. Кўп яшайсан, етти ўғил, етти қиз кўрасан...

У бу гапни эшитиб қизариб, ўтирган жойида қотиб қолди.

— Тавба қилдим, де! — Маъсума бека Бадиага ишора қилди. Лекин Бадиа миқ этмай ўрнидан турди. Кейин Яланғоч авлиёнинг зийраклигига тан бериб, таъзим қилиб, пастга туша бошлади. Бадиадан сўнг бошқалар ҳам ўринларидан туриб қўллари кўксисда, авлиёга хайр ишорасини қилиб жўнашди.

Бадиа сири фош бўлиб — қиличи синиб, қалқони тешилган сарбоздек лол бўлиб қолди. Худододбекка жон кирди: у ер тагидан секин Бадиага қараб қўйди. Чап ёнда келаётган Заврак Нишопурий Худододбекка қаради: «яхши хонадон» ўшанини бўлса керак. Ҳали шу сўлақмон «етти ўғил, етти қиз»га ота бўладими? Кизининг бу шўхлигидан Маъсума бека ҳам хижолат

эди. Зулфиқорнинг ҳам бу воқеадан таъби тиррик бўлиб, орқароқда келарди.

— Онамлар ҳам ҳар йили шу авлиёга назр олиб келиб, ҳаммамизни дуо қилдирадилар. Бу жуда мўътабар одам, — деди ўртадаги сукунти бузиб Худододбек. У ғолиб сарбоз каби гердайиб олдинда бораарди. Бадианинг попуги пасайганидан хурсанд эди. — Бу авлиёни амирзода Иброҳим Султон ҳам ҳар замон, ҳар замонда зиёрат қилиб турадилар. У хамма нарсани билади, унга ёлғон гапириб бўлмайди.

— Яланғоч авлиё ҳазратлари, дарҳақиқат, сезгир одам эканлар, — деди Зулфиқор, гапга аралашиб, — лекин Бадиа бекамнинг қалпоғи остидан чиқиб турган соchlарини кўриб қолдилар. Иккиламчи, ўғил болалар либосида сайилга чиқиш ҳиротликларга қўпдан одат. Мана, ҳозир сайил бозорига борайлик, сизларга «ўғил болалар»ни кўрсатаман...

Бадиа ялт этиб Зулфиқорга қаради. Зулфиқор унинг кўзига халоскор бир инсон бўлиб кўринди. Танига андак жон кирди. Бу гап Худододбекка ёқмади, ранжиганнамо гап қотди:

— Азизим Зулфиқор Шоший, авлиёга тил тегизиб бўлмайди. Ҳақиқат аччиқ нарса, чидаш керак! Иккиламчи, бу авлиё жуда мўътабар зот, унга ихлос кўйган омад топади. Унинг айтгани келади...

— Кўчкорнинг иркит шохидан ўпдим, мана энди томогим оғрияпти, — деди унинг гапини бўлиб Зулфиқор. — Сўйилган кўчкормикан ёки калла солишиб ўлган кўчкормикан?

Ҳамма бирдан қах-қах уриб кулиб юборди. «Калла солишиб» дегани очикдан-очик кўчкорбоз Худододбекка ишора эди.

— Дарҳақиқат, буни қаранг, сочим анча чиқиб қолган экан, — деди Бадиа эркаланиб Зулфиқорнинг қулоғига.

— Фақат сочингиз эмас, белингизни ҳам камар билан сиқиб боғлагансиз... Буни уч яшар бола ҳам пайқамай иложи йўқ.

— Сиз эътибор берган экансиз!

— Бўлмасам-чи? Мен сизнинг посбонингиз, содик итингизман.

Бадиа Зулфиқорга табассум қилди. Улар ўртасидаги бу гапни ҳеч ким пайқамаган эди. Бадиага жон кириб, у яна илгаригидай сўзамол ва шаддодлигига қайтди.

Улар ғордан қайтишганидан сўнг бозорга боришиди: кенг сайҳонликда туриб, бозор деб аталган ўрталикда қопларда равочлар, исмалоқ ўтлари уюб ташланган. Шакарпазлар, сомсапазлар, ҳолвачилар, ёймачилар ҳам ўз чодирларидан чиқиб, бозорни обод қилишган эди. Ўғил болача кийинган қизлар ҳам учради. Уч давангир йигит орасида келаётган Маъсума бека дархол ўзини шоҳи мато сотаётганлар тўпига урди. Заврак бир қучоқ равоч сотиб олиб, ҳамроҳла-рига улашди. Нишопурӣ мамнунлик билан нордон равочни чайнаб, юзларини буриштириб турганида, Худододбек бир кийимлик чиройли шоҳи матони харид қилиб Маъсума бекага ва яна бир кийимлик зар қадалган ипак матони Бадиага тутди. Сайил таомили бўлганлиги сабабли улар бу тухфани қабул қилмай иложлари йўқ эди.

— Вой-бў-ў, — деди Бадианинг кўзлари катта бўлиб. Зулфиқор билан Заврак ҳам ҳайрон бўлиб қолди. Бу матолар учун Худододбек бир неча олтин танга тўлади. — Бадиа мағрур турган Худододбекка қаради-ю, гап қотди: — Ё подшо билан дўст бўл, ё жаллод билан. Ё бир йўла ҳоким бўласан, ёки бир йўла ўлиб кутуласан... Мана бунақа жаноб Нишопурӣга ўхшаган йигитлар билан юрсанг, факат равоч чайнаб, юзингни буриштириб юрасан. Ҳа-ҳа-ҳа-ҳа-ҳа...

— Мана бу биздан тухфа, — деб Маъсума бека чиройли гуллар солинган катчани сотиб олиб, Худододбекка тутди.

— Бизларнинг ҳам номимиздан деб билурсиз, бек! — деди Заврак кулиб.

Заврак билан Зулфиқорнинг маъюс турганини сезган Бадиа, дархол онасидан тилла танга олиб, яна икки катча сотиб олди-да, Зулфиқор билан Завракка тухфа қилди.

— Ҳаммамиз ҳам тухфалик бўлайлик, олинглар, оғалар!

Ҳамма мамнун. Аммо ҳамон Бадианинг кўз олдида

авлиё турарди. Бир томонда Зулфиқор, бир томонда Худододбек, бир-бирига мутлақо ўхшамаган икки йигит унинг хаёлини нари обориб, бери олиб келарди...

XVIII б о б

САЁҚ ЮРГАН ТАЁҚ ЁР

Ҳар бир ишида амирзодаларга тақлид этиб ҳаракат қиласиган корфармо Аҳмад Чалабий устод Бухорий, устод Қавом, мавлоно Табризийларнинг равоч саилига чиқиб кетганларини эшишиб, икки қизил чопонликни уларнинг орқаларидан жўнатиб юбориб, ўзини анча енгил ҳис қилди. Шундан сўнг, кўнгли ишрат тилаб колди. У гап-сўзда, қаддини тик тутиб, чап қўлини белидаги энлик камарига тикиб туришда, орачора хаёлчан қадам ташлаб орқа-олдига юриб туришда Иброҳим Султонга тақлид этарди. Амирзодалар, айниқса, Иброҳим Султоннинг ишратбозлигидан, «кувваи шаҳват» деган ном ҳам олганлигидан, рофизийлар махфий тузган ишратхонада ўғирланиб олиб келинган ёш жувону қизлар билан ишрат қилиб, ҳамён-ҳамён тилла танга тўкиб келишидан хабардор эди. У, устаю шогирдлардан узиб олиб қолган тилла тангалирни катчага солиб, қош корайгач, шаҳар чети — овлок кўчаларда турувчи рофизийларникига жўнади. Кундуз куни беклар каби яширинча «маҳрам» юбориб, ўзининг келишига яхшилаб тайёргарлик кўриб қўйишини, ё Дамашқ, ё Корабоғ малакларидан танланнишини буюрган эди.

Эшикда кутиб олган бесёнақай филай бир одам Аҳмад Чалабийни ичкарига бошлаб, ярим коронги бир хонага олиб кирди. Хона ўртасига курси қўйишиб, дастурхон нозу неъматлар, маю гулоблар билан безатилган, хона юқорисида ўрин солиғлиқ, даҳлизнинг бир томонида ханик, обдастада илиқ сув, лунгги...

Аҳмад Чалабий ичкарига кириб, чопонини ечди. Бошидаги саллани ҳам олиб, чопони билан бирга қозиққа илди. Ундан сўнг курси чеккасидаги қалин

тўшалган кўрпачага ўтириди. Шу лаҳза эшик фирч этиб очилиб, харир ва қимматбаҳо матолардан тикилган либосда ёш бир жувон ичкарига кириб, унга салом берди-да, рўпарасига ўтириди. Аҳмад Чалабийнинг юраги дук-дук ура бошлади, жуда келишган, кўкракдор, беллари хипча, бодом қовок... ўн саккиз ёки ўн тўқиз ёшлардаги гўзал бир малак. Аҳмад Чалабий юборган маҳрами фохишахона эгасига «амирзоданинг тоғалари» деб тушунтиргани сабабли «халтачадаги тилла тангалар» алоҳида тайёргарлик кўриб, «Димишкий малак» ўрнини босадиган қиз топиб олиб келишга ундан-ган эди.

— Номинг нима?

— Малак, — деди у аввал «амирзода»нинг ном сўрашидан таажжубланиб, кейин унинг бўйнига осилди. Одатда амирзодалар бундек тафсилотни суриштирмаи, май ичиб, дархол ишратга майл қилишади. Бу одамнинг хаёл суриши, ҳовлиқиши унга ғалати туюлиб жилмайди. Кўлини юраги устига қўйиб, нозланиб табассум қилди-да, жавоб берди:

— Шом ўлкаси, Дамашқ шахриданман, ҳурматли амирзода.

Малак туркий сўзни қийналиб, бошқача бир оҳангда гапиради. У «амирзода»нинг сўмрайиб ўтирганини кўриб, дархол пиёлаларга май қўйди-да, оппоқ билакларини кўрсатиб Аҳмадга узатди:

— Ичинг!

— Хўб, ичаман, — Аҳмад Чалабий пиёлани олиб симириб юборди. У ўзининг дадил ва кучли бўлишини кўзлаб пайдар-пай икки-уч пиёла май сипкорди. Малак амирзодаларга қиласиган қилифи «ғалвира» усулини қўллади. Аҳмад дами чиқкан пуфакдек бўшшиб ўтириб қолди. Ярим тунгача ахвол шу бўлгач, ўриндан туриб, кийимларини кийиб чиқиб кетди. У чиқиб кетаётганида эшик олдида фохишахона эгаси қўлида шам, унинг йўлини тўсади:

— Соҳиб, ҳақ тўламасдан кетаётурсен?!

— Ўзи гуноҳкор! Иш бўлмади...

Филай одам шамни токчага қўйиб, кучли қўллари билан Аҳмад Чалабийнинг ёқасидан тутди.

— Ҳақини ташлаб кетинг! Агар муттаҳамлик қил-

сангиз, бу ердан соғ чиқмайсиз! Мен бугун эрталабдан буён сизга ҳозирлик кўрдим.

— Нега у бунақа қиласи бўлмаса?

— Қип-яланғоч бўлиб ётиб берди-ку! Ўзинг хез бўлгач, менда нима гуноҳ! Харажатини тўла!

— Йўқ! — деган эди, Аҳмад Чалабий даҳанинг тагига бир мушт тушиб, гандираклаб ерга ағдарили. У этиги билан тепмоқчи бўлиб ҷоғланётганини кўрган Аҳмад бақирди, — тавба қилдим, тўхта! Мана, ҳақингни бераман.

У ўрнидан туриб, ёнидан катчани очди. Кафтига тилло танга тўкаётганида, ҳалиги филай чанг солиб қўлидан катчаю тилла тангаларни юлиб олди.

— Бу ердан омон-эсон чиқиб кетаётганингга шукур қилавер! — деди сўл қўли билан Аҳмад Чалабийнинг камаридағи ханжарни ҳам суғуриб олиб, — сен номард ханжар тақишига ҳаққинг йўқ! Агар яна бирон нима десанг, сирингни бутун шаҳарга овоза қилиб юбораман! Жўёна!

Аҳмад Чалабий кўзларини ола-кула қилиб, фоҳишаҳонадан чиқиб кетди.

У бирон ҳафта уйда ётиб, Меъморнинг бола-чакалари, ёр-биродарлари билан равоч сайлидан қайтганини эшитиб, мадраса қурилишига борди. Меъморга тавозе кўрсатиб, бетоб бўлгани ва бунинг устига «амирзода пулни камроқ берәётгани»ни айтди.

— Қарз узилар, хотин ёнга қолар, корфармо,— деди Меъмор кулимсираб,— ҳозир ақчани сиқиширишганинг фойдаси йўқ, кейин ўзлари хурсанд бўлади.

«Хотин» сўзини эшитиши билан Аҳмад Чалабийнинг ранги учди. Гап шаҳарга тарқалиб кетибди, хаёл қилиб, гапи гапига қовушмай, фўлдираб, Меъмор оллида бақа бўлиб қолди...

XIX б о б

ОЁҚ ОСТИДАГИ ФОЖИА

Сайил авжига минди. Ҳамма ёқ одамларга тўлиб, гала-ғовур, ўйин-кулги бошланиб кетди.

Худододбек Бадиа ҳозироқ бориб, «йигит» либосини ечиб, ўз аслига қайтади, деб янглишди. У яна илгаригидай пинагини бузмай, уч йигит ичида тўртингиси, илғору дадили бўлиб қадам ташларди. Улар обдон равоч чайнаб, бозорни бир-икки айланишгач, нариги кенг майдонда чавандоз йигитлар улоққа тайёр гарлик кўришаётганини, от чоптиришиб юргани кўзга ташланди. Ёлғиз қозигида қолган тўрик бетоқат бўлиб тинмай айланиб кишинарди. Дам у ёқдан-бу ёқка чопаётган ёш чавандоз йигитларни, дам кишинаётган отини кузатиб турган Бадиа кутилмаганда ҳамроҳларига мурожаат этди:

— Жаноблар! Менга рухсат беринглар, бориб отамга қарашим керак. Ҳамроҳ бўлганингиз учун ташаккур!

У ёлғиз ўзи тўриқ томон кетди. Йигитлар унинг орқасидан тикилиб қараб қолишли.

Бадиа отининг олдига келиб, уни эркалади, эгар, жабдуқ уриб қайишларини маҳкам тортиб боғлади. Юганини оғзига солиб, жиловини эгар қошига илди. Эгасининг эркалаши отга жуда ёқарди. Ўзидан узоклашгани сабабли соғинган эканми, от жонивор қилт этмай эгасининг фармону ишорасига шай турарди. Бадиа от атрофини айланиб, теваракни кўздан кечирди, узокда ўзини кузатиб турган Зулфиқор, Заврак, Худододбекларга қараб қўйди. Орадан кўп ўтмай Бадиа эгар қошидан ушлаб отига енгилгина минди-да, улоққа тайёргарлик кўриб, чопиб юрган чавандозлар тўпи сари учиб кетди. Уч йигит ундан кўз узмай ўша равоч сотаётгандар ёнида туришарди. От айлантириб, чопиб юрган бу «ўғил бола»нинг бошқа йигитчалардан ҳам фарқи йўқ эди. Чавандозлар ичида Бадиадан бўлак «ўғил» бўлиб олган қизлар йўқлигига уч йигит қаноат ҳосил қилишса ҳам, орадан бир оз вақт ўтгач, Зулфиқор равоч сотиб олаётган бир «йигит»чани Худододбекка кўрсатди. Ўзига тикилишиб қараётганини сезган «ўғил бола» наридан-бери равочни олди-да, уларнинг кўзидан жўнаб қолди.

— Мана гапимнинг исботи! — деди Зулфиқор. — Бухорода бундай одат йўқ. Ҳирот пойтахт, шу сабабли янги-янги одатлар чиқаверади.

— Бухоро анча чекка, унда мутаассиб кишилар, имомлар кўп дейишади. Шу ростми? — сўради Худододбек.

— Рост. Аммо меъмору устолар унда ҳам бор, — деди Зулфиқор. «Ундоқ бўлса, эй бухоролик, нега бу томонларда санқиб юрибсан?» — деган гап туғилмасин, деб изоҳ берди: — Бухорода устод Нажмиддин Бухорий каби катта меъмор бўлмаса ҳам, кичикролари бор. Мен ўз ҳамشاҳарим — бу улуғ Меъморнинг донгини эшитиб, унинг услуби ниҳоятда кўнглимга ёққани сабабли Ҳиротга келдим.

— Ҳа, меъмор Нажмиддин Бухорий ҳазратлари ягона! — деди Худододбек Зулфиқорга тикилиб.

— Ҳа, Нажмиддин Бухорий ҳазратлари билан отангиз устод Қавом ҳазратларини Хурросону Мовароуннахрда ягона десак хато бўлмайди. Бу бизларнинг гойибона мұхаббатимиз, шахсий туйғуларимиз даъвати билан айтилаётган сўз эмас, умуман, маърифат ахли уларни ниҳоятда эъзозлаб, шундай аташади.

Худододбек жим бўлиб қолди. Бир лаҳзадан сўнг улар от чоптириб юрган ёшларга қарашди. Йигирмалан ортиқ ёш чавандозлар тоғ бағридаги кенгликда у ёқдан-бу ёққа қувлашар, чопағон отлар ичидан у ёқдан-бу ёққа чопиб юрган Бадиадан кўз узмасди. У аллақандай тенгқур йигитчалар билан басма-бас от қўйиб, бошқа отлардан ўзсин деб тўриқни никталарди.

...Нима ҳам бўлдию, отликлар орасида Бадиа бирдан кўринмай қолди. Боя қандайдир бир чавандоз у билан ёнма-ён чопиб юрган эди. Отлар ичидан эгасиз юрган тўриққа Зулфиқорнинг кўзи тушди. Бирдан унинг юраги орзиқиб нафаси оғзига тиқилди. Шерикларига: «Бадиани олиб қочишиди!» деди-ю, чавандозлар тўдаси томон югорди. Бундан бир лаҳза бурун ёнидаги «йигитчани» отдан азот юлиб олиб, олдига ўнгариб кетганини кўрган одамлар ҳайратланган эди. От чоптириб юрганлар ҳам ҳайрон бўлиб, жиловни тортиб четга чиқишиди. Зулфиқор билан Завракнинг ҳам кўзи тушган эди. Улар кетма-кет чопиб келаёттиб, йўл-йўлакай: «Бадиани олиб қочди», дейишиди. Худододбек ҳайрон бўлганича тура берди. Зулфиқор тўдага етиб бориши биланок, тўриққа югорди. У жон-

холатда отга етиб олиб, чаққонлик билан минди-да, жиловни қўлга олиб тоққа қараб чопди. Узокда пашшадек бўлиб кўринган кора нарса орқасидан учиб борарди. У тинмай отни никтарди. Бадиани олиб қочган чавандоз даштдан ўнгга бурилиб, тоғ оралиғига кирди-да, кўздан фойиб бўлди. «Чоп, жонивор, чоп!» Зулфиқор ҳам ўнгга бурилиб, тоғ оралиғига кириб кетди. Йўлда Бадианинг телпаги тушиб қолган эди, Зулфиқор уни узокдан кўрдию, яна жадаллади. Баъзан Бадиани олиб қочаётган чавандозни йўл бурилишида кўриб қолар кўздан қочирмасликка харакат қилас: «Э худо, шарманда қилма!» деб отини қистарди. Унинг кўзлари олдинда-ю хаёли Бадиада... Мана, эркалиknинг оқибати! Агар қарокчи тутқазмай кетса нима бўлади! Унда ота-онаси жудолик аламига чидармикан? Ўзи-чи? Усиз дунёда яшай олармикан? Бадиадан айрилса, ўзини анави тоғ чўққисидан жарликка ташлагани афзал! Бундан бўлак йўл йўқ! Қани, тўрик жонивор, чоп, тезроқ, ҳа-чу! От жонивор ҳам кучининг борича олдинга интилар, унча-мунча жилғалардан сакраб ўтиб кетарди. Демак, Бадианинг изига тушган одам бор экан, бўлмаса унинг қиз бола эканини авлиёдан бўлак ҳеч ким билмас эди. Зулфиқор негадир шу лахза Худододбекни эслади: «Лалаймай ўл! Бўлғуси куёв ҳам шунақа бўладими?! У Бадиани севмайди».

— Чу, жонивор чу!

Агар у қароқчига етиб бориб, Бадиани кутқариб олмаса, Меъмор ҳам, Маъсума бека ҳам шу ернинг ўзида тамом бўлади. «Э, худо, шарманда қилма!» Эртаниндин Низомиддин музafferият билан қайтиб келиб, синглисини қароқчи олиб қочганини эшитса, нима деган шармандалик! Қароқчи Бадианинг изига эҳтимол шаҳарда тушгандир. Форга борғанларида орқаларида қизил чопон, шоп мўйловли одамлар от етаклаб, ўралашиб юришган эди-я! Зулфиқор уларни Пули Млондан ўтаётгандарида ҳам кўргандек бўлган эди...

— Чу, жонивор, чу!

Баъзан кўриниб, баъзан кўринмай бораётган қароқчи тамоман кўздан йўқолди. Зулфиқор шиддат билан чопиб кетаверди. Атрофидаги баланд чўққилар усти-

га қулаб тушаётгандай вахимали осилиб турарди. Бир маҳал у рўпарасида — сершагал сой четида, устида одам йўқ, қароқчининг оти юрганини кўрди. Эгари корнига осилиб қолган, ундан нарирокда Бадиа қаққаёнб турарди. Зулфиқор отдан таппа тушди-да, Бадиа-нинг олдига борди. Унинг қўлида Зулфиқорга таниш кичик ханжар ялтираб турарди. Бадиа йўл четида ётган қизил чопон, саллалик, давангир қароқчига имо қилди: У кўзларини ола-кула қилиб, худди сўйилган хўкиздек ағанаб ётарди.

— Нима гап ўзи? — дея ҳовлиқиб сўради Зулфиқор.

— Нима бўларди? — деди Бадиа сўкмоқ четида шўзилиб ётган одамга жирканч назар билан қараб, — анча жойгача ўзимни ўнгләёлмадим. Мана шу ерга келганда ханжарни суғуриб олиб...

— Бекам, келинг, отга миндириб қўяй. Бу ердан тез кетайлик!

— Бир икки ҳовуч сув ичириб юборинг, оға! — деди Бадиа, — бу номард Чалабийнинг иши экан. Жон аччиғида айтиб қўйди.

Зулфиқор ҳовучида сув олиб, Бадиага ичирди. Бадианинг ўғил болаларга ўхшаб гапириши, бу даҳшатли ҳодисага нописандлик билан қараётгани уни хайратга солди. Ё тавба! Бу ўзи қизми, ўғилми! Зулфиқор кўзларига ишонмай ҳайратланди.

— Кетайлик, бекам!

— Тўрикни анави харсангтош ёнига олиб боринг, оға, мен миниб олай, — Зулфиқор Бадианинг қўлтибидан кўтариб, аранг отга миндириди. У отга миниб олиб Зулфиқорга гап қотди, — оға, сиз анави тўнғизнинг отига миниб олинг. Чодиримизга етиб олганимиздан сўнг ҳайдаб юборармиз!

Шу пайт рўпарадан бирор от чоптириб келаётганини кўришди. Зулфиқор дарҳол ўлиб ётган қароқчи белидаги пичоқни суғуриб олди. Ҳалиги отлик етиб келгач, жиловини тортиб, Зулфиқор билан Бадиага, ўлиб ётган қароқчига қаради. Ҳамма гапга тушунди. Олишишга чори келмаслигини пайқагач, бир лаҳзалик сукутдан кейин, Зулфиқорга ўкрайди.

— Ким ўлдирди уни?!

— Мен! — деди Бадиа унга ўқрайиб.

— Бу сенинг оғангми?

— Оғам!

— Жўнанглар! Айб ошнамнинг ўзида, ажали етган экан. Сен зўр чиқибсан, даъвом йўқ. Энди эҳтиёт бўл, агар яна қўлимизга тушсанг, отангнинг ёнига қайтиб боролмайсан!

Бадиа унга бир хўмрайиб қараб қўйди-да, отини ниқтади. Зулфиқор қўлида пичоқ, эҳтиёт бўлиб, Бадиа билан ёнма-ён, қароқчидан кўз узмай юра бошлиди. Анча йўл юриб, тоғ орасига киришгач, Бадианинг илтимоси билан Зулфиқор ҳам тўриққа мингашди.

Тўриқ ниҳоятда чарчаганига қарамай йигит билан қизни миндириб, шахдам қадам ташлади. Бадиа Зулфиқорнинг кўксига бош қўйиб, ўнг оёғи билан сонининг оғригини ҳам сезмай сармаст келарди. Агар Зулфиқорнинг ўрнида ё Низомиддин, ё отаси бўлганида «вой-вой»лаб йиғлаши аниқ эди.

— Сал нарига бориб, отдан тушаман, — деди Зулфиқор.

— Кўрқманг, сизни ҳеч ким кўрмайди. Каранг, икки томон осмонўпар тоғлар.

— Ҳа, тоғлар! — деди Зулфиқор, — эсимизни чиқариб юбордингиз-ку!

— Ойимлар кўрмаганмиканлар?

— Билмадим! Лекин Заврак билан Худододбек кўрди!

— Кўрса кўрар! — деди Бадиа юзларини Зулфиқорнинг кўксига қўйиб. Атрофида ҳеч ким йўқлигини пайқагач, Зулфиқор ўз кўксига бош қўйиб турган Бадиани қучиб, лабидан, дудокларидан ўпди. Қизнинг ўзи шуни истарди. У йигит қучоғида эриб кетди.

— Оғажон, оғритманг!

— Яна битта ўпай.

— Бас! — деди Бадиа Зулфиқорга тикилиб. Кейин у яна илгаригидек жиддий тусда гап қотди: — Оға, шу воқеани ҳеч кимга билдиrmайлик. Айб ўзида эканини шериги тан олиб айтди-ку!

Улар тоғ оралиридан чиқиб, сайил бўлаётган кенг майдонга бурилишда ҳовлиқиб келаётган Заврак Нишопурийга қамти чиқишиди. Уларнинг саломатлигини

кўрган шогирд ўз кўксига туфлади. Бадиа от устида, ён томонда Зулфиқор пиёда келарди.

— Тинчликми? — сўради ранги оқариб кетган Заврак.

— От опқочди, — деди Бадиа.

— Юрагимиз чиқиб кетди-ку!

— Яна кимнинг юраги чиқиб кетди? — жонҳолатда сўради Бадиа.

— Кимники бўларди? Менинг юрагим...

— Бошқа ҳеч ким билгани йўқми?

— Бек чодир томонга кетган. Хабар қилса керак.

— Ярамас! Лекин оға, бўлган воқеа шуки, мени от опқочди... Вассалом!

— Енгингизга қон тегибди, қаранг!

— Айб ўзида!

— Ҳа, майли, — деди Заврак ўзини босиб, — аммо бекам, доимо шунақа иш қиласиз. Сизнинг отангиз сарбоз эмас, меъмор, кишини қариган чоғларида ташвишга соловериш инсофдан эмас!

— Узр сўрайман, оғо! Отамга бу гапни билдирмай қўя қолинглар.

— Билдирмаймиз, ташвишланманг, бекам, худо бир асрари, — деди Зулфиқор Заврак билан ёнма-ён кета туриб.

Сой бўйига етишганида, Бадиани эҳтиёткорлик билан отдан туширишди. У қўлларини, юзини ювиб олди. Уни яна отга миндириб қўйишди. Бозорга яқинлашгач, у Завракдан илтимос қилиб, икки дона равоч ҳам олиб, от устида чайнаб кета бошлади. Зулфиқор билан Завракка «ўзларингиз бозорда бир оз айланиб, чодирга борарсиз, мен холи бораман. Туя кўрдингми, йўқ!» деди.

Бадиа ўз чодирига яқинлашганида устод Қавом чодири томонидан ҳовлиқиб келаётган Маъсума бека қизини кўриб, бир оз ўзига келди.

— Тинчликми? Юрагим қинидан чиқиб кетаёзди-я!

— Тинчлик, — деди Бадиа сиполик билан отдан сакраб тушиб. — От опқочди! Ҳув, нарироқдан қайтариб олиб келдим...

— Оғаларинг қани?

— Бозорда.

— Худододбек бўлса, сени кимдир опқочиб кетди, деди, — она ўз кўксига туфлаб, — юрагим чиқиб кетди-ку!

— Отамлар қанилар?

— Форга кетишган. Худододбек хабар бергани кетди.

— Ярамас! У кишини безовта қилиш нимага керак эди?! Борайми?

— Ҳожати йўқ, қизим! Юр, чодирга кир! Энди бу либосларингни еч!

Бадиа бу гал рози бўлиб, онасининг айтганини қилди. Унинг бирданига ювош тортиб қолгани онасини таажжубга солди.

Бадиа Худододбек билан отасининг ҳовлиқиб келаётганини кўриб, дарҳол чодирдан ташқарига чиқиб, уларни қарши олди. Ўз аслига келиб, отасини кутиб турган Бадиани кўрган Худододбек ҳангуманг бўлиб қилди.

— Тинчликми? — сўради Меъмор қизидан.

— Ҳа, тинчлик, отажон, — деди Бадиа пинагини бузмай, — отим опқочди. Билмадим, нега бундай қилди?

— Бунақа одати йўқ эди-ку, ҳаром ўлгурнинг, — деди Меъмор соябон арава ёнида ўт чимдиётган тўриққа ўкрайиб қараб.

Худододбек Бадианинг қаҳрли кўзига бир караб кўйди-да, бошқа гап айтолмай, Меъмор билан хайрлашиб, ўз чодири томон жўнади.

Меъмор тушки овқат вақтида Зулфиқорни ёнига чақириб ундан бўлган воқеани сўради. Зулфиқор лўнда қилиб, ҳақиқатни айтди. Меъмор ҳайратланиб, донг қотиб, чодир томонда ўтирган қизига қаради. Худододбек бехудага ҳовлиқтиргмаган экан... Меъмор ўйланиб туриб, Зулфиқорга маслаҳат солди:

— Кечга яқин шаҳарга қайтсак, нима дейсиз?

— Кечаси йўл юриш, устод, хавфли. Эрта билан йўлга чиқайлик.

— Маъқул, — деди Меъмор.

Зулфиқор билан Заврак ҳамма анжому нарсаларни шай қилиб, ўзлари арава ёнига сўйил яшириб

кўйиб, ёнларида ўткир пичоқ, тун бўйи мижжа қоқмай, чодир атрофида посбонлик қилиб чиқишиди...

Эрта билан улар араваларида шаҳарга қайтиб тушишди.

Орадан бир ой ўтгач, Амир Довуд барлос сардор бўлган лашкар Балхга кирибди, бир ҳафтага қолмай Ҳиротга етиб келади, деган хабар тарқалди. Дарҳақиқат, бир ҳафта ўтар-ўтмас эрта тонгдан Ҳирот дарвозалари тепасида карнаю сурнай, ноғоралар авж қилди; султон Шоҳруҳ Мирзо лашкари ғалаба билан қайтиб келди. Улар орасида Низомиддин хам бор эди, у соғ-саломат қайтиб, отасининг қучогига ташланди. Меъмор уч кундан сўнг, ўғли шарафига катта зиёфат бериб, ёр-биродарларини мамнун этди. Уста Ҳасанбек бўлса ўғли Шодмонбекнинг жангда шахид бўлгани туфайли аза очди...

Иккинчи киси

ХХ б о б

ХОРУН БЎЗЧИ ИСЁНИ

Нажмиддин Бухорий, кечагина Ҳирот кўшини Маймана шаҳри устига шитоб билан бостириб кетганини эшитиб, юраги ачишди. Яна бир култепа пайдо бўлмаса хўб эди... Мосиф¹ водийсида Вардана, Зандана, Кармана, Афшана, Варажша, Нур, Тавоис, Искажжат, Байканд каби шаҳарлар бўлганини тарихнавис Абубакир Муҳаммад ибн Жаъфар Наршахийнинг китобидан ўқиб билган эди. Мажусийларнинг буюк шаҳри Рабинжон² ҳам култепага айланганини эшитган эди...

Ҳалаб ва Ҳамадон шаҳарларидан амирзодалар таъкиби остида бош олиб чиқиб кетган баъзи хуруфийлар аввал Машҳад ва Ҳиротдан, кейинчалик, Туркистон тизма тоғлари орасидаги Дарайи Гурзивон, Боло Мурғоб, Банди Амир водийларидан бошпана топган эди. Айниқса, Маймана, Балх ва тоғ оралиғидаги Калласаркори шаҳарларидан хуруфийлар Фазлуллоҳ ва Сайид Насимий қатлидан сўнг жунбишга кирган, Обий Қайсар соҳиллари, Давлатобод шаҳарчаларида ҳам пойтахтдан сурилганларни жим ётибди, деб бўлмас эди. Ўзаро қирғин, ҳарбий юришлар, ўлпону ушр соликлари раиятни тобора қашшоқлаштириб, тинкаси ни қуритди, амирзодаю бекларнинг фахш ишлари авом орасида тарқалиб, кишиларда нафрат уйғотар, аслзодалар кўпроқ Машҳаддан келган руҳонийларга суюниб, «фоний дунё азоб-уқубатларини кўп чеккан банди

¹ М ос и ф — Зарафшон.

² Р а б и н ж о н — Судиёнларнинг Зарафшон водийсидаги катта шахри. Кейинчалик (1158 йил, милодий) уни хоразмшоҳлар вайрон этган.

да бокий дунё роҳатини кўради...» деган ақидалари билан одамларни алдашарди.

Аммо фирмайи ҳуруфия таъсиридаги кишилар бу дунё роҳатидан воз кечмаслик, золимга бош эгмай, ўз инсонлик ҳуқуқини ҳимоя қилмоғи лозимлигини айтишарди. Бу ўринда, мўғул ҳукмдорлиги даврида бўлган «Оға-ини ҳикояти»ни кўп айтишарди: Чингиз лашкари Хурисонни босиб олгач, Балх шаҳрида, кўчада икки оға-ини юзларини ерга қилиб ётишган экан. Кечга яқин кўчада пайдо бўлган одамлар, улар тепасига келиб: «Эй, оға-инилар, не сабабдан чўзилиб ётибсизлар?» деб сўрашибди. Улардан бири бош кўтариб айтиби: — «Мўғул сарбози бизларга бунда ётинглар, бир лаҳзадан сўнг бошқалардан қўлим бўшагач, келиб сенларнинг бошингни ҳам чопаман, деб тайинладилар. Биз кутиб ётибмиз», — дебди. «Э, нодон, — лебди бир йўловчи киши, — тур, ўрнингдан! Мўғуллар Балхдан чиқиб Майманага кетишди, сенинг бошингни чопишга фурсат йўқ». Шундан сўнг оға-ини ўринларидан туриб, этакларидаги тупроқни қоқишибди.

Яна бир ҳикоятда, амирзода Мироншоҳ ўзининг орқаклик кудрати бениҳоя эканлигини билдиримоқ бўлиб, дорию дармон билан ўз харамида ҳар ҳафта оир кўҳлик қизни кори шаҳват билан тонг отгунча кийнаб ўлдирар экан. Бу «одат»ни ҳозирги вақтда амирзода Иброҳим Султон ҳам такрорлар, шишиб, кўкариб кетган канизларнинг мурдаси яширинча дағнотилиб, йўқ қилиб юборилар экан...

Бу гап Банди Туркистон тоғлари оралиғидаги Дарайи Гурзивон ва Калласаркори аҳли орасида кўп гарқалди. Бу томонлардан олиб кетилган тоғ қизларининг тақдирни нима бўлганини фуқаро биларди. Маймана аҳли орасида эътибори кучайган ҳуруфийлар Машҳаддан келган мутаассиф руҳонийлардан кўра ҳам баобрў эди. Бўз ва бошқа мато тўқувчи Хорун деган мўйлабдор бир одам бозорда ва ичкари маҳаллаларда одамларни ўз атрофига тўплаб, уларга ҳамдард бўларни.

Унинг айтишича, Маймана беги амирзодалар уруғидан бўлиб, фаҳш ишларни кўп қилас, косиблару

зироат етиштирган дехқонларнинг сармоясини шилиб олар, тинмай Ҳиротга кўю қорамоллар юбориб турар экан.

Совур ойининг иккинчи ҳафтаси, якшанба куни эртә билан бозорда кўтарилиган ғалаён төддан ногихоний оқиб тушган шиддатли селдай Маймана беги турган эски қалъа томон оқиб кетди. Ғалаён кўтарганлар олдида қилич яланғочлаб Ҳорун бўзчи борарди.

Шу куни тонг сахарда бўзчининг олти нафар одами кетмону курак кўтариб, қалъанинг орқа деворлари остидан икки жойни ковлаб борут тўкиб, пилталарни улаб қўйишган эди. Бу ғалаёнга Дарайи Гурзивондан бир неча кадхудо қишлоқ оқсоқоллари бошлаб келган яроғлик одамлар ҳам қўшилган. Бозору кппон, косибу ҳаммоллар битта қолмай ғалаёнга қўшилиб кетди. Тўқайга ўт кетса ҳўлу қурук баробар ёнганидай, димоғдор, одамлардан жирканиб, ўзини улур тутадиган бек анчадан бүён кишилар фазабини қўзғаб, тоқатини тоқ қилиб келарди. Эркаклаб кетган пиёздек бу новча, ёш бек оғзидан хеч қачон ширин гап чиқмаган, доимо димоги осмонда, одамларни куртқумурсқача ҳам кўрмасди. У ёш бўлса ҳам, қорни тарвуздек юмалоқ, оёқлари ингичка, елкалари тор бир кимса эди. Шу холига қарамай, шахвоний ишларни кўп қиласди.

Ғалаён тўппа-тўғри қалъага яқин келгач, борут тайёрланган томонга ўтиб, Ҳорун бўзчининг ишораси билан пилталарга ўт қўйишиди. Қаттиқ бир гумбурлаш натижасида қалъа деворидан бир қисми қулаб тушди. Шовқин кўтарган оломон қалъага кириб, бекни хобхонасида қилич билан чопиб ташлашиди. Бекка яқин кишилардан яна уч-тўрт одамни ҳам найза санчиб ўлдиришиди. Қалъани ихота қилиб турган навкару ясовуллар ҳар томонга тумтарақай қочиб кетишиди. Ғалаён ўз ишини қилиб, кечга яқин тўполон босилгач, Ҳорун бўзчини Маймана ҳокими деб эълон қилишиди.

Орадан уч ҳафта ўтгач, иттифоқо, Маймана йўлларини навкар босиб, ярим тунда беадад отликлар шаҳарга бостириб кирди. Шаҳарда яна чопқин бошли-

ниб, бир нέча кишини тутиб олиб чиқиб, дарахтга боғлаб, уриб ўлдиришди. Хорун бўзчи билан ўн чоғлиқ киши тоғ оралиғига — Мурғоб томонга қочиб яширинди.

Кейинги хабарларга қараганда, Хорун бўзчи ёвмит туркманлари сингари мўйлабини қириб ташлаб Аст-рободга ўтиб кетибди. Баъзилар унинг Ҳиротда яшириниб юрганини ҳам кўрган эмиш...

Ўғли ҳаёти қил устида тургани туфайли Самарқандга, Улуғбек Мирзо номига нажот тилаб ёзилган номага ҳадеганда жавоб бўлавермагач, Нажмиддин Бухорийнинг юрагига ғулғула тушди. Нажот истаб чор атрофга югурди. Худди шундай кунлардан бирида, иттифоко, «Маликул калом, туркий забон...» ҳаёлига келди. Бу ҳаёлини Бадиага, Маъсума bekагa, шогирдларига маълум қилди. Подшо саройининг энг мўътабар шоирларидан бўлмиш мавлоно Лутфий ҳовлисига йўл олди. Нега бу фикр илгарироқ ҳаёлига келмаганига, у зотдан паноҳ тилаб бормаганига ачинди; мавлононинг ҳазрат олдида саркардаю нуфузли беклардан кўра ҳам эътибори баланд эканини ўйлади. Айниқса, Хуросон ёшлари мавлононинг билурдай тиник, баҳрдай теран туркий ғазалларини бенихоя севишарди. У Ҳирот якинидаги Дехиканор қишлоғида туғилиб, машхур сўфий мавлоно Шаҳобиддин Хиёбонийдан тасаввуф таълимими олгани, «Маликул калом» деган табаррук унвонга мушарраф, Шайх Сайдий, Хўжа Хофизлар қаторида турадиган, айниқса, туркий забон пур эътибор одам экани ҳаммага маълум эди. Эллик ёшларга борган, баланд бўйли, ориқ, қорамагиз, қошлари куюқ, кирра бурунли, мулойим ва ҳозиржавоб бу шоир тезда оғиздан оғизга тушиб кетган. Ошиқона ғазаллари билан танилган. Ўзи инсон сифатида ҳам камтарин, барчага баробарлиги билан шуҳрат топган эди. Ҳамма вакт оппок саллани чиройли ўраб, сокол-мўйлаблари текисланган, кийимлари бегард, озода юрарди. У, асосан Шоҳруҳ Мирзо замонида эътибор қозонди. Сарой хизматига ўтди. Бойсункур Мирзо, Улуғбек Мирзолар билан ҳам фоятда яқин эди. Мавлононинг «Улуғбекхон билур Лутфий

камолин, ки рангин шеъри Салмондин қолишмас», деган байти амирзодалар эътиборида эди. Хаттот Азхар ва Жаъфар Табризийлар мавлоно Лутфий ғазалларини турли баёзларда дастхат билан ёзишган, «Гул ва Наврӯз» достонини ҳам кўчиришган. «Девони Лутфий» хаттот Ёкут услубида кўчирилган бўлиб, Шоҳруҳ Мирзога тухфа қилинганд. Мавлоно ёш эътибори билан Меъмордан кичикроқ бўлганига қарамай, анча салобатли, айни вактда ширин забон, дилбар одам экани меъмору муҳандислар орасида маълум эди. Мавлоно Лутфий Меъмор Хиротда қураётган «Мирзо» мадрасасини бир неча бор келиб кўрган, сухбатларда бўлган. У бир сухбатда ўзининг Олтин Ўрда томонларга саёҳат қилиш орзуси ҳам йўқ эмаслигини маълум қилган эди. Меъмор унинг ўн минг байтдан ортиқ «Зафарнома» китобини ёш амирзода Бойсункур Мирзо орқали вақтинча олиб ўқиган эди. Мехри Талъат бека мактабига қатнаб ўқиб юрган Низомиддин билан Бадиа кейинги таҳсилдан сўнг Мирзонинг отаси қўлидаги бу омонат китобини ўқиб, «Зулфингни кўриб...» «Қани бу шаклу шамойил...» ғазалларини кўчириб олган эдилар. Умуман, шоирнинг сермуравват инсон экани Меъмор хонадонига маълум эди. Киши бошига иш тушмагунча, атрофдаги одамларнинг фазилати унча ярқираб кўринмас экан. Аксинча, баъзан серфазилат кўринган кишилар дарду алам билан паноҳ тилаб қолишган кунларда фазилат у ёқда турсин, бадкирдор одамлар экани ҳам намоён бўлиб қолди. Хуллас, Меъмор мавлоно Лутфий ҳовлисига паноҳ тилаб жўнади.

Шоир эрта билан ўз эшигига Меъморни кўриб, унга меҳрибонлик кўрсатди. Ичкарига олиб кириб, юқорига ўтқазиб, олдига дастурхон ёзди. Шоир Меъморнинг бошига тушган мусибатдан, юрагидаги аламдан хабардор эди; у Меъморни ўз эшигига кўришидаёқ, нима мақсадда келғанини сезган эди. Бу топилмас устод, беназир олимнинг ахволига ва ўғлининг хибс этилганига ачиниб, унинг обрўсини саклаб қолиш, агар жиндек илож бўлса, ўғлини Ихтиёридин қалъасидан чиқариш лозимлигини, бу йигит ҳуруфийлар-

нинг махфий тўдасига кириб қолса-да, аслида салтанаат учун бўлган жангларда иштирок этганини Мирзога айтиб, баъзи ёмон ниятли кимсалар шу йўл билан Меъморга шикаст етказиши кўзламоқдалар, деган эди. Мирзо «маликул калом» фикрини тамоман тасдиқлаб, ҳамма имкониятдан фойдаланажагини, аммо ҳуруфия — салтанатнинг ашаддий дўшмани, оғаси Иброҳим Султон бу ёмонликни батамом тугатиб юбориш учун қаттиқ чоралар кўраётганини ҳам айтган эди.

Бу гаплар ялт этиб шоир хаёлидан ўтди.

Аммо у ҳеч нарса билмагандек, аввал ҳол-аҳвол сўрашиб, кейин Меъмор ўғлининг ҳибсда эканини эшитганини айтди. Унга таассуф билдириди.

— Ҳурматли зот, худди шу масалада сиздан паноҳ истаб келдим. Бошимга оғир кулат тушди...

— Ҳаммасидан воқифман, — деди шоир чуқур ўйчанлик билан ва Меъморнинг изтиробига шерик бўлгандай. — Сизни бунчалик изтиробга солмай ишни тўғриламоғимиз керак эди. Мен Бойсунқур Мирзога бу ҳақда айтган эдим. Бир мен эмас, ахли шуаро шу фикрда. Бир гал подшо ҳазратлари афв этиб, ёшларнинг гуноҳидан ўтсалар, фуқаро аро салтанат эътибори яна ҳам кўтарилади, дедим. Энди мен улуғ ҳазрат ёнларига кириб чиқмокчиман, чунки бусиз ҳеч илож ўйқ.

— Худо ёр бўлсин сизга, доимо саломат бўлинг.

Меъмор билан шоир учрашуви мана шу тариқа бўлди. Чунки ёзилиб гаплашиб ўтирадиган пайт эмас эди. Меъмор мавлоно Лутфий билан хайрлашиб, тезда ўз уйига жўнади.

Дарҳақиқат, «маликул калом» ўз сўзида туриб, подшоҳ ҳузурига киришга харакат қилди. Чоршонба куни кечга яқин унинг бир неча бор қилган илтимосини қондириб, сарой мансабдорлари ҳамда вазири аъзамнинг аралашуви натижасида хасталикдан тузаллаётган подшоҳ шоирни қабул қилди. У аркнинг кунчиқар томонидаги деворлари ўймакор ганч, катта хона — қизил гиламлар ташланиб нақшин шифтга улкан қандил осилган хонада қабул қилди. Шоҳруҳ Мирзо хона юқорисидаги таҳтда ўтиради. Ичкарига

кирган шоир бош эгиб, таъзимдан сўнг унга анча яқин бориб, ҳозирланиб қўйилган курсига ўтириди. Ҳол-аҳвол сўралгандан сўнг, ўзининг янги кўчирилган «Ғазалиёт»ини тухфа этди. Шундан сўнг мақсадга ўтиб, подшо ҳазратларидан Ихтиёриддин қалъасига хибс этилган олти йигитнинг гунохини бир оз енгиллатиш, овозаларга қараганда, уларга ўлим жазоси таҳдид этаётганини эшифтгани, аҳли шуаро номидан ҳам жазони бир оз енгиллатишни илтимос қилди. Аввал «Ғазалиёт» китобини очиб, вараклаб турган Шоҳруҳ Мирзо шоирга кўз ташлади, китобни ёнига қўйиб, ҳаяжон билан гапираётган мавлонога энсаси қотиб тикилди. Бир муддатлик сукутдан кейин, «ўзиники бўлмаган ишларга аралашиб, довдираб юрган шоирга» ачингандек бўлди.

— Сиз, ҳурматли зот, садоқат, поклик ва баҳодирликни васф этадирсиз. Нечун бир тўп наслу насаби нопок каллакесарларни химоя қилибсиз? Мавлононинг бу ишлари жуда таажжуб?! Улар ҳуруфия тўдасига мансуб бўлиб, мусулмонликдан воз кечиб, куфр йўлига ўтганлар...

— Подшоҳи олам, бу ҷалғиган ёшлар ўз айбига пушаймон бўлар, тавба қиласар, бир куни мамлакат корига ярас, деган умиддаман. Улардин бирининг отаси — машҳур меъмор Нажмиддин Бухорийдир, бирининг отаси...

— Маймана шаҳрида раият шу ҳуруфийлар васвасасига тушиб ғалаён кўтарган. Биз қўшин йўлладик. Уларнинг саркори Хорун бўзчи деган кимса эмиш, — деди қовоги солинган Шоҳруҳ. У шоирга бошдан-оёқ тикилгач, бир юмшаб, деди: — Ўғлим Иброҳим Сultonга бу сўзларингизни айтаман. Ҳуруфийлар ичida Меъморнинг ўғли ҳам бор экан, дейман. Аммо ҳуруфияни батамом йўқотиш унга топширилган.

Мавлоно Лутфий подшоҳга яна таъзим қилиб, ташкарига чиқиб кетди.

Кейинчалик, ўз илтимоси ерда қолиб кетганини билган шоир бир ой уйдан кўчага чиқмай «ҳаста» бўлиб ётди. Шундан сўнг «саёҳат» баҳонаси билан аввал Олтин Ўрда, ундан сўнг Криму Қорабоғ томонларни кўзлаб подшоҳ саройидан бош олиб чиқиб кетди...

XXI б о б

ҚАТЛ

Мухтарам китобхонга маълумки, биринчи бобда меъмор Нажмиддин Бухорийнинг шаддод қизи Бадиа Ихтиёриддин қалъасига ҳибс этиб ташланган оғаси Низомиддинга хўрак олиб борган эди. Зинданбон қизни алдаб, оғангни кўрсатаман, у билан гаплашасан, деган баҳона билан номусига тажовуз этмоқчи эканини сезиб қолганди...

Бадиа саросимада қалъа ичидаги ярим қоронғи хона бурчагига тисарилди. Кўзлари ола-кула бўлиб, рўпарасида турган даҳшатли зинданбондан асло кўз узмасди. У баркашни ҳам, саватни ҳам ерга ташлади. Нимчаси ичига қўл тиқиб, ниманидир маҳкам ушлагани ҳолда, титраб турарди. Шоп мўйлабли зинданбон ҳозироқ ўз ўлжасига ташланишга чоғланаётган қоплондек, қон талашган кўзларида ҳайвоний хирс, Бадиага яқинлаша бошлади. Бадиа нимчаси ичидаги кичкина, аммо ниҳоятда ўткир ханжарни бир лахзалаёк суғуриб олди. Туйнукдан тушган ёруғликда ханжар ярқиради. Хона бурчагида турган Бадиага яқинлашиб бораётган зинданбоннинг кўзи ханжарга тушиши билан шу лаҳзанинг ўзидаёқ жойида қотди.

Шоп мўйлабли зинданбон орқасига тисарилди.

— Чиқиб кет бу ердан! Йўқол! — у қўли билан эшикка ишора қилди.

Бадиа зинданбондан четлаб, деворга сўйкалиб, иккинчи хонага, ундан сўнг қоронғи йўлакка ўтди. Орқадан келиб қолмасин, дегандек, атрофига олазарак бўлиб, яна бир йўлакка ўтди-да, қалъа дарвозасига чиқди. Дарвоза ёнида ҳам ўнг қўлидаги ханжарни маҳкам ушлаган ҳолда тўрт томонга олазарак бўлди. Дарвоза ёнида қилич осиб, найза ушлаб турган навкарлардан ҳам чўчиб, физиллаганича пастликка — қалъа олдидаги майдонга тушди. «Ҳа, кабутарни кўлдан чиқариб юборибсиз-да» деди эшиқдаги навкар ичкаридан чиқиб келаётган зинданбонга. «Бу кабутар эмас, чаён! Ёнига яқинлашсам, чақадиганга ўхшади, ярамас! Ёнида ханжари бор экан. Ҳозирги ёшлар яроғ

олиб юрадиган бўлган...» — деди хафсаласи пир бўлиб зинданбон.

Пастда, майдон четидаги йўлкада кутиб ўтирган Заврак Нишопурй Бадианинг қўлидаги ханжарини кўриб, ўрнидан дик этиб турди. У югуриб келиб сўради:

— Хўш, Низомиддин оғани кўрдингизми?

— Ҳалиги малъун мени алдаган экан, — деди Бадиа қўлидаги ханжарни нимчасининг ичкари катига яшириб, анави қароқчига ўхшатиб, нақ юрагига санчиб, ўлдириб чиқмоқчи эдим, оғам Низомиддинга шикаст етказмасинлар, деб бу ишни қилмадим.

— Оғангизни кўрдингизми?

— Қаёқдан кўраман!

— Сават қани?

— Ўша хонада қолди. Билагузукларим ҳам қолди... Мана, подшонинг навкарлари! Уларнинг порахўр эканликларини эшитган эдим. Лекин бунчалик абллаҳ эканликларини билмасдим. Шуларга ишониб ўтирибмиз-а! Салтанат учун жонини тикиб, жангга киргандар зинданда! Тушуняпсизми, жаноб Нишопурий? Отамлар доимо салтанатга тил тегизма дердилар, мана — салтанат!

— Юринг, кетдик, бекам!

— Кетдик! — деди Бадиа қалъа дарвозасидан ўзларига ўқрайиб қараб турган зинданбондан кўз узмай,— улар бизга тикилиб қараашяпти. Низомиддинга шикаст етказишмасмикан?

— Низомиддин тафтиш этилмоқда. Унинг иши амирзода фармони билан боғлиқ, — деди Заврак, — фармонсиз унга тегиша олмайди. Мен шундок деб тушунаман. Ишқилиб, худо ўз паноҳида асрасин. Низомиддиннинг подшо учун жанг қилиб келгани, баҳодирлиги сабаб бўлиб тез кунда зиндандан чиқариб юборишларига имоним комил. Қандайдир бир шубҳа уни ҳибс этилишига сабаб бўлган...

— Илоҳим айтганингиз келсин, оға!

Бадиа билан Заврак қўлтиқларидан тарвузлари тушиб, уйга қайтиб келишди. Отасига ҳам, онасига ҳам «хўракларни ичкарига олиб кириб кетгани...» хақида гапиришди-ю, аслида бўлган воқеани айтишмади. Бадиа бу гапларни сир саклаш кераклигини Завракдан

ўтиниб сўради, йўқса, чолнинг бир дарди икки бўлиб, ўлиб қолиши мумкин, деди. Зулфиқорнинг Бухорога жўнатиб юборилиши — Бадиа учун катта жудолик бўлган эди. Фаввос Мухаммад бир қадар тўнг одам, у билан очилиб, сирлашиб гаплашган вактлари камданкам. Лекин Зулфиқор бунинг акси, у дилбар йигит — у билан тез орада иноклашиб кетишган. «Бадиага кўз олайтириди», «Хунар ўрганиш ўрнига ошиқ-маъшуклик қилди...» деган шубҳа билан ҳайдаб юборилди бечора. У бор вақтида ёлғон гапириш, Меъмордан бирон нарсани сир тутиш — жиноят ҳисобланарди. Зиндонбон воқеаси сир тутилиб, Зулфиқордан кейин отасига биринчи бор ёлғон сўзлаши эди.

Кунлар ўта бошлади.

Мадраса қад кўтариб, хурсандчилик бўлади, деб турилганда Низомиддиннинг хибс этилиши Меъмор қаддини дол қилиб қўйди. Бу дунёда ғам-ғуссасиз одам йўқ. Меъмор ҳам чинакамига ғуссанинг зўрига учради. Меъмор равоч сайлига чиққанда тоғ этагидан оқиб ўтадиган сой бўйида ўтириб, тошлар орасида сузиб юрган танга балиқларни томоша қилган эди. «Шу ҳам ҳаёт бўлдими-ю, бу балиқлар мириқиб ўз кифтларини ўzlари қаштай олмасалар! Киши ўз кифтини қашлаши қандай роҳат!» деб кифтини қашлаб, кулган эди. Кошки эди у ҳам ўша балиқдек дунё ташвишларидан холи, беандух, шу тиник сув ичидা хоҳлаган томонига сузиб юрса! Кифтини ўзи қашламаса ҳам кошки эди! Одамларнинг унга нисбатан ишончи адойи тамом бўлгандай... У бирон навкарга кўрамат¹ ўрнида ҳам керак бўлмай қолди. Агар иш шундай давом этса, дорулмулк²ни ҳам ташлаб, бошқа томонга бош олиб кетмоғи лозим бўлади. Бу воқеа ҳали бора-бора шундай шубҳалар солурки, дўст-ёrlар ҳам ўzlарини тортиб, ундан ҳазар қилурлар...

Маъмур чуқур ўйга чўмар, унинг кўз олдидан сарой аъёнлари ўтарди. Бу мансабдорлар ўз юзларини тескари қилиб ўтиб кетаётгандай бўларди.

Низомиддин хибс этилган бу машъум кунлардан

¹ Кўрамта — ўқдон.

² Дорулмулк — пойтахт.

бирида Меъмор олим уламо, фозилу фузало, шоишуаро ҳомийси Мирзо Улуғбекка иккинчи бор нома йўллади. Номани саройга олиб бориб, Самарқандга кетаётган анчолардан бериб юборилишини илтимос қилди. Ҳар куни қандайдир зарур ишлар билан Самарқандга чопар кетишини ва ҳар куни у томондан чопар келиб туришини биларди. Ўзига яқин бир юкори мансабдор билан маслаҳатлашганда, у Меъмор номасини зудлик билан Самарқандга — Улуғбек Мирзога юборишга вайда берди. Ўғлиниң қисмати шу нома билан боғлиқ эканини айтиб, ёлвориб, юракдан ўтиниб сўради. Хатда: «Оlampanoҳ Улуғбек Мирзо ҳазрати олийларига, «Илму маърифат раҳнамоси, сultonлар сultonи, мунажжиму мухандису меъморлар устоди, аъло ҳазрати муazzами хумоюни Улуғбек Мирзога етиб маълум бўлғайким, мен содик куллари, бир фариб меъмор Нажмиддин Бухорийдурманким, аслим Бухоройи шарифдан бўлиб, йигирма йил Хурросонда Аълоҳазратга сидқидилдан хизмат қилдим... Эндиликда ўғлим Низомиддин бизга номаълум бўлган сабабларда иштибоҳ этилиб, ҳибсга олинди. Ихтиёриддин қалъасига ташланди. Мансабдор шахсларнинг хабар қилишларига караганда, ўғлим Низомиддинга ўлим жазоси таҳдид солиб турибди. Оlampanoҳ меҳрибон! Менинг ўғлим Низомиддин сиз Аълоҳазратнинг содик сарбозингиз сифатида Фарғона юришида иштирок этиб, салтанатингиз душманларига қарши курашган, бошидан қаттиқ ярадор бўлган. Сайхун бўйидаги даштда бўлган жангда сиз, Аълоҳазратга ва саркарда Ёкуббек жанобларига қасд қилиб, орқадан қилич чофлаг бораётган рақибни ер билан яксон қилган. Мен, салтанатнинг содик қули, меъмор Нажмиддин бир неча бор подшохимиз тухфаю эҳсонларига сазовор бўлганман. Ҳиротда, Балхда, Самарқандда, Бухорода бир неча кўприк, сардоба, ҳаммом, мадрасаю масжид қурилишида бош бўлдим. Садоқатим ва шу хизматларимни инобатга олиб, ўғлимни қатл этилишдан олиб қолишингизни сўрайман. Ҳудойи таоло сиз ҳазрати олийларига доимо ёр бўлсин, музaffer байроғингиз доимо салтанатимиз устида хилпираб турсин. Содик қулингиз, меъмор Нажмиддин Бухорий».

Барот ойининг ўн олтиси, Ҳирот шахри», деб ёзилган эди.

Ҳамма гапдан воқиф сарой мансабдори номани Меъмор қўлидан олдида, совуқконлик билан уни алватта Самарқандга юборажагини маълум қилди. Меъмор Нажмиддин Бухорий унга эгилиб сидкидилдан гашаккур айтиб чиқиб кетди. Анчолар орқали Самарқанду Балх, Машҳаду Табриз, Нишопуру Қобулга чиқиб кетаётган барча ҳужжатномаларни Иброҳим Сulton кишилари кўрмоғи ва ёки хабардор бўлмоғи шарт ёди. Сарой мансабдори бу фарзи айнга риоя қилиб, Меъмор номасини кечга яқин амирзоданинг ўз қўлига берди...

Тун.

Ҳаммага кўрқув солиб турувчи Ихтиёриддин қалъаси. Баланд ва ҳўмрайган совуқ бу бинода чирок йўқ, факат дарвозалари, қалин деворлари устида машъала кўтариб юрган посбонларгина бор. Тунда у яна ҳам даҳшатлироқ бўлиб, ўтган-кетганларга қўрқув солади. У бир улкан Аҳраман девдек Ҳиротнинг Машҳад йўлида қаққайиб турибди. Унинг совуқ кучогида канчалаб маҳбуслар азоб чекмоқда. У, Меъмор наздида кулча бўлиб ётган улкан бир илонга ўхшарди; қанча одамни ўраб олиб, ютишга ҳозирланаётгандай... Машҳадга кетаётганлар ва у томондан келаётганлар қалъага бошдан-оёқ тикилиб ўтиб кетишарди.

Жума куни қалъа ҳовлисига қурилган етти дор ёнига зах ҳужраларда ётган олти маҳбусни олиб чиқишиди. Уларнинг ҳаммаси ёш йигитлар бўлиб, улуғи йигирма беш, кичиги йигирма ўнда эди. Худди шу куни уларнинг дўсти Аҳмад Лур Жоме масжидидан чиқиб келаётган подшоҳга суиқасд этиб, шу ернинг ўзида подшоҳ кишилари уни тутиб олиб, тилка-пора килиб ташлаган эди. Етти дорнинг бири уники бўлиб, ўзи йўқ эди.

Олти маҳбус қатор дор тагида туришарди. Улар орасида Меъморнинг ўғли — Низомиддин ҳам бор. Килич яланғочлаган навкарлар маҳбусларга нисбатан ўн баробар кўп. Тик келган ўн тўрт кунлик ой қалъа ҳовлисини кучсизгина ёритиб турарди. Қўллари боғ-

лик маҳбуслар баланд деворлар тепасидағи ойга боқишар, бир-бирларидан рози-ризолик сўрашар ва кимнингдир от чоптириб келиб, подшо ўз ҳукмини ўзгартиражагини кутишарди. Навкарларнинг хўмрайган даҳшатли башаралари, ўликхоналарнинг миқ этмай турувчи қулф эшиклари бир-бирига ўхшаб кетарди. Маҳбус йигитлар орасида турган Низомиддин ойга қарап, илгари қанчалаб завқу хурсандчилик баҳш этган ой бу гал қонга белангандай, юз-кўзлари моматалоқ бўлиб, шишиб чиққандай кўринарди. У ҳамма ишнинг сабабчиси, шошқалоқ Аҳмад Лурга ўхшарди. Ана энди унинг ўрнига сен осиласан, деди хаёлан Низомиддин ойга қараб. Шу орада Низомиддиннинг кўзи қилич яланғочлаган навкарлар орқасида, ёлғиз бир ўзи курсида ўтирган рангпар, чўққи соқол, ингичкагина одамга тушди. Бу одамни қаердадир кўргандек эди. Ўйлаб-ўйлаб, уни Фаргона жангиди, даштда, қозон тепасида кўрганини эслади. У ўшандаги табокда гўшт олиб келиб, ёнларида ўтирган эди. Бу одам каллакесарлар орасида нима қилиб юрганига ҳайрон бўлди.

Дор тагидаги олти йигитни тутиб олиб келган, даҳшатли Қораилон мана шу шахс эканини Низомиддин мутлақо билмасди. У яна ёнидаги ошналарига қаради. Наҳотки, ҳозир улар дорга осилиб ўлиб кетадилар! Наҳотки, уларнинг кунлари битган! Ахир у подшо ҳазратлари учун жанг қилиб, зафар қозониб келди-ку! Унинг хизмату садоқатини хисобга олиб, осиб юборишмас. Наҳотки, подшоҳ уни осиб юборишга фармон берса! Йўқ, бу дор олдига олиб чиқишиб сиёsat: уларни қўрқитиб, бундан кейин ёмон ишларга қўл урмасликка даъват этиб, пўписа қилиб қўйишимокчи. Бу иш катта танбех бўлсин деб, дор ёнига ҳам олиб келишган. Агарда уларни ҳақиқатан ўлдирадиган бўлсалар, ота-оналари билан юз кўришириб, хайрлашишга имконият бериларди. Ширин сўз, чўққи соқол ҳам бунда юрмасди. Демак, бу бир пўписа... Низомиддин яна хаёлга толар... Бундай хаёлдан сўнг у яна мурдадай қотарди.

Тун ўрталарида икки сипоҳи от чоптириб келиб, қалъа дарвозасидан ичкари кирди. Улар отдан тушма-

ган ҳолда зинданбонга нома узатиши. Зинданбон номани дарҳол курсида ўтирган чўқки соқолга берди. Дор тагида оёқ-яланг, қўллари боғлиқ жавдираб турган олти маҳбусга жон кирди: «Э, худо, ана, подшонинг янги ҳукми келди. Бизларни ўлим жазосидан олиб қолади», деб ўйладилар.

Қоғозга кўз ташлаган чўқки соқол зинданбонга ҳамда маҳбуслар атрофида қилич ялонғочлаб турган навкарларга ишора қилди; тайёрланиб турган навкарлар дарҳол маҳбуслар бўйнига сиртмоқни солиб, куч билан арқонни тортиши. Олти маҳбус саройдан келган мансабдор отлиқлар олдида осиб ўлдирилди.

Уларнинг мурдаси аzonгача дорда осилиб ётди. Эрта билан ўликларни қалъанинг орқа томонидаги эшикдан олиб чикиб, тиканзор бир ташландик ерга казилган чуқур хандаққа ташлаб, устидан тупроқ тортиб, текислаб юборилди.

XXII б о б

МЕЪМОР ТЕЛБАСИФАТ

Низомиддин қатл этилганига бир ҳафта бўлган бўлса ҳам, унинг ота-онаси бу фожиадан тамоман бехабар эди.

Қишиш бошланган.

Шаҳарда қора совуқ изиллар, бева-бечоралар гўшаларда жиндаккина олов атрофида ўзларини тутиб, жунжиб ўтиришар, ҳаво бўшашиб, тарақлаб қотган ерлар пилч-пилч бўлгач, кўчама-кўча изғиб, тиланчилик қилишарди.

Сандалга бағирларини бериб ўтирган ота-она ва Бадиа хомуш, мунгли ўтиришар, сандалнинг яна бир томони бўш тургани, иккинчи фарзанд совуқ зинданда ётгани — ота-она бағрини тимдалар, овқат ҳам томонидан ўтмас эди. Меъмор бир лаҳза бўлса ҳам хотини билан қизига далда бериш учун ўтмишдан турли ҳикоялар айтиб, уларни овутар эди.

Меъмор баъзан соатларча бармоқлари билан соқолини тимирскилаб, хаёл суриб ўтиради. Отасининг

чукур изтироб чекаётганини Бадиа сезса ҳам, бир нима дея олмас, ота бечора ғоятда эзиларди.

Меъмор Самарқанддан Ҳиротга маҳсус нома келади, ўғлимни кутқаради, деб астойдил ишониб, бу «мужда»ни кутиб ётарди. Аслида унинг номаси Самарқандга юборилмай, Иброҳим Султон ишораси билан бунда қолиб кетган эди. Келаси жума куни бу машъум хабар шаҳар аҳолисига маълум бўлиб, «подшога суиқасд қилганлар осилибди...» деган гап оғиздан-оғизга ўтди. Меъмор сарпойчан, ранги оқариб юргурганича саройга борди; агар уни ҳозироқ амирзода Бойсунқур ҳузурига киритмасалар, дод деб бозорга боражагини, ундан сўнг мадраса пештокидан ўзини ташлаб юборишини айтиб, дарвоза олдида ўтириб олди. Бирон соатлардан сўнг уни амирзода ҳузурига киритдилар. Ҳовли саҳнида ерга қараб, ҳомуш турган Мирзо ранги оқариб, рўпарасига келган Меъморга қаради.

— Шу ростми, ҳурматли амирзода?

У ҳомуш, сукут сақлаганча тураверди. Бир лаҳзадан сўнг Бухорийга қаради:

— Жиноят ниҳоят оғир бўлганлиги сабабли менинг аралашувим ва илтимосларим инобатга ўтмади. Мурофа¹ ҳам фарзи айнни қувватлаб фатво берган...

— Салтанат учун жанг қилиб, қон кечиб келган эди-ку?

Бойсунқур жавоб қилмади.

— Мен Улугбек Мирзога нома йўллаган эдим?

— Бундан хабарим йўқ.

— Э, худо, бу қандок кўргулик! Э, худо, менинг жонимни олсанг бўлмасмиди! Қани адолат? — Меъмор ердан ғижимлаб тупроқ олиб ўз бошидан сочганича, бақириб, дод солиб саройдан чиқиб кетди.

У то ҳовлисига етиб борганича бақириб, кўчаларда мункиб, ерга ағанаб яна ўрнидан туриб, деворларга бошини урди. Ҳовлисига кириши билан ўзини ерга отди. Заврак Нишопурий билан Фаввос Мухаммад Меъморни кўтариб, хонага олиб киришди. Бу гапни эшитган Маъсума бека ҳам дод солди. Фақат Бадиа қотиб қолди.

¹ Мурофаза — диний суд.

Бир муддатдан сўнг Меъмор ўрнидан турди. Бадиага, Маъсума бекага, Заврагу Favvosга қараб, бир нимадеб ғўлдиради:

— Мен хозир бориб чўқмол билан мадраса кошингларини уриб тушираман! Мен хозир бориб ҳаммомни ҳам, кўприкни ҳам бузаман! Мен ҳамма ёқни бузаман!!! Ҳамма ёқни бузаман!!! Мусаллони ҳам бузаман, чунки унда ҳам менинг хизматим бор! Мен уларни ким учун қурдим! Ким учун!!! Шу қотил амирзодалар учунми?! Йў-йў-йўк, мен хато қилган эканман! Мен, эсини еган нодон чол доимо хато қилиб юрибман! — у пешанасига кафти билан қарсиллатиб ура бошлади.

— Ота, ўзингизни қўлга олинг, — деди Бадиа отасининг қўлларидан ушлаб, — отажон, бир оз сабр қилинг.

— Шунча хизматларим бадалига менинг биттаю битта ўғлимни ўлдирадиларми?! Ахир суиқасд қилганлар бошқа-ку! Шубҳа қилиб ҳам ўлдирадиларми? Қотиллар! Конхўрлар! Аблаҳлар!!! Мен энди ҳамма қурганларимни бузаман! Ўт кўяман! Ёндираман!!!

— Отажон, сиз мадрасаларни у золимлар учун эмас, фукаро учун кургансиз, — деди яна Бадиа отасини кучиб, унинг ёшли кўзларига тикилиб, — улар ҳам бир кун ўлиб, унутилиб кетади, сиз ўлмайсиз, сизни одамлар дуо қиласди.

Меъмор Бухорий хотини, қизи ва икки шогирди билан тунни мижжа қоқмай ўтказиши. Аzonга яқин Бадиа бодом ёғидан тайёрланган доруий бехушдан озгина бериб отасини ухлатди. Онаси ҳам мурдадек қотиб қолди — улар ғарип ва ҳақир одамлар каби бошларини ичига тиқиб ётишарди. Улар бепаноҳ, бесуянчик, жамиятда қувиб юборилган осий одамлардек ўз хоналарида ётишарди.

Заврак билан Favvos эрта билан бирлари бозордан ион келтириб, бирлари чой қўйиб, нонушта тайёрлашди. Энди бу тахкирланган хонадонга Ҳиротнинг номдор кишилари қадам босмайди. «Э, у меъмор эмас, бир лўттибоз...» деб хақорат қиласиганлар ҳам чиқиб колади. Уларнинг биринчиси Аҳмад Чалабий бўлади. У энди кулохини осмонга отиб қувонади, жирттак

уради... Заврак Нишопурий билан Бадиа кўз олдига корфармо Аҳмад Чалабийнинг совуқ башарасию хунгизор гавдаси кўриниб кетди. Нонуштадан сўнг Заврак Нишопурий ўз хонасига кириб, Зулфиқор Шошийга йиғлаб-йиғлаб нома ёзди. Номани ёнига солиб йиғиб юрган ақчасидан икки тилло танга олиб, югурганича карвон саройга борди. Шу бугун Бухорога жўнаётган карвонни топди. Инсофлик ва тақводор бир савдогарга нома билан икки тилло тангани бериб, «ўлгунимча ҳаққингизга дуо қиласман, бу хатни қиёматли дўстим Зулфиқор Шошийга ёки унинг отаси уста Нусратга етказинг, худо йўли учун шу хизматни қилинг», деб ёлворди. У одам икки тиллони қайтариб бериб, «агар соғ-саломат етиб борсан, номани эгасига топшираман, ўғлим, изтироб чекманг. Худо хоҳласа, сизнинг хоҳишингизни бажо келтириб, савобга қолурман», деди.

Зулфиқорга нома кетганидан хабар топган Бадиа Завракнинг қўлинини кўзларига суртиб, йиғлади...

Меъморнинг кўзи мошдай очилди. Ҳали подшодан бизга Суюргола¹ бўлади, деб юрган эдим, мана у! Мўғуллар Ўтрору Нур ва Зернук²ни йўқотиб юборганини афсус билан айтардик, аммо ўзимизнинг подшоларимиз, ўзимизнинг туркий уруғларимиз ўзимизни йўқотиб юборяпти, — деб ох урди Меъмор. — Бу фожия ҳамма учун моҳак тоши³ бўлди, сен юз йил садоқат билан меҳнат қилу, агар подшоҳ сендан бад олса шу лаҳза ёстуинг курийди. — Ўғлимнинг фожиаси — эл учун моҳак тоши бўлди... Энди мен бунда меъмори малик бўлганимдан кўра, ўша ўз юртимда наддоф бўлганим афзал. Хуросон энди мен учун ҳаром, мен бу ерга келиб нима рўшнолик кўрдим! Ҳозир кўза синдирган азиз! Мен билардим, кейинги пайтларда нуктадонлар эмас, хушомадгўйлар азиз бўлиб қолди...»

Чол кун бўйи шундоқ гапларни айтиб, йиғлаб ўтириди. Овқат ҳам емади. Кечга яқин Заврак билан бирга

¹ Суюргола — ер инъом этиш.

² Ўтрор, Нур, Зернук шахарларини мўғуллар йўқотиб юборган.

³ Моҳак тоши — тилла билан жезни ажратадиган минерал тош.

Ихтиёридин қалъасига борди. Шоп мўйлаблик зинданбон подшонинг фармони: «Фарзи айн билан қатл этилганлар яширин кўмиб юборилди», — деди. Ўғлиниг мозорини топиб беролмаслигини айтиб, хўмраийб турди.

— Жаноза ўқилдими?

— Йўқ!

— Ўғлим Низомиддин ўлим олдидан калима келтиридими?

— Ха, ҳаммалари ҳам калима келтиришди.

— Вой, болагина-е-ем! Отангни ўлдиришса бўлмасмиди! — чол хўнгиллаб йиғлади.

Шундан сўнг у қалъа дарвозасидан чиқиб, пастликка, майдонга тушди-да, ерга чўкка тушиб ўтириди. Заврак Нишопурий ҳам унинг ёнига чўкка тушиб ўтириди. Кекса Меъмор қалъа дарвозаси томон қараб, ўғлига дуо ўқиб, юзларига фотиха тортди. Қалъа дарвозаси ёнида хўмрайиб турган зинданбонларга бир сўз демай, орқаларига қайтиб кетиши.

Даҳшатли фожиадан кейин бегона товукдек четлаб, атрофда ўзини тортиб юрган учинчи шогирди Favvos Мухаммад ҳам бетоблигини баҳона килиб, Меъмор ҳовлисига келмай қўйди. Бунга Заврак таажжубланмади, чунки Favvos Меъморнинг Аҳмад Чалабий билан оралари бузилганидан кейин шундай бўлиб қолган эди.

Орадан бир ой ўтди.

Favvos Мухаммаднинг устодни ташлаб кетиб қолгани армон бўлиб турганида эшикдан учинчи шогирд Зулфиқор Шошний кириб келди. У ўтириб обдан йиғлади, Заврак билан ичкари ҳовлига — Низомиддиннинг хонасига кириб фотиха ўқиди. Заврак Нишопурийнинг номасини олиб, бундек оғир кунларда устод ёнида бўлишни лозим топиб, зудлик билан етиб келибди. Бу ҳолни кўрган Меъмор мени ташлаб кетадиганлар эмас, йўқлаб келадиганлар ҳам бор, деб бироз таскин топди. Худододбек ҳам бу томонларга қадам босмай қўйган эди.

Иккинчи ойнинг ўрталарида, иттифоқо, Меъмор ёшигига икки отлик келиб тўхтади. Булар ким бўлди экан, деб ташқарида кутиб олган Зулфиқор билан

Заврак ҳайрон бўлишиб турганида, иккинчи отлик — ўрта яшар, яроғ осган бир мансабдор отидан сакраб тушиб, ёнидаги шай кийинган, бошидаги ипак саллага жиға ўрнатилган йигитни эҳтиёткорлик билан отдан туширди. Иккала отни ҳам эшикда турган шогирдлар қўлига топшириб, сўради:

— Меъмор жаноблари уйдамилар?

— Ҳа, уйдалар, — деди Завракнинг хаёли ўзига келиб. Ахир бу йигит Бойсункур Мирзо-ку! У келгандарни одатдагидек Зулфиқорга топшириб, ўзи юргурганча ичкарига кирди, устодга амирзода Бойсункур келганини хабар қилди. Меъмор ўтирган еридан қимирламади. Келган бўлсалар кираверсинлар, дегандек ишора қилди. Заврак яна зинфиллаганча қайтиб чиқиб уларни ичкарига таклиф этди. — Марҳамат, кираверинглар!

Мирзо билан мансабдор ичкарига кириб, Меъмор билан кўл беришиб омонлашгач, одатдагидек Заврак улар олдига дастурхон ёзди, чой олиб кирди. Бир муддатдан сўнг, мансабдор Меъмор билан Мирзони хона ичидаги ёлғиз қолдириб, Зулфиқор билан Завракни атаяй бошлаб ташқари ҳовлига чиқиб кетди. У кетаётуб хона эшигини ҳам ёпиб кетди. Хона ичидаги дастурхон атрофида икки киши — Бойсункур билан Нажмиддин Бухорий қолди.

— Мухтарам Меъмор, — деди Мирзо, гарчи Меъмор салтанат томонидан отасининг қаттиқ сиёсатидан фоятда озор топиб, жабрланганлигидан унга рўйхуш бермаётганини сезиб турса ҳам, дардмандлик билан мурожаат этди. Унинг хатти-харакати ва илгаригидай ўйлаб пишитилган гапларидан мулојим ва зуқко Гавҳаршод бегимнинг овози эшитилгандай бўларди, — бошингизга оғир кун тушди. Ҳуруфийлар илгарилари ҳам салтанат душмани хисобланиб, подшо ҳазратлари томонидан қаттиқ жазоланган; Фазлуллоҳ Астрободий тақдирини ўзингиз яхши биласиз. Бундан ташқари «сарбадорлар» сардорлари Мавлонозода, Абубакир Қалавий, Хурдаки — Бухорийлар... қисмати не бўлган, уни ҳам яхши биласиз. Қалавийни Амир Ҳусайн қатл этди. Аммо сиз устоднинг салтанат учун қилғон хизматларингиз буюк ва бекиёс. Иншоолло, салтанат ҳам, фуқаро ҳам сизни унутмагай. Эндилик-

да шаҳарда ҳар турли миш-мишлар тарқалиб, сиз, ҳурматли зотнинг подшоҳга қарши гапларингизни айғоқчилар тинмай етказиб турибди. Фуқаро ичидан кўп кишилар сизнинг ёнингизда туриб, салтанатга кўз олайтиromoқдалар. Сиз устодга яна бирон шикаст ет-маслигини ўйлаб, Хурсондан чиқиб кетишингизни маслаҳат кўрамиз.

— Мен ўзим ҳам шу фикрга келган эдим, — деди Меъмор — мен энди «шубҳали» одамман.

— Ҳурматли Меъмор, иложсизликдан бу фикрга келдик.

Меъмор ўйланиб қолди, ҳа, демак... Хурсондан чиқиб кетмоқ лозим.

— Мен қаёққа кетай?

— Ҳажга, Маккаю Мадинаға. Мана ақча, — Мирзо чўнтағидан тилло тангалар тўлдирилган халтачани чиқариб дастурхон четига кўйди. У яна Меъморга қаради. — Гап-сўзлар бости-бости бўлиб, бу воеа фуқаро ёдидан кўтарилигач, яна қайтиб келасиз, ўзимиз сиз жанобни қучоқ очиб кутиб оламиз. Бу ҳам бир тадбир. Мен сиз жанобга яна бир гапни айтиб кўйишим керак. Қораилон изингизга тушган, корфармо Чалабий, оғамга кўп ёмон гапларни етказиб, бўхтон тошларини отмоқда. Бундай фитначилар учун қулай фурсат етиб келди. Иккиламчи, равоч сайли вактида қизингиз ўлдирган кимса тўғрисида ҳам Қораилон хабар топган. Бу маълумотлар бизга етиб келди. Эҳтиёт бўлинг, Меъмор. Қизингизни ўғирлаб кетиш билан сиз жанобга катта фусса солиш режалари барбод бўлганидан ўзлари пушаймон. Қораилон билан ўйнашиб бўлмайди! Амирзодалар орасига нифоқ солиб, фитна билан не-не кишиларни ёқалаштирадиган ҳам Қораилон! Бепарво бўлиш foятда зиён. Қораилоннинг майдаги илонлари ҳам ниҳоятда кўп эканини эшитгандирсиз.

— Низомиддин жангдан қайтиб келгандан сўнг, Фарғона ҳокими Аҳмад Мирзонинг икки вазири сотқинлик қилиб, баланд мартаба, мол-дунё ниятида Мирзони тутиб берганликларини айтган эди. Лекин Улугбек Мирзо Фарғонани олганларидан кейин Амирак Аҳмадни Ҳиротга жўнатиб, икки сотқин вазирнинг

бошини кесишига фармон берганлар — сен ўз ҳокимингга сотқинлик қилдингми, менга ҳам вафо қилмайсан, деганлар. Тўғри қилганлар. Чалабий сотқин шахс, у амирзода Иброҳим Султонга ҳам вафо қilmайди. Бу — аник!

— Бу жуда ибратли гап, ҳурматли Меъмор.

— Мен ўз она юртимга кетаман! Мовароуннахрга! Йигирма йилдан буён Бухорони кўрмадим. Мен ўз тупроғимни соғинганман, шаҳзода! Ақчаларни олмайман, уй-жойимни сотсам, йўлга етарли пул бўлади.

— Бу сизнинг ўз ихтиёргизда. Биз бир нима деёлмаймиз. Қайда бўлсангиз ҳам, омон бўлинг, Меъмор. Бу ақчани олинг, у сизнинг ҳаққингиз. Бу ақчани мен бераётиман... Хайр, Меъмор! — Бойсункур Мирзо ўрнидан турди.

Меъмор ҳам ўрнидан туриб, унинг узатган икки қўлини олди-ю, жойидан жилмади.

Мирзо ва мансабдор шахсни Зулфиқору Заврак кўчагача кузатиб, отга миндириб жўнатишиди.

Меъмор ҳамма амирзодалар ўғлимнинг қотили деб, қанчалик ёмон кўрмасин, лекин Бойсунқурнинг сўзлари хақиқат эканини пайқаб турарди.

У шогирдлари ва таниш-билишлари орқали ҳовли-жойларини сотмоқчи эканини маълум қилди. Харидорлар келиб туришиди. Устод Андугоний, йўл учун пул беражаги, уй-жойни сотмай, бирон йил Бухорога бориб туришини, қайтиб келганидан кейин яна бунда яшайверишини маслаҳат қилди. Меъмор унамади. Заврак билан Зулфиқор ҳамма вакт ёнида бўлишини айтиб, Бухорога жўнашини маъқул кўришиди. Шогирдларининг бу садоқати Меъморга қувват бағишлади: «сизлар Низомиддин ўрнига Низомиддинимсиз», деди.

У шошиб-пишиб арzon-гаровга ҳовли-жойини сотди, мол-мулкини ҳам... Ундан сўнг шогирдлари билан бирга карвонсаройга бориб, Бухорога жўнайдиган карвонин излаб уч кун муддат ичida ҳамма ишларини саранжом этиб, йўлга чиқишажагини айтишиди. Тез ва бехатар Бухорога етказиб қўйишлари учун сарбонга катта пул ваъда қилишиди. Амирзода хабар қилганидек Қораилон изига тушгани, у касофатлар

иккинчи фарзанди — Бадиага бирон шикаст етказ-
масликлари учун у тезроқ жўнаш пайига тушди.

Меъморнинг карvonсаройга қатнаб юрганини Аҳмад
Чалабий сезди. У, яқин келмай, наридан юзини тес-
кари килиб ўтиб кетарди. Уни карvonсаройда кўриб
Меъмор билан шогирдлари таажжубланиши. Зулфи-
корнинг ранги ўчиб айтишича, пешанасини танғиб
олган яна бир совуқ кимса ҳам улар атрофида айла-
нишаётган эмиш — бу кимса ўлган қароқчининг ош-
насига жуда ўхшаб кетар экан. Бадианинг масла-
хати билан Зулфиков билан Заврак бозордан ўзлари-
га ўткир пичоғу шоп сотиб олишди. Олис йўлга чик-
қанда ёнда яроқ бўлмоғи бало-қазони даф этармиш.
Бу Бадианинг ҳар эҳтимолга қарши тадбир-чораси
эди. Йигитларнинг яроғ сотиб олишаётганини ҳам
қандайдир нотаниш кимсалар кузатаётганини сезиши-
ди. Қораилон номини эшитган Меъмор ўғли ишида
унинг қонли панжаси борлигини билди. Бу даҳшатли
кўл кизи ва хотини баҳтини қаро қилмаслиги, ўзи-
нинг бўйнидан бўғиб ўлдирмаслиги учун у иккилан-
май тезда Хурсондан чиқиб кетишга қарор қилди.
Уки, кўз тиккан бўлса, Бадианинг яроғга куч бериши
ҳам бефойда, деди Меъмор ўзига ўзи.

Шу кунлари уста Ҳасанбек билан уста Ҳусайн-
беклар келиб, Меъморга ҳамдардлик изхор этишди.
У билан хайрлашиши, мадрасанинг битиши тўй эмас,
азага айлангани — Шодмонбек билан Низомиддин-
нинг ўлеми юрагимизни узди, дейиши. Кундан-кунга
замон оғирлашиб, Меъмору банно¹, нажжору мухан-
дис, кулолу, наққошу сангтарошлар аҳволи ёмон
бўлиб, мансабдорлар иши йирик бўлаётганини ай-
тишди. Кебакхон, Қозонхонлар даврида ҳам бунчалик
ахли ҳунар завод кўрмаган эди, дейиши. Ўз отала-
рининг «Дил ба ёру даст ба кор» деганларига ҳам
амал қилмаётирлар, деди усталар. Меъморнинг «кўчиб
кетаётганини» эшитган кулоллар: Абутолиб ўғли Абу-
али билан келиб, жуда ачинишди — ўзлари томони-
дан бирон ёрдам керак бўлса жони диллари билан
беришга тайёр эканликларини айтишди. Меъмор ак-

¹ Банно — устод.

синча ҳеч кимдан ҳеч нима сўрамади, ғаридан кулолларга ўзининг баъзи ўлчов асбоблари, уй жиҳозларидан берди. Амирзода инъом этган заррин түнни ҳам кулол устига ёпди. Унинг, олмайман, деганига ҳам унамади. «Ҳар замон-ҳар замонда Ихтиёриддин қалъасига бориб ўғлимга дуо ўқиб қўйинг, — деб илтимос қилди. — Уни қалъа ичидаги ўлдирдилар, шу атрофга кўмгандарини ҳам билдим. Демак, унинг қабри шу атрофда», — деди кўзига ёш олиб Меъмор.

— Кулол, сиздан бир нарса сўрайман, — деди Меъмор енги билан кўз ёшини артиб.

— Сўранг, устод!

— Иккита хумча. Йўл узок, қумлик қўп, сув олиб кажавага ташлаб қўямиз.

— Яхши хумчаларим бор, сирлангани ҳам, сирланмагани ҳам, устод, ҳозир олиб келамиз.

Кечга яқин Меъмор ҳовлисига устод Қавом, Мутриб¹ Ҳожа Юсуф Андугоний, Табризий, мавлоно ҳофизи Абрў, мавлоно Лутфулло Шоший, Қутбиддин Самарқандий, уста Ҳожи Мухаммад, Асадулло Машҳадий ва яна бир неча тарроҳу, меъмору хаттотлар кириб келишди.

Улар олдида Меъмор кўзига ёш олмади, факат фалакнинг гардиши — ўз қисматининг аччик эканини айтди, холос. Қора кийиниб олган Бадиа меҳмонларга чой-нон қўйиб, сиполик билан хизмат қиласарди. Отаси билан бирга келган Худододбек ҳам тез-тез Бадиага кўз ташлар, буни Бадиа сезиб турарди. У, ҳовлида турган Зулфиқор билан Завракка бек ўзидан кўз узмаётганини, бир гапи борга ўхшашётганини билдириди. Орадан қўп ўтмай, гўё бу хайрлашувдан ташвишлангандай, Худододбек катталар ёнида ўтиришдан зерикиб, ҳовлига чиқди. У Бадиа билан қамти келиб, гўё яқин қариндошлардек бошга тушган ғуссага ачиниб, қизга мурувват қилмоқчи бўлди.

— Бизнинг ҳовлимиизда, синглим ёнида қолинг. Отангиз бир муддатта Бухорога бориб турадилар. Яна бунда қайтиб келадилар...

¹ Мутриб — созанда.

— Нега яна қайтиб келишлари керак?

— Бу бир сиёsat. Жанжаллар тинчигандан кейин пойтахтга қайтиб келмай, унда нима қиладилар. Меъморлар бунда бўлмоғи керак.

— Менимча, олиму фозиллар Самарқанду Бухорода бўлишлари керак. Албатта, у чинакам олиму эркпарвар инсон бўлса. Хуросон олимлар учун зиндан!

— Сиз, жаҳл устида гапирмоқдасиз, мен буни тушунаман.

— Бу гапни бутун Ҳирот аҳлидан эшитасиз, унда ҳаммани тушунишингиз керак. Сиз мени ўз синглингиз ёнида олиб қолмоқчисиз? Шу гап чинданми?

— Ҳа, бекам, чиндан. Онам ҳам шу фикрдалар.

— Мен қолсам, подшони ўлдираман. Бу аниқ! Аҳмад Лур пичоқни яхши уролмаган... хомлик қилган. Мен билиб ураман. Бу гапга онангиз нима деркинлар?

Худододбек миқ этмади.

— Иш шунаقا бек! — деди Бадиа «бўлғуси куёв»-нинг кўзларига тик караб. — Сиз бунаقا ёмон қизни нима қиласиз! Сизнинг мулоийим, одоблик синглингизни ҳам йўлдан оздиришим мумкин. Сиз ўзингиз ҳам нотинч бўласиз. Рози-ризолик сўраладиган бир пайтда, хурматли бек, сиз мени синглингиз ёнида олиб қолиб, кўнглингиз борлигини айтмоқчисиз. Кечиқдингиз, бек! Ота-оналаримизнинг «аҳду паймонлари» бир рўёдек ўтиб кетди. Гап бошқа, иш бошқа. Оғамнинг ўлими юрагимни парчалаяпти. Лекин Ҳиротдан чиқиб кетаётганимизга жуда хурсандман.

— Тақдирнинг бундай бўлишини ким билиди. Хайр, бекам!

— Хайр! — Бадиа онасини ёнига кириб кетди. Мана шу бир лаҳзалик сухбатда неча йиллик борди-келдилар тугади. Бадиа жўрттага бор гапларни унга маълум қилди, бу хунгазор, чапани йигит Бухорога ҳам келиб юрмасин, деб ипни узди.

Эртасига ҳамма нарса тайёр бўлиб, юклар, бўхчалар туғилиб, йўлга ҳозирлик кўрилаётган бир пайтда яна Favvos Мұхамад ҳовлида пайдо бўлди. У эсанкираган, талвасада. Устоддан ажралиб, бу ерда қолмаслигини, устод қаёққа борса шу ёққа кетажагини бил-

дирди. Бу гап Зулфиқор билан Завракка ёқмай, энсаси котди. Бадиага ҳам... Лекин Маъсума бека ўртага тушиб, «уришманглар, бир-бирларингизга қаттиқ гапирманглар, ўзимизники ўзимизга етади. Фаввос Мұхаммад устоднинг ёмон шогирди эмас, майли, биз билан кетса кетаверсин. Шундоқ ёмон кунда биз билан бирга бўлган ҳар қандай одамни қадрлаш керак, кўкрагидан итармоқ яхши эмас», деди.

Эртасига эрта билан Меъморнинг Хуросондан чиқиб кетаётганини эшитган Жўржий ўғли билан устод ҳовлисига келиб қуруту пишлок тўлдирилган чарм қопчани беришиди.

— Мухтарам зот, сизга ҳамдардлигимни изҳор киламан, — деди Жўржий йўғон овозда, — шаҳардан чиқиб кетаётганингизни эшитиб, яна ҳам қайғурдим. Сиз билан бизнинг қисматимиз жуда ўхшаш... Сиз — меъморсиз, мадрасаю минора курдингиз, мен — тошқалъалар қурганман. Касбим мени бу ерларга етаклади. Маккага жўнаётган эмишсиз?

— Йўқ, азизим, ҳажга эмас, ўз она шахрим — Бухоройи шарифга!

— Унда аламингиз анча енгил тортиби. Фарзандингизни йўқотсангиз ҳам, юрtingизни топяпсиз. Сиз ҳали ҳам менчалик бебаҳт эмассиз, Меъмор, — деди уста Жўржий — мана шу нарса ичидаги пишлогу қурут йўлда керак бўлади. Аммо мана шу чарм қопчада хислат кўп. Мени Казбек тоги этакларида, Терек ва Кура дарёлари соҳиллари, ундан сўнг Хазар денгизидан ўтиб, кумликлардан пиёда ҳайдаб келишибди. Шу узок йўлда мана шу чарм қопча бирга бўлган — хўрак тоза туради, сув ҳам солсангиз оқмайди, шуни олинг. Бу диёrlарга келиб топган яккаю ягона қадрдан дўстим сиз эдингиз, — у кўзига ёш олди.

— Ташаккур, уста Жўржий!

— Сиз кетганингиздан кейин менинг ҳолим нима бўлади! Ҳам ватандан, ҳам дўстдан жудо...

— Азизим, сизга ҳам нажот тегиб, ўз туғилган юрtingизга боринг, қариндош-уруғлар жамолини кўринг, илоҳо омин!

— Айтганингиз келсин! — Жўржий унча қовушмаса ҳам ўз дини таомилини қилди.

Улар алламаҳалгача гаплашиб ўтиришди. Бунчалик содиқ дўстлар камдан-кам бўларди.

Меъмор хотини ва қизининг бир неча бор такрорий уқтиришлари натижасида пулни аччик чайнаб, уч соябон арава, олти отни кирага олиб, катта карвон кетидан юришни ва йўлда сарбондан ташқари бир қадар мустақилроқ бўлишни гаплашишди. Кирақашларга икки баробар ортиқ ҳақ тўланиб, йўлни яхши биладиган одам танланди. Тўғрироғи, забардаст бир аравакаш келиб, ўзи олиб боражагини билдириди. Бу тадбир, Меъморнинг йўлга чиқишидан икки кун аввал Бойсунқур Мирзо ўзининг ишончли кишиси орқали «Меъмор Хуросондан чиқиб кетишда катта йўл — Қалъай Нав, Боло Мурғоб, Шибирғон, Балх... орқали эмас, бошқа йўлдан юрсинлар», деган гапи туфайли бўлди. «Бошқа йўл»ни ўзлари биладилар, дебди. Бойсунқур Мирзонинг маҳрами эшикка «тиланчи» қиёфасида келиб, бу гапни фақат Меъморнинг қулогига айтиб, фойиб бўлди. Гапнинг исботи тариқасида амирзода ўзининг тилло нигинини бериб юборибди. Бу узукни Меъмор яхши танирди...

Меъморнинг ғоятда боши қотди: ўғлини ўлдирсалар ва яна бунинг устига ўзини ҳам. Бу қандай таъқиб! Гуноҳи нима?! Кўз олдида ҳамма номдор шахслар қўрқадиган даҳшатли Қораилон пайдо бўлди. Бу Қораилоннинг кўли етмаган жой йўқ экан-да! Ундан кўра подшонинг ўрнига подшо бўла қолса бўлмайдими! Амирзодаларгача ундан кўрқса! Илгари Муҳаммад Арғун дейиларди, у ўзининг ойболтаси билан Қораилон олдида ҳеч гап бўлмай қолди! Қораилон мўгуллардан кўра ҳам кўп хунрезлик қилмоқда; ҳатто Мункахон Угэдэй бошини кесганда ҳам очик кесган. Наҳотки, Шоҳруҳ Мирзо сиёsatни шунчалик қаттиқ килиб қўйди экан! Ҳар бир одамнинг орқасида ханжар ушлаган бир кўл турганга ўхшайди. Амир Темур кўп вақт жангу жадал, юришларда бўларди. У замонида ўлганлар жангда ўларди. Аммо Шоҳруҳ замонида юриш йўғу фуқаро орасида ўлим ғоятда кўп. Қандай оғир кунлар келди! Эртага у диққинафас, рутубатли Ҳиротдан чиқиб кетади, шу йўсин билан бир йўла у беадад ғаму фуссадан ҳам кутулади!

Кутулади?

Йўқ! Бунда унинг кўз корачиғи — фарзанди ер тишлаб ётибди, не-не умиду орзуларга юраги тўла, қувноқ ва баходир Низомиддини етдим деганда йиқилиб, унинг бўйнига сиртлонлар арғамчи солиб бўғиб ўлдиришди. Уни «бухоролик» деб камситиши, шубҳаланиши, шунча садоқатию жонини тикиб жанг қилганига ҳам қарамай, ўлдиришди. У наҳотки тожу тахт душмани бўлса!

Хувиллаган, бўм-бўш ҳовли...

Бундаги ҳар бир устун, ҳар бир гишт энди бегона, бировники.

Ҳовлига шоми ғарибон чўқди... уч шогирд ташқарида қуруқ бўш хонада шумшайиб ўтиришарди — бу хонаю ҳовлилар энди улар учун ёт. Ичкари ҳовлида кекса Меъмор атрофида қизи ва хотини шумшайиб ўтиришарди; ўртада устига эскигина дастурхон ёпилган курси, курси устида нон, қанд-курс, чой...

Меъмор кўзлари бир нуқтага қадалган, хақоратланиб, «жамият дарёсининг тўлқинлари уни бир ҳасдек итқитиб қирғокқа чиқарди, энди у тўлқинларда сузолмайди, у ҳеч кимсага керак эмас». Фусса чекаётган устод хаёлан ўтмиш кўчаларида саргардон кезарди; қани энди, у ҳам Моний, Зардушти, Маздак, Муқанна каби истибоддога қарши борсаю тожу тахтни кунпаякун қилиб ташласа! Баъзи ҳукмдорлар Мусайлима¹ қабиласига ўхшайди. Улар хурмо данагидан санам ясадилар, оч қолгач, ўз худоларини чақиб едилар... Мен ҳам, Табризий ҳам, Қавом ҳам хурмо данаги эдик, аввал бизга сифиндилар, қалъалар қуриб бердик. Энди улар оч қолган эдиларки, бизни биттабитта чақиб емоқдалар. Кутайба ибн Муслим ал Боҳилий ўн икки минг қорамол терисига олтин билан ёзилган «Авесто»ни мажусийлар китоби, деб ёқиб юборди. Бундан ортиқ ваҳшийлик борми! Ҳали бу Иброҳим Султон мингларча бухорийларни ёқади. Абу Райҳон Беруний айтганларидек, меҳнатсиз шуҳрат қозонган одам улуғлик кийимида ҳам яланғочдир. Мен кекса дарахт, эгилиш, юмшоқлик даврларим ўтиб кет-

¹ Берунийнинг «Осор-ул бокия» асаридан Мусайлима хикояси.

ди, қаттиқ ва мўрт бўлиб қолдим. Энди куришим заруратdir.

Яrim кечада Меъмор кўчага чиқиб кетди. Бу пайт Маъсума бека билан Бадиа қаттиқ ухлаб ётишган эди. Меъмор сарпойчан аввал тўппа-тўғри Пули Молонга бориб, баландликдан шаҳарга қаради; тун, фақат юлдуз тўла осмоннинг ғарби-жануб томонида тўлин ой ярқираб турарди. У шунча нур соггани билан ҳам шаҳарни мунаvvар қилолмасди — офтоб бўлолмасди. Унинг назарида бутун Ҳирот қора ридога ўралиб, мотам тутаётгандай. Аммо ҳув ана, баландликда — сарой ичидаги қасрларда ҳокимлар базм қуриб, ҳозир сархуш, ухлаб ётибди. Улар юмшоқ шоҳи кўрпаларда ағанаб, пишиллаб, бамайли хотир ухлашмоқда. Ташқарида, деворлар остида, дарвозаларда яроғ ушлаб посбонлар мижжа қоқмай уларни қўриқламоқда.

Меъмор кўзларини уқалаб, шаҳарга яхшироқ, жонжаки билан тикилди. Кўчаларни, томларни, расталарни, каппон, карвонсарайларни кўрмокчи бўлар, ҳаммаси тун қучоғида. Фақат унда-бунда чироқ милтилларди. Лекин мис баркашдек бўлиб, атрофида улкан нурли доира ясад турган ой нурларида гала миноралар, Мусалло, Гавҳаршод бегим, Мирзо мадрасаларининг кошинлари ярқираб кўриниб турарди. Меъмор кўприк устидан тушиб, ўша томонга юрди. Унинг кўлида ҳасса, яланғоч оёғида кавуш, ёқалари очик, тунги шамол чанг кўтариб, унинг юзига урап, у ҳеч нарсага эътибор бермай минораю мадрасалар томон юрарди. Мири шаҳид мақбарасидан ўтиб, қалъага яқинлашишда бир йўловчи қамти келиб, жадал келаетган чолга шубҳаланиб тикилди. Кейин ўз йўлида давом этди. Нарироқда қувлашиб юрган итлар ҳам бир лаҳза унга тикилиб, вовиллашишди-да, яна жим бўлишди. Қалъа девори тепасида юрган навкар ҳам яrim тунда сарпойчан, бош яланг кетаётган кекса одамга қараб таажжубланди: у девона ёки тельватезак касалига мубтало одам бўлса керак, деди ўзига ўзи. Меъмор ҳеч нарсага эътибор бермас, у шу юрганича тўппа-тўғри осмонўпар гала миноралар тагига бориб, аллақандай бир минора пойdevorини қучоқлади: хози-

рок уни ердан суғуриб олиб, отиб юбормоқчидек бўларди. Унинг кулочи хеч қаёққа етмас; у қоматини ёзиб деворга ёпишиб ётган кўршапалакка ўхшарди. Шу атрофда юрган кишилар кун бўйи Бозори Қандахорда юрадиган Мажнун-девона бу ерга келиб қолибди хаёл қилишди. Аммо ўша Мажнун-девона шу ерда, мусалло ёнидаги эски мадраса жиловхонасида ухламай ётарди. Ойдинда минорага ёпишаётган одамга узокдан бошини кўтариб қараб, бу ғайри табиий ҳолга тушунолмай у ўрнидан турди. Бир «девона» бу томонга келиб қолибди деб, иштончан ҳингиллаб кулиб Меъмор ёнига келди-да, уни масхара қила бошлади. Меъмор унга ялт этиб қараб Мажнун-девона эканини билди. Минорадан кулочини олиб, Мусалло томон юрди. Гавхаршод бегим мадрасаси ёнига келиб, «гулдаста»га қаради; зангори кошинлар ой нурида ярқираб туарарди. Ундан сўнг яна жадал юриб, ўзи қураётган мадрасага келди. Кирк қадамча наридан туриб, мадраса дарвазаси, пештоқи, равоқига тикилди; яшил ва ложувард кошинлар; қанос, помоялар ярқираб туарарди. У мадрасага яқин бориб, дарвоза ёнидаги помоя кошинларини пешмати этаклари билан артди. Унинг назарида девордаги чанг босган кошинлар яна ҳам ялтираб, жилва соча бошлади. У мадрасага бошдан-оёқ тикилди; бориб деворга пешонасини суртди, кучоклади. Меъморнинг орқасидан кузатиб, таъкиб этиб юрган Мажнун-девона хайрон бўлиб куларди. Шу атрофдан ўтиб кетаётган тунги йўловчилар ҳам янги солинаётган мадраса деворини кучоқлаб, ёпишиб ётган одамга хайрон бўлишарди. Эллик қадамча нарида чўққайиб ўтирган Мажнун-девона йўловчиларга уни кўрсатиб, масхара қилиб куларди. Меъмор тамоман бепарво, хеч ким билан иши йўқ эди. Ухлаб колган миршаб ҳам негадир уйғониб кетиб, яна шақилдоғини шақиллата бошлади. Асли навкар бўлган бу сарбаст, новча одам ўзига жуда таниш Мажнун-девона-нинг хиринглашини эшитиб, унга яқин келди-да, мадраса деворини ўпиди, бошини суркаб, кулоч ёзиб кучоқлаб турган кекса одамни кўрди. У яқинроқ келиб, бу — меъмор Нажмиддин Бухорий ҳазратлари эканини кўриб ҳайратга тушди. «Бечора ўғлиниг қатли-

дан кейин девона бўлиб қолибди», хаёл қилди. У жуда ачиниб, унга яқин бориб, аста гапирди:

— Ассалому алайкум! Мухтарам зот, шамоллаб қолмайсизми?

Меъмор ялт этиб қоровулга қаради. Лекин деворга ёпишган қулочини олмади:

— Ваалайкум ассалом!

— Хурматли Меъмор ҳазратлари, бу ерда шамоллаб қолмайсизми, деяпман.

— Йўқ, шамоллаб қолмайман.

— Мана бу ерда менинг кулбам, қумғонда чой қайнаб турибди, марҳамат қилинг.

— Йўқ, азизим. Мен чой ичганман. Ташаккур!

«Ана айтмадимми, у бормайди. У — жинни!» деди тizzасига уриб хингиллаб Мажнун-девона. Коровул Меъмордан узоқлашиб, индамай четда турди. Негадир, «Меъмор жинни бўлиб қолибди», деган фикрни тасдиқлагандай, бунга у ишонди. Дархол унинг ёнига Мажнун-девона хам келиб, улар иккovi нарироқдан туриб «жинни меъмор»ни кузатишарди. Меъмор бўлса мадрасанинг гоҳ у ёғига, гоҳ бу ёғига ўтиб, пештоқу гулчамбарларга, равоқу кунгуруларга тикиларди. Яна қайтиб келиб, кошин ёпиширилган деворни қучоқларди.

Бир муддатдан сўнг у бояги коровул турибди, хаёл килиб яна ёнига қаради.

— Коровул! Азизим!

— Мен бу ёқдаман, Меъмор ҳазратлари, — деди югуриб келиб коровул.

— Бу мадрасага ўзингиз караб турасиз-а?

— Албатта!

— Кошинларни чанг босмасин. Талабалар атрофи ни озода сақласинлар.

— Хўп бўлади.

— Яхши қараб тураман, деб айтинг, азизим! Мен кетмоқдаман.

— Яхши қараб тураман...

— Мадрасани сизга топширдим, сизни худога...

Хайр, иним.

— Хайр, саломат бўлинг, Меъмор ҳазратлари!

Меъмор мадраса ёнидан узоқлашиб, ўз ҳовлиси

томон кетди. Мажнун-девона бўлса қорама-қора уни таъкиб этиб, эшигигача келди-да, Меъмор ичкарига кириб кетгач, яна орқасига — Мусаллою гала мино-ралар томон жўнади. У ҳайрон, хеч нарсага тушун-масди, ўзини бу дунёда яккаю ягона девона деб ўйларди. Наҳотки, яна битта девона пайдо бўлган бўлса?! Искандар ҳам битта, Темур ҳам битта, Доро ҳам битта, худо ҳам битта, Мажнун-девона ҳам битта! Наҳотки, бу дунёда яна бир девона пайдо бўлган бўлса?!

У ҳайрон эди.

Эртасига у Бозори Қандаҳорга тушиб, расталарни айланди, аммо кечаги девонани учратмади...

XXIII б о б

ҲАЙДАЛИШ

Шу ғуссали кунларнинг бирида, эрта тонг корон-фисида меъмор Нажмиддин Бухорий эшиги олдига уч арава келиб тўхтади. Аравалар янги, гупчак ўқла-ри обдан яхшилаб мойланган, харсанг ётқизилган кўчада гумбурлаб юришидан узок сафарга тайёрлан-ганлиги сезилиб турарди. Уларнинг бири очик, юкка мўлжалланиб, иккинчиси соябонли. Аравакаш — кифтлари кенг, ўрта яшар, забардаст бир одам эди. Унга шу даражада пул ваъда этилган эдики, бу пулга яна уч арава сотиб олиши мумкин эди. Аравакаш бу гапни эшитиб негадир кулиб қўйган эди. У катта карвонга уланиб йўлга чиқса ҳам, кира қилганларнинг хоҳишлари билан карвондан ажрали-ши ва хоҳлаган жойда тўхтаб дам олишлари, ҳатто қолиб кетишлари ҳам мумкин эди. Учинчи, усти очик аравага юклар ортилди. Бу юк кийим-кечак-лар... унинг, ҳам учдан икки кисми меъморлик ан-жомлари, китоблар, курилиш-ўлчов асблори, тешаю курак ва кетмонлар билан тўлган эди. Биринчи аравага Меъмор оила аъзолари билан чиқиб, иккинчи ва учинчи араваларда Зулфиқор, Заврак, Фаввослар ўтириши керак эди.

Бадиа яна эркакча кийинди: оёғида акасининг этиги, қўнжида икки ханжар, бошида тоқия устидан чиройли қилиб салла ўраб олган. У ўзини, ота-онасини, шогирд оғаларини «ногихоний бало-қазодан» саклаб қоладиган ҳамма чораларни аввалдан ўйлаб олган; дори-дармонлардан тортиб, то заҳаргача, бодом ёғи, жавза қай, илон чаққанда суркайдиган малҳамларга-ча тахт қилиб қўйган эди... Бадианинг яна «баҳодир» бўлиб юриши Зулфикор билан Завракнинг юрагига тулғула солди. Равоч сайлида бўлган воқеа яна такрорланадигандек. Ишқилиб, «бека қиз овга чиқар, кетидан ғовға чиқар...» бўлмасин-да! Ўзининг айтишича, боло мурғоблик аравакаш юқ олиб чиқиш учун ховлига кириб кетганида дастурхонга ўроғлиқ икки қилични Бадиа Зулфикорнинг қўлига берди. «Бири — сизники, иккинчиси — Заврак оғамга. Аравага беркитиб қўйинглар. Фаввос оғага ойболта билан пичок бердим...» Саркарданинг гапини икки қилиб бўлмагандай, Зулфикор билан Заврак Бадиага итоат этишиб, буйруғини бажаришди. Бадианинг йигитона кийиниб юрганини қўшнилар ҳам кўриб таажжубланишгани йўқ, чунки бу шаддод қиздан ҳайиқишар ва бу ўрганиш бўлиб қолган эди. Уни гап билан енгиди бўлмаганидан ташқари, у қилиб юрган ишидан кулиб, масҳаралашга ҳеч кимнинг ҳадди сифмасди. Чунки Бадианинг баъзан серзарда, баъзан қўнгилчалиги, қўлидан келган ҳамма яхшиликни, нимаики ишқилса одамлар хурсанд бўлишини ўйлаши, сахийлиги биронта кишини бу қизга ўқрайиб қарашга йўл қўймасди. Унинг қилиқлари ўзига ярашар ва ҳатто дугоналари ҳам ҳасадини мутлақо яширишарди. Бу бўйсунмас, ёввойи күшни кўлга ўргатиш ҳамма йигитларнинг ҳам қўлидан келавермаслигини билишарди. Бадиа акаси Низомиддиннинг Фарғона жангига осиб борган қизил филофлик қиличини биринчи аравага олиб чиқиб, соябон михига ошкора илиб қўйди. «Тиштирноғигача қуролланган» Бадиа билан ҳозир ҳазиллашиш асло мумкин эмас, у ҳозир ўзида йўқ, қандайдир қонли тўқнашувлар муқаррарлигига ишониб, ўзини тайёрлаётганини сезиб туришарди. Бу файри табиийликни Зулфикор билан Заврак қиз феълидаги ўзига

хослик деб тушунишарди. Лекин аслида у «тиланчи» қиёфасида келиб, отасининг қулогига шивирлаб кетган Бойсунқур Мирзо кишисидан хабардор эди. У кимса Меъморга яна: «Сизларнинг араваларингиздан унча узоқ бўлмаган масофада ўн чоғлиқ отлиқ «жайрон ови» баҳонаси билан юради, уларнинг қўлларида камон бўлиб, бошларига салла тангиган. Бу навкарлар Мирзонинг одамлари, сизлар то Майманадан ўтиб, Шибирғонга етгунча кузатиб, ихота қилиб боради. Улардан чўчиманглар, улар билан асло гаплашиб мулоқотда ҳам бўлманглар», дебди. Бу гап ҳам Бадиага маълум бўлиб, Мирзо Мурғоб, Пули Сангин, Чоржӯ Фороб йўлини тавсия этмаяпти. Бухорога энг яқин йўл шу бўлгани билан у ғоятда хавфли эди. Маймана, Андхуд, Қизқудук йўли бир ҳафта узоқлиги бўлгани билан бир қадар хавфсиз эди.

Мирzonинг бу тадбирига Бадиа ишонмади; ҳам қотиллик, ҳам шафқат... Захар билан асал ёнма-ён! Наҳотки «асал» ейишаётган бўлса? Захар ва асал бир-бирига қўшила олмайди. Бу гап саройнинг одатдаги оддий макри, биз, фуқаро тушунмаймиз, соддиллик қилиб, нобуд бўламиз. Бу макру хийлалар амирзодалар ўртасидаги оддий бир ўйин...

Чарчаган, қовоқлари салқиб, мудраб ўрнидан турган Меъмор қизининг гапларини тасдиқлади.

— Дарҳақиқат, саройдаги икки амирзоданинг бирбири билан олишуви — фуқаронинг шўри! Бу олишув, тахту тож талашувларидан факат фуқаро азоб чекади. Лекин мен Мирзо сўзига амал қиласман, унинг гапида ҳақиқат борлигига дилим ишониб турибди, — деди Меъмор.

Дарҳақиқат, Қораилон томонидан Иброҳим Султонга етган маълумотга қараганда, Бухорога чоршанба куни олдинма-кейин икки катта карвон жўнаши, биринчи карвон охирига Ҳиротдан кўчид кетаётган Меъморнинг уч араваси ҳам қўшилажагини, бу карвонлар қисқа қум йўли — Мурғоб, Пули Сангин ва Фороб орқали Бухорога кириши маълум бўлганини хабар қилган эди. Иброҳим Султон Қораилон қулогига шивирлаб, хуфия топшириқни маълум қилди. Қораилон ўн чоғлиқ каллакесар сарбози билан бир кун

ўтгач карвонлар ортидан бориб, Мурғоб дарёси бўйида: «қароқчилар молини талаб, бошини чопиб кетибди...» деган хабар Иброҳим Султон қулогига етиши кераклигини тайинлаб, тахт қилиб қўйган эди. Бу каллакесарлар орасида Бадианинг кушандаси, қизил чопонлик галварс ҳам қасос оламан, деб пайт пойлаб юрарди...

Ҳамма нарсаларни ташиб олиб чиқилгач, дарвоза ёнида қўни-қўшнилари, ҳовлисини сотиб олган одам билан хайрлашаётган Меъмор бир муддатдан сўнг улар орасидан ажралиб чиқди. Аравакашни бир чеккага олиб бориб, паст овозда унга мурожаат этди:

— Бояги мен айтган гапларга қандай қарайсиз?

— Маъкул, — деди аравакаш ҳамма гапга тушунгандай, — ҳамонки, шундай шубҳа бор экан, мен сарбонга озгина акча бериб, сизлардан беш ёки олти фарсанг олдин юраман, аравам нобоп, дейман. Сарбонга тилло танга бўлса бас. Сизлар карвонсаройдан чиқаётганларингизда биз Қалъайи Мордан ўтиб, Пули Сангин томонга кетаётган бўламиз. Мабодо арава ишдан чиқса, сизлар етиб оласиз дейман...

— Балли!

— Аммо биз Боло Мурғоб — Маймана йўлида кетаётган бўламиз.

— Балли!

— Оби Қайсар, Андхудга етиб олсак, у томони бехавф. Устод, уч кечаю уч кундуз қийналамиз. Хурросондан чиқиб, Жайхунга яқинлашдик, демак, хавф йўқолади. Сиз, жаноб айтганингиздек, биз ҳозироқ карвонсаройга киришимиз билан мен сарбонга йўлиқаман. Иншоолло, ёмон кўзларга панд бериб, омон-эсон Бухорои шарифга кириб борамиз.

— О-омин! — Меъмор билан аравакаш юзларига фотиха тортдилар.

Шундан кейин ҳаммалари араваларга чиқишли. Ҳиротнинг харсангтош ётқизилган, айланма кўчасида уч арава гумбурлаб юриб кетди. Дарҳақиқат, карвонсаройга етишгач, аравакаш сакраб отдан тушди-да, кенг ҳовлидаги хужралардан бирига кирди. Эндинга ўрнидан турган қотма, баланд бўйли сарбонга йўлиқиб, саломдан сўнг ҳозироқ йўлга чиқишини, аравада

аёллар борлиги сабабли олдинда юришини, бир корхол бўлса орқада катта карвон борлиги ва унинг мадади билан шитоб қилиб юрмогини айтди. Сарбон тилло тангаларга кўзи тушиши биланоқ, йўлга кўпроқ сув олиб: «ҳайдайвер, Боло Мурғобда учрашиб, қолган гапларни ўша ерда гаплашамиз», — деди. Аравакаш сарбонга ташаккур айтиб ташқарига чиқди.

Фурсатни кўлдан бермай уч аравани катта йўлга солиб, Боло Мурғоб томон шитоб билан жўнади. Улар Пули Молондан ўтишганида, эндигина шарқ осмони ёришаётган эди. Шаҳарнинг ғарби-жануб осмонида тўлин ой ярқираб турарди. Олдинги арава харсанг ётқизилган йўлдан тупроқ йўлга ўтиб, қалдираши туғагач, аравакаш орқасига — Меъморга қараб кўйди.

— Иш ўйлаганимиздек бўлди, устод. Сарбон илтимосимизга унаб, дадил, қўркмай бораверинглар, Боло Мурғобда тунаб, дам оламиз, деди. Агар сиз рози бўлсангиз, Боло Мурғобга етмай, йўлда дам олиб, ҳордик чиқарамизда, ундан сўнг Боло Мурғобдан ўтиб, Маймана сари жўнайверамиз. Катта карвон бу ерда тунаб, эртасига Пули Сангин томон юриб, биздан ажралиб кетади. Улар бизни кум ичиди, анча олдинда боряпти, хаёл қиласди. Майманаю Андхудгача йўллар жуда яхши, Оби Қайсарни ёқалаб бориш ва бунинг устига Давлатобод, Чуқургузарларда дам олиб, керакли нимарсалар сотиб олмок ҳам мумкин.

— Балли! — деди Меъмор хушфеъл аравакашга.

Аравакаш сергапроқ экан, бир муддатдан сўнг Меъморга гап котди:

— Мен чарчасам, отга жияним минадилар, — деди у отаси орқасида ўтирган «йигитча» Бадиага қайрилиб қараб, — шундоқми, жиян? Исмингиз нима?

— Бадиuzzамон, — деди Бадиа дархол ё онаси, ё отаси гапириб қўймасин учун олдини олиб. У овозини бошқачароқ қилиб чиқарди. Қизнинг шумлик қилаётганини билиб турган она ҳам, ота ҳам миқ этмади. Эҳтимол, Бухорога етиб олгунча шундай «тадбир» керакдир. Бадиа бундан бўлак бошқа сўз айтмади. Аравакаш Меъмор «ўғли»ни камгап, димоғдор фахмлаб орқасига қайрилиб яна бир қараб қўйгандек бўлди-ю, аслида кўп нарсадан хабардор эди.

Салтанат таъқиби... ҳақида ўйлаб келаётган Меъмор ҳозирги ёшларнинг эҳтиёткор ва пухталигини кўриб таажжубланар, замон шуни тақозо қилаётир, деб ўйларди. Гап биргина унинг қизида эмас, одамлар шундок бўлиб кетганини, ўз манфаати йўлида ҳеч қандай ишдан ҳазар қилмайдиганлар кўпайиб кетаётгани, бунга мансабдорларнинг ўзлари сабабчи эканликларини хаёлидан ўтказарди. Илгариги одамлар анча содда, раҳмдил, мўмин эканини, айниқса, ўзининг тенгдошлари қувлик-шумликлардан узок, инсофлик, фариштаси бор одамлар эканини дилидан ўтказди. Ҳозирги ёшлар ичидаги қиморбозлар, майхўрлар кўпайиб кетаётгани жангу жадалларнинг бир қадар тўхтаб, подшо одамларининг майшату шуҳратга юзтубан кетганликларига сабаб эканини фахмлади. Шу боисдан ёлғиз қизию шогирдларини сертантана, сербазм ва фирибгарликлар макони Хуросондан тезрок олиб чиқиб кетаётганидан бир қадар мамнун эди. Ёш қизининг баъзи «қилиқ»ларидан хафа ҳам бўлмасди. Дунёда яшириниб қоладиган ҳеч сир йўқ, у вақти келиб качонлардир очилади. Низомиддиннинг Иброним Султон томонидан қатл этилиши — бу жиноят бир куни одил бир амирзода Хуросон тахтига ўтиргач, золимни жазолайди, деб ўйларди. Улуғбек Мирзонинг Меъмор хатига жавоб қилмагани, бу «маърифат ҳомийси, илмпарвар» амирзодадан ҳам ихлосини қайтарди. У болалигига Самарқандда вабо тарқалиб, фуқаро қирилиб кетгани, шаҳарда жуда оз туркӣ үруғлар қолганини, тоғлардаги зироат билан машғул бўлувчи уруғлар шаҳарга мажбуран мўнишириб олиб кетингани, ўтроқлаштирилганини эшитган эди. Бу йиллари Меъмор Намозгоҳ маҳалласида истиқомат қиласи.

Икки томон кенг, ясси қирлар. Жимжит дала ўртасидаги илон изи йўлда уч арава шитоб билан борардии: тонг ёришгунча улар анча йўл юриб кўйишди. Шу орада ўн чоғлиқ ёш навкарлар белларида шаммир, кўлларида камон, от чоптириб ўтиб кетишди. Орқа аравада келаётган Зулфиқор дарҳол арава четига, намат остидаги қилични суғуриб олиб, ҳозирлик кўриб турди. Бу ҳолатни сезиб турган олдинги арава-

даги Бадиа Зулфиқорга кафтини кўрсатди, бу «хавф йўқ» ишораси эди. Агар у муштумини кўрсатса «эҳтиёт бўлинг» дегани бўларди. Бу имо-ишораларга иккинчи аравада келаётган Favvos тушунмай, илжайиб қўйди. Камон ушлаган «овчи» навкарларнинг саркори аравадагиларга тикилиб қараб, олдинги аравада бошини чиқариб қараётган Меъморга салом бериб ўтиб кетди. Ўғли қатлию ундан кейин ҳар хил хатарлар юрагини олиб қўйган Маъсума бекам дам эри, дам аравакашга жавдираб қаарди.

— Мирзо бизни алдамаганига бир белги — мана бу овчи навкарлар, — деди Меъмор ярим овозда қизи билан хотинига. — Мен боя тонг ёришгандан буён камон ушлаган навкарлар кўринармикан, деб атроф-жонибга қараб келаётган эдим.

— Менинг бу гапга ишонгим келмаяпти, — деди Бадиа, — лекин, сипоҳдан ошнанг бўлса, ёнингда ойболтанг бўлсин, дейдилар, отажон. Зарур бўлиб қолса, оғамнинг шамшири мана бу ерда! Бу — сизга. Менинг ўз яроғим бор! Анави аравакаш ҳам қараб турмасин, ёнида пичоги бормикан? Сўраб кўринг! Нонушта килаётганимизда мана бу чўқморни унга айтиб қўйганимиз маъкул. Бизлар ҳам кам эмасмиз — етти кишимиз. Ойимлардан бошқа ҳамма яхши қуролланган.

— Сен нималар деяпсан, қизим, — қўрқиб сўради Маъсума бекам, — бир нарсани сезяпсизларми?

— Ҳеч гап йўқ! Эҳтиёт шарт-да. Ахир бизлар — салтанат душманларимиз. Хуросонда бизни ҳар қадамда ҳавф кутиб турибди. Бизни ҳайдаяптилар! Биз бадарға килингапмиз!

— Бу гапинг тўғри эмас! — деди ота. — Биз салтанат душманлари эмасмиз! Шубхаю бад олиш, ярамас кимсаларнинг фитнаси бизни подшо қаҳрига гирифтор қилди. Бу вақтинча. Албатта ҳақ жойида қарор топади, биз яна юзага чиқамиз. Биз хайдалаётганимиз йўқ! Мирзонинг ўзлари ҳажга кетишни таклиф қилдилар, биз бўлсак ўз юртимизга кетишни лозим топдик.

— Ота, содда бўлманг! Сиздек бегуноҳ бир одамнинг бўйнига тавқи лаънат илишди, оғамни ўлдириш

хам, сизни сафдан чиқариш ҳам — бизни душман деб билганидан! Уларнинг ақли ҳамма нарсага етади — ҳамма иш ўйланиб қилингандай. Содда бўлманг, отажон, улар очикдан-очик душман, бизни йўқ бўлиб кетишимизни истайдилар. Сизни зиндонга ташлаб ёки очикдан-очик ўлдиришга кучлари етмайди. Агар бундай иш қилганларида бутун Хурросон оёқка туради. То қиёмат бу хунрезлик доғини юва олмайдилар. Шу сабабли сизни ҳайдашди. Бошка одам бўлганида ўлдиришарди. Бойсункур Мирзонинг гапига ишонманг!

— Тилингга куч берма, қизим! — Меъмор аравакашдан ҳайиқиб гапирди.

— Қани энди ўша сарбадорларнинг сардори Мавронозодами, Қалавийми, хуруфийлар сардори Фазуллоҳми, Хорун бўзчими ҳозир тирик бўлсаю, мени жангга кирардим ва ўз қўлим билан подшоҳнинг бошини узардим! Хуруфийлар, маълум бўлдики, жуда ожиз ва бетадбир. Пичоқ билан подшоҳ ёнига борган Аҳмад Лур, юрагини мўлжаллаб урмайдими! Корнига урибди-я, нодон!

— Бас қил, бу гапларни! — Маъсума бекам Бадианинг оёғини чимчилади. Эшиitmади хаёл қилиб, аравакашга ҳам қараб қўйди.

Уч арава далама-дала қир ошиб, тушга якин Мурғоб дарёси бўйида тушиб овқатланиши. Отларни су-гориб, хўрак беришди. Бир муддат хордиқ чиқаришгач, ёнда келаётган уч отни аравага қўшиб, аравадаги отларни ёнга олишди. Яна шитоб билан йўл юришиб, шу юрганча тўхтамай, Боло Мурғоб шахрига кириб бориши. Бунда ҳам тўхтамай, Оби Қайсар ёқалаб, Чечекту манзилгоҳидан ҳам ўтиб, қайдасан, Маймана, деб кетаверишди... Кунчикиш, шарки-жанубда, ясси қирлар орқасида Банди Туркистон чўққилари кўзга ташланарди. Унинг нариги ёғи — Кўҳисиёҳ ва Кўхи сафед, бултур баҳор ойларида бу тоғ этакларида бўлишган эди. Мана энди Кўҳисиёҳ этакларидаги саийллар орқада қолиб кетди, бир умр энди у томонларни кўришмайди. Хомуш ўтириб, баъзан қизини, баъзан эри, пурғусса Меъморни ичидаги дуо ўқиб, дам солиб келаётган Маъсума бекам тилга кирди.

— Йигирма ўилча мукаддам, Низомиддин бўйимдалигида Бухородан чиқиб кетган эдик. Толлимаржон деган ерда касал бўлиб қолган эдим. Ўша ерга яна қанча бор?

— Ҳали беш-олти кун юрамиз.

— Шунақа узоқми? Ота томондан тошкандликман, кўп шаҳарларни кўрдигу лекин ўша томонга бормадик. Тошкандни кўргим келади.

— Фаму саргардонлик сен билан мени жаҳонгашта қилиб юборди, — деди Меъмор хотинига, — Хуросонга келиб, мадрасалар курганимга ҳам афсуснаман, ҳам фахр этаман. Бу бинолар ичида фуқаро фарзанди маърифат олгани менинг бахтим, аммо бу бинолар султонлар мулки ҳисобланганидан, уларнинг номи билан аталганидан хафа бўламан. Мана, мен энди, дарёйи уммон остидаги чиганоқдек қопкоғими ни ташлаб, кетиб қолдим. Менинг мадрасам ҳам ўша чиганоқдек минг йилларга етаверади... Султон Санжар Мурғоб дарёсиға ғиштин тўғон қурдирганида кир ишлатган. Кир ғоятда мустаҳкам ашё. Янги мадраса пойдеворига кир солганман. Метин бўлиб кетди!..

Боло Мурғобдан ўтишгач, яна бир муддат юришиди. Отларнинг обдан чарчаганини сезган аравакаш, Меъморга мурожаат этиб, Мурғоб дарёси шохобчасидан биринчи кечув яқин қолгани, Майманагача яна уч кечув борлигини айтди, агар лозим топилса, хозир дам олган маъқул бўларди, деди.

Меъмор маъқул кўрди.

— Сиз сарбон, нима десангиз биз измингиздамиз, иним.

Кечувга яқин ерда тўхташиб, отларни аравадан чиқаришиди. Учинчи аравага ортиб олинган бедадан ташлаб, эгар-жабдуқларини, юганларини ечиб қўйишиди. Аравадан сакраб тушган Бадиа шағалтошлар устидан ёйилиб, шариллаб оқиб ётган Мурғоб шохобчаси бўйига келди. Кўкдаги ой ҳамма ёқни ёритиб турарди. Ой нурида беором сув тошлардан-тошларга урилиб, шовиллаб оқиб ётибди. У нақадар чиройли. Тунги шабада жонга ором бағишлиарди. Аммо қандайдир бир қўрқув унинг нигоҳини дарҳол сувдан олиб

атрофга, қирларга йўналтириди. У кечув жойини мўлжаллаб қўйгач, бу атрофда бирон кимса борми, дегандек юриб, кўздан кечириб келди. Шундан сўнг оиласини етаклаб, тепалик орқасига олиб кетди. Меъмор билан аравакаш дарёда юз-кўлларини ювиб, таҳорат қилиб, хуфтон намозини ўқишга киришди. Йиғитлар ҳам юванишиб олиб, отларни сугоришиди, унтаин сўнг дастурхон ёзив, нон, қанд-курс қўйишиди. Некин ҳамма чарчаган, кўзларни уйқу босарди. Бир чой қайнагунча дам олишиб, аравакашнинг буйруғи онлан шогирдлар ёнда келган уч отни араваларга кўшиб, йўлга тушишиди. Кечувдан ўтиш ҳам қийин бўлмади — аравакаш кулай ерини яхши билар экан. Яна ортиқ туриб қолинса уйқу босиб, совиб қолишдан кўркқан аравакаш Майманага этиб олгач, карвонсаройда ухлаб, яхшилаб дам оламиз, деди. Майманагининг карвонсаройи жуда қулай, унда қадрдон ошнаси борлигини ҳам айтиб, ҳаммани мамнун қилмоқчи бўлди. Хат-саводи бўлмаган бу одам илм-маърифат кишиларини бениҳоя эҳтиром қилишини Меъмор се-иб туради. Бундан бир қанча вақт бурун мавлоно Хожа Муҳаммад Мутриб деган зотни Самарқандга кўчириб олиб келганини, у зот ниҳоятда покиза одам эканликларини таъриф қилди. Аравакашнинг билишича, у зот ҳам шоир, ҳам созанда эканлар. Бошига гусса тушиб, Самарқандни паноҳ тортиб, кўчиб кетиби. Самарқанд бир шамчироқ, биз ахли шуаро парвонадек учиб бориб, у чироқ атрофида айланамиз, дебди ўша мавлоно.

— Мавлононинг бу гапида ҳақиқат бор, — деди Меъмор, — аммо Самарқандда ҳам у парвонанинг қаноти куйиб, кулаб тушиши турган гап. Биз ҳам Самарқандга мурожаат этиб нома ёзик, жавоб бўлмади... Шундан сўнг, ўз шахримизга кетишни лозим гопдик. Колган кунларимни бир чеккада, узлатда худойи таолога сифиниб, тоат-ибодатда ўтказмоқчиман. Биз кексаларга энди, шундай қилмоқ фарзу қарз. Ҷунёning аччиқ-чучугини татидик... Мана бу ёшларни йўлга солиб юборгач, ўзим тоат-ибодатда бўламан. Салтанатга яқинлашмайман, мансабдорлардан узоқ юраман... Подшоҳлар бир аждарки, узоқдан кўрмок

яхши, аммо ёнида бўлмоқ хавфли, бир сабаб билан комига тортмоғи осон... Бултур Атоулла Шоший, Абдуллоҳ Кўҳистоний деган зотлар ҳам Ҳиротдан Самарқандга кўчиб кетишди. Куз ўтиб, қиши келяптими, билмадим-билмадим... тўтию товуслар, кумрию андабиллар иссиқ мамлакатларга қараб учишяпти...

XXIV б о б

АНДХУД КАРВОНСАРОЙИДАГИ РЎЁ

Тонг сахарда улар Майманадан беш тош бери Чилтон дара деган манзилга етиб, бир муддат дам олишни лозим топишиди. Учинчи аравага қўшилган от чарчаб, орқада қола бошлаган эди. Шарқ осмони аста ёришиб келарди: ҳадемай ўнг томондаги баланд тепалар, ундан наридаги тик қоялар устида офтоб порлайди. Учинчи араванинг оти ўзгартирилди. Меъмор аравадан тушиб, бир муддат бўлса ҳам майса устига ёнбошлади. Шогирдлари келишиб унинг ахволини сўрашиди. Меъмор иккинчи кечувдан ўтишда шағал йўлда бир оз кўнгли беҳузур бўлганини, лекин бу ҳол тезда ўтиб кетажагини айтди. Бадиа билан Маъсума бека ҳам келиб ўтирди. Шу лаҳза Бадиа яна ўрнидан туриб, аравадаги хумчадан ним коса шарбат олиб келди.

— Кўнглингиз равшан бўлади, ичинг!

Меъмор бош чайқади.

— Ким истайди, марҳамат!

Ўтирганлар ҳам бош чайқашди. Ҳеч ким истамаётганини сезган Бадиа ўзи симириб, кейин отаси ёнига келиб ўтирди. Меъмор кун чиқиши томондаги баланд ва қўнғир қояларга тикиларди. Битта-яримта учиб ўтаётган қушларга ҳам караб қоларди.

— Бир нимани сезяпсизларми? — деди Меъмор ўзининг беҳол бўлиб турганидан ташвишланаётган шогирдларига, — мен боядан бери бир нарсани кузатиб ётибман. Қаранглар, кичик қушлар ҳам, арилар билан чивинлар ҳам бир томонга, хув, анави тик қоялар орасига учишяпти.

Шогирдлар тепадан, қулоқлари ёнидан ҳар замон гингиллаб учиб ўтаётган асалариларни кузатишди.

— Агарда шу қоя атрофига яна ҳам яқинроқ бориб қарасақ, чивинларнинг бир томонга учайтганини кўрамиз.

— Бу нима, устод? — сўради Зулфиқор.

— Бу, менимча, мўмиё. Мана шу тоғ бағрида, бирон ерда мўмиё бор. Бу тахмин, албатта. Эрта билан чивину күшчаларнинг бир томонга учиши шундан далолат бериб турибди. Мўмиёйи асил изловчилар эрта билан худди шундай тоғ этакларида, дараларда ётишиб, чивинларнинг, күшларнинг учиб ўтишини кузатадилар. Шу йўл билан мўмиёни топадилар...

Бадиа кулди.

— Йўқ, сен кулма!

Негадир яна ҳамма беихтиёр жилмайди.

— Сизларни алдаётганим йўқ, азизлар, — деди Меъмор ҳам жилмайиб. — Кекса одамнинг гапига ишониш керак.

— Тўғри айтаяпсиз, — деди жиддий бир тусда Меъморни кувватлаб аравакаш, — мана шу тоғларда мўмиёйи асил бор. Бир-бири билан олишиб, суяги синган тоғ эчкилари ҳам мўмиёни қидириб топиб, ялаб, даволанадилар...

— Ана, айтмадимми! — деди Меъмор. Мўмиёнинг ўзидан кўра у ҳақдаги қизик ҳикоялар кишини даволарди; буни чол жўрттага айтиб, ўзига тикилиб, ташвишланаётгандарнинг дикқатини тарқатиб юборишни ўйлаган эди. Ҳадеб фурбату амирзодаларнинг макру зулмини ўйлаб, ташвиш тортавермай яхши, беғубор гаплар билан йўлдошларини овутмоқ Меъморга хуш келди. У аравага чикди. Кўнгил бехузурлиги ҳам йўқолди. Ҳамманинг дикқати ўша дара четидаги қояларда қолди.

Офтоб ёйилганда уч арава Маймана шаҳрига кириб борди. Аравакаш карвонсарой соҳиби билан гаплашиб Меъморнинг хотини, «ўғли» билан бир ҳужрага тушиб, қолган тўртовлон яна бир ҳужрага жойлашишди. Отларни наридан-бери аравадан чиқариб, карвонсарой хизматкорига топширишди. У, Меъмор-

нинг имоси билан хизматкорга уч кумуш танга берип, то тушгача отларига ем едириб, дам беришни илтимос қилди. Хизматчи бу одатдан ташқари тангалардан мамнун бўлиб, ҳамма ишни жони дили билан тайёрлаб қўяжагини, bemalol кириб ухлайверишиларини айтди.

Улар хужраларга кириб таппа-таппа ташлаб ухлаб қолиши; уйқу жой танламас, деганлари шу бўлса керак-да!

Улар юришда давом этиб, сафарнинг бешинчи куни, Давлатобод, Чуқургузарлардан ўтиб, Оби Қайсар ёқалаб Андхуд шаҳрига кириб келиши. Яна карвонсарой, отларга хордик бериш, овқатланиш... Йўл азоби — гўр азоби шу эканини Бадиа амалда кўрди. Охудек эркин югуриб юрган қиз биринчи бор хуқуқсизлик ва қийналиш исканжасида қолган, на она ва на отага, на Зулфиқору Завракка шикоят қила олар, лекин ўзини ҳамма вакт мамнун кўрсатишга уринар эди.

Андхудда ҳаво исиди. Лоҳас бўлиб турган Меъмор ёнига салоҳ осган бир навкар йигит келиб, мурожаат этди:

— Мухтарам жаноб! Мен «жайрон овига чиқканлар»нинг сардориман. Биз энди Андхуддан қайтиб кетамиз. Бу ёғида хавф-хатар йўқ, иншоолло, манзилингизга соғ-саломат етиб оласиз.

— Ташаккур! — деди Меъмор, — сизларнинг ҳам омон-эсон етиб боришиларингизни оллодан тилайман.

— Хайр, саломат бўлинг!

Навкар йигит бир лаҳзалик учрашувдан кейин карвонсарой дарвозасидан ташқарига чиқиб кетди.

Бу фавқулодда ва қиска учрашувни Бадиадан бўлак ҳеч ким кўрмади, деб бўлмайди. Аравакаш ҳам негадир шу орада ивирсиб юрарди. Навкар йигитнинг шарпаси йўқолгач, Бадиа отасидан сўради:

— Кетишарканми?

— Ҳа.

— Ҳурросондан чиққунча, деб айтган эдингиз-ку. Унда Жайхун соҳилигача боришилари керак эмасмиди?

— Шунга ҳам шукур қил. «Жайрон ови» деб ўзла-ри бизни чопиб кетишганда нима қиласдинг?

— Бундай қилиша олмасди. Биз ҳам тайёргарлик кўрганмиз.

— Ҳарқалай Мирзо бизни алдамаган. Энди ишондингми?

— Хурросон сарҳадидан ўтмагунча қўлим ханжар дастасида туради!

Меъмор индамади. У хужрага кириб, чўзилиб ётди. Маъсума бека иссиқ чой ҳозирлади. Улар ҳавонинг димлигидан шикоят қилишарди. Тинмай рўмол билан ўзини елпир, бўйнидаги терларини артарди.

Кўп ўтмай Меъморни уйқу элитди. Маъсума бека ҷолининг тепасида ўтириб, қўлидаги рўмолчаси билан қўнмокчи бўлаётган пашшаларни ҳайдар, қўнгли бехузурлигини яшириб келаётган эри юзига тикилар, ўғлиниг доғи алами Меъморни икки букиб қўйганини щундок кўриб турарди. Аммо Меъмор ўзининг путурдан кетаётганини асло сездирмас, дилида гусса катта бўлганига қарамай, дадил, куч-куввати кўп, енгилмас эканини исбот қилмокчи бўлаётгандай юарди.

Меъмор шу мизғиганида туш кўрди: у битай-битай деб қолган мадраса ҳовлисида туарар эмиш. Мадраса деярли тугалланиб, ҳовли ичидаги баъзи ишлар — иккинчи қават хужраларидағи ганч ишлари, ҳовлига уюлган ортиқча ғишту тупроқларни чиқариб ташлаб, саҳнни, йўлларни, зинапояларни тозалаш, баъзи ҳавозаларни девордан олиб, мардикору усталар билан ҳисобкитоб қилиш ишлари тугалланиб, ниҳоят салтанат вакили — Мирзо Бойсунқурни бу ерда тантанавор кутиб олиб, унга янги мадрасани кўрсатишга ҳозирлик кўрилаётганимиш. Меъмор ҳовли ўртасида викор билан туармиш.

Кимдир курси олиб келиб, ўтиришга ундар, Меъмор бўлса, бош ирғаб ташаккур айтару ўтирмас, унинг дарду фикри нигоҳи одамларда эмиш. У ўрнидан туриб, ҳовлини айланармиш, дарвозадан ташқарига чиқиб пештоқларга, равоқу «гулдаста»ларга кўз ташлар — кошинлар, қуббалар, гумбазу сипарлар Меъморга тантанавор кўринар, унинг орқасидан эргашиб, қилинган ишлар, нақшлар, хандасавий ҳисоблар хақида

унга ахборот бериб юрган шогирдларни Заврак Нишопурий, Фаввос Мухаммад, Зулфиқор Шоший ва нарироқда шумшайиб, унинг ёнига яқин келолмаётган корфармо Аҳмад Чалабий ҳам унга бир нима демоқчи бўлиб юрармиш. Мадрасанинг ҳамма томонини айланниб чиққан Меъмор, хонақоҳга кириб, ерга солинган янги гиламларни кўздан кечиравмиш. Чунки бугун янги белгиланажак муфти имомлигига бунда биринчи бор намози пешин ўқилар экан. Шу меҳроб ёнига борибди, деворларга, тепадаги туйнугу гумбаз тагига осилган қандилларга ҳам кўз ташлармиш. Ҳамма нарса жойида! Ундан сўнг дарвозадан кираверишда, ўнг томонга наққошлар хатти хуфия билан ёзиб қўйган: «Амали меъмор Нажмиддин Бухорий» ёзувига кўзи тушибдимиш, негадир бу ёзув унинг кўзига: «Амали Аҳмад Чалабий» бўлиб кўриниб кетибди. У ёнида юрган шогирди Завракка қарабди. Заврак бўлса елкасини қисиб, «Буни қаранг устод, асли меъмор қолиб, корфармо ўз номини ёзиб қўйибди!» деб фифон бўлармиш. У дарҳол ложувард кошинлар билан ёзиб қўйилган бу тарихни теша билан кўчириб ташлаб, тузатиб қўймоқчи бўлармиш. Меъмор бўлса шогирдини бу жазмдан қайтариб, майли, қўявер, қизишма, у ҳукм этиб ўз номини ёзиб қўйгани билан тарих биладики, бу мадрасанинг меъмори биз! Зўрлигу фармон билан олинган обрў узокқа бормайди. Биз бўлсак, Бухородаги Минораи Калондек абадул-абад тураверамиз! — дермиш. Аммо устоднинг бу гапларига қаноат қилмаган шогирд шу лаҳза теша билан «амали Аҳмад Чалабий» сўзини кўчириб ташлаб, «амали Бухорий» деб ёзиб қўйганмиш. Юқорида ҳужралар ичини ганчлаётган уста Ҳасанбек билан уста Ҳусайнбеклар ҳовлида юрган Меъморга қўллари кўксида, узокдан салому таъзим этишар, очик чехра, табассум билан уни навозишу табрик этишгандек бўлишармиш. Кўп ўтмай, айникса, Меъмор билан сухбатлашишни ёқтирадиган Жўржий унга кўл узатармиш:

- Бардаммисиз, Меъмор?
- Ўзингиз бардаммисиз, уста?
- Ишимизнинг битиши билан, мана бу ажойиб илм қасри билан сизни кутлайман!

— Сизни ҳам!

Шундан сўнг Жўржий ҳам Меъморнинг ишлари чиқилинч эканини сезиб, зинапоялардан юқори қаватга — унда ҳужра деворларига ганч суреб ишләётган ўғли ёнига чиқиб кетганмиш.

Меъмор атрофидаги одамларга илиқ муомала қилиб, ҳамма ёкни кузатиб турган бир пайтда амир юда келяптилар, деган хабар тарқалибди. У Мирзони кутиб олмок учун мадраса ташқарисига чиқибди; бир неча отлик сарбоз ихотасида амирзода Бойсункур келәётганига кўзи тушибди. У янги мадраса ёнига келиб отдан тушгач, меъмор Бухорийга қарамай, ундан сал олдинроқда турган корфармо Аҳмад Чалабий билан кўл беришиб, омонлашиб, унинг таклифи билан ичкарига юра бошлабди. У бу ерда қаққайиб турган Меъморни сезмагандек, кўзи тушган бўлса ҳам, уни мадраса курилишига ҳеч қандай алоқаси йўқ киши хисоблаб эътибор бермабди. Бу мадрасанинг меъмори Аҳмад Чалабий деб хисоблаб, унга илтифот кўрсатибди. У билан бирга мадраса ичига кирибди, ҳамма ёкни томоша қилибди; унинг ёнидаги мансабдор ҳам қўлидаги тугунни ечиб, соҳибининг имоси билан зарбоф чопонни Аҳмад Чалабий устига ёпибди. Чалабий амирзодага қуллук қилиб, бош эгибди. Шундан сўнг, Аҳмад Чалабий Мирзо дикқатини равоқу пештоқларга жалб этиб, уларни тушунтириб, уларнинг ҳандасакий хисобларини ҳам бидиллаб гапира бошлабди. Оратира бу мадраса курилишида «юонон олими Фисофурс ҳаким таълимотига сунянганини» ҳам айтибди. Меъмор Нажмиддин Бухорий ўз шогирдлари билан бир чеккада шумшайиб қолибди, унга ҳеч ким эътибор бермабди. Аҳмад Чалабий Мирзога илмий жиҳатдан нотўғри гапларни айтганидан фифон бўлиб турган Меъмор бирдан бақириб юборибди:

— Ёлғон! Бу малъун сизни алдаяпти-ю! — дебди титраб Мирзо ёнига бориб. — Ҳамма гаплари ёлғон! У лўлиларга ўхшаб саннаб, сизни алдаяпти! У ҳеч нарсани билмайди, илмдан бехабар одам! Унинг ҳамма гаплари ёлғон. — У ўз овозидан ўйғониб кетиб, кўзини очганида тепада ой сузар, ҳамма ёқ жимжит, кумлик, унинг атрофига Маъсу-

ма бекам билан Бадиа ҳайрон бўлишиб, кўркиб туришарди.

Меъмор ўзига келиб, қизи билан хотинига қаради. Аравакаш хужра эшиги олдида бедор кузатиб турарди.

— Туш кўриб, уйқусирабман... — деди Меъмор.

Эрини кузатиб турган Маъсума бека шу паллагача ўзини тутиб келарди; ўғли Низомиддинни йўқотгани, бутун хонадонининг тўзиганидан хўрлиги келиб, кўзига ёш олди. Мехнат қилганлар хору зор бўлиб юргани хўрлигини келтирди-да, баттар ўртаниб кетиб, чўққайиб ўтириб, бошига тушган кора кун дастидан тоза хўнграб йиғлади...

— Кўйинглар, — деди Меъмор, — қўй, йиғлама, худонинг хоҳиши шундоқ экан, иложимиз қанча!

Бадиа токчадаги шамни ўчирмади. Ота ўз тушини яхшиликка йўйди; ундан сўнг қизи билан хотинига яхши гаплар — эски ҳикоятлардан айтиб берди. Лукмони ҳакимнинг зинданда ётгани, подшохга суяк тикилиб қолганида эчки сўйиб, суякни олгани... Биби Фотима оч қолган болаларига қозонга тош ташлаб қайнатиб, пишириб бергани... тошлар шолғомга айланиб, болаларининг қорни тўйгани ва бошқаларни гапириб, қизи билан хотинини овутди. Кулол чарх каллагига қўйган гумбаз — лойдан идиш ясад, олмадек ортиб қолганини ташлаб юбормай, хуштак ясади. Чалабий мана шунақа «Хуштак» одамлардан, деди яна чол.

Эрталаб Зулфиқор билан Заврак карвонсарой ҳовлисидаги қудукдан сув тортиб, икки обдаста ва яна мис кўзада сув тўлдириб Меъмор ётган хужрага олиб кириб беришди. Улар иккови ҳам тунги ҳангомадан хабардор эдилару ўзларини кўрсатмай, уларни муҳофаза қилиб туришган эди. Фақат биргина Favvos Муҳаммаднинг ҳеч нарсадан хабари йўқ, пишиллаб ухлаб ётарди.

Меъмор ювиниб, тахорат қилиб намозини ўқиб олгач, ҳовлига чиқди. Нонуштага ҳозирлик қилишни шогирдларига топширди. Лекин ҳовлида қудук ёнида турган бир нотаниш киши Меъморга салом берди. Ўзининг нажжор Абдулазиз Ахсикатий эканини, бир

нече йил мұқаддам устод қўлида ишлагани, фалак-нинг гардиши билан Қобул, Нишопур, Ҳирот шаҳарларида истиқомат қилганини, ҳозир бу Андхуд шахрида усталик қилиб юрганини гапирди. Ундан сўнг Ҳиротдаги мадраса курилишида ишлаганини ҳам айтди. Қўлига теша тегиб кетганида устоднинг ўзлари белбоғларини ечиб боғлагани, бир парча кигиз куйдириб босиб, қон тўхтатилганини айтиб, Меъморнинг ёдига туширди.

— Тўғри, тўғри, ёдимга тушди, — деди Меъмор.— Қалай, қўлингиз, тузумки?

— Тузалиб кетди, устод, — у чап қўли бармоқла-рини кўрсатди.

— Хайрият.

— Ўзингиз бақувватмисиз?

— Шукур.

— Мадраса Мусалло ёнида яна бир Мусалло бўлди. Ҳурносон кўксидаги беназир гул, — деди у одам.

Меъмор сукут сақлади. Ерга каради.

— Ёнингизга келишдан мақсад, ҳаддим сифса, каминанинг ҳовлисига ташриф этиб, бир пиёла чойимни иссангиз бошим осмонга етарди. Жуда ҳам илтинос қиласман. Ҳовлим узоқ эмас, мана шу яқинда. Уч ўғлим, икки қизим бор. Ўғилларим ҳам нажжор. Ўғилларим оту араваларни шай қилиб қўйишди. Ҳаммаларингизни таклиф этаман. Андхудга келиб, устод, бизнинг бир пиёла чойимизни ичиб кетмасангиз хафа бўламан. Мен ҳам сизнинг шогирдларингиздан бириман. Ҳаққим бор таклиф этишга.

— Биз, Ҳурсондан нима сабабдин чиқиб кетаётганимиздан хабарингиз борми?

— Хабарим бор.

— Бизни меҳмонга чорлаб, яна ўзингизга бир ноҳушлик тилаб олманг?

— Бу гапларни қўйинг, устод. Сизга неча йил хизмат қиласам ҳам қарздорман. Сизга ёмонлик истаганларнинг ўзлари ёмон!

— Салтанат мени ҳайдади...

— Агар салтанат сиздек мўътабар зотни ҳайдаган бўлса, мен ундоқ салтанатни ҳурмат қилмайман! Салтанатни чалғитган ёмон одамлар бор! Лекин сизга

бир сирни айтмоғим шарт. Сиз мухтарам устоднинг Андхуддан ўтиб кетаётганингиздан мутлақо хабарим йўқ эди. Шу салтанат кишилари, уларнинг айтишича, сизни иҳота қилиб келаётган навкарларнинг соҳиби шахсан менга мурожаат этиб, карвонсаройда эканингизни маълум қилди. Қўлингиздан келса Меъмор билан мулоқотда бўлиб, қўнгилларини кўтаринг, деди. Ўзлари Андхуддан жўнаб кетишиди. Мана шундай гап, устод. Иккиламчи, мана бу аравакашингиз кўп яхши одам. Хорунбек паҳлавон бу ерларда кўп бўлган, биз уни эҳтиром қиласмиш...

— Сиз жуда таажжуб гапларни айтяпсиз!

Меъмор турган ерида хаёл сурди. Унинг кўз олдида тушуниб бўлмас Бойсунқур Мирзо ва унинг ўн чоғлиқ «шикорчи» навкарлари пайдо бўлди. Бу ҳақиқатми ёки макрми — ақли етмасди.

У рози бўлиб, хотини, қизи, уч шогирди ва аравакашни олиб, нажжор Абдулазиз Ахсикатий ҳовлисига жўнади. Абдулазиз ўғиллари отларни суфориб, араваларни шай қилиб қўйганини, карвонсарой соҳиби ҳам унга тегишли одам эканини, ҳеч нарсанинг ташвишини қилмаслик кераклигини айтди.

Улар яқингинадаги бир ҳовли дарвозаси ёнига келишиди. Эшикдан кираверишда, ҳовли четида кўл-оёқлари боғлоқлик қўй тепасида турган қассоб Меъморга мурожаат этиб, фотиҳа беринг, устод, деди. Меъмор кафтларини очиб, фотиҳа берди. Қассоб қўйни сўйиб юборди. Нажжор Абдулазиз Ахсикатий меҳмонларни катта бир хонага, Маъсума бека билан Бадиани ўз оиласи ёнига — ичкари хонага таклиф этди. Дархол дастурхонлар ёзилиб, нону ширинликлар, қаймогу қатиқ олиб келинди. Чой олиб кирилди. Кетма-кет таомлар муҳайё қилинди...

Нажжор Абдулазиз Ахсикатий Меъмор бошига тушган мусибатдан, ўғли Низомиддинни хуруфияда айблашиб, қатл этишганингача, ҳамма гапдан хабардор экан. Обрўингиз яна барқарор бўлиб, ҳақ жойига қарор топажак, дейишиб, уни дуо қилишиди.

Шу куни Меъмор Абдулазиз хонадонида тунаб қолди. Эртасига эрта билан карвонсаройдаги аравалар шай қилиниб, нажжор Абдулазиз Ахсикатий эши-

тига олиб келиниб, шу ердан яна йўлга тушишди. Абдулазиз ўз ўғиллари билан бир неча фарсах ергача Меъморни кузатиб бориб, яна қайтиб келишди.

Уч арава олдинма-кетин қумликлар ичига кириб кетди.

XXV б о б

ҚОРАИЛОН ИЗГА ТУШДИ

«Ўлакса илонга қўнган паишадан эҳтиёт бўл...»

Ибн Сино

Нажмиддин Бухорий шубҳалик одам сифатида Хуросондан чиқариб юборилганидан сўнг, Бойсункур Мирзо мадрасаса курилишини ниҳоясига етказиш ва тантанали қабул маросимларини ўтказишларига ражбарлик қилишни устод Қавомдан илтимос қилди. Лекин меъмор Бухорий бунда эканида ҳасадгўйлик қилиб турадиган устод Қавом, Нажмиддин кетганидан сўнг, кўнгли бўм-бўш бўлиб қолиб, бир нимасини йўқотган одамдек гангиб юрди. У амирзоданинг илтимосини рад этди; авваламбор, бетобман, қолаверса, кексалигимга қарамай, ҳар қанча янги бошланажак ишларига тайёрман, аммо тайёр ошга баковул бўлолмайман, деди. Бу жавоб Мирзони ранжитмади, аксинча у шундок жавобни кутган экан. Устод Қавомнинг рад жавоби Бойсункур Мирзо орқали подшоҳга ҳам етди: «Меъмор Бухорийлар хонадони хуруфияга алоқадор бўлгани туфайли шу жазога лойик. Аслида унинг беназир меъморлиги бизга маълум...» дебди Шоҳруҳ ўз ўғлига, Меъмор жўнаб кетгандан сўнг Ҳасанбек билан Ҳусайнбеклар, наққош Худобахш икки ўғли билан нажжор ва сангтарошлар корфармо Ахмад Чалабийга итоат этмай, ишга келмай қўйғанлар. Мадрасада иш тўхтаб колган, факат тутқун гуржи уста ўғли билан бирга ишлаётгани мансабдорлар кулоғига етган.

— Биз ҳозир оёғимиз остидаги мадраса курилишига эмас, олис Сайхун бўйларига қарашимиз кепрак! — деди Шоҳруҳ ўғлига зардаомуз, — у томонда дашти қипчоқлар — Бароқ ўғлон лашкар тўпламокда! Тушундингизми?

— Тушундим, — деди Мирзо.

Ҳамма вақт хаттот, наққош ва меъморлар масаласини кўтариб кираверганидан отасининг энсаси қотиб турганини сезган Бойсункур итоаткорлик билан таъзим қилиб, ташқарига чиқиб кетди.

Орадан бир ой ўтгач, мавлоно Анварий ҳам Ҳиротдан Самарқандга кўчиб кетди. «Ҳиротга куз тушиб, ватвату турналар иссиқ мамлакатларга учиб кетмоқдалар», деган гап ҳам саройда айланишиб қолди. Иброҳим Султон тарафдорлари: «ватвату турналар кетса кетар, аммо андалиб қишида ҳам, ёзда ҳам ўз ерини ташлаб кетмайди. Бизга ҳозир ватват эмас, андалиб керак...» дейишибди. Ёш амирзодаларнинг маишату бир-бирлари билан тарафкашлик қилмасликларининг олдини олиб, Шоҳруҳ баъзан уларни бўлғуси катта муҳорибага — Чинга юриш, Бароқ ўғлон ҳужумига тайёргарликни бўшаштирмаслик, лашкарга эътибор беришликини таъкидлардию, аммо аслида у бехаловатликини фоятда ёқтирмас, отаси бунёд этган салтанат тахтида тинч ўтириб базму ишратга муккасидан кетган эди. Гавҳаршод бегим, Бойсункур Мирзо ва Самарқанд ҳокими Улуғбек Мирзо таъсири ва тазийки билан подшо Иброҳим Султонга аҳли уламою фузало устидан таъқиби ҳаддан зиёд қилмаслик, мумкин қадар уларга тегмаслик кераклигини айтди. Иброҳим Султоннинг Исфаҳонга ўз саройига боришига ҳам монелик кўрсатилмади. Аммо бу фармойиш кечикиб берилди. У фоятда маҳфий топшириқ билан Қораилонни Нажмиддин Бухорий изидан жўнатган эди...

Ўша куни Меъмор ҳовли-жойини сотиб, шахардан чиқиб кетаётгани Қораилон маҳкамасига маълум бўлди. У хатто Меъморнинг уч янги арава ёллаб, катта карвондан олдин юришини бу ҳақда сарбон билан аҳдлашиб қўйганини, карвондан бир неча манзил илгари юришини биларди. Бу иш уларнинг қора режасига жуда кулай эди. Шу сабабли ўн-каллакесарни олиб орқама-орқа жўнади. Уларни боло мурғоблик бир аравакаш олиб кетаётганини ҳам билишарди. Аммо карвонсаройдан чиқиб кетган Меъмор Кушка, Қалъайи Мор, Тошкўприк орқали эмас, бошқа йўл — Боло Мурғоб, Маймана, Чукургузар, Анд-

худ орқали Хурсондан чиқиб кетаётганини мутлақо билишмасди. Эртасига улар савдогарлар либосида изма-из жўнашди. Ярим тунда хуфия Кушка яқинидаги бир манзилгоҳда катта карвонга етиб бориб, бир кишидан: «уч арава ҳани», деб сўрашди. У одам елка кисди, ҳеч қандай уч аравани кўргани йўқлиги, аниқроғини сарбон билишини айтди. Савдогар либосидаги қароқчилардан бири сарбонни ётган еридан уйғотиб, уч аравани сўради. Сарбон «Хорунбекнинг аравалари олдинда, жуда илгарилаб кетган, Қалъайи Мордан ўтиб, Тошкўприкка етиб қолган бўлсалар ҳам эҳтимол», деди. Савдогар либосидаги отлиқлар вақтни қўлдан бермаслик учун яна йўлга тушиб, даламадала, даштма-дашт отларини ниқталаб чопиб кетишиди. Кушка дарёси ёқалаб, Қалъайи Морга етишди. Шаҳар жимжит. Нотаниш отлиқларни кўриб, бад олган итлар вовиллашди.

Тонготарда улар шаҳарни бир айланиб чиқиб, карвонсарайга киришди:

— Уч арава келдими?

— Кеча ҳам, бугун ҳам, тунда ҳам саройга биронта арава киргани йўқ, — деди карвонсарай қоровули.

— Бошқа бирон қўнадиган жой йўқми? — отлиқлардан бири сўради.

— Йўқ, жаноб! — деди қоровул. — Бу ерни Қалъайи Мор дейдилар, ҳар бир бегона ит тугул, бегона илон кирса ҳам пайқаймиз.

Отлик орқароқда турган чўққи соқол, рангпар кимсага бир қараб кўйди. У индамади. Юзлари захил, камгап, ғазабини ҳам, шодлигини ҳам билиб бўлмайдиган, доимо юзларида бир заҳархандалик зохир бу кимса азбаройи амирзода Иброҳим Султонга садоқати юзасидан «сафарга» чиқсан эди. Бу гал бажариши керак бўлган иш — унинг наздида тиш ковлаш билан баробар қўлининг уни билан қилиб қўядигандек түюлган эди. Бундай «шунчаки» ишларга бошқаларни юборар, аммо Меъморнинг Хурсонда катта эътиборга молик одам эканлиги сабабли уни йўқотиш жуда «моҳир жарроҳ» қўлида бўлмоғи, гап-сўз тарқалмаслиги лозимлигини Иброҳим Султон Қораилонга топширган, шунинг учун ҳам унинг ўзи йўлга чиқсан эди.

— Бегона ит ҳам, бегона илон ҳам шаҳрингга кирган, пайқамагансан! — деди отлик зарда билан.

— Э, савдогар бача, мени сенлама! Мен пайғамбар ёшидаги одамман. Сизларни пайқадим, сизлар итмисиз, илонмисиз, билмадим...

Отда турган йигит қамчин билан кекса қоровулнинг оғзига шартта туширди. Чолвой деганича оғзини ушлаб, ерга йиқилди. Шу лаҳзанинг ўзидаёқ оғзи бурнидан кон келди. У бўйнига пичоқ тортилган тоувукдек ерда питирлаб ётганида отликлар карvonсайдан чиқиб, жадаллик билан Тахта ва ундан Тошкўприк томон жўнашди.

— Чакки қилдинг! — деди йўлда Қораилон манглайини танғиб олган қизил чопонли суворийга.

— У ярамас бизни ҳақорат қилди!

— Думбулсан! — деди Қораилон илжайиб. Бу илжайиш жуда қўрқинчли эканини пайқаган қизил чопонли «тавба қилдим» деди. Қораилон одатда қоидадан чиқкан кишининг илжайиб туриб қорнига ханжар тиқиб, отдан ағдариб кетар эди. Бундай пайтда хеч ким ҳеч нарса демай, миқ этмай турарди. Қизил чопонли дағ-дағ титрай бошлади. Йўқ, бу гал ҳеч фожия содир бўлмади: отликларнинг наздида соҳиб «гўдак»ни бир гал кечирди.

Улар яна кун бўйи жадал юриб, Тошкўприк, ундан сўнг Сандикочгача боришли, уч аравадан ному нишон бўлмагач, яна Тошкўприкка қайтиб келиб, шу ерда тунашни лозим топишиди. Уч араванинг қаноти бўлганда ҳам бунчалик олислаб кетиши мумкин эмас эди. Қораилон айрон ичиб ўтириб, ўзининг маҳорат режаларини кимдир пайқаганлигини сезди. Ҳеч қачон аҳли шуаро, аҳли фузало бунчалик «панд» берганини эслайлмас. Саройдаги мансабдорлар ичida кимдир бор, деб ўйлади. У ўзидан ўзи хижолат бўлди: «Наҳотки мен иккинчи бир томонни ўйламадим! Улар бизни лакиллатиб, Маймана, Андхуд ўюли билан бориб, ё Карки, ёки Халач орқали Жайхундан ўтиб кетсалар нима бўлади! Агар улар Мовароуннахрга ўтиб кетсалар, бу гап Самарқандга етиб боради, тафтиш бошланади...

Қораилон эрта билан барвақат туриб, ўтирган ерида тўдадаги ориқ, абжир бир йигитга қаради:

— Сен мен билан қоласан! Бошқалар Ҳиротга жўнанглар! Бизнинг саёҳатимиз тўғрисида ҳеч кимга лом-мим! Аҳдни бузганинг боши қўлимда! Жўнанглар, қўзичокларим! — у яна илжайди.

Йигитлар секин отларига миниб, ёввойи мушукдек пусиб жўнаб кетишиди.

Кораилон ишонган йигити билан ёлғиз қолди.

— Анави нодон қизил чопон қоровул чолни уриб, яхши иш қилмади. Ими-жимида бўладиган ишнинг хидини чиқариб қўйди, — деди Кораилон шеригига. — Карvonсаройда биз хусусимизда шубҳа туғилиб қолди. Энди оёғимга кирган тиканни чаён ниши билан илишим керак!

— Режа қандок бўлади энди, соҳиб?

— Биз иккимиз энди илонга айланиб, қум ичига киришимиз керак! Ўз ўлжамизни ўша ерда ушлашимиз керак! Тушундингми?

— Яъни?

— Яъни, — деди Кораилон шеригига. У қиска савол берган кишиларни ёқтирарди, — яъни Қумлик ва Оби Қайсар тепаликларидан ўтиб, Андхуд шахрига борамиз. Ундан сўнг чўпонлар орасига кириб, ўлжамиз Халачга етмасданоқ, Калиф қумликларида паймонасини тўлдирамиз. Меъморнинг ўн саккиз яшар қизи бор, унга заҳар эмас, доруий бехуш бермоқ лозим. Биз энди тири-ғарронни эмас, Мехтарбоди Ялдойи Самарқандий йўлини тутиб, заҳар жангини бошлаймиз. Бизлар — «мурғоблик чўпонлармиз»...

— Маъқул, соҳиб.

Кораилон ўз шериги билан қумликлар, дашту тепаликлардан оша отни қамчилаб, уч кечаю уч кундуз деганда Андхуд шахрига етиб келишиди. Йўл-йўлакай у «Хурросон ахли шуарою фузало орасида сиёсат душманлари кўпайиб, салтанатга таҳдид солаётгани ва яқин йиллар ичida бундай гайри сиёсат кимсаларни батамом йўқотиш хусусида» подшоҳ ҳазратларининг маҳфий фармони борлигини, амирзодалардан энг яхшиси — Иброҳим Султон эканини гапирди.

— Биз ҳаммамиз Мухаммад Арғун хизматида бўлганимиз билан аслида биз подшоҳ ҳазратларининг шахсан ўзларига ҳамда амирзодага бўйсунамиз. Улардан бошқа ҳамма мансабдорлар, саркардалар бизнинг кўзи-

миз остида. Кимда-ким, салтанат сиёсатига зид иш юритиб, гап айтдими, бизнинг мана бу темир панжаларимиз уларнинг гирибонида! Биз тез вактда Хурсонни чириган, ачиган мавлонолардан, шариатда мункир ахли фузалодан тозалаб оламиз. Ана ундан сўнг ишлар жуда яхши бўлади, на сарбадорликка мойил кимсалар ва на хуруфийлар бўлади! Ҳозир ҳам, бундан кейин ҳам подшоҳ ҳазратлари бизларга суюнадилар, биз улуг ҳазратнинг ўткир ханжарларимиз!

Шериги, тушундим, дегандек бош қимирлатиб келарди.

Қораилон Андхуддаги карвонсаройдан «уч арава» дарҳақиқат, бунда бўлгани ва икки кун бурун йўлга чиқиб кетганини билди. Яна отларига миниб жадал кетишди. Бир кечаю бир кундуз юриб, такир даштда узокдан қудук ёнига тушиб, отларни сугориб, дам олишаётган уч арава соясида ўтирганларни кўришди. Улар дам олаётганлар ёнига бориб, отдан тушишди. Дастурхон юкорисида ўтирган Меъморга салом беришеб, ўзларининг каркилил чўпонлар экани, Андхуддан савдо-сотик қилиб, бола-чақалари ёнига кетаётганини айтишди. Меъмор уларни дастурхонга таклиф этиб, ўз ёнидан жой кўрсатди. Аммо негадир Бадианинг ҳам, Зулфиқорнинг ҳам юрагига шубҳа тушди; агар улар чиндан ҳам Каркига ўтиб кетишаётган бўлса, бу ёқларда нима қилиб юришибди? Ҳар қандай йўловчи ҳам уларни сезмай, катта йўлдан ўтиб кетишлиари аниқ эди. Йўл устида қудуклар бор, улар атай аравакаш Ҳорунбек маслаҳати билан анча ичкари қудуққа боришган эди. Бир муддатли сухбатдан кейин «чўпонлар» хуржунларидан қаттиқ нон, қурут, ширинлик олиб дастурхонга қўйиши. Лекин негадир сухбат унча қовушмасди. У ёқ-бу ёққа аланглаган Қораилон бир лаҳзадан сўнг нарирокда қозон осиб, гўшт қайнатаётган Маъсума bekaga қаради, кейин Меъморга мурожаат этди.

— Шундай пайтда ёш келинми, қизми бўлганда яхши бўлар экан-да. Кампир қийналиб қолибдилар?

— Тўғри, иним, йўл жуда чарчатди, — деди Меъмор, — кампиримиз шўрва қайнатяпти, пишиб қолди.

Қораилон ўз орқасида ўғил болача кийиниб, тик турган Бадиани пайқамади. Бу Қораилоннинг бирин-

чи эътиборсизлиги эди. Одам кузатишда у ҳеч қачон янглишмаган эди.

— Ўғлим, томоғимиз қақраб кетди, озгина сув бер, — Қораилон орқасига қайрилиб Бадиага мурожаат этди.

Бадиа шу лаҳза кичик мис кўзачани олиб, қозон ёнига келди. «Чўпонлар»нинг кўзини шамғалат қилиб, ён чўнтағидаги доруий беҳушдан кўзачага ташлаб, қудуқдан тортиб олинган сувдан қуйиб, «чўпон»га тутди. Қораилон ёш йигитча олиб келган кўзачадаги сувни симирди, ёнидаги шеригига ҳам узатди. У ҳам чанқаган экан, анча симирди. Бир муддатдан сўнг уларнинг кўзлари чалишиб, ўтирган жойларида ёнларига кийшайиб, ухлаб қолишиди. Бадиа билан Зулфиқор зудлик билан «чўпон»ларнинг ёнларини титкилашди: ёнидан ханжар, кичик шишаларда заҳар ва турли айёрлик анжомлари, отлар устидаги хуржунда ўқ-ёй, сунъий соқол-мўйлаб, кийим-кечаклар ҳам чикди.

— Ота, булар чўпон эмас! — деди Бадиа. Бу гапни Зулфиқор ҳам, Заврак ҳам тасдиқлади.

Аравакаш Хорунбек билан Favvos Мухаммад ҳайрон бўлиб, донг қотиб қолишиди. «Қизингиз йўқми, кампирга қийин бўлибди», деган гап ҳам уларни шубҳага солган эди.

— Булар бизнинг изимиздан тушишган! — деди яна Бадиа.

— Абдулазиз Ахсикатий юборган, — деди Заврак,— бўлмаса бизларнинг бу ерда эканлигимизни қаёқдан билади!

— Абдулазизни гапирманглар! — деди Меъмор,— у жуда пок инсон. Бу шахслар бошқа ёқдан келяпти. Бу аник!

— Нима қилмоқ керак? — Бадиа отасига қаради.

— Доруий беҳушнинг кучи қанча вақтга етади?— Меъмор сўради.

— Эрталабгача ухлайди, — деди Бадиа, — мен кўпроқ ташладим.

— Унда, бу ердан тез кетамиз! — деди Меъмор,— улар уйғонганга қадар Каркига етиб оламиз. Иккиламчи, биз етти кишимиз, улар факат икки киши. Қўлидан ҳеч иш келмайди!

Шу лахза Маъсума бека қозондаги шўрвани катта мис кўзага ағдариб, аравага олиб чиқди. Оловни ҳам наридан-бери ўчиришиб, отларни қўшиб, шитоб билан жўнаб қолишга тайёргарлик кўришди. Эҳтимол, шериклари бўлса орқадан етиб келмасин, деган қўркув ҳам йўқ эмасди уларда. Хорунбекнинг маслаҳати билан икки номаълум шахснинг отини ҳам ўзлари билан олиб, хуржун ва ёnlаридан чиқкан дорию ханжарларни ҳам йиғишириб аравага солишиди.

Аравалар жўнаб кетишига шай турган бир пайтда, ухлаб ётган номаълум кимсалар тепасида турган Бадиа, Зулфиқор бир-бирларига қарашиди. Бошқалар араваларга чиқиб олган эди.

— Нима қиламиз? — Бадиа Зулфиқор билан аравакашга қаради.

— Булар изимизга тушгани аник! — деди Хорунбек. — Булар чўпон эмас! — Хорунбек ухлаб ётган чўққи соқол, рангпар кимса тепасига яқин келиб, бир муддат тикилиб турди, — менга айтишларича... (бу гапни айтгач, Хорунбек тилини тишлади, кейин яна гапирди). — Бу шахс Қораилон деган жаллодга ўхшайди. Лекин кўп вакт амирзодалар атрофида юради. Кумда, биздек бир ҳимоясиз одамлар орқасида юриши жуда таажжуб! У «катта ишлар» устида бўлар эди. Агар бу малъуннинг Қораилонлиги рост бўлса, Низомиддинларни тутиб берган шу бўлади! Сиз аравага чиқиб олинг, Бадиа бекам! Заврак Нишопурий жанобларига айтинг, охирги аравадаги белкуракни олиб тушсинлар!

— Сиз менинг «Бадиа»лигимни қаёқдан билдингиз?! — Бадиа жаҳл билан Хорунбекка қаради.

Хорунбек индамади.

— Айтинг!

— Йўлда гаплашамиз, — деди Хорунбек, — ҳозир пайти эмас! Вакт ниҳоятда зик. Мен сизни анча вактдан бўён биламан, қизим!

— Тушимми, ўнгимми?! — деди Бадиа. — Бизнинг атрофимиизда нималар бўляпти ўзи? Зулфиқор оға, ҳеч нарсага тушунмаётирман?!

— Ҳарқалай, мен сизнинг душманингиз эмасман! — деди аравакаш. — Ҳадеб ханжарингизни ушлайверманг!

— Отамлар чаёнга ҳам, илонга ҳам шафқат қила-дилар, бу — хато! Мен кётдим. — Бадиа Заврәкка имо қилди-да, ўзи биринчи аравага чиқиб, отаси ёнига чўкди.

Орқада қолган Хорунбек Низомиддиннинг димиш-кий шамширини яланочлаб, ўткир учини Қораилон кўксига икки бор санчди. Шеригига ҳам. Хорунбек атай Қораилон кўксига ўзи тиф санчди. Заврак, Хорунбек, Зулфиқор наридан-бери жасадларни қумга кўмишиди.

— Агар бу ҳақиқатан ҳам Қораилон бўлса анчадан буён кетимга тушиб, мени излаб юрибди, — деди Хорунбек йўлдошларига. — Ишқилиб, бу унча-мунча қароқчи бўлмай, Қораилон бўлиб чиқсин. Меъмор ҳазратлари изига тушиб, қасд қилган илон менинг кўлимда боши янчилгани яхши бўлди...

— Сиз на вазир, на Меъмор бўлсангиз, нечун сизни у анчадан буён таъқиб этади? — сўради Зулфиқор.

— Иним... Кейин айтаман.

Улар аравалар орқасидан югуришиб келиб ўз жойларига чиқиб олишди.

Бадиа ўзининг «йигитча» эмаслигини билиб келаётган ва бунинг устига қароқчилар бошини янчган аравакашга тикилди; унинг рўпарасида содда бир аравакаш эмас, қалъяларни зеру забар қилган Жалолиддин Мангуберди ёки Темур Малик каби паҳлавон тургандай бўларди. Бу аравакашда катта сир борлигини пайқади. У чурқ этмай, ҳар замон-ҳар замонда Хорунга қараб кўярди.

Уч арава яна дашту қумликлар оша илгарига қараб силжий бошлади. Бўлган фожиали воқеа ҳаммага маълум, ҳамма индамай жим ўтиради. Бармокларини тишлаб, хаёл суриб ўтирган Меъмор Хорунбекка гап котди:

— Сиз асли Майманадан эмасмисиз?

— Ҳа, устод, мен Майманаданман.

— Карвонсаройда сизни боло мурғоблик дейишиди. Бу гапни ўзингиз ҳам айтгандек бўлувдингиз?

— Ҳа, устод, боло мурғобликман, десам ҳам бўлади... У ерда оға-иниларим бор. Мен Бухоро, Шахрисабз, Самарқанд, Балх, Калласаркори, Оби Қайсар,

Давлатобод шахарларида ҳам турганман... Баъзан бу шаҳарларнинг ҳам номини айтаман. Ўша ерликман, дейман.

— Кўп шаҳарларни билар экансиз, — деди Меъмор хайратомуз, — аравакашлик касбингиз бунчалик кўп ерларни кўришни тақозо этган бўлмоғи керакдирда, а?

— Бу томони ҳам бор. Аммо асли ота касбим бўз тўқимоқ...

Меъморнинг юраги шигиллаб кетди. У яна миқ этмай қолди. У ҳамма гапга тушунгандай, аравакашга қараб қолди, Ҳорун бўзчи!

XXVI б о б

ОДАМ САФАРДА БИЛИНАДИ

Икки номаълум шахснинг изларига тушиб, бунда келиши бир томон, Абдулазиз Наманганийнинг эъзозу зиёфати бир томон, Ҳорунбек муаммоси бир томон — Меъмор гангид қолди. Шунча ўлим етмасмиди! Қўй эмас, эчки эмас, икки одамни ўлдириб кетаётгандари барчани ўйлатиб қўйди. Қасд қилган илоннинг боши янчилгани яхши, аммо бу конли воқеалар кекса Меъмор, яъни одам ўлдириш у ёқда турсин умрида биронта кишининг бурнини қонатмаган киши учун жуда оғир! Низомиддин қатли, равоч сайлидаги қароқчи ўлими, бугунги фожиа... ўзи нима гаплар бўляпти! Доимо бино қурилиши — усталар орасида, ҳандасавий чизиклар, ал-жабр, риёзиёт билан шуғулланиб, бош қотириб келган кишини бу кутилмаган воқеалар довдиратиб, саросимага туширмаслиги асло мумкин эмас эди.

— Илоннинг боши янчилгани яхши бўлди! — деди Бадиа, — отажон, хеч қўрқманг.

Меъмор чўчиб тушди:

— Нима дединг?

— Изимиздан тушиб келаётганлар қароқчилар экани аниқ бўлди. Чўпон бўлса шунча захару ханжару сохта соқол-мўйлабларни нима қиласарди?

— Эҳтимол, бизга қасд қилмагандир?

— Бизга қасд қилмаган бўлса, бошқа бир одамга қасд қилас. Бошқани ўлдирса майлими?! Нега Мирзо ўн «овчи» отлиқни юборди? Мана бу фожиа Мирзонинг ҳамма гаплари ҳақиқат эканини тасдиқлади. Сизнинг душманингиз Мирзо эмас, бошқалар! Бу икки кимсани ажал хайдаб келган!

— Сен Меъморнинг эмас, жаллод қизининг гапини гапиряпсан!

Бадиа ерга қаради.

— Бу қаро кунлар ўтиб кетармикан, э худо! Ўзингга тавба қилдим...

— Бу қаро кунлар ўтиб кетади; ойнинг ўн беши коронги бўлса, ўн беши ёруғ, — деди гапга аралашиб Маъсума бека. У боядан бери нафаси чиқмай декчадаги шўрванинг тўклиби кетмаслиги учун маҳкам ушлаб ўтирган эди.

— Агар бегуноҳ оғамни ўлдирмаганларида мен бунчалик қаҳри қаттиқ бўлмасдим, — деди Бадиа отасига.

— Энди бас қил, қизим! Энди сен ҳам қизимсан, ҳам ўғлим. Бас қилинглар энди хунрезликни! Бу ишларнинг ҳаммаси худодан. Худога ёлвориб, гуноҳими кечир дегин!

Бадиа бош эгиб ўтирди-да, бир нима деб пичирлади, отасини ризо қилмоқ учун уч бор «тавба қилдим», деб такрорлади.

Икки томон чексиз қумликлар...

Қорамтири сарғиш қум тепаликлари оралаб Ҳорунбекнинг уч араваси борарди.

Жимжитлик. Бадиа соябон аравадан бош чиқариб, атроф-жонибга тикилар, ҳеч бир жонивордан асар ўйқ, бирон қуш ҳам осмондан қанот қоқиб ўтмасди. Ҳаво нихоятда қизиган, отлар ҳаллослаб терлар, кучининг борича тиришиб аравани тортардилар.

— Мурғоб отлари қумга ярамайди, — деди отустида кетаётган Ҳорунбек Меъморга гап қотиб, — қумга такаёвмит отлари яхши, ҳам тез чопади, ҳам чидамли. Мана бу икки бегона от — ёвмит отлари, кўрдингизми? Афтидан эгаси қумда юришни ҳисобга олган экан. Афсуски, бу отларни аравага қўшиб бўлмайди.

Меъмор ҳам, Бадиа ҳам индамади.

— Бу одамларни ажал хайдаб келган экан, — деди

яна Хорунбек Меъмор изтиробига шерик бўлиб, — улар шунчаки одамлар эмас, қасд қилиб изингиздан тушган одамлар. Буни мен пайқадим, устод. Сиз салтанат учун хавфли одам сифатида жўнатиляпсиз. Бу хорои шарифга етгандан кейин ҳам эҳтиёт бўлинг, салтанат ишларига аралашманг. Чунки улар қасд килган экан, яна бир куни кўзига қўринсангиз яра янгила-нади. Подшолар ҳам ўлиб туради — бирон амирзода тахтга чиққанигача ўзингизни панада тутинг. Ҳар бир пошоҳ ҳам янги тахтга чиққанида «яхши» бўлади — фуқаропарвар бўлиб ўзини кўрсатади. Яхши ваъдалар қиласди. Кейин секин-секин айнаб шуҳратпарастликка, майшатга, шубҳага юзтубан кетиб, мамлакатда мана шундай фожиалар содир бўла беради...

— Эҳ-ҳа-а, — деди Меъмор Хорунбекка жилма-йиб, — сиз ҳам кўп гапдан хабардор экансиз.

— Сиёсатни бир мансабдорлардан, бир шаҳарма-шаҳар юрадиган аравакашлардан сўраш лозим. Биз, устод, кўп нарсани биламиз. Ўзимиз мадраса кўрман-ган бўлсак ҳам bemayerifat эмасмиз.

— Саломат бўлинг. Сиз юравериб жаҳонгашта бўлиб кетибсиз.

— Ҳалиги одам, агар пайқаган бўлсангиз «бир ёш келинми, қизми бўлганда шўрвани тезроқ пишириб юборарди», деди. У ичимизда Бадиа қизимизнинг борлигини қаёқдан билди? Қизимиз йигит кийимини ўхшатиб кийиб юргани туфайли бир оз чалриди. Яна бир муддатдан кейин билиб олиши аниқ эди.

— Тўғри сезибсиз, — деди Меъмор.

— Мен ўзимни жўрттага унинг орқа томонига олиб турдим. У атрофга аланглади, кимнидир қидирди. Бизлар неча кишидан иборат эканимизни улар илгаридан яхши билишларини сездим.

— Вахима қиласверманглар, юрагим ўйнаб кетяпти, — деди Маъсума бека, — уларнинг шериклари рўпарамиздан чиқиб қолмасмикан?

— Ойижон, кўрқманг. Подшонинг биздан бошқа ишлари ҳам жуда кўп. Газандаларнинг боши янчилганини эшитса, ажаб бўлибди, шу қўйдек ювош одамларгаки, кучи етмабдими, бундок жаллодларнинг ўлгани маъқул, дейди. Хўп деяверинг. Бўлди энди. Улар қайтадан бизнинг изимизга тушишмайди!

Маъсума бека пичирлаб дуо ўқиб, қизига, ундан сўнг ўзига дам урди.

— Ана, қаранглар, эчкемар! — деди Бадиа.

Орқада келаётган иккинчи аравадаги йигитлар ҳам кум тепалиги устида томоғини лиқиллатиб турган каттагина эчкемарга қараши. Лекин негадир арава ўртасида нафаси чиқмай ўтирган Favvos Мухаммаднинг кўзлари олазарак бўларди. Орадан бир муддат ўтгач, яна Бадианинг дилбар овози эшитилди:

— Жаноблар, қаранглар, кум илони!

Соябон аравадагиларнинг ҳаммаси бошларини чиқариб, кум устида сувда сузгандек тез кетаётган илонга қараши. Иккинчи арава оти устидаги Заврак қамчини ҳавода ўйнатиб, илонга дўқ урди. Лекин илон парвойи фалак, ҳатто Завракка қайрилиб ҳам қарамай ўйлида кетаверди.

— Зўр илон экан! — деди Бадиа Завракка, — бундок Нишопурий жанобларига қайрилиб салом ҳам бермади-я! Ҳа-ҳа-ҳа-ҳа!

Заврак ҳам кулди. Бу бугунги биринчи кулги эди. Бу кулги дикқинафас бўлиб кетаётганлар учун худди қишдан чиққанларга баҳор гунафшасидек ғоятда тансик эди. Заврак Нишопурий дархол жавоб қилди. У бундай учирма гапларга ҳозиржавоб эди:

— Беғараз илон экан. Ақлли илонларнинг индамай, салом ҳам бермай илонга ўҳшаб юрганлари маъқул! Буни қаранг, юришлари қандай чиройли. Товусдек хиром қиласи-я!

— Сиз жанобни ўша илон авраб қўймадимикан? Жуда мактаб юбордингиз? — деди Бадиа.

— Менга афсуну авраш кор қилмайди. Онамлар Нишопур шаҳри яқинидаги чалдиворда етмиш йилдан бери истиқомат қиласидиган бир фолбинга ўқиттириб, дам солдириб берган туморлари қўлтиғимда. Менга инсу жинс ҳам яқинлаша олмайди. Мени афсун билан ром ҳам қилиб бўлмайди, менга заҳар ҳам таъсир қиласи-я, гап ҳам!..

— Ўҳ-хў-ў, — деди Бадиа, — гап таъсир қиласигини билардигу қўлтиғингизда тумор борлигини билмас эканмиз.

— Ҳа, бекам, сал-пал сурбетроқмиз.

— Ҳа-ҳа-ҳа-ҳа.

— Бетимнинг қалини — жонимнинг ҳузури, — деди яна Заврак кўз қисиб, Favvosga ишора қилди.

Бадиа оғир сафарда ҳеч кимнинг дилини оғритадиган гап айтмасликни кўнглига туккан эди, у Завракка жавоб қайтармади.

Ҳамма ёқ кўнғир қум тепаликлари. Уфқача чўзилиб кетган илон изи йўл. Жимжитлик. Аравада ўтирганлар қаёқдан келиб, қаёққа кетишаётганини ҳам билишмасди. Баъзан икки йўл келиб қолганида аравакаш Ҳорунбек офтобга қарап, ундан сўнг пешмати, ёнидаги қибланомани олиб кафтига қўяди. У баъзан қибланомани Меъморга ҳам кўрсатиб, ё ўнг ё чап йўлга ўтишни тасдиклаб ҳам оларди. Бир неча фарсаҳдан кейин қудук қелишини олдиндан айтар, қудукни эзмаланиб тасвирлар, ҳамма айтганлари тўғри чикарди.

Йўлга чиққанидан бошлаб камгап, хомуш бўлиб қолган Favvos Андхуддан чиқиб, қум ичига киргач, серхархаша бўлиб, гап ёқмай қолган эди. Шунақа экан, нега қўшилиб йўлга чиқди? Унинг жонга тегиб, ошналари билан гаплашмай фиш-фиша қилиб келаётгани фақат иккинчи аравадагиларга маълум. У анчадан бўён Зулфикор билан Завракни қон қилиб келаётган эди. Биринчи аравада келаётганлар бундан бехабар, фақат унинг хомуш, камгап бўлиши — Бухорони кўриш иштиёқида иссиқ уйини ташлаб келаётгани туфайли деб билишарди. Бадиа ҳам, Меъмор ҳам худди шундай деб ўйлашарди. Меъмор бошқа шогирдларидан кўра ҳам унга ўзгача илтифоту эҳтиром кўрсатар, чунки у ёш жихатдан сал каттароқ ва бунинг устига оиласлик эди. Заврак билан Зулфикор у билан қаттиқ ҳазил ҳам қилмасди. Аслида, унинг бирга узоқ сафарга чиққанидан хурсанд ҳам эмас эдилар.

Бу кун ҳам ўтди.

Йўлда қудук ёнида тунаб, овқатланиб ухлашди. Зулфикор билан Заврак яланғоч қилични тиззаларига кўйган ҳолда ухламай, галма-галдан қоровуллик қилишди. Кишилардаги руҳият, чарчоқликни сезган отлар ҳам жим, тиқ этган товуш уларни шубҳалик қарашга мажбур этарди. Жимжитлик, кимсасизлик, яrim ўлик табиат наинки инсон, жониворлар юрагига ҳам вахид

ма соларди. Буни мижжа қоқмай ўтирган Зулфиқор аниқ сезиб ўтиради.

Осмон тұла юлдузлар... Бунда юлдузлар шунчалик күп ва шунчалик яқын күринадики, шундоқ құл узатиб, шафтоли тергандек терса бўладигандай. Зулфиқор чалқанча ётиб осмонга қарап, баъзан осмонда узун нурли чизик чизиб юлдуз учарди. Улар йўлга чиққанида ярқираб турган тўлин ой ҳам ўроқ шаклини олибди. Тиккада турган «Етти қароқчи»га кўз ташлар; биз ҳам етти киши — юлдуз ҳам еттита... Рамазон ойлари унинг онаси шу «Етти қароқчи»га қараб сахар уйғонарди. У Минораи Калон орқасига ўтганида ўчоққа олов ёқиб, овқатга ҳозирлик кўрарди. Мана ўша «Етти қароқчи», кимсасиз чўл устида ҳам ярқираб турибди. Бир муддатдан сўнг Заврак ўрнидан туриб ўтириб, «энди сен ухлайвер», деди. Шу дам нарироқда, ота-онаси ўртасида ётган Бадиа секин ўрнидан туриб келиб, пичирлаб гапирди: «Оғалар, иккавингиз ҳам дам олинглар, мен коровулчилик қиламан». Бу ҳам илтифот, ҳам фармон эди — бажармаслик мумкин эмас. Зулфиқор билан Заврак: «Хўп, бориб ўз ўрнингизда коровуллик қилинг!» дейишиди. Бадиа шу лаҳзада ўз жойига кетди.

— Бу қизнинг мана шунақа қиликлари учун бир марта ҳайдалган эдим, — деди Зулфиқор Завракнинг қулоғига, — яна устоднинг дилини оғритишни истамайман.

Заврак Зулфиқор ёнида ётиб, оёғи билан сал туртиб кўйди.

— Бари бир сен шу қизни яхши кўрасан, иккавингнинг тилинг бир...

— Бунақа гапларни йиғиштири, ёлғон!

— Ўзларингиз сезмайсизлар... Бизлар анчадан бери сезамиз...

— Қўйсанг-чи бу гапларни!

— Ошиқ-маъшуқларнинг парвойи бўлмайди, улар фақат бир-бирларини биладилар...

— Бас, дўстим! Ана энди уйқум ҳам қочиб кетди!

— Сизларга менинг ғашлигим йўқ, аммо хавасим келади. Мени ҳам бирон одам яхши кўрармикан... Фақат кўзим... жуссам...

— Азизим, гап жуссада эмас, хафа бўлма, гап инсоннинг олижаноблигию ақлида...

— Шундоқ деймизу, лекин бари бир қизлар хуснга, қадду қоматга қарайдилар...

— Ухла энди, азизим!

Шу пайт Бадиа ўрнидан туриб, Зулфиқорнинг топасига келди.

— Жаноблар, нимани шивирлашиб гаплашяпсизлар? Мен у ерда ёлғиз қўрқяпман, ёнимдан вишиллаб илон ўтиб кетгандек бўлди. Ундан сўнг, сизлар ҳам эшитдингизми, ҳув анави томондан чиябўрининг овози келяпти. Чакалоқ болаларга ўхшаб увляяпти...

— Бекам, жойингизга борсангиз яхши бўларди.

— Хижолат бўлаверманглар, мен, ахир сингилларингман! Аравакаш Хорунбек ҳам бизни яхши билади, айб қилмайди. Ойимларга ҳам айтиб келдим.

— Бўпти, ёнимизда ўтира қолинг, — деди Заврак Нишопурий.

— Мен жуда сизларнинг ёнингизда ўтиришга зор эмасман, лекин қўрқяпман. Шунинг учун келдим. Ҳув, анави томонга қаранглар, қумликлар устида катта дев турганга ўхшайди. Уни қаранглар, юряпти. Ўшани қўриб, баданим жимирилашиб кетди. Девни ўлдириб бўлмайди, дейишади, шу ростми? Унинг қони тўкилса — ҳар томчисидан минг дев пайдо бўлаверади, дейишади. Шу ростми?

— Бу ваҳима гапларни қаёқдан топасиз-а, бекам? — Зулфиқор кулди.

— Ундоқ деманг, — деди Бадиа секин ва тобекорлик билан. — Бизларнинг бу ерда тунаётганимизни девлар, жинлар қўриб туришибди. Улар баъзан кўзга ҳам қўринишади. Улар бир дақиқада ҳамма ёқдан тўпланиб келиб, бизнинг ёнимизда базм қуришлари, баъзан шикаст беришлари ҳам мумкин. Жаноблар, ана, улар ҳув анави кум тепасида чўққайиб ўтиришибди. Менга қараб имо қилишяпти. Жуда қўрқиб кетяпман. Ёки бу бизлар ўлдириб келган айғокчиларнинг руҳи эмасмикан?

— Бекам, восвос бўлиб қолибсиз! — деди Заврак, — бир оз дадил бўлинг! Вахима қилаверманг, бу

ерда ҳеч нарса йўқ. Фақат ҳар замонда юмронми, чўл сичқоними, илонми ўтиб қолиши мумкин. Қароқчини тил тортириштада ўлдириган одамлар, сичқондан кўрқадими?

— Вуй, жуда кўрқяпман.

— Келинглар, яхши гаплардан гаплашайлик. Осмондаги юлдузларга қаранглар! Шу юлдузлар нима экан? Гавҳар тошлармикан?

— Улар жуда кўп-а. Қандай чиройли, — деди Бадиа юлдуз тўла осмонга қараб, — хаммасини тўплаб олгим келади...

Бадиани дев, ажиналар ваҳимасидан ажратиб олаёт-ганига қувонган Зулфиқор Шоший бошқаларга эшиттириштада, сёкин фазал ўқиди:

Жоним чикадур дард ила, жононима айтинг!
Мён хаста гадо ҳолини сultonима айтинг.

Ўртсанмак-у кўз ёшию ўлмак дурур ишим,
Бу қиссами ул шамъи шабистонима айтинг.

Қат-кат юрагим боғлади қон фунча мегизлик,
Бу дарди дилимни гули хандонима айтинг.

Қон ёшим эрур юз узра юлдуз каби сонсиз,
Ул кўзлари чўлпон, мохи тобонима айтинг.

Лутфий дилафгор тилар ҳажр элидин дод.
Аҳволини ул бегиму хонима айтинг.

— «Қон ёшим эрур юз узра юлдуз каби сонсиз», дебдилар ҳазрати Лутфий, — деди Бадиа завқланиб.— Худди бизни айтибдилар.

— Ҳазрат Лутфийни кўриш баҳтига мұяссар бўлганман. У зот бизнинг устоддан ёшроқ, баланд бўйли, қотмадан келган одам. Мавлоно узоқ йили устод ёнларига келган эдилар. Мадраса қурилишига ҳам келганлар. Тўғрими? — Заврак Бадиага қаради.

Бадиа бош қимирлатиб, бу гапни тасдиқладиу, овоз чиқармади, унинг хаёлидан отасининг бу машхур шоирга акаси Низомиддин ҳакида ёрдам сўраб мурожаат этгани, бу иш унинг қўлидан келмагани, бу уриниш натижага бермаганини келиб отасига айтганини ҳам эслади. Шоир Хуросондан чиқиб кетганини ҳам эшитган эди. Бундоқ улуғ зотлар икки хил гапирмаслигини кўнглидан ўтказиб, шерикларига гап қотди:

— Ҳазрат Лутфий отамнинг яқин ошнолари, у зот ҳам Ҳурсондан чиқиб кетганлар. Дарҳакиқат, Ҳурсонга киш кириб, совуқлик бошланяпти... Подшоҳ зулми ошиб кетди.

— Қайси подшоҳнинг зулми ошмабди? — деди Зулфикор. — Чингизхон, Угэдэйхон, Чигатойхон, Қозонхон, Қозоғонхон, Түғлиқ Темир, Кебакхон... Қайси бири фуқарога яхшилик қилибди?

— Бу гапни биз айтсак ярашади, чунки бизнинг хонадондан ҳуруфия чиқди. Сиз, жаноб Зулфикор Шоший, эҳтиёт бўлинг, бундай гапларни айтишга одатланманг. Сарбадорлар ҳам ҳамма вақт шундай деб келганлар.

— Азизлар, гап аввал илон-чаёндан бошланди, — деди Заврак, — кейин жину девлар, энди подшолар... Энди яхши гаплардан гаплашайлик. Анави тўнғизнинг хириллаб ухлашига хавасим келяпти, — у Favvosни кўрсатди. — Сизлар икковингиз баҳри байт айтишиб ўтиринглар, мен озгина мизғиб оламан.

— Йўқ, энди ухлаш йўқ! — деди Бадиа ўрнидан туриб кетаётган Завракнинг этагидан тортиб, — кемага тушганнинг жони бир!

— Айтмадимми, сиз Кебакхондан ҳам золимсиз! — деди Заврак яна қайтадан жойига ўтириб. — Сизлар эркинроқ гаплашиб ўтиринглар деб, сизларга муруват қилаётган эдим. Сизлар яхшиликни билмаянисизлар. Дунёда жину дев, подшоҳу илон-чаёндан ташқари «бўсаи канор...» деган гаплар ҳам бор...

— Жаноб Нишопурый, сал эсларини йиғиб олсинлар! — деди Бадиа, аслида бундай ҳазиллар ёқса ҳам шарму ҳаёй йўл бермагай. — Тил югуриги...

— Бошга! — деди Заврак Нишопурый дархол.

Тонг гира-ширасида ухлаб, ҳордиқ олган аравакаш отларни суғориб, араваларга кўшди, улар наридан-бери юз-қўлларини ювиб, йўлга тушиб кетишли.

Кўп ўтмай чинакамига қум барханлари бошланди. Андаккина совиган кумлар қуёш кўтарилиши билан яна қизий бошлади. Аравада мудраб келётган Бадиага отаси кум тепа устида кулча бўлиб, ўзини офтобга солиб ётган каттакон чипор илонни кўрсатди. Бадиа

кўзларини очиб, илонга қаради, уйқуси ҳам қочиб кетди.

Кум, кум, кум...

Эртасига ҳам яна шундай юриш; ҳамма ёқ кум, йўлнинг поёни кўринмасди. Ҳам толиш, ҳам диққатли...

Инденига, иккинчи аравада анчадан бери фингшиб келаётган Favvos Мухаммад арава ўртасига ётиб олди; буларга қўшилиб йўлга чиққанидан пушаймон бўлиб келаётган бадавлат хонадоннинг лўмбиллаган ўғли аравада осмонга қараб ётиб олиб, ох ура бошлади. Заврак билан Зулфиқор аввал унинг бу қилигини яшириб келишаётган эди, бир дамдан кейин бу ҳолга кўзи тушган Бадиа Зулфиқорга «Нима гап?» дегандек имо қилди. Зулфиқор унга ҳеч гап йўқ, деган ишорани қилди. Лекин аслида Favvos Мухаммад енгилтаклик қилиб, ўз йўлдошларини сўкиб, оғзидан кўпик чиқариб, ох уриб ётарди.

— Хув, уят бўлади! Бу нима қилиқ? — деди Заврак.

— Сен лаънати мени йўлдан оздирдинг! — деди бақириб Favvos, — бўлмаса мен Ҳиротдан чиқмаган бўлардим! Нега мен сенларга қўшилдим?! Менга нега керак эди бу азоб! Сен мени чалғитдинг!

— Ўзингиз хоҳлаб келдингиз, Завракда айб йўқ,— деди Зулфиқор. — Биз ҳатто сизни ҳисобга қўшмаган эдик.

— Сиз аралашманг! Сиз буҳороликсиз, юртингизга кетяпсиз!

— Мен сизни ранжитиш ниятида айтиётганим йўқ. Ўзингизни қўлга олинг, йигит кишиносиз! Уят бўлади! Иккиласми, бу енгилтаклигингизни устод сезиб қолсалар хафа бўладилар!

— Сиз менга насиҳат қилманг! Мен бунақа кумда юролмайман! Сизнинг ошиқ-маъшуқлигингиз учун мен кумда сарсон бўлиб ўлиб кетолмайман! Бола-чақала-рим бор!

— Нодон экансиз! — деди Зулфиқор оёқларини тарвақайлатиб арава ўртасида ётган Favvos Мухаммад тагидан тиззасини тортиб олиб. У «oshiq-maъshuk» сўзи учун Favvosning лунжига туширмоқчи эди, ўзини тутди.

— Фойдаси йўқ! — деди Заврак Зулфиқорга бошини сарак-сарак қилиб. — Бу тўнғизнинг шунақалигини билардим! Илгари ҳам бир бор шунақа қилган... Савдогарнинг ўғли-да...

— Ўзинг тўнғиз! — бақирди Favvos.

— Бу имтиҳондан ҳам ўтмаган, сизга ўхшаб ертўла синовида ҳам бўлмаган. Устод Қавом ўртага тушиб, устодга шогирд қилиб берилган. Буни қаранг, қилаётган қилиғига илонлар пўст ташлайди!

Favvos Зулфиқорга ҳам, Завракка ҳам қарамай, осмонга қараб, оғзидан кўпик чиққариб, ох ура бошлиди.

— Во-й, во-й, ўламан... қумларингнинг ҳам падарига лаънат! Мени бошлаб олиб чиққанларнинг ҳам падарига лаънат! Тўхтатинглар!!! Араваларни тўхтатинглар! Қайтиб кетамиз! Мен орқага қайтиб кетаман! Во-й-ой!

Биринчи аравада кетаётган Бадиа яна Зулфиқорга қаради:

— Нима гап? Нима деяпти?

Зулфиқор елкасини қисди.

— Аравакашга айтинглар, орқага қайтиб кетамиз! Вой,вой, — деди яна бақириб Favvos Мұҳаммад.

Бу гапларни эшитган Бадиа аравакаш Хорунбекдан илтимос қилиб, биринчи аравани тўхтатди. У ота-онасига хеч нима демай аравадан ерга тушди-да, иккинчи аравага ўтди. Аравалар яна юришда давом этди. У Зулфиқорнинг рўпарасига ўтириб, отга мишиб бораётган Завракка мурожаат этди.

— Нима гап?

— Эрталабдан бери шу гап, бекам, — деди Заврак, — қайтиб кетаман, деяпти.

— Во-о-й, во-о-ой, ўламан! Қумларингнинг падарига лаънат, ўламан! Араваларни қайтаринглар! Ҳиротга қайтиб кетамиз! Во-о-ой...

— Жаноб Favvos, бу нима қилиқ?! — деб Бадиа оғзидан кўпик чиққариб, аравада чалқанча ётиб олган Favvosга тик қаради.

— Йўқ, мен қайтиб кетаман!

— Қайтиб кетиб бўлмайди, тушунинг ахир! Биз Жайхунга яқинлашяпмиз. Жуда кўп ўйл юрдик. Хоҳламас экансиз Майманада айтишингиз мумкин эди!

— Мен бормайман! Қайтиб кетамиз, во-ой...

Бадиа ҳайрон бўлиб қолди. У дам ғазабланди, дам ўзини қўлга олиб, тишини-тишига қўйди.

— Тоза дард устида чипкон бўлди-ю, Заврак оға, сиз тушунтиринг, йигит киши уялмайдими?!

— Гап юқмаяпти, бекам!

— Мен хеч нарсани билмайман! Мени Ҳиротга қайтариб олиб боринглар!

— Нима қиласиз? — Бадиа Зулфиқорга қаради.

— Бу хеч кимнинг гапига қулоқ солмаяпти. Устодга хабар қилиш керак.

— Устоднинг ғами ўзига етмайдими!

Бадиа яна унга мурожаат этди:

— Ўзингизни қўлга олишингизни сўрайман! — деди у кўзларида ғазаб ўтлари чақнаб. — Йўқса, жазойингизни бераман! Сиз ҳаммани безовта қиляпсиз!

— Бор, ўша аравангга! Мен Бухоросига бормайман! Мен касалман! Қайтаринглар араваларни!

Бадиа Зулфиқорга имо қилди, кейин жон-жаҳди билан буйруқ берди.

— Бу аблахни аравадан отиб юборинг! — У шу лаҳза этиги қўнжига қўлини тикиб ханжарини олди. — Айтганимни қилмасангиз, тўнғизни шу ерда ўлдираман!

Бадианинг буйругини икки қилиш асло мумкин эмаслигини биладиган Зулфиқор сапчиб ўрнидан туриб, ох-воҳ уриб, ялпайиб ётган Favvosni азот кўтариб қумга отиб юборди. Тўнкадек гурсса қумга тушган Favvos апил-тапил ўрнидан туриб, дод солиб, арава орқасидан эргаша бошлади. Бу ишдан биринчи аравада кетаётганлар ҳам хабардор бўлди. Тишини-тишига қўйиб келиشاётганлар индамади. Учала арава ҳам тўхтамай кетаверди.

— Номард! Қўрқок! — деди Бадиа.

Favvos Ӯмаммад қумга ағанаб, оҳ уриб, бақира бошлади. Бир муддатдан кейин, талвасага тушган Favvos олислаб кетаётган аравалар орқасидан югорди, яқинлашгач, Бадиа кўзидағи ғазаб, ярқираб турган ханжарни кўриб орқага тисланди. Хуруфия тўдасига алоқам бор, мен акам қонига қон оламан, деб юрадиган Бадиа учун бу чўли биёбонда Favvosга ўҳшаганларнинг бикинига ханжар тикиб кетиш хеч гап эмас эди.

Фаввос Мұхаммад биринчи аравадагиларга қараб бақирди:

— Мени олиб кетинглар, до-од, тавба қылдим!

Хеч ким унга қайрилиб қарамади. У борми, йўқми, хеч ким парво қилмади. Кетаётгандарнинг ҳаммаси Бадианинг измида эканиға тушунди. Гўзал қиз унинг кўзига Қораилон каби даҳшатли бўлиб қўринди.

— До-о-о-д! Мени ташлаб кетманглар!

Бадиа арава устида индамай тура берди. Бир муддатдан сўнг унинг ишораси билан Заврак отдан сакраб ерга тушди, ўрнига Зулфиқор отга миниб, йўлда давом этаверишди. Қумга сакраб тушган Заврак анча нарида судралиб, дод солиб келаётган Фаввос Мұхаммадни учинчи аравадаги юклар устига чиқариб қўйдида, ўзи яна югуриб келиб, иккинчи аравага — Бадианинг ёнига ўтирди. Бу ҳолни кўрган Маъсума бека, Меъмор ва Ҳорунбекларнинг юраги таскин топиб, индамай кета бошлишди.

— Чикдими? — секин сўради Бадиа.

— Ҳа, — деди ўрнашиб олиб Заврак, — асбоблар орасига тикиб қўйдим.

— Шунча йилдан буён мен унинг бунақа қиликлари борлигини билмаган эканман. У ҳайвоннинг ўзгинаси экан-ку!

— Оғир бўлинг, қаттиқ гапирманг, бекам! Ханжарингизни ҳам бекитиб қўйинг! — деди Зулфиқор, — бу ҳам бир тутқаноқдек дард. Қийинчиликни кўрмаган хомсемиз одам-да. Шунақаси ҳам бўлади.

— Ҳўп, — деди Бадиа Зулфиқорнинг айтганларига амал қилиб.

— У ҳамма нарсани кузатиб боряпти, — деди Заврак.

— Яна оҳ-воҳ қилиб ўйин кўрсатмасин.

Уч арава қумликлар оралаб, олдинга кетаверди. То кечгача улар миқ этмай боришди. Отлар ҳам обдан чарчади...

Шу чарчаб толиққан оғир бир пайтда иккинчи аравадаги отига миниб кетаётган Зулфиқор орқада Заврак билан ёнма-ён хомуш ўтирган Бадиага эшитилар-эшитилмас, илгари ғинғиллаб айтадиган қўшиғини айта бошлиди:

Жоним чиқадур дард ила, жононима айтинг!
Мен хаста гадо ҳолини султонима айтинг...

Ковоқ солиб ўтирган Бадиа бошини кўтариб, жилмайди. Унинг лабларидағи табассумни кўрган Зулфиқор, ашулани яна ҳам баландроқ олди. Биринчи аравада кетаётган Ҳорунбек орқасига қайрилиб қараб, «Бормисан, укажон!» деб хурсанд бўлиб кетди.

— Каттикроқ айт! Ичимиизда ҳасрат тоғини йиқичадиган паҳлавон ҳам бор экан-ку!

XXVII б о б

БЕХУДУД ҚУМЛИКЛАР...

Баҳри мухитдек беҳудуд қумликларнинг тўқ сарик, қўнғир «тўлқин»лари силсиласи кўзни оларди. Қум барханлари силсиласи узра жимиirlаб ҳарорат кўтарилар — бу ерда иссиқлик жуда баланд бўлишига қарамай Меъмор кийналмай нафас олар эди. «Дўзах» деб аталмиш Қизилкум оралиғида ҳам чўпонлар яшарди. Негадир бу ерларда Меъмор яхши нафас олиб, ўзини бардам сеза бошлади. Ҳорунбек ҳам илгари бу ҳикматни сезган эди. У ёлғиз турган Меъмор ёнига келиб, ҳавонинг қизик бўлишига қарамай беғубор, соғ әкани, бу ерларда киши асаби жуда мулојийму мўътадил бўлишини айтди.

— Сўзингиз жуда тўғри, иним, — деди Меъмор кафтларини бир-бирига ишқалаб, — қумда ҳаво қизик бўлишига қарамай, нафас олиш қулай. Асаблар ҳам юмшаб, киши кайфияти кўтарилади. Ана, орқада рутубатли Хирот қолди, кейинги йилларда мен ўзимни жуда ҳақиру ҳаста ҳис этардим. Ҳозир биз ўша «рутубат»дан холи, таъқибдан узок қум оралиғидамиз...

— Ҳақ гап, — деди Ҳорунбек, — аммо сиз ҳазрат, таъқиб дедингиз, дарҳақиқат, Мухаммад Арғун айвоқчилари сув илондек кишининг ичига кириб кегади. Устод, сиз ҳамма шогирдларингизга ҳам бирдек ишонасизми?

— Ишонаман. Шогирдларим ичидаги хоин ўйқ.

— Мен-чи? Мен бегона кишиман-ку? Менга ишонасизми?

— Ишонаман! Сиз яхши одамсиз. Сизнинг инсоғли одам эканингизни ўша биринчи куниёқ жамолингиздан сезган эдим.

— Ташаккур, устод! Сиз юраги пок, чинакам меъмор, зиёли киши бўлганингиз учун шундай деяпсиз. Менга ишонмасангиз ҳам бўларди. Мен сизнинг ўрнингизда бўлганимда, қизиму рафиқамдан бўлак ҳеч кимга ишонмасдим. Сиз ҳақиқатан ҳам таъқиб остидаги кишилиз. Сарой сизни «хавфли одам» ҳисоблади.

— Бу гапларни қаёқдан биласиз, иним?

— Эшитганман.

— Таажжуб! Менинг бошимга тушган фусса карвонсаройларга ҳам ёйилган экан-да.

— Сизнинг дардингизга ярим Хуросон шерик. Амирзодалардан зулм кўрганларнинг ҳаммаси сиз томонда. Мен ҳам зулм кўрганман, аравакашлик — кейинги касбим. Асли ота-бобом бўзчи ўтган, ўзим ҳам бўз тўқийман. Мен Сайид Имодиддин Насими, Мир Қосим Анварнинг китобларини ўқиганман.

— Бундок денг, — Меъмор аравакаш Хорунбекка тикилиб қаради, — дунёда бафри бутун киши йўқ экан-да!

Улар бир муддат сукут ичидаги чексиз кумликларга тикилишиди. Меъморнинг хаёлига ялт этиб, Мир Қосим Анвар билан «Маликул калом» Лутфий келди. Бу икки шоир ҳеч қачон ўз бетоблигини ўзгага билдирамаслиги, доимо «Мен саломатман, шукур» дейиши Меъморга ёқди. Меъмор доимо ўзининг бардам эканлиги, ишлаб чарчамаслигини, намойиш қиласарди. Яхши ният — ярим мол эканида ҳикмат бор бўлганидек, киши ўзининг доимо соғ эканини айтиши узок умр бағишлийди. Киши танидаги аъзоларнинг ҳам қулоғи бор: ўзининг бардамлигини эшитган аъзолар яна соғ туриб хизматни бажараверади. Уч алломанинг бу одати кейинчалик ҳарбий юришларни тўхтатиб, Хуросон тахтида ўтириб қолган Шоҳруҳнинг ҳам қулоғига этиб, у ҳам доимо амирзодаларга, элчиларга, мансабдор шахсларга ўзининг фоятда бардамлигини атай билдириб турарди. Унинг учун бундай килиш — саркардалар, амирзодаю беклар подшоҳ қариб, касалманд бўлиб қолган, деб бошқа амирзодага эътиимод қўймасликлари учун керак эди.

— «...Фа айнама таваллу фасамма важхуллохи¹» — деди Хорунбек қум барханларига тикилиб турган Меъмор дикқатини ўзига жалб этиб. — Пиримиз Фазлуллоҳ ҳазратлари демишким, «важх» сўзи ўн тўрт рақам бўлиб, бизнинг йигирма саккиз ҳарф бутун мавжудотнинг асосидир...»².

Меъмор Хорунбекка яна тикилиб қолди. Унинг кўз олдига қатл этилган ўғли Низомиддину жангари Аҳмад Лур келди. Ёшлар-ку бу фирмка «афзаллиги» билан сеҳрланган бўлса, аммо сиз, Хорунбек унча ёш эмассиз-ку, сиз нега бу ишни ихтиёр этдингиз? Не зарурат бор эди, демокчи эди, бундан бир йил бурун Хуросондан ҳайдалган шоир Мир Қосим Анвар кўз олдида гавдаланди. Меъмор индамай қараб қолди. Ҳалаб шаҳрида амирзодалар томонидан териси шилиниб, минг қийноқ билан ўлдирилган улуғ шоир ва мутаффакир Сайид Имодиддин Насимий хаёлидан ўтди.

— Ҳазрат Насимий шиа мазҳабида бўлиб, Мансур Ҳаллож каби «аналҳақ» деди ва ўзини, оллоҳман, деб куфр йўлига ўтди... Шу сабабли қатл этилди.

— Мироншоҳ кишилари Фазлуллоҳ ҳазратлари хусусида авомга шундоқ гапларни тарқатди. Аслида бу мўътабар зот авом тарафида туриб, фуқарога кўп зулм етказаётган амирзодаларнинг кирдикорларини коралардилар.

— «Бақара» сурасини тўлароқ ўқимоқ лозим, — деди Меъмор. — «Валил-лоҳил машрику вал-мағрибу фа айнама таваллу фасамма важхуллохи. Иналлоҳа восисиъун аълимун!», яъни, машриқ ва мағриб Оллоҳникидур ва қаерга сиз бокманг, унда Оллоҳ важхи бор. Ҳақиқатан ҳам унинг даргоҳи кенг, у ҳамма нарсадан воқиф, дегани.

— Офарин, устод!

— Айтадурларким, шоир Насимий хўб соҳибжамол баҳодир киши экан... Шоирнинг терисини шилаётган жаллод унга қараб: «Сен — аналҳақ бўлсанг,

¹ «...Сиз қаерга бокманг, унда Оллоҳ жамоли бор...» («Куръон»нинг «Бақара» сурасидан).

² Хуруфийлар тъерифича, «Важх» сўзидаги ҳарфлар: вов — 6, жим — 3, ҳаввос — 5.

нега сарғаймоқдасан?» — деб савол берибди. Кўп қон оқиб азоб чекаётган шоир айтибдурким: «Мен мухабbat осмонининг қуёшиман, хамма вакт яркираб турганман. Қуёш ҳам ботаётган чоғида сарғаяди...» Териси шилиниб, ўлдирилаётганда бундок гапни фақат фавқулодда баҳодир инсонлар айта олади. Бу мислсиз баҳодирликдан амирзодалар таҳликаға тушган. Мир Қосим Анвар, мавлоно Ашраф Мороғавий, Сайид Имодиддин Насимийлар улуғ шоирлардир.

— Ташаккур, устод! Мен сизни бунчалик олижаноб эканингизни билмас эканман. Ташаккур! — деди терисига сиғмай Хорунбек.

— Азизим Хорунбек, биз жуда гапни чуқурлатиб юбордик. Келинг, яхши гаплардан гаплашиб, кулишайлик. Ҳиротда ёруғлик кўрмай, юракларимиз андуҳ зулматидан чиқмади.

Хорунбек кулди. У Меъмор билан яна хуруфия ҳақида, юрагидаги ўзи учун муқаддас ва олий тояларни тилига чиқариб, узоқ гаплашиш истаги бор эди. Аммо Меъморнинг яна фикрий чуқурлашишдан бош тортаётганини сезиб, унинг хоҳишига қаради.

Меъмор индамади. Ҳозирги замонда энг тараққий топиб, айниқса, мадраса талабалари, майда хунармандлар орасида кенг тарқалиб кетган «сўфиёна фалсафий оқим — хуруфия фирмаси унинг кўнглидан ўтди. Бу «гирдоб»га тушиб, ҳалок бўлган ўғли Низомиддин асло кўз олдидан кетмасди.

Отаси билан Хорунбекнинг анчадан бери бошқалардан ажралиб, гаплашаётганини, айниқса, отасининг ниҳоятда жиддий пайтда қиласидан хатти-харатларини узоқдан кузатиб турган Бадиа атай келиб, сухбатдошлар ёнига ўтирди. Хорунбекнинг «Фазлуллоҳ...» деганини эшишиб қолиб Бадиа гапга аралашиб кетди.

— Илоҳийлик оддий фуқарода мужассамдир, олло нурига кирган кимса ҳар қандай хукмдорлардан ҳам юқоридир. Ҳазрати Фазлуллоҳ аналҳақ, деган эди оғам. Лекин хуруфия маҳфий фирмасининг яхшироқ кучтўпламай якка-якка подшохга тиф кўтармоғи шошмаршошарлик бўлган.

— Офарин! — деди Хорунбек кулиб.

— Тўрт томон кум, хайрият, бунда ҳеч ким эшитмайди. Агар сен бу гапни Ҳиротда айтганингда оғангдан аввал сенинг бошингни узардилар. Мен қандай фарзандлар орасида қолдим... Э, худо, тавба қилдим, ўзинг кечир! — деди Меъмор

— Устод, мени авф этинг, — деди шод кулгидан ўзини тутиб Ҳорунбек, — хуруфия ниҳоятда пок ва адолатли, авомпарвар фирмадирким, дунёning жамийки ёшлари уни орзу қиласидар.

— Оғамнинг айтишларича, — деди Бадиа, — Ҳалаб шахрининг ҳокими Ёшбек Сайид Имодиддин Насимий ҳазратларини тутиб, зиндонга ташлаган ва қийноқ билан қатл этган. Ёшбек амирзода Султон Муайдига тобе беклардан бўлган... Шоирнинг фожиали, лекин баходирона ўлими шундай бўлган.

— Насимий «аҳли зоҳир шуароси» эмас, балки мажозий мухаббатни куйлаган мутасаввуф — сўфи шоир эканини ҳазрат Лутфий айтган эдилар, — деди Меъмор беихтиёр гапга аралashiб.

— Шу сабабли Сайид Имодиддин Насимий ва унинг устоди Фазлуллоҳни шаҳид этдилар. Хуруфийлар шу сабабли Шоҳруҳ хаётига қасд қиласидар! Мир Қосим Анвар Ҳиротдан ихрож этилди... — деди Ҳорунбек. — Лекин «Шоҳнома»ни ифтихор этган Бойсункур Мирзо устоди Мир Қосим Анварни чин қалдан севарди. Улугбек ҳам Мир Қосим Анварга жуда яқин дўст бўлган, у шоир бошига ҳам сиз ҳазратнинг кунингиз тушган. Ҳиротдан ихрож қилинган бу шоир Улуғбек даргоҳидан паноҳ топди, унинг хурмати ва ишончига сазовор бўлди.

— Бу тафсилотларни бундан буён айтиб юрмокликнинг ҳожати йўқ! Мен ҳам кўп гапириб юбордим, — деди Меъмор қизига насиҳатомуз. — Мен, онанг ёшимизни яшадик, лекин сен ёш жонингга жабр қилмагин, бу гаплар яхшилик келтирмайди! Сipoҳ билан гаплашмокчи бўлсанг қўлингда табаринг бўлсин, деганлар. Амирзодалар биз билан гаплашиб ҳам ўтирмайди. Бир ишора билан бош узилиб кетиши ҳеч гап эмас. Қизим, тилга эҳтиёт бўй!

— Тўғри, — деди Ҳорунбек, — мен устоднинг сўзларини қувватлайман.

Бадиа шаддодлик қилганидан хижолат бўлиб, ерга қаради.

Меъмор гапни бошқа томонга бурди:

— Амирзодалар хунхорликлар, бемаъни ишларни қилиб қўйиб, салтанат таназзулига юзтубан кетаётганида бу айбни бошқа бир одамга тўнкаб, «фарзин» айирбошлашадилар ёки «фил суради»лар. Бунинг маъноси шуки, Фарғона жангидаги кўп одам нобуд бўлиб, Сайхун бўйларида аҳвол ёмонлашиб, фуқаро қашшоклашиб кетди. Худованднинг қудратини қарангки, зироат ҳам унмади. Бу «номаврид жангнинг сабабчиси Ёқуббек» деб, ҳамма гуноҳни унга тўнкаб, бошини олиб юборишиди. Кейинги вактларда кўп эътиборлик одамлар хуруфияда айбланиб, Хуросондан ялпи чиқарив юборилмоқда. Бу ҳам таназзул. Мен ишонаманки, амирзодаларнинг ўзи қолиб, бу иш учун вазир Мухаммад Арғуннинг албатта боши кетади! Амирзодалар ўз жиноятларини фуқародан яшириб бирон вазиру саркардани сўйиб юборадилар. Шу билан мамлакатда яна ҳукмронликни давом эттириб, айшу ишрат сураверадилар...

Хорунбек билан Бадиа Меъморнинг «салтанатга тегадиган бундок гапларни гапирманлар», деб таъкидлашию, аммо ўзининг беихтиёр гапириб юборишига ичдан кулиб, бир-бирларига караб қўйишиди. Бу гуфтигўли сезиб турсалар ҳам боядан бери келишга ийманиб турган Зулфиқору Заврак бир муддатдан сўнг Меъмор атрофини ўрашди.

— Азизлар, — деди яна Меъмор, — биз Сайийд Имодиддин Насимий билан Мир Қосим Анварни ёдга олдик. Келинглар, у зоти боборакотларнинг рухларига бафишлайлик!

Ҳамма чўкка тушиб, юзига фотиҳа тортди.

То уфқача чўзилган бехудуд қум барханлари беҳисоб қабрларга ўхшарди. Бу қабрларда дорга осилган Низомиддин ва унинг олти ўртоғи, Фазлуллоҳ Астрободий, Сайийд Насимий, Мир Қосим Анварлар ётгандай бўлиб кўринарди.

ХАЛАЧ ЯҚИНИДАГИ ҚУМ БЎРОНИ

Қораилоннинг қумга кириб, ғойиб бўлганини эшитган Мұхаммад Арғун, уни Мовароуннаҳр орқали бошка мамлакатга қочиб кетди, хаёл қилди. Чунки у қадами етган ерда қон тўкиб, ишни тез ажрим қиласарди. Фоятда махфий бўлишига қарамай, Хурросонда қилган хунрезликлари ва жуда хавфли кимса бўлиб қолганлиги сабабли амирзодалардан бирининг одамлари, албатта, бир куни уни йўқотиб юборишлари аён бўлиб қолган, буни унинг ўзи ҳам сеза бошлаган, вақт фаниматида, тилло тангалар йигишга ружу қилаётгани юқори мартабали мансабдорлар ўртасида унга нисбатан шубҳа туғдира бошлаган эди. Хуллас, уни бериб қўйилган чексиз имтиёз салтанатнинг бошига бир кун бориб бало бўлишини сарой ахли тилида бўлмаса ҳам, дилида мулоҳаза қиласа эди. Фукарони қўй подаси деб бўлмайди, ситам ошиб, вақти соати етгач, «қўйлар» йўлбарсу шерларга айланиб кетади — у на шоху, на Қораилондан кўркади! Ўзини подшога Мұхаммад Арғундан ҳам яхшироқ кўрсатиб юрган Қораилоннинг ғойиб бўлганидан Мұхаммад Арғун шу сабабли ҳам таҳликага тушмади, аксинча қувонди. Қани энди шу ярамас йўқолиб-йитиб кетсаю у юзага чиқса! Вазири тафтиш Мұхаммад Арғун яна бир ой кутиб, агар келмаса, кейин кириб подшоҳга хабар қилажагини дилидан ўтказди. Аслида подшоҳ Қораилонни Мұхаммад Арғундан ҳам кўра яхши биларди.

Вазир Қораилоннинг шериги билан бирга қум ичидага ўлиб ётганидан мутлақо хабари йўқ эди.

Меъмор Favvosнинг талвасага тушиб, оҳ-воҳ урганидан кейин барчанинг кайфи бузилиб, сукут ичидаги келаётгандаридан, Маъсума bekaga одатдагидек гап қотиб, кўзларига жуда катта бир бинонинг шаклу таровати кўринаётганини, Бухорога омон-эсон этиб боргандаридан сўнг унинг тархини яхшилаб қофозга чизажагини айтди. Бу шундай бир мадраса бўладики, рўйи заминда унинг тенги топилмайди. Қани энди шундай бир одил подшоҳ бўлсаю унга ўз хунари билан хизмат этиб, ундан яхшилик кўрса! Баъзида у

пешмати ёнидан тошқаламу дафтарини олиб, арава-нинг чайқалиб, қалқиб кетаётганига қарамай нималарнидир чизиб, ёзиб қўяр эди. **Маъсума** бека ҳамма вакт унинг фикру ўйларини кувватлашга, диққат билан тинглашга ўрганиб қолган, арава устида ҳам у **Хиротдагидек** меҳрибонлик кўргизиб, чолининг фикру ниятини маъқулларди. Аслида, ҳозир унинг юрагига лойиҳа сифармиди, юраги **Хиротда** қолиб кетаётган ўғли Низомиддинда эди... Тиниб-тинчимас бу чол умр бўйи ўз лойиҳаларини, чизмаларини **Маъсума** бекага гапириб келди, аслида у унинг лойиҳаю чизмаларига асло тушунмасди. Аммо қадрдонининг тушуниб бўлмас ҳар бир чизиғу хатлари ҳам қадрдон ва аллақандай мўжизадай бўлиб туюларди унга. У **Меъмор** нинг гапларини эътиroz билдиrmай, сабр-тоқат билан эшитар, бош қимиrlатиб тасдиқларди. «Бир оёғинг гўрда, бир оёғинг ерда, қайсар чол, энди сенга иморат солишини ким кўйибди! Ўзингнинг иморатинг солиняпти!» — дейдиган бирон одам йўқ. «Инсон шунака экан-да, — деди ичида **Маъсума** бека, — бу самарқандликлар, бухороликлар ва шошликлар эртага ўлаётган бўлса ҳам бугун иморат солишади. Дашибти қипчоқликлар бойиса хотин олади, туркийлар бой бўлса — том солади... Том солиш у кишининг қонида бор-да...»

Хуфтонга яқин уч арава **Жайхун** бўйига — Карки шаҳрига етиб келди. Бу ер — Хуросон билан Мовароуннахр чегараси. **Меъмор** карvonсаройга тушибоқ, қизи билан бирга оқшом коронфисида жимиirlаб оқаётган дарё бўйига бориб, юз-қўлларини ювиб, бир-икки култум сув ичиши. Бу сув умр бўйи ичиб катта бўлгани Зарафшон сувидек тотли эди. У дарё бўйида хуфтон намозини ўқиди. Ўзингнинг руҳига тиловат қилиб, кўзидан ёш тўкиб бахшида қилди... Ибодатдан кейин у қизи билан бирга яна карvonсаройга келиб, йўлдошларига чехраси очилиб салом берди. Бир чеккада ғариб бўлиб ўтирган Favvosга ҳам яхши гапириди, ўзингизни ёмон сезмаяпсизми, деб сўради. Бу томони **Мовароуннахр**, кумликлар тугаб, далалар, боғу роғлар, экинзорлар бошланишини, дарёдан ўтиб Толлимарジョンга етгунча яна озрок кум борлиги, ундан у ёғи яхши бўлиб кетишини айтди.

— Мулла Фаввос Мухаммад иним! Машаққат бўлса ҳам Бухоройи шарифни кўриб қўйганингиз яхши, — деди Меъмор очик чехра билан. — Одамзод бир сабаб билан ўзга юрт, ўзга шаҳарларни ихтиёр этади. Сабабики бўлмаса, ким иссик ўрнини ташлаб, кум тепаликлари орасида саргардон бўлиб юрарди! Син-дидоби Баҳрий жаҳондаги жамийки баҳру дарёларни сузиг ўтган, ибн Ваттута ҳам еру сувда юриб, дунёни айланиб чиқкан...

— Кўнглим бехузур бўлиб... йўлдошларимни бе-зовта қилибман, устод, мени кечиринг, — деди бошини қўйи солиб Фаввос Мухаммад.

— Зарари йўқ, — деди Меъмор. — Буни йўл мешаққати деймиз. Бухорога етиб олсак, дам оламиз, барча мешаққатлар унутилиб кетади.

Фаввос Мухаммад эрталабдан ҳамма билан яна саломалик қилишиб кетдию, аммо Бадиа билан Зул-фикор Шоший юзига қаролмади.

Дарёдан оту араваларни ўтказадиган сол ва улкан қайиқлар Халаҷ шаҳрида бўлганлиги туфайли эрта тонгда уч арава яна дарё ёқалаб юра кетди.

Бир томон кум, бир томон сув...

Негадир Меъморнинг кўз олдида ғазабини ҳам, шодлигини ҳам билиб бўлмайдиган, қаҳри қаттиклиги билан бобосига ўҳшайдиган Иброҳим Султон кела бошлади. Халаҷ йўлида, чексиз кумликлар ичида, итти-фоқо бу пурқаҳр хукмдорни эсласига ўзи ҳам таажжубланди, кулча юз, ёноқлари туртиб чиқкан, япаски бурун бу амирзода оға-инилари — на Мухаммад Тарағай ва на Бойсунқурга ўҳшарди. Унинг башараси кўпроқ мўғулларни эслатарди. Ўз шахсию шуҳрати йўлида хеч қандай мулоҳазага бормай, ёмон кўрган кимсасини гезликда йўқотиб юбориши билан Мункахоннинг худди ўзи эди. Ўз рақибига кутилмаганда даҳшатли зарба берарди. Ўз кўл остидаги Исфаҳон, Шероз ва Машҳад беклари амирзодадан зириллашарди; кўп вақти отаси ёнида — Ҳиротда ўтишига қарамай, Эрондагилар ҳам кўркишарди. уни «мўғул шаҳзода» деб атардилар. Шу ёвуз одамнинг ҳадеб лоппа-лоппа ёдига тушавергани Меъморни чўчитди. Ёки бу савқи табииймикан? Яна у шу кумликлар ичида пайдо бўлиб қолса-я! Амирзода келишган хотинлар, ишрату тўшак ҳақида кўпроқ

ўйларди. Унинг учун ишратдан кўра муқаддасроқ нарса йўқ. Ҳамма нарса, жангу жадаллар, қирғину макрлар фақат шунга етиш учун бўлган тадбирлардан деб қарапди. Маърифатпарвар Улуғбек Мирзо билан Бойсункурлардан куларди. Маърифат авомни алдаш учун керак, дерди у. Бир куни у ўша ҳарамида қийнаб ўлдирган канизак учун мақбара қуришни меъмор Нажмиддин Бухорий билан устод Қавомга топшириди. Устод Қавом тезликда сафар анжомларини шай қилиб, Шерозга жўнадио, аммо Меъмор бормади: «Гариб канизак хукмдорнинг бир кечалик ишрати учун қурбон бўлиб кетди. Бу кийикнинг шохини қозик қилиш, бош суяк чаноғида май ичиш билан баробар. Гўзалнинг ўлигидан ҳам фойдаланиб, шуҳрат топадиларми?!» Кўйинглар, отонаси бағридан юлиб олиниб, у бечора ғариб қиз ҳарамга ташланган, тупроқда тинч ётсин! Мен бундок ишларга кўл урмайман!!» деди Меъмор. Шерозда ўша канизакка чиройли сафана қурилди. Лекин Иброҳим Султон ўз амрини бажармаган ва бунинг устига «носазо» гап айтган Меъморни ёмон кўриб қолган эди. Субудой билан Чигатой ишрат қилиб, ўз «куч»ларини кўрсатиш мақсадида қиз ўлдирганларини эшитган эдик, бу мўфул хукмдорларининг одати экан. Булар ҳам шу ишни қилибди, демак, қиёмат яқин қолибди, деди Меъмор. Бу қилиқ эркакнинг кучлилигини эмас, носоғломлигини кўрсатади. Меъмор бу сўзларни ҳамкасабалари, шогирдлари ичida эмас, мансабдорлар олдида ҳам тажанг бўлиб айтган эди. Бу гаплар амирзода қулоғига бориб етганига асло шубҳа қилмаса ҳам бўлади. Лекин Меъморнинг, аввало, раият, қолаверса, салтанат олдидаги мавқеи, Хурросону Мовароуннаҳрдаги шуҳрати унга қарши кескин чора кўришга йўл қўймас эди.

Чолнинг пинакка кетганини сезиб ўтирган Маъсу ма бека тўсатдан унга мурожаат этди:

— Ҳой, отаси, анави қумларнинг оқишини қаранг!

Сувга ўхшаб оқяпти.

— Ҳа, кўряпман.

— Анави юмронга қаранг! — деди Бадиа жимликини бузиб.

— Кўряпман.

— Нима учундир илонлар кўринмаяпти? — деди

атрофга аланглаб Бадиа, — ёки Халач шахри томонда илонлар каммикан? Эчкемар ҳам кўринмайди?

— Хув ана! Кум тепасига қаранг, — деди отда ўтирган Хорунбек. — Кумнинг оқиши, юронларнинг безовта бўлиши — бир ниманинг белгиси...

— Ниманинг белгиси? — дарҳол сўради Бадиа.

— Бўрон бўлиши эҳтимол, қизим. Лекин ҳаммаси худодан... — деди аравакаш. — Озгина шамолга қум оқса, орқасидан бўрон келади, дердилар. Буни «хаммир учидан патир», дейишарди. Бу ерларда гирдибо-лу бўрон кўп бўлади. Тезроқ Халачга етиб олсак яхши бўларди. От жониворлар ҳам роса тортяпти. Мўлжалимда Халачга кечга яқин кириб борсак эҳти-мол.

— Дарвоқе, шамол бўляпти! — деди Меъмор соя-бон араванинг ёнларини очиб. У терлаб-пишиб бораётган отга, орқадаги аравага, ундан кейинги учинчи юк ортилган аравага, унинг орқасидан келаётган икки йўрға отга ҳам кўз ташлаб қўйди. Машақкатли, иссиқ йўл бедов отларни ҳам бошқа отлардек, «мўмин» қилиб қўйган эди. Қуриб-қаҳшаган табиат ҳамма нарсани жизғанак қилиб, қовжиратаман, сувсизликдан қақратаман, менинг қайноқ шамолларим қашқирдан ёмон! Тимдалаб-титаман, дегандек бўларди. Меъмор Хорунбекка қаради. — Хув анави томонга қаранг, у гирдибод эмасми?

— Гирдибод! — деди Хорунбек.

Икки малла устун фалакка бўй чўзиб бураларди.

— Қибланомага қаранг, у қайси томон?

— Мағриби-шимол, — деди Хорунбек белбоғида-ги жез қибланомани кафти устига қўйиб. — Қора-кум. Тўғри юраверса, Сақарга, мағриб томонга юрилса, Марвга борилади. Бу йўлларда кўп юрганман. Аксар, мана шу Карки, Халаҷ, Сақар йўлида бўрон бўларди. Шу ерларда бир гап бор. Юронларнинг дарё томонга югуришида ҳам бир гап бор. Ишқилиб, ўзи арасин.

Олисда фалакка устун бўлиб турган икки гирди-бод орқасида яна «устунлар» пайдо бўлди. Арава ғил-дираклари остида шувиллаб оқаётган қумлар қолиб, Меъмор олис-олисларда гир айланиб, қуму янтоқларни осмонга олиб чиқаётган гирдибодлардан нигохини

узмас эди. Беш-олти «минора» фалакка бўй чўзиб, осмонга тўзон пуркарди. Улар гала минораларга ўхшаб кетарди. Олдингиси Минораи Калонга ўхшаса, оркадагилари Хиротдаги гала минорага, баъзан Мирзо мадрасасининг икки «гулдаста»сига ҳам ўхшаб кетарди. Бу янги мадрасани тўрт йилда куриб битирдию, тўйи насиб қилмади. Етдим деганда, йиқилди. Буюрган экан! У ер юзида жаннат яратиб, битганида ичкарига киролмай остононда йиқилиб ўлган Шаддодни эслади. У ҳам шундай бўлди. Худо ўша мислсиз боғни саккизинчи жаннат қилиб юборган экан...

Унинг кўз олдига Низомиддин келди — янгилишиб, аждар комига кетган болам, бутун бир салтанатга қарши таёқ билан жанг қилмоқчи бўлган эди. Сен қалтис ташлаган қадамнинг қурбони бўлиб қора ерда ётибсан! Шу лозимми? Бир тўда йигит мағрибдан то машриққача етган, лаккак лашкари бўлган салтанатни қулата олармидингиз! Сипоҳларнинг кучли қўллари гирибонингиздан тутиб, бўғиб ташларди. Салтанат билан ўйнашишнинг оқибати мана шунака! Биз бу ишни қилсак майли эди: ёшимизни яшаб, ошимизни ошадик. Биз ҳамма қабиҳликларни кўрдик, подшохга яқин юрмоқ — аждарга яқин юрмоқдан хавфли эканини билардик. Биз иморат барпо этардик, гарчанд подшоҳ учун қурилаётган бўлгани билан, бу фукаро мулки эди. Сиз, ҳали ҳеч нарсани кўрмаган ёўр гўдаклар, чалғиб аждар комига лаҳм этдек кириб кетдингиз! Полопон вақтингиздаёқ ёруғ дунёдан кетдингиз! Ана шунга куяман! Бу Захҳок ҳали кўп фарзандларимизни ейди! Ҳали-бери у ўлмайди. Агар бу Захҳок ўлса, у Захҳок тахтга чиқади. Агар у ўлса, ўрнига эҳтимол бошқаси чиқади. Эҳтимол Муҳаммад Султон чиқади... Шоҳруҳ: «Бизнинг салтанатимиз, худонинг хоҳиши билан, абадул-абаддир», деган. Биз ҳам дунёдан ўтиб кетамиз, аммо бу подшоҳлар тураверади... Йўқ! — деб ўзига ўзи хитоб қилди Меймор. — Бир адолатли подшоҳ келиб, ғариб-бураболар бошини силайди, мазлумлар золимлардан ўч олади! Интиқом пайти етади — алқасосу минал ҳақ! Эҳтимол у подшоҳ илм-маърифатга ривож бериб, ахли фузалога меҳрибонлик кўрсатар. Энг ёмони — кўнгилни киймалаб, фазабни аланг аолдирадигани шуки, зехни

паст, баъзи ноқобил мансабдорлар обрў учун кекса олимларга шогирд тушгандай бўладилар-да, оз муддатда улар мадрасаю мактабда «таҳсил» кўриб, олим билан «биргаликда илм билан машғул бўлади»лар. Сиёсату қилич ва оталарининг зўрлиги билан «олим» бўлиб оладилар. Кейин эса, илмнинг шўрини қуритадилар!»

Темурийзодаларнинг орасида учраб турадиган баъзи мана шунақалари Меъморнинг юрагини сикиб, ғазабини кўзғатарди. Ҳукмдор Иброҳим Султон ўзининг ишрату кишиларни қийратишдан бўлак нарсани билмовчи жоҳил, нодон, дағал бир одам эканлигини ниқоблаш мақсадида аввал риёзиёт билан шуғулланмокчи бўлди. Юраги сиқилиб, дафтарни улоктириди-да, устозига «тўн кийдириб, жўнатиб юборинглар», деди. Риёзиёт бўлмаган гап, ўзини билган кимса бунаقا ишлар билан бошини қотириб юрмай, ҳарбу зарбни машқ қилгани маъқул, деди. Лекин баъзан оғаларидан кейинда қолмаслик, улардан ақллироқ кўриниш мақсадида яна аҳли фузалога кўз ташлади. Бу гал у устод Қавомга «муҳаббат билан» қараб, меъморчилик санъатини ўрганиб, мамлакатда кўп бинолар қурдирмокчи бўлди. Бу ҳам бўлмади, тез орада устод Қавом билан ҳам хайрлашди. Унинг ҳандасавий ҳисобу ўлчовлари асло миясига кирмади. Устод Қавом янги қасрлар тархини тасвирлаётганида унинг хаёли ҳаробаларда кезди, мағлубларнинг оҳ-зоридан нашъаланди.

Баъзан шундай узундан-узун хаёллар Меъморни қуршаб олиб, бир муддат тарёку наша элитган одамдай бир нуқтага тикилганича хаёл суреб қоларди. Бундай чоғларда ёнида ўтирган хотинию кизини ҳам кўрмасди — у тамоман узок-узокларда юрарди. Отасининг бундай тушкун пайтларида Бадиа унга ҳалал бермас, отажон, ҳадеб бундай уҳ тортавериш кишини ичдан емиради, дея олмасди. Бу — аччик қисмат захри эканини, бу қалб жароҳатини даволаб бўлмаслигини тушунарди.

Темурийзодалар ўзларига ён босган зотларнинг бошидан тилло сочардию, аммо уларнинг ҳукмдорлигига қиттаккина мункир келган кимсани асло кечирмасди — қаттиқ ўч олардилар. Буни сарой атрофидаги мансабдорлар эмас, Хурросону Мовароуннаҳр аҳли

яхши биларди. Вазиру вузаро орасида бир қалтис қадам ташлаб, бутун умрга «шубҳали кас» бўлиб қолган бундай одамлар ўша замонда «сарбадор»ликда, Шохруҳдан то Алауддавла замонигача «хуруфия»да айбланиб, пойтахтдан анча нарига сурин қўйиларди. Тасаввуф кишилари Машҳадга, мансабдорлар Астрободга, сипоҳлар бўлса, тоғ ичидағи Наранг томонлагрига жўнатиларди. Меъмор Нажмиддин Бухорий ҳам умри ғурбатда ўтиб кетадиганлар тоифасига кириб, кексалиги туфайли Наранг тоғига маъдан қазиш учун эмас, умрини тоат-ибодат билан ўтказиш, токи у дунёга бегуноҳ борсин ниятида хажга жўнатилган эди. Аммо Бойсунқурнинг аралашуви билан ўз она юрти Бухорога жўнади. Бунга ҳам шукур қилмоқ керак, деди у ўзига ўзи...

Уч арава ёнидаги отлар билан Жайхуннинг чап ёнида, қумликлар ичидан борарди. Каркидан чикқандан сўнг оқшомга қолмай етиб боришлари мумкин бўлган Халач негадир жуда олис бўлиб кетди. Олисдаги сарғиш чанг ва гирдибодлар карвонга яқинлашиб кела бошлади. Кўлида қибланома, икки кўзи фарб қумликлари устидаги гир айланаетган гирдибодларда бўлган Ҳорунбек орқасига қайрилиб, Меъмор билан Бадиага қаради.

— Чап томонга қаранглар! Ҳув, анави ялангликка қаранглар!

— Кўряпмиз, — деди дарҳол Бадиа. — Унда одамзод суюги ётибди. Бечорани қашқир талаган бўлса керак.

— Йўқ, — деди Ҳорунбек, — ана, нариги томонларга ҳам қаранг, ҳамма ёқда бош чаноклари, қовурға-оёқ суюклари... Шунча одамни бўри талаган эмас, Самарқандликлар билан хоразмликларнинг ўртасида қаттиқ жанг бўлган. Булар хоразмликларнинг суюги... Шамол қумларни учирив, тепаликларни ялаб кетган, қум остидаги жасадлар очилиб қолган. Ана, қалқону қиличлар ҳам ётибди...

Учала аравада келаётганлар ҳам дарҳол ўша суюкларга, тўнкарилиб ётган бош чанокларига қарашди; кенг қумликларга сочилиб ётган инсон устухонларининг адади йўқ эди.

Бадианинг хаёлига йўлда саранжом қилишгани икки

жосус қароқчи келди. Уларнинг ҳам жасади қум орасида ётади-да, бир куни шамол бўлиб, уларнинг ҳам суяклари юзага чиқиб қолади.

Кўп ўтмай узокдаги бўрон яқинлашиб кела бошлади, арава ғилдираклари тагидаги қумни учираётган шамол энди ғувиллаб бўронга айланиб, араваларни сариқ чанг ўрай бошлади. Отлар ҳам пишқириб, бетоқат бўлар, туёклари қумга ботиб кетарди. Арава соябонларига шитирлаб урилаётган қум ичкаридан ёмғирни эслатарди; кани энди қум бўрони эмас, шовиллаб ёмғир ёғса, деб ўйларди Бадиа. Бу ерларда ёғингарчилик кам бўлади. Негадир бу ерлар осмонидан оқ паға булутлар камдан-кам сузиб ўтадилар. Бу ерлардан кўп қатнаган Хорунбек ҳам бўронни кўрарди ёмғирни ҳеч қачон учратмаган эди.

Хорунбек отнинг жиловини тортиб аравани тўхтатди. Сал ишорани кутиб турган от жониворлар ҳам дарҳол жойида тўхтади. Олдинги от қаттиқ пишқирди. Бошқа аравалар ҳам одатдагидек олдинги аравага яқин келиб тўхташди. Йигитлар аравалардан таппатаппа сакраб қумга тушишди. Улар ғувиллаб учайди. Бир бўрон ичиди бир-бирларини аранг кўришарди. Аввалига, чолга бир нима бўлди, хаёл қилган Зулфикор билан Заврак югуриб келиб устодга қарашди, йўқ, устод ҳам, Бадиа ҳам, Маъсума бека ҳам яхши ўтиришарди. Шогирдларининг безовта бўлганини сезган Меъмор бўрон туфайли юриш ноқулай бўлаётганини лекин кайфият ёмон эмаслигини сезди-да, йўлнинг энг машаққатли жойи шу, дарёдан ўтгандан кейин, ундан у ёғи — Мовароуннаҳр, «дунёдаги энг гўзал мамлакат» эканини айтиб, уларга таскин берди. Шогирдлар чолнинг далда бераётганини сезиб, ичдан кулиб қўйишар, алдаса ҳам ўзи бардам эканлигидан мамнун эдилар. Фаввос Мухаммаднинг ҳам улардан бир қадамча нарида устодига жавдираф қараб турганини сезиш мумкин эди.

— Нима қиласайлик? Шу ерда тўхтаймизми ёки юраверамизми? — Меъмор йўлдошларига мурожаат этди.

— Юриб бўлмайди! — деди бир дамлик сукунти бузиб Хорунбек.

— Дарёга яқинроқ борамизми? — сўради Бадиа қум кирган кўзларини уқалаб.

— Бу жуда хавфли, — деди Хорунбек.

— Бўлмаса жойимизда тураверайлик, — деди Меъмор.

— Маъқул, — дейишди шогирдлар. Хорунбек ҳам бош қимирлатиб тасдиқлади.

— Отларни чиқариб, арава филдиракларига маҳкам боғлаш керак. Бўроннинг тезда ўтиб кетишига кўзим етмайди, — деди яна Хорунбек, — уч-тўрт кунлаб бўлганини ҳам биламан! Йишқилиб, тез ўтиб кетсин.

— Хорунбек, гирдибодлар узоқда эди, мана бу томонга яқинлашяпти, — деди Меъмор. — Бу ерда ҳам тез ўтиб кетади. Қўрқмаслик керак. Лекин отларнинг хашакларини арава тагига олиб кириш лозим! Учириб олиб кетиши ҳам турган гап.

— Охирги аравадаги наматларни олиб, филдиракка ёпинглар, — деди Хорунбек, — ҳаммамиз араваларнинг тагига киришимиз керак!

Фувиллаб учайтган бўрон ичидаги йигитлар наридан-бери хашагу бедаларни арава тагига олиб кириб, филдиракларга намат ёпишди. Бадиа билан Маъсума бека арава тагига кириб яширинишиди. Бир муддатдан кеин Меймор ҳам арава тагига кирди.

Тинмай бўрон Фувиллаб эсар, намату чодирларни пирпирак қилиб учириб кетмоқчи бўлар, араваларни силкитар, филдиракларга боғлоқлик отлар оёқларини кериб, қимир этмай туришарди. Бегона икки от ҳам жим, қитмирилик қилмасди.

Халач бўрони!..

Хуросондан Самарқанду Бухорога қатнайдиганларга бу ернинг феъли жуда маълум, аммо энг яқин йўл шу бўлганлиги туфайли хамма ё Мукри, ё Карки, ё Халачга бормасликка, Жайхундан ўтмасликка иложлари йўқ. Хонобод, Кундуз, Қалъайи Зол орқали юрадиганлар ҳам бўларди — бу, асосан Дехли, Қобулдан келадиганлар нуктаси эди. Аравалар тагига кириб, кум бўронидан жон сақлаган Меъмор ва Хорунбеклар хаёлида уч-тўртга бўлиниб, лимиллаб оқаётган дарёнинг нариги томонидаги Хўжаабbos шаҳарчасига ва ундан Толлимаржонга чиқиб олиш ташвиши турарди. Лекин кутимагандага бошланиб қолган Халач бўрони уларни дарё бўйига ҳам етказмай, кум остида

таққа тўхтатди. Меъмор филдиракка ёпилган намат орасидан узок-узоқларга боқарди; ҳамма ёқ сариқ чанг, аммо баъзида гарб томонда фалакка устун бўлиб турган гирдибодлар ҳам анча яқин келиб қолган эди. Бу «устун»лар орасида мовий гумбазлар ҳам унинг кўзла-рига кўриниб кетгандай бўлди. Фалакка бўй чўзган аллақандай буюк қаср рўпарада намоён бўлиб, Меъморнинг хаёlinи олиб қочди. У хаёл ичидаги араваларни, наматларни тортқилиб, ғувиллаётган Халач бўро-нини сезмас, унинг кўз олдида гирвату бўрон кашф этган мислсиз бир қаср турарди. Бу қаср ўзининг улкан равоқу «гулдаста»лари, гумбазу дарвозалари билан Оқ саройдан ҳам Богои Жаҳоноро қасридан ҳам буюк эди. Қорамтири гирдибод, уни бирдан Ихтиёриддин қалъасига ўхшатди. Меъморнинг юраги орқасига тортиб кетди — бу даҳшатли қалъа ичидаги унинг Низомиддини ўлдирилган! Дунёда бу қалъадан ҳам ваҳшатли қалъа бўлмаса керак!

Меъморнинг хаёл суриб, гиёхвандлардек котиб қолганини кўрган Хорунбек, бош чайқаб, устод баъзан шундай ҳолга тушиб қолармикан, бу эҳтимол аччик аlamning оқибатидир... деб ўйларди. Аравакашнинг ички ҳолатини сезиб турган Бадиа чидаб туролмай, дарҳол отасини туртди:

— Сув берайми, ота?

Чол ўзига келди.

— Йўқ, сув ичмайман! — деди Меъмор, — буни кара, қизим, мени хаёл олибди; мана шу томонда бир катта қаср солинган эмиш...

Бадиа Хорунбекка қараб қўйди. Бу нигоҳ билан у «отам жинни бўлиб қолган эмас, ахли фузало мана шундай узок ҳаёл сурадиганлар бўлади. Катта бинолар гишт териш билан кўтарилавермайди. Қанчалар уйқусиз тунлар, ҳаёллар, изтиробу изланишлар, мутолаалар натижаси...» демокчи бўларди.

Меъмор сўзини яна давом эттириди:

— Кум тепаликларини ҳам тамоман унугибман. Мана шу томонда жуда катта қаср турибди. Ё тавба, бу барҳанлар устида қаср нима қиласи! Худойи таоло менинг дилимга яна бир катта қаср бино этишни соляпти. Мен бу қасрни аниқ кўрдим. Ҳа, бу туш

эмас, шундок куппа-кундузи, уйғоқ турганимда кўрдим. Бўлмаса, келиб-келиб шу қум сахросида қаср кўраманми! Ё тавба!

Бадиа ҳам, Маъсума бека ҳам, Хорунбек ҳам ярим коронги арава тагида жим, Меъморга қарашди, улар лом-мим демай индамай туришарди.

— Бадиа қизим, шогирдларимдан бирини, Зулфиқорними, Завракними, Favvosними чақириб беролмайсанми? Дафтарини, тошқалам билан жозварини ҳам ола келсин.

— Мен чақираман, — деди дарҳол ўрнидан қўзғалиб Хорунбек.

— Сизга нима бўлди, отаси, — деди Маъсума бека эрига мурожаат этиб, — шундок пайтда дафтараталам нимаси!

— Худо дилимга солди, ўша буюк қасрни ўз кўзим билан кўрдим, онаси, бир амаллаб чизиб оламиз. Ёдингда бўлса керак, «Мирзо» мадрасаси ҳам шундок бўлган эди. Ёддан кўтарилимаслик учун баъзи ерларини қайд қилиб қўямиз.

Бўрон тинимсиз фувиллаб турганида ёнгинадаги аравадан чиқиб, отларнинг тагидан ўтиб, Зулфиқор билан Заврак эмаклаб кириб келишди. Улар орқасидан Favvos Мухаммад ҳам келиб кирмоқчи эди, ичкарига сифмади. Хорунбек билан Favvos араванинг сиртида чўкка тушиб ўтириб, бошларини ичкарига тикишган эди. Бу ҳолат Бадиада кулги қўзғади: у онаси пинжига суқилиб Зулфиқорнинг қош-кўзларидан нигоҳ узмай тикиларди. Зулфиқор устодга яқин ўтириб, қўйнидан кенг ва қалингина дафтарини очиб, тиззасига кўйди. Тошқаламни Меъморга узатди. Зулфиқор орқасида ёпишиб турган Заврак Меъморнинг дафтар саҳифаларига тортаётган чизиқларидан, ҳандасавий ўлчовларидан кўз узмасди.

— Сизларни безовта қилдим-а?

— Бемалол, устод.

— Худо дилимга шуъла солди, буни қаранглар, бир яхши бино кўзимга кўринди. Анави гирватлар минораларга ўхшайди, учеби бораётган сарик кум — девору равоқларнинг ўзгинаси. Кексалик, яна ёдимдан кўтарилиб кетмасин, деб дафтарга чизиқлар тортиб, белгилар қўйишни лозим топдим. Бир яхши одил

подшоҳ бўлсаю, унга атаб қурсам. Подшоҳ Искандар, Фаридун ёки Ҳорун-ар-Рашиддек адолатли бўлса. Аммо улар тирик бўлганида бу қаср уларга муносиб бўларди. Жамшиду Искандар бўлганида, мен уларга бу қасрни қуриб берган бўлардим. Унинг номини «Олтин сарой» деб атардик. Афсуски, улар йўқ...

Ярим қоронги арава тагида Меъмор қўлидаги тошқалам билан дафтар сахифалариға чизиқлар тортар, ёзар ва яна янги сахифаларни очиб, чизиқлар чизарди. Шогирдларнинг кўзи дафтарда. Ҳорунбекнинг нигоҳи Меъморда, Бадиа бўлса Зулфиқорнинг юzlарига тикиларди. Маъсума бека араванинг ичию ташида ўтирганларнинг ҳаммасига жавдираб, ҳамманинг хатти-харакатини кузатиб ўтиради. Мушфиқ она учун бунда ҳамма қадрдон эди. У ҳаммадан кўра ҳам Favvos Муҳаммаднинг кўнглини ўқситмаслик мақсадида унга меҳрибонлик кўрсатмоқчи бўларди.

Меъмор дафтарга хандасавий чизиқлар чизиб, шогирдларига нималарнидир тушунтиради. Фисогурс хисоби бўйича учбурчаклар ва уни кесиб ўтувчи тўғри чизиқлар бурчагига рақамлар қўйиб кўрсатарди. Меъморнинг ҳаяжонланиб айтиётган, «мислсиз қаср» тасвири ва хандасавий ҳисоблари ёш шогирдлар наздида бир афсонага ўхшарди. Устоднинг кўп гапларига ишонгилари келмаса-да, унга итоат ва эътиқод юзасидан ҳамма гапларини маъқуллашарди.

Ташқарида намату чодирларни кучли шамол тортқилар, Favvos билан Ҳорунбек бўлса дамо-дам узокдаги «фалак устунлари»га қараб қўйишарди.

— Хай, уста, — деди Маъсума бека, — шу пайтда бу чизиқларингиз кимнинг қулоғига киради! Ҳали замон устимиздан кум босиб кетадими... Шогирдларингизни ўз ҳолига қўйинг, отларга қарашсин. Лоҳовла вало қуввата!..

— Сен дуойингни ўқиб, дам солиб ўтиравер! — деди илжайиб Меъмор, шогирдларига кўз қисиб. — Кўлимиз бўш, бари бир бекор ўтирибмиз. Бу бизнинг қасбимиз.

— Ахир қўрқиб кетяпмиз!

— Ким? Сен ўзингми, ёки Бадиа ҳамми?

— Мен ўзим, — деди Маъсума бека бўрон тортқилаётган чодирни маҳкам ушлаб.

— Кўркма! Ҳаммамиз шу ердамиз. Бўрон тезда ўтиб кетади, биз Жайхуннинг нариги томонига ўтганимиздан кейин бунақанги ёмон оғатлар бўлмайди. У томон Мовароуннаҳр, Бадиа, сен қўрқмаяпсанми?

— Йўқ, отажон.

— Ана, эшитдингми, онаси.

— Эшитдим, — деди Маъсума бека, — аммо сизлар шатранж ўйнаётган одамлардек ўзларингиз билан ўзларингиз гаплашиб ўтираверасиз, биз бу гапларингизга тушунмаймиз. Мундок тушунадиган гаплардан ҳам гаплашинглар. Халачга кечга яқин кириб борармиканмиз?

— Худо хоҳласа, — деди Меъмор иши билан машғул бўлиб.

Орадан кўп ўтмай аллақандай бир куч араваларга келиб урилди. Отлар кишнади. Ҳамма ёқни коронгилик босиб, юзларга қум урилди. Аравалар ҳам бориб кела бошлади. Биринчи арава тагида ўтирганлар беихтиёр фиддиракларга ёпишишди. Қандайдир даҳшатли бир қўл қоронгилик ичидаги нарсани тортиб, осмонга отарди. Бу бир дақика ичидаги пайдо бўлган ёвуз куч зилзилага ҳам ўхшарди, ер остин-устун бўлиб кетаётгандай, кеч нарсани кўриб, тушуниб бўлмасди.

— Бу гирдибод! — деди оғзи-бурнига қум кирган Меъмор, бир дақиқадан кейин жонҳолатда. — Бир-бирларингизни маҳкам ушланглар!

Меъмор беихтиёр қизи билан хотинини ушлади. Зулфиқор бир қўли билан бориб-келиб турган арава фиддирагини, бир қўли билан Бадиани маҳкам ушлади. Заврак устодининг оёғига ёпишишди. Ҳорунбек билан Фаввос биринчи арава фиддиракларига маҳкам ёпишганча кўзларини юмиб тураверишди.

— Жойларингдан қимираманглар! — деди яна Меъмор шу лаҳзанинг ўзида... — Гирдибод ўтиб кетади.

Коронгилик бир неча дақиқа давом этди. Юзларга урилаётган бетўхтов қум бўрони кўз очиргани кўймасди. Фужанак бўлиб бир-бирларига ёпишиб олган ўловчиликлар «гирдибод» деган гапни эшитишли-ю, аммо нима бўлаётганини бош кўтариб кўриша олмади. Факат отларнинг бир лаҳзалик кишинаши ҳам тўхтади. Кўп

ўтмай қоронғилик кетиб, кун ёришаётганга ўхшади. Фувиллаб эсаётган бўронга қарамай, Меъмор секин бошини кўтарди, гирдибод ўтиб кетган эди.

— Гирдибод ўтиб кетди, жигарларим. Бу ҳам худонинг ишларидан бири, — деди Меъмор.

Ҳамма секин бош кўтариб у ёк-бу ёкка қаради. Дарҳақиқат, чанг-тўзон анча нарилаб, Карки томонга кетарди. Осмону фалакка бўй чўзган гирдибод ичидаги намату, чодиру ҳашаклар учидарди. Гирдибод қаерларнидир ялаб, қаерларгадир қум тепаликлари уюб кетибди. Иккинчи арава тўнкарилиб, учинчи араванинг анча нарига олиб бориб, филдиракларининг ярмигача қумга кўмиб кўйибди. Унинг устида на ҳашак ва на юклар бор. Биринчи арава филдиракларига боғланган уч от бору қолган отлардан дарак йўқ. Юз қадамча нарида қумга ботиб ётган учинчи араванинг ўнг томонида саман йўрға орқа томонидан қумга ботиб, чиқа олмай унналарди. Аравага кўшиб бўлмайдиган бегона икки отдан тамоман дарак йўқ. Қум бўронининг анча пасайганини, гирдибод бу ердан ўтиб кетганини кўрган Меъмор арава тагидан чиқиб, атрофга қаради. Аравалар қуп-қуруқ. Гиламу шолчалар, қотган нону толкон солинган халтачалар, кийим-кечакларгача олиб кетибди. Олис қум тепаликлари устида ҳашак қолдиклари сочилиб ётарди. Қийшайиб ётган учинчи аравада факат декчаю, белкурагу кетмонлар қолибди...

Меъмор арава тагидан чиқиб, қумда чўқкайиб ўтирган Масумма бекага ялт этиб қаради:

— Катча борми?

— Бор, — деди хотини, — бири менда.

— Менда ҳам бор, — деди Бадиа.

— Хайрият, — деди Меъмор, — мана, ўтники — ўтга, сувники — сувга, қолди қатиқнинг пули... Бу ҳам худонинг хоҳиши.

Зулфиқор Шоший билан Заврак Нишопурий шу лахза юрганча отни қумдан кутқариб олиш учун нарида қийшайиб ётган учинчи арава ёнига келишди. Favvos орқама-орқа чолиб белкурак олиб, от тепасига борди. Хорунбек ҳам юрганича бир тепаликка чиқиб, атрофга аланглади. Йўқолган отларни кидирди. Ҳеч қаерда жонли нарсадан нишон йўқ. Тўрт отнинг саломат қолганига ҳам шукур қилишди.

— Жонимиз омон қолди, — деди Меъмор, — бўлмаса, бу гирдибод ёмон нарса. У қарокчилардан баттар. Жонимиз омон қолганига шукур қиласлик!

— Гирдибодни кўтара эдиму, аммо мундоқ ичига тушмаган эдим, — деди тепаликдан тушиб, устод ёнига яқинлашган Хорунбек. — Бизни дабдала қилиб кетди-я! Энди қолган отлар билан тезда Халачга етиб олмасак, отлар хўраксиз, сувсиз халок бўлади.

— Шундай қиласлик, биродар, — деди Меъмор, — бу кўргулик ҳам бор экан. Лекин бу зиённи қопладиган акчаларимиз бор, биз ҳаммасини тўлаймиз.

— Бу худодан келган нарса, устод, мен бу офат етказган зиён учун ҳақ олмайман.

— Ҳозир мол-жон ўртада, иним, Бухорога етиб олайлик, у ёфи бир гап бўлар.

Уч йигит саман йўргани кутқариб олиб келишди.

Шундан сўнг атрофга сочилиб, бирон нарса кўринармикан, деб қум тепаликларини, пастликларини излашди. Ҳеч вақо йўқ. Гирдибод қиласиган ишни қилиб, оладиганини олиб, яна қуммикларга кириб кетган эди.

— Йигитлар, узок-узоқларга қаранглар, отлар кўринмайдими? — деди Хорунбек. — Жониворлар қаёқда қолган экан? Ёмон одамнинг оти бўлса ҳам от... жониворда нима айб.

— Ҳеч нарса кўринмайди, — деди Заврак.

— Шоший жанобга ҳам айтинг, у киши ҳам қарасин, — деди Бадиа. — Сиз, жаноб Нишопурий, бир кўз билан нимани ҳам кўрадингиз!

— Шундоқ пайтда ҳазил! Тавба! — деди жахли чиқиб Заврак. Кейин юзини тескари қилиб, Зулфиқорга ярим овозда гапирди: — Мен нима ғамда-ю, у... гул санчади!

Зулфиқор мийигида кулди.

— Нима деяётганингизни билдим, жаноб Нишопурий! Мени камситяпсиз, — деди Бадиа. У фактат ўйлдошлари рухини кўтариш, андак кулиш ниятида бу ҳазилни ўринисиз қиласлан эди: — Отолмаган сопқон ҳам бошга тегар, ҳам оёққа!..

— Йўқ, бекам, мен фактат биз уч кўз билан ҳамма ёкни қидиряпмиз, дедим, — Заврак «уч» сўзига урғу бериб, Зулфиқорга қаради, — яъни, бекам, менинг бир кўзим, Зулфиқорнинг икки кўзи, жами уч кўз

бўламиз. Уч кўз бўлгандан сўнг кумга тушган иғнани ҳам кўрамиз.

— Бўлар иш бўлди, ачинишнинг фойдаси йўқ, — деди Бадиа, — шу сабабли ҳозир ҳазилдан бўлак фойдали нарсани билмаётирман. Шундоқ эмасми, жаноблар!

— Жуда тўғри, бекам, — деди Заврак.

Кумда таланиб, бор-йўғидан ажраган кичик карвон сочилган нарсаларни йигиб, отларни эгарлаб араваларга қўшишга ҳозирлик кўрди. Томоғи қақраган Бадиа нима дейишини билмай, қаергадир кумларга кўмилиб кетган мешу хумчани қидирарди. Отлар ташна... Лаблари лабларига ёпишиб қолган Меъмор ҳам ўз ташналигини билдирмай, тупук ютар, очликка чидаш мумкин, аммо ташналикка бардош бериш ғоятда машаққат эканлигини дилидан ўтказарди. Бу ҳолатни сезиб турган Favvos биринчи арава шотисига боғлоклик каттагина челакни ва кумда тўнкарилиб ётган ёғ хумчани олиб, кум йўлининг ўнг томонига — кун чиқиш томонга жўнади.

— Дарё анча олисда. Топа олармикансиз? — сўради Хорунбек.

— Қибланомага қаранг, тўғри кетяпманми?

— Тўғри кетяпсиз, — Хорунбек кафтидаги қибланомага қаради.

— Унда топаман.

— Кечикманг, ўғлим, биз бунда узок туролмаймиз, — деди Меъмор.

— Хўп, устод.

Favvos Мухаммад бир қўлида челак, хумчани қўлтиқлаб олганича кумлар оша югуриб кетди. У фурратни қўлдан бермаслик учун кучининг борича югуради. Ҳозир югуриш керак, лекин сув билан югуриб бўлмаслигини биларди.

— Ҳарқалай у «favvos!», — деди Заврак, — сув тошиб келишига ишонаман. Лекин бу бойваччанинг рўпарасидан бирон илон чиқиб қолса, пақир билан хумчани ташлаб, дод солиб қочиб келмоғи ҳам мумкин.

Бадиа кулимсиради:

— Унда ўзингизга навбат келади!

— Мен ҳозироқ зинфиллаб кетардим, идиш йўқ, бекам.

— Сабр қилиб туринглар, — деди Маъсума бека,— лекин Favvos Мухаммадни ўкситадиган гапларни айтманглар, у ҳам бирорнинг нуридийдаси. Ҳар тўқисда бир айб. Сал қўрқоқроқ бўлса нима! Одамнинг сал қўрқоқроқ бўлгани ҳам яхши бўлади. Устозингиз ҳам бақадан жуда қўрқардилар.

Барча тайёргарлик ишларига киришиб, отларни қўшиб, қуруқ араваларга чиқиб, Favvosни кутишди.

Favvosдан дарак йўқ. Бир дамдан сўнг Меъморнинг тоқати тоқ бўла бошлади.

— Бу нима иш бўлди?!

— Сабр қилинг, устод.

— Йўлга чиққандан буён дам бетоқат бўлиб, охвоях қилади, дам куттириб қўйдиради. Оғирчиликни кўрмаган йигит-да.

— Сабр қилинг, — деди яна Маъсума бека.

Бир маҳалда узокда қора нуқта кўринди. Арава устида ўтирган Заврак тик ўрнидан туриб, Favvos келаётганини айтди.

— Сизнинг кўрганингизга ишонса бўлади, — деди биринчи аравада ўтирган Бадиа, — сиз дурбинда кўргандай жуда якъол кўрасиз.

— Ўзлари қақраб, ҳолдан кетяптилару яна мендан куладилар. Буни қаранг, онажон!

— Майли, оға-сингилнинг гапи ботмайди, — деди Маъсума бека, — сен ҳам, Бадиа қизим, бунақа қалтис ҳазилингни қўйгин. Заврак ўғлимнинг бир кўзи икки кўздан ҳам яхши кўради.

Бадиа қиқиллаб кулиб, Зулфиқорга кўз қисиб кўйди.

Хонумони таланиб, қиличи синиб, қалқони тешилган — енгилган сарбоздек хомуш алам тортиб ўтирган Меъмор билан Хорунбек жонланди. Улар миқ этишмай, узокда терлаб-пишиб сув олиб келаётган Favvosдан кўз узишмасди. Ҳатто аравага қўшилган отлар ҳам Favvosга тикилишарди. У етиб келмасданоқ Хорунбек пастга тушиб, кутиб турди. Терга ботиб, ҳаллослаб келаётган Favvos челяқдаги сувни Хорунбекка узатди. У тез юриб ҳаллослаганидан тили гапга келмасди.

— Сув лойқароқ.

— Э, ука, лойқароқ бўлса ҳам сув-ку! Омон бўл!

— Барака топинг! — деди Маъсума бека.

— Устод, нима дейсиз? — Хорунбек Меъморга қаради.

— Хумчадагидан ҳаммамиз ичайлик. Пакирдаги сувни отларга оз-оз ичиринг, — деди Меъмор.

— Устод, мен яна зинғиллаб бориб келавераман! Дарё узоқ эмас экан, аммо юриш қийин. Дарё негадир лойқа оқяпти...

— Жайхун доимо лойқа оқади, — деди Меъмор, — биз шу сув билан Халачга етиб оламиз, ўғлим. Бу ишингиз кўп яхши бўлди.

Фаввос устозининг андак бўлса ҳам мамнун бўлганидан қувонди. Аравалар бирин-кетин юриб кетгач, Заврак ёнида ўтирган Фаввос ёнидан илон чиқариб, билинтирмай Завракнинг тиззасига қўйди. Тиззаси устида буралаётган чипор илонга қўзи тушган Заврак капалаги учиб, дод деб сакраб ерга тушди.

— Ҳа, нима гап? — деб Хорунбек отининг бошини тортди.

— Нима қилди? — Зулфиқор билан Бадиа ҳам Завракка қарашибди.

— Ҳали бу ишни сиз қилдингизми?! — деди боши эзилган илонни кўриб Заврак заҳарханда билан Фаввос Мұхаммадга.

— Сизни илону аждарлардан кўрқмайди, деб эшитган эдим, баҳодир Нишопурий!

— Ҳалиги гапни эшитган экансиз-да. Қандай қилиб эшитдингиз? Анча нарилаб кетган эдингиз-ку?

— Ҳар ким ўзига тааллуқли гапни нариласа ҳам эшитади. Агар менинг устимдан яна қўрқоқ деб кулсангиз, мен энди аждарни тутиб келаман.

Фаввос Мұхаммад ўз устидан кулишганини мутлақо эшитмаган эдию аммо тусмоллаб, бу ҳазилкаш йигит, албатта орқамдан бир нима дейди, деб ўйлаган эди. Тахмини тўғри чиққанига ўзи ҳам ҳайрон бўлиб колди.

— Офарин, Фаввос! — деди Заврак яна сакраб аравага чиқиб. Кейин унинг елкасига қўл ташлади.— Қани, менга айтинг-чи, қандай қилиб, бу ярамасни тутиб ўлдирдингиз?

— Кетаётсам рўпарамда турган экан, бош кўтариб тилини чиқараверди. Яқинроқ бориб, хумча-

нинг қорни билан бошини эздим-қўйдим. Вассалом! Сизнинг гапингизни эшитганим йўқ, лекин орқамдан, албатта, бир нима дейишингизни кўнглимдан ўтказиб қўйган эдим. Чунки сиз гапирмай туролмайдиган одамсиз!

— Зеҳнингизга қойилман, Favvos!

— Ўша илонни мен ҳам кўрай, — деди Бадиа.

— Э, қўйсанг-чи! — деди Маъсума бека эътиroz билдириб. — Илонни ҳам ўйнайдими одам! Турки курсин!

Сув ичган отлар анча ўзларига келиб, пишкириб ўйлга тушишди.

Шу куни тунда улар Халачга кириб боришди. Карвонсаройга тушиб, отларга ҳам ҳордиқ бериб, ўзлари ҳам дам олишди. Бу ерда ҳам Favvos Ҳорунбек ёнида юриб, файрат кўрсатди. Отларга қаради. Карвонсарой хизматчилари билан гаплашиб, овқат ва чой тайёрлади. Отларга хашак бериб, яхшилаб суғорди. Favvos-нинг ишchan бўлиб кетганига Зулфикор билан Заврак таажжубланишарди. Лекин бу ёмонми? Яхши-ку! Сафарда шундок бўлишлик лозимлигини тушунган бўлса, бу жуда маъкул иш-ку!

Эртасига эрта билан от-араваларни сол устига чиқариб, дарёдан ўтказиш машақкати бошланди. Улкан ёғоч сол ҳар арава-отни алоҳида-алоҳида қилиб, уч бор дарёни кечди. Тўртинчи ўтишда солга Бадиа, Маъсума бека, Меъмор ва Зулфикор тушишди. Дарёнинг нариги томонига ўтган от-аравалар, Хўжаабbos манзилгоҳида тўхтамай, тўғри Толлимаржон ёки Файзобод шахарларига қараб юришни кўзлаб, шай турарди.

Дарёдан кечувда ҳам Favvos жонбозлик кўрсатди. У уч бор сол устида отларнинг жиловидан ушлаб, хуркитмай нариги томонга ўтказди. У килаётган бу жонбозликлари билан қумдаги «гуноҳи»ни ўзича юваётган эди, буни ҳаммалари ҳам кўриб туришарди.

— Мен, Favvos оғайнин кўрқоқ деган эдим, фикрим хато экан, — деди Бадиа.

— Бадиа бекам, ҳозир у сув юртида, — деди Заврак. — Favvosлар сувда ботир бўлади. Улар балик мижоз, қумга тоқатлари йўқ, чунки балиқ сув билан-да...

— Йўқ, жаноб! У қумда ҳам ботир бўлади, — деди кулиб Бадиа, — сиз ҳамма вакт гапда ботирсиз! Бир сафар енгилганингизни тан олинг, жаноб!

Заврак бир лаҳза индамай қолди-да:

— Хўп, тан олдик, бекам! — деди қўлини кўксига қўйиб.

Жайхундан ўтиб, Хўжаабbos йўлига тушган уч арава Толлимаржон шахри, кайдасан, деб кетаверди. Улар энди, гарчи яна қумликлар аро бораётган бўлсалар ҳам, аслида, Мовароуннаҳр тупроғида эдилар. Бу рўйи замин, Меъмор тақрор-тақрор айтадиган, дунёдаги энг гўзал ва энг муқаддас мамлакат эди!

XXIX б о б

«ҚОБУС» ДАРДИ

Толлимаржон йўл устидаги кичик, кўримсизгина шахарча бўлиб, Карки, Халаҷ, Хўжаабbos атрофидаги қумликлардан кейинги тақир ва яссиликларга жойлашган. У дарёдан анча узок, Қизқудук ва Файзобод қалъаларига яқин. Бешкенту Қаршига етгунча дашт, бу атрофда қўй боқиб юрган чўпонлар кўп учрайди. Бу ерларда кудуғу сардобалар кўп. То Бешкент яқинидаги Қашқадарёга етиб олгунча қудук сувларидан бўлак сув йўқ... Жазира маиси, куёш бу ерларга эрталабдан то кечгача нур тўқади, аммо шўрҳоку сувсизлик боғлар унишига йўл бермайди. Тиккайган дарахт йўқ. Қани энди бу ерларга сув чиқариб, ток кўкартирилса, ҳамма ёқни шарбатга тўлдириш мумкин эди.

Карвонсарой бу ерда шаҳар чети — йўл устида бўлиб, одатдагидек яхши хужраларни Самарқанддан Ҳиротга бораётган мансабдорлар эгаллаган. Карвонсарой сохиби Меъморга яхши қарамади — ғарибу фуррабо, қаландарномо одамлар тушадиган икки хонани тақлиф этди. «Ўтники ўтга, сувники сувга...» бўлган, ҳеч вақоси қолмаган, ейиш-ичишининг ҳам мазаси қочган бу йўловчиларга карвонсарой хизматкорлари ҳам унча илтифот кўрсатишмади. Отларни аравадан чиқариб, Халаҷ бўронидан колган-кутган нар-

саларни шу ҳужраларга тушира бошлашди. Орадан бир муддат ўтгач, карвонсарой сохиби Favvos Мухаммад билан бирга келиб, андак табассум билан Меъморга илтифот кўрсатди.

— Мухтарам жаноб, юкоридаги маҳсус катта хона сизга, — деди сохиб, кўли кўксига, таъзим билан.

Бу маҳсус хона ичида такаёвмит гиламлари тўшалган, парёстиқлар, партўшаклар ва жамийки анжомлар муҳайё эди.

— Нега бундай бўлиб қолди? — хайратланиб сўради Меъмор. У ахволнинг бир лаҳзада ўзгарганидан таажжубланди. Сохиб ёнида турган Favvos Мухаммадан асло кўз узмасди. Бу йигит ёлғон сўз айтиб, фирибгарлик қилмадимикан, устозига яхшилик қиласман, деб ёлғон сўзлар айтмадимикан, деган хаёл бир лаҳзада Меъмор миясидан ўтди. Бунинг устига уни «жаноб» деб атагани ҳам янгилик. Бу одам ҳамма мансабдорни шундай аташга ўрганиб қолганини билб тасалли топди.

— Маъзур тутасиз, жаноб, марҳамат. Неча кун турсангиз ҳам биз хизматдамиз, — сохиб Меъмор билан Favvos Мухаммадни ҳовлида ёлғиз қолдириб, ўзи кетди.

— Бу ҳолни қандоқ тушунмоқ керак? — Меъмор шогирдининг кўзларига қаради.

— Бу ҳолни тушунмоқ жуда осон — акча, — деди Favvos, — кўнглингизга ҳеч қандай ноҳуш фикр келмасин, устод. Мен бориб унга беш тилло танга бердим, вассалом! Бошқа ҳеч қандай гап айтганим йўқ. Бу одамларга шу керак. Ёнимда отам берган анча тилло танга бор; шундоқ пайтда коримизга ярамаса, улар нега керак! Мен сохибни алдаганим ҳам йўқ, ёлғон гапирганим ҳам йўқ!

— Ташаккур!

Favvos Меъморни ўша шинам хона сари бошлаб олиб борди:

— Онамиз, синглим Бадиа билан сиз шу хонада бўласиз. Сохибнинг хизматкори эмас, ўзимиз — уч шогирдингиз хизматда бўламиз.

— Маъкул, — деди руҳи кўтарилиб, кайфи чоғ бўлган Меъмор.

У Маъсума бека билан қизини имлаб чакириб, ўша энг аъло хонага кириб кетди.

Ховлини кесиб ўтиб кетаётган карвонсарой соҳиби қудук ёнида қаққайиб турган Фаввосга ярим овозда: бу хонада бир неча йил муқаддам валиаҳд амирзода Мухаммад Тарагай Улуғбек Мирзо Ҳиротга кета туриб бир кеч тунағанини, ундан ташқари Шоҳ Малик ҳам турганини, бу хона энг яхши хона эканини таъкидлади.

— Бу мұхтарам жаноб шоирмилар? Хурсондан ихроj этилғанмилар? — деда сўради соҳиб.

— Йўқ. Бу жаноб — меъморлар.

Фаввос бундан бошқа сўз айтмади. Соҳиб «шундок денг» дегандек бош қимирлатиб, ҳеч нарсага тушунмай яна ўз йўлида давом этди.

Халач бўронининг ғоратидан кейин сиртдан билдирмаса ҳам ичдан анча шахти қайтиб, маъюс тортиб қолган Меъмор ясатиғлик хонага кирибоқ ётди. Бадиа бу «илтифот»га шубҳа билан қараб, оғасининг латтага ўроғлик исфихонини ўзига яқин кўйди. Белидаги ханжарини ҳам шай қилиб, иккинчи исфихонни Зулфиқорга олиб чиқиб берди.

Улар бунга хайрон бўлсалар ҳам, «доно Бадиа» сўзини икки қилишмади.

Кўхисиёҳ — равоч сайлига боришганидаги қароқчи ўлими, ундан кейин Калиф чўлида — қудук ёнидаги фожиа... Меъморни жуда чўчитиб, юрагига қаттиқ ўрнашиб қолган эди. «Ўзи нима бўляпти...» дерди баъзан боши қотиб. Низомиддин фожиасидан кейин, унинг назаридаги ўлим жуда кўпайиб кетгандай эди. Ёки Бадиа оғаси учун хун оляптими?! Дарҳақиқат, Бадиа қаттиқ изтиробга бормасди — бу ўлимлар унинг учун шунчаки одатдаги ўлимлардай кўринарди. Аммо бутун умрида китоби лойиҳа, фишту ганчхоклардан бошқа нарсани билмаган Меъмор учун эса бу воқеалар жуда даҳшатли ҳоллар юз бераётгандай бўлиб туюлар эди. Ёки бўрон учиролмай сандиқда қолган Мухаммад Авфийнинг «Лубобул албоб»ини олиб ўқисинмикин? Махмуд Замаҳшарийнинг «Муқаддиматул адаб»и билан Абу Али ибн Синонинг «Муътасмуш шуаро» китоблари мутолааси билан машгул бўлсинми? Лекин бари бир унинг кўнглига бу

китоблар ҳам сигмади, уни ҳар хил хаёллар олиб қочди — у шоҳона ҳужрада ҳам яхши ухломади, бир неча бор босинкиради. Маъсума бека буларнинг барини чарчаш ва Ҳалач бўронига йўйди. Отасининг бўғилиб, «Йўқ», мен ўлдирмадим, йўқ!..» деб хириллаб, нафас ололмай бўғилаётганини кўрган Бадиа ўйланаб қолди. У онаси билан отасининг ёнида ўтириб тонг оттирди. Тонготарда ҳужрадан чиқсан Меъмор карвонсарой ҳовлисини кесиб ўтиб, дарвозадан ташқарига йўл олди.

Чексиз дашт, ясси тепаликлар...

Меъморнинг мағриб томонда, тепаликлар устида. яркираб турган ярим ой ўроғига кўзи тушди. Ой жуда ҳам катта бўлиб, тепалик устига тушиб қолгандай турарди. Бундай манзарани Меъмор шунча ёшга кириб биринчи марта кўриб, таажжубланди. У бир муддат ойга тикилди; худди Жоме масжиди гумбази устидаги ойнинг ўзи! Аммо у кумуш ранг, бу ой ҳақиқий олтин. У чоғроқ эди, бу эса улкан... Меъмор икки кафтини ёзиб, ойга тикилган холда юрт қаторида ўзига ҳам яхшиликлар тилаб дуо ўқиб, юзига фотиха тортди. Унинг кўнгли анча ёришгандай бўлди. Оlam қайта яшараётгандай кўриниб кетди-да, бу тонготардаги айни манзара қалбида бетак-рор туйғулар уйғотиб юборди. Унинг кўзига ўша шарқ томонда қандайдир бир гумбаз кўриниб кетди. Қандайдир меъмор кўли билан бино этилган гумбазга ўхшарди. Тепаликлар секин-аста ўша бинонинг фиштин деворлари, равоқу пештоқлари тусига кира бошлади. Бу ҳам Ҳалач бўрони куни дафтарига чизган лойихани эслатарди. Меъмор тонготар коронгилиғида, чексиз даштда ёлғиз турарди. Бекарор шабада пешмати этаклари билан ўйнашар, соқолмўйлабларини силаб ўтарди...

У яна ҳужрага қайтиб кириб ўтирди. То нонуштагача яна кўзи илиниб, мизғиб, бир неча бор чўчиб тушди. Аллақандай ўйлар хаёлини чулғади. Арастунинг: «Душман томонларнинг фикру мақсадларини яхши билмай туриб, уларнинг ишларига аралашма, қариндошларнинг адоватию қўшниларнинг ҳасадини ислоҳ қилишдан машакқатли нарса йўқ дунёда», — деган гапи кўнглидан ўтди. Ўзига ўзи: Яхшилик йўлида

ранжу меҳнат тортсанг, буни машакқат деб ҳам англама. Дунёда шу қолади, деб қўйди. Арастунинг доно сўзлари негадир лоппа-лоппа ёдига кела бошлади. Ёки бу савқи табииймикан? У ўзининг ўтган умридан заррача шикоят қилмайди, гарчи ранжу-меҳнат чекдим, яхшилик қилдим... деди у яна ўзига ўзи фикран.

Шу ергача соппà-соғ, дадил келган Меъморни негадир ҳадеб ваҳима босавергани Бадиа орқали Зулфиқорга ҳам маълум бўлди. Буни Favvos ҳам сезиб хайрон бўлди...

Ўша куни эрта билан бор-йўгини уч аравага жойлаб, уч шогирди билан Ҳиротдан чиқиб кетаётган Нажмиддин Бухорий билан Бойсункур Мирзо одами учрашиб, «овчи йигитлар то Ҳурросон чегарасигача қорама-қора боради, улардан чўчимаслик керак, уларнинг иши сизларни муҳофаза қилиш», деган эди. Шу пайт Меъморнинг калласига: «Ҳўш, кимдан?» деган савол келмаган экан. Машакқатли йўл юриб, Калиф қўмлигида, қудук бўйида боши янчилган икки шубҳалик одам фожиасидан кейин у қаттиқ ўйланиб қолган эди. Мен сарбозу саркарда эмасман, менинг қўлимда қилич эмас, андава ўйнайди. Мен бино қураман: ёндиrmайман, вайрон қилмайман, мен қураман — нечук менинг атрофимда хунрезликлар содир бўлмоқда? Бу жуда таажжуб-ку? Демак, Бойсункур Мирзо бизнинг изимизга қўйилган қотилни пайқаб, муҳофаза сифатида «овчи йигитлар»ини йўллаган. Нажмиддин Бухорий қолганларини ақл мантиқи билан еча бошлади: Иброҳим Султон фуқаро орасида эътибори зўр бир Меъморнинг Ҳурсондан чиқиб кетиб, Бухорода «ҳар хил гапларни» гапириб юрмаслиги ва бунинг устига, Ҳиротда қурган биноларининг такорори бошқа жойда бўлмаслигини ўйлаб, уни бола-чақаси ва шогирдлари билан биргаликда «қўмда кароқчи талаб ўлиб кетибди», деган хабарни тарқатиб йўқ қилиб юбормоқчи бўлган. Бу вазифани кўп хунрезликларни қилиб, амирзодаю беклар ичига низо солиб юрган яқин одами — Қораилонга топширган. У кимса учун эса, бу вазифа чўнтағидаги бодомни «қирс» этиб чақиб егандай жўн гап. Бойсункур Мирзо бу қора ниyatдан хабар топгану, унга йигитларини киши билмас «ҳамроҳ» қилган. Қораилон гарданига юклатилган ва-

зифани олисда, қум ичидә бажаришни кўзлаб келиб, ўзи ҳалиги аҳволга тушган...

Ҳирот.

Орадан бир ой ўтди, лекин Қораилондан дарак ўйк.

Бу иш Мұхаммад Арғунни эмас, Иброҳим Султонни ҳам ўйлатиб қўйди. Қораилонни бошқа хорижий давлатга қочди, хаёл қилган Мұхаммад Арғун ўзининг уч сипоҳини тоб билан унинг изига солди ва аникроқ бир хабар топиб келишни буюрди. Агар лозим бўлса Самарқандга ҳам, Бухорога ҳам боришлирини тайинлади. Булар Қораилоннинг бу томонларга эмас, Панжакент, Жиззах ва ниҳоят, Даشت Қипчоққа — Бароқ ўғлон томонга қочди, деган хаёлдан ҳам холи эмасдилар.

Мұхаммад Арғун одамлари Халач яқинида күмга ботиб ўлиб ётган отларнинг эгар-жабдуғидан, бу — Қораилоннинг оти эканини аниқ билиб, орқаларига қайтишди. Исбот учун ўлик отнинг эгар-жабдуғини ўзлари билан олишди. Ҳиротга қайтиб келишгач, бу хабарларни дарҳол амирзодага етказишди. Бунинг устига каркиликлардан, Халач яқинида күм барханлари устида каттиқ бўрон бўлиб, гирдибод чўпонларга ҳам анча зиён етказганини эшитгач, амирзода ҳам, Мұхаммад Арғун ҳам Қораилоннинг гирдибодга тушиб қолиб, ҳалок бўлганига тўла ишониши.

Шодлик билан туғилиб, шарафу обрў билан ўлмоқ — инсон учун баҳт. Ўлимдан қочиб кутулиб бўлмайди, ўлгандан сўнг ўз обрўси билан тупроққа топширилмоқ — тириклигига меҳнат қилиб, мазмундор яшаганликнинг исботидир. Наслу насаби номаълум, ота-онасининг ҳам тайини ўйқ Қораилонни бирон кимса ҳам эсламади — унинг изсиз йўқолганидан фуқаро эмас, ҳукмдорларнинг ўзлари ҳам хурсанд бўлдилар...

Карвонсаройда Калифдаги кудуклардан бирининг ёнида ўлдирилган икки жасад топилгани — кучли шамол мурдалар устидаги қумни олиб кетиб, очиб қўйгани, чўл кузғунлари талаётгани ҳақида кимдир гапирган. Бу гаплар Меъморнинг кулоғига етди. У Бадиа билан Зулфиқорга бир қараб қўйдию индама-

ди. Лекин шу карvonсаройда пешанасини зангори рўмол билан танғиб боғлаб олган қизил чопонлик бир одам Зулфиқор билан Бадианинг дикқатини тортиб, юраклари шувиллаб кетди. Бу одам ҳеч ким билан гаплашмасди. У Бадиага ўткир бир тикилди. У ўзининг шоп мўйлаби, икки ёноғидаги бўртиб чикқан сұяклари, ўткир қарашлари билан «равоч сайли»да Бадиани олиб қочган қароқчи шеригини эслатарди. У ўч олмоқ ниятида изларига тушганмикан?

Бу шубҳа ҳам Мәъсума бека орқали Меъмор кулогига етди. Меъмор карvonсарой ҳовлисида у билан қамти келиб, юраги шифиллаб кетди. Қароқчини кўрмаган бўлса ҳам, ҳамма белгиларини Зулфиқор билан Бадиадан эшигтан эдӣ.

Ўлимлар, соядек изга тушиш, таъқиб, қувгин, ҳақорат... Меъморга айниқса кейинги кунлари қаттиқ таъсир этиб, вассасага туша бошлаган ва бу вассаса даҳшати унга чирманиб, томоғидан бўға бошлаган эди. Юрса ҳам, турса ҳам кўз олдида шубҳалик одамлар рўёдай уни кузатишашётгандай бўларди. Босинқи-рашлари ҳам ҳолва экан, иккинчи туни ойдинда ҳовлига чикқан Меъморни дев қувлади. Танидан жун усиб чикқан, бошида икки шохи бор, кўзлари ёниб турадиган новча бир дев уни тутиб оламан деб ҳовлила пойлаб турган экан, тириқтириб қувлаб, тутолмади. Меъмор бақирганича уйга қочиб кириб, ўзини гиламга ташлади. Хотини, қизи, ён хонадаги шогирдлари ҳам уйғониб кетиб, дархол ичкарига — хонага киришди. Ерда, гилам устида кўзлари ола-кула бўлиб ётган Меъморга сув ичиришди. Меъмор бўлса ғулдираб тили сўзга келмай, факат эшикни кўрсатарди. Бадиа ханжарини кинидан сугуриб, юрганича эшикка чиқди. Қилич яланғочлаган Зулфиқор ҳам олдинмакетин у билан ҳовлига чиқди. Ҳовли жимжит, ҳеч ким йўқ. Бадиани қудук олдида қолдириб, Зулфиқор юрганича карvonсаройдан ташқари чиқиб, деворлар итрофини, далани қаради: ҳеч кимса йўқ. Дарвоза ёнида ухлаб ётган икки олапар ит ҳам ҳайрон бўлгандек Зулфиқорнинг қўлида ярқираб турган қиличга карашди. Зулфиқор ҳамма ёқни кўздан кечиргач, яна Бадианинг ёнига келди.

— Ҳеч ким кўринмайди.

— Тавба, — деди Бадиа отхона ёнидаги қоронфиксикдаги кўзини узмай, — тарин у қарокчи отхонага бекинган бўлмасин?!

Шу лаҳза рўпарадаги эшиги очиқ хужрадан чиқиб келган қоровул ховли ўртасида туриб, Зулфиқорга мурожаат этди:

— Жаноб, бир нарсадан хавфсираяпсизми?

— Ҳа! Бу ерда бегона одамлар борга ўхшайди! — деди андак дағдаға билан титраб. — У ярамасларнинг бошлари оғирлик қилаётганга ўхшайди! Биз ҳаммамиз куролланганмиз!

— Жаноб, бу ерда кароқчи йўқ. Бегона одам фаяқат ўзларингиз. Икки самарқандлик мўйсафид бор эди, кеча эрта билан, сизлар келган кунингиз кетишиди. Бошқа бегона одам йўқ. Ҳурматли отангиз ховлига чиқиб, бир муддат ойга тикилиб турдилар-да, сўнгра ўзларидан-ўзлари бақириб, хонага қочиб кириб кетдилар. Мен уйғоқ эдим, ҳайрон бўлиб қолдим. Бу ерга одам тугул бегона чивин кирса ҳам қоплонларим билишади. Дарҳол вовиллаб, бутун саройни бошларига кўтарадилар. Ўттиз йилдан бери шу ердамиз, ҳали бирон кори ҳол бўлгани йўқ. Бу ер тинч жой. Ухлайверинглар, таксир!

Бадиа билан Зулфиқор ичкарига қайтиб киришди. Шу лаҳза Favvos билан Заврак ҳам этиклари қўнжидаги ўткир пичокни қўлларига олиб ташқарига чиқишиди. Яна икки йигит ташқарига чиқиб, ўзига ўқра-йиб караб турганини кўрган коровул бош чайқаб, лом-мим демай ўз хужрасига кириб кетди. Бир лаҳзадан сўнг, катта хонадан Меъморнинг беўхшов овози эшитилди:

— Дев, ана дев! Мени олиб кетмоқчи!

Меъморнинг кўзлари ола-кула бўлиб, эшик тепасига тикилганича бақираарди.

— Ота, дев йўқ. Биз уни ўлдирдик, — деди Бадиа.

— А?! Яна кимни ўлдирдинг?! — чол яна безовтапланниб, телбаларга ўхшаб, ҳаммага тикилар, хеч кимни танимасди. Хонада уч шам ёқилган, у деворга тушган одамларнинг соясига ҳам ағрайиб, чўчириди.

Зулфиқор Бадиага қараб, лаб тишлаб ишора килди:

— Устод, биз ўша девни қувиб юбордик, — у «кувиб» сўзига урғу бериб, икки бор такрорлади.

Чол дархол жавоб қилди:

— Қувиб юборинглар!

— Ота, қувлаб юбордик, кетиб қолди, — деди Бадиа отасининг пешанасига қўлларини босиб. Дарҳақиқат, чолнинг иссии баланд эди.

Шу ҳолда улар Толлимаржон карвонсаройидан қўзғалолмай қолишиди. Меъморнинг ҳарорати пастига тушмас, бунинг устига тинмай алаҳсирап, васваса килиб турарди. Кеч кириши билан ҳамманинг юрагига қўрқув тушарди, чолнинг босинқираб, довдираши йўлдошларини оёққа турғизарди. Эрта билан у ўзига келар, тунда қилган ишларини мутлақо эслолмас ва ўзи ҳам хайрон бўларди...

Учинчи куни шогирдлар ичидаги ёш жиҳатдан каттароги бўлган Favvos Муҳаммад табиб излаб шаҳар айланди. У дараклаб бир табибининг уйига қидириб борган эди, у Қизқудук томонга — чўпонлар ичига кетган экан. Биттагина бу табибининг бозори чакқон, ҳовлисида камдан-кам бўлар экан. Лекин ўзи ниҳоятда билағон, жарроҳлик ҳам қўлидан келар экан. Карвонсаройга қайтиб келган Favvos бу гапни ошналарига айтиб, ёнига тилло танга тўла катчасини солиб, йўрға бир отда ҳайё-хув, деб Қизқудук даштига чопди. Favvos ўн тош чамаси узоқлиқдаги Қизқудукқа борди. Favvosнинг бу ишга тез киришиб, мустақил харакат қилаётгани Бадиага ёқарди — «қўрқоқ», «инжиқ» деган фикрлар ундан узоқлаша бошлиди. Халачда бориб дарёдан сув олиб келганидаёқ Бадиа ўз фикрини ўзгартирган, йўлда уни аравадан улоқтириб юборганлари учун хижолат эди. Лекин Бадиа Favvos учун ўшандай бир жазо қўллагани фоятда гўғри бўлганини билмасди.

Эртаси куни кечга яқин Favvos Муҳаммад Қизқудук даштидан табиб олиб келди. Йўрға саман байталга мингандан табиб олтмишлардан ошган, чўққи соқол одам бўлиб, йўлда Favvos Муҳаммаддан дарднинг ҳамма белгиларини сўраб олганди. От устидаги хуржуннинг икки кўзи дори-дармон, жарроҳлик асбоблари билан тўлган эди. Табиб уйига ҳам кирмай тўппагўғри карвонсаройга келишининг боиси асосан яна

катчадаги тилло тангалар бўлди, у Кизқудук атрофидаги бошқа қишлоқларга ўтмай, дарҳол Толлимаржонга қайтишга қарор қилди. Бунинг устига табиб мавлоно Лутфий, устод Андугоний, Машҳадийлар сафдоши меъмор Бухорий номини эшитган эди. Устод Бухорийни кўриш учун хам у энтикиб йўлга тушди. Фаввос Мухаммад «устод Нажмиддин Бухорий бошига тушган ғаму фуссаларни» хам, умуман, йўл-йўлакай айтиб келди. Табиб Меъморнинг яна кеч кириши билан «Дев келди, девни ҳайданглар!» деб васваса қилаётгани устига кириб келди. Бемор ёнида ўтирган Маъсума бека, Бадиа, Зулфикор, Завраклар дарҳол ўринларидан туришди. Улар табибни кун бўйи кутишган эди. Табиб аёлларни хонадан чиқарib юбориб, bemor ёнига чўкка тушиб ўтириб, томирини кўрди. Кўз милкларини, тилини текширди. Меъмор «табиб» деган сўзни эшитиб ўзига келди, кўзини очиб, унга тикилди. Зулфикор бегона одамга қараб яна «девни ҳайданглар» деб қоладими, хаёл қилган эди, йўқ, ундей килмади. Чол жим туриб қолди.

— Меъмор ҳазратлари қисман «қобус дарди»га чалинибдилар, — деди табиб. — Яхши ҳамки, вактни ўтказиб юбормай мени олиб келибсизлар. Бундай дард билан оғриган кишиларни кўп учратганман. Ёнгоқдан ясалиб, қайд қилдирадиган жавза кай бериб, ични тозалаймиз, сўнгра қатиқ ичирамиз. Озгина доруий бехуш бериб, ухлатамиз. Худо ўзи шифо берса, соғайиб кетадилар. Жавза кай «Ал-Қонун»да ёзилгандиреки, Луқмони ҳаким ҳам қобусга жавза кай даво демишлар...

Шогирдлар табиб атрофида унинг хизматига тайёр туришарди. Табиб сув илитишни, янги ивитилган қатиқни хурмачаси билан олиб келишни буюрди. Фаввос билан Заврак югуриб ташқарига чиқиб кетишиди. Бемор ёнида Зулфикор билан Ҳорунбек қолишиди. Бир дамдан кейин йигитчалардек кийиниб олган Бадиа ҳам кириб, бир чеккада турди. Ҳожи табиб унинг киз бола эканини сезмади.

— Бу дард — кўркув ва фуссадан бошланади, — деди табиб, — сафро ошиб, уни авжга миндирган. Иситмани туширсак, устод ҳазратлари кўзларини очадилар. Довдирашлари хам йўқолади. Бу зот қандай

ишини ва кимни яхши кўрардилар? Шу хусусда гаплашмоқ даркор. Нимани хуш кўрмасалар ва ёки бирон кишидан бад олсалар, уни гапириб, ёдга солмаслик, ўтиб кетган ёмон гапларни такрорламаслик лозим.

— Хўп бўлади, — деди Зулфикор.

Заврак қайнаган сув олиб келгач, табиб Меъморни сафро қайт қилдириб, кўл, бетларини ювди. Бирниёла иссиқ чой ичириб, доруий бехуш билан ухлатиб кўйди. Эрта билан келиб, ўзи қатиқ ичиражаги на бошқа дорилар беражагини айтиб, карvonсаройдан чиқиб кетди. Дарҳақиқат, кўнгли бир оз ёришган Меъмор азонгacha алаҳсирамай тинч ухлади. Шогирдлар унинг тепасида мижжа қоқмай ўтириб чиқишиди. Бадиа дам хонага, дам ҳовлига чиқар, юрагини отаси-нинг дарди эзарди.

Эрта билан Ҳожи табиб келиб, Меъмор билан омонлашиб, ҳол-аҳвол сўрашгач, Шаҳобиддин ҳакимнинг китобидан «Қобус дарди» назмини ўқиб берди:

Эшият, то қобусдан айтайин нишон,
Уни «таҳора» дер аҳли Хиндустон.
Нафас чиқмай, қимир этмайди забон,
Қаттиқ азоб тортар шунда ҳар инсон.
Кўп киши билади, уйкуда ногоҳ
Оғир бир юк босиб қолади гоҳ-гоҳ.
Ўлдим энди дея қилганда гумон,
Бирдан нафас чиқиб, бўлади равон.
Баъзилар ўша юк девдир дейишар,
Бу сўз билан улар хато килишар!
Давосини сенга айтсанам, эй инсон,
Бослиқ томиридан олмоқ керак кон.
Жавза кайдан бергил яна бир дирам,
Қўкракдаги хилтга беради барҳам...
Ўн дирам мустако бергил ҳар куни,
Икки ҳафта даво қилдирсанг буни,
Бу доридан бемор топади шифо.
Аммо ким бу дардга учраса мудом,
Емасин кунжуту яна моши хом.
Саримсоқ пиёздан асрасин ўзни,
Ловия, нўхотдан ўгирсин юзни!¹

Меъмор завқланиб маснавийни эшитарди.

Ҳожи табиб асли Бойсун ёқдан бўлиб, Қўнғирот

¹ М. Ҳасанов таржимасидан.

уругидан эканлиги, замонанинг зайди билан Толлимаржон томонларга келиб қолганини, кўл-оёғи синганни мўмиё билан даволашини, жарроҳлик ҳам қилишини, яра-чақани малҳам билан даволашини ҳам айтди. Ундан сўнг, Ҳиротда Абулқосим Иштихоний деган мўътабар зот бор, эшитганмикансиз, дегандек Меъморга қаради. Меъмор эшитганман, деб бош қимирлатди. У зот ҳам асосан Мовароуннахрдан бўлиб, Самарқандда таҳсил топганини, устози эканлигини айтиб, Меъмор диққатини бир муддат ўзига жалб этди. У қайта-қайта томир кўрди, дори берди, қатиқ ҳам ичирди... Алмисоқдаги қизик гапларни гапириб, Меъмор диққатини тортди. Табиб хушфеъллиги ва кўп қизик, антиқа гапларни билиши билан Меъморга жуда ёқиб қолди. Ёшлигиде Бойсун ва Қумқўрғонда яшаган чоғларида Қўнғиротнинг тўғиз, қорабўйин, ўр, хурросоний уруғлари билан Жузнинг иткути, марқа, қарапчи уруғлари бир-бирлари билан чикишмай, доимо жанжаллашиб келганини, айниқса, қарлуғ ва қатагон уруғлари ҳам ахил эмаслигини, қиз олиб, қиз бермаслигини гапириди. Тепасида қадалиб турган Бадиа ва шогирд йигитларга, «ишларингизни қилаверинглар, касалга тикилиб турмоқ — давони сусайтиromoқ ва умуман, бемор тепасида хомуш ва қадалиб ўтиromoқлик яхши эмаслигини Абу Али ибн Сино ҳам таъкидлаб айтганлар, — деди. — Меъмор ҳазратлари камида бир ҳафта Толлимаржонда қоладилар, ундан сўнг, худо хоҳласа, мен ўзим Бешкентгача бирга бориб, у ёғига кузатиб юбораман». Косон ва Хўжа Муборакда, чўпонлар ичиди яқин одамлари бор, бек, мингбоши ҳам унга яқин таниш эканини, ҳарқалай Бухоройи шарифгача қийналмай боришлирига ёрдам беражагини айтди. Бу дилкаш одамнинг ўз ақидаси ҳам бор: у беморга дори-дармон бериш билан бирга, яхши сўзлар, яхши ҳикоялар ҳам айтиб, кўнглини хушлаш ҳам уни тезроқ шифолайди, деб биларди.

— Меъмор ҳазратлари менинг ихтиёримда, — деди у, — ҳазрат уч-тўрт кун ётиб, оёққа турганларидан кейин, устод пойи қадамлари бизнинг ҳовлимизга ҳам етсин, кейин ўзим кузатаман. Мен устоднинг мадрасаларини кўрганман, Мусаллони ҳам... Меъмор ҳазратларини эшитган эдим-у, мулоқотда бўлмаган эдим.

Мавлоно Жаъфар Табризий, устод Ҳожа Юсуф Андугоний, устод Қавомни ҳам эшитганман.

— Ҳурматли иним Абдуласад Ҳожи, — деди ётган ерида Меъмор табибга мурожаат этиб, — шогирдларимга айтинг, ҳамон биз бунда уч-тўрт кун қоладиган бўлсак, бозорга бориб, турли анжомлар ва йўлга керакли нарсаларни харид қилсунлар. Ҳалачдаги бўрон бизнинг барча нарсамизни торож қилди...

Ҳожи табиб бу гапни ҳовлига чиқиб биринчи галда Favvos Муҳаммадга ва яқинлашиб келган бошқа шогирдларга айтди. Бу гапдан Бадиа ҳам, Ҳорунбек ҳам хабардор бўлди. Ичкарига қайтиб кирган табиб, Favvos Муҳаммад ҳақида Меъморга гапирди:

— Шу шогирдингиз бошқаларидан юз чандон сизни яхши кўрар экан. Қандай қилиб мени олиб келганини ўзим ҳам билмай қолдим. Мен эртага йўлга чиқаман, деган эдим, ялиниб-ёлворди, сиёsat ҳам қилди. Охири йиғлаб, менга илтижо қилди. Зудлик билан йўлга чиққаним тўғри бўлган экан, қобус дарди — жуда бешафқат, сафро ҳам ёмон... Тез чора кўрилмаса, ёмон оқибатга олиб келарди. Бу шогирдингиз — шогирд эмас, айни бир фарзанддай экан. Фикрим тўғрими, устод?

Меъмор «тўғри» дегандек бош қимирлатди.

Ҳожи табиб уйига жўнади.

Чоршанба куни эрта билан карвонсарой дарвозаси ёнида уч арава шай туарди.

Анча тузалиб, йўлга чиқиб кетаётган Меъмор Ҳожи табиб берган сандал ёғочидан қилинган асога тираниб, ҳовлида кайфи чор ҳолатда хотини билан бирлаҳза гаплашиб қолди.

— Мехри гиёйингиз бор, уста, — деди Маъсума бека касалдан чиройи очилиб турган эрига хушомад қилиб. Чунки табиб ҳам худди шундоқ гаплар айтишни шогирдларига тайинлаган эди. — Қаерда бўлманг, атрофингизни одамлар ўрайди. Худди асаларининг «подшоси»га ўхшаб, сиз учган томонга дўстларингиз атрофингизни ўраб уча беради. — Меъмор асаларилар ҳаётини кўп гапирав, уларнинг ўз қонун-қоидаларини яхши кўрарди... — Мана, Ҳожи табиб, Ҳорун-

бек, ўзимизнинг шогирдларимиз, Андхуд шаҳридаги нажжор Абдулазиз Намангоний, Мирзо Бойсункурнинг одамлари... ҳаммалари сизнинг сафарингизда парвона бўлиб юришибди. Уларни бирон одам мажбур қилаётгани йўқ. Бухорода бораётган одамлар илгари йўлда биронта таниш учратса учратарди, бўлмаса — йўқ.

— Аммо Ҳожи табиб ниҳоятда дилкаш одам экан,— деди Меъмор чехраси очилиб. — Ҳожи бизнинг қувилганимиз, подшонинг «қўш қўллаб ургани», «хавфли» одам эканимизни билади. Шунга қарамай, меҳрибонлик кўргазиб юрибдими, чинакам инсон экан! Мунофиқлардан худо асрасин! Мунофиқ одамлар ҳам тўлиб ётибди! Мана Аҳмад Чалабийни олайлик. Ҳамма гапни, ҳамма оддий нарсаларни ҳам сир тутарди. Улар ожиз одамлар. Улар шундай қилмасалар, ўзларининг ожиз, жамоага кераксиз кимсалар эканликла-ри билиниб қолади. Шунинг учун ҳам, мушук ахлати-ни бекитгандек, улар ҳамма оддий нарсаларни ҳам сир тутадилар. Димоғдорлик, ғўддайиш каби иллатлар уларнинг касби. Подшоҳ саройи бундай одамларга тўлиб ётибди.

— Уста! — «подшоҳ» сўзини тилга олгани сабабли Маъсума бека лабини тишлади.

— Авваламбор, бу ерда бегона кимса йўқ! Иккиламчи, подшоҳ наздида биз ўлган одамлармиз, ўлганлар ҳеч нарсадан қўрқмайди! Бизнинг қўрқадиган ери-миз йўқ! Энди нимадан қўрқамиш?!

— Биз ўлганимиз йўқ! Бизни ўлди, деганларнинг ўзи ўлсин! — деди Маъсума бека.

— Балли, ана энди ўзингга келдинг!

— Сиз ўлмайдиган инсонсиз, уста, — деди яна Маъсума бека, — чунки сиз ҳеч қачон бирорга ёмон-лик хоҳламагансиз.

Меъмор сукут сақлаб, ерга қараганича ўйланиб қолди. У ҳассасининг учи билан ер чизарди....

Шу лаҳза карвонсарой ховлисида ўзининг саман байталида Ҳожи табиб пайдо бўлди. Байталнинг қорни чиққан, устидаги хуржуннинг икки кўзи табобат анжомлари билан тўлган эди. У отдан тушиб Меъмор билан саломаликдан сўнг, бу кеча қандай ухлаганини, ётиш олдидан қатиқ ичдими — шуларни сўради.

Ҳаммаси жойида. Шундан сўнг Меъмор ва нарироқда. Ҳорунбек ўзининг байталига тикилиб туришганини сезиб, гап қотди:

— Кўриниши унча бўлмаса ҳам, иши пухта, — леди Ҳожи табиб Ҳорунбекка, — жонивор йўрға, чидамли. Борадиган жойларимнинг барини билади. Битта камчилиги шуки, хуржундаги дорилардан олиб беморларга беролмайди, бўлмаса ҳамма нарсани билади.

Ҳорунбек илжайди.

— Ҳа, фақат табиблик қилолмайди. Ундан бўлак ҳамма нарсага фаҳми етади. — Бу соддадил чолнинг куйиб-пишиб отини макташидан атрофдагилар ҳам завқланиб кулишди.

XXX б о б

БИЧИЛГАН ҚУЛ

Шаввал, яъни саратон авжга минган, ҳавонинг ниҳоятда қизиган бир куни. Толлимаржондан чиқкан уч арава Даشت карвонсаройида андак тўхтади. Кўримсиз бир чалдивор жазирамада ёниб ётарди. Ваасваса дардидан анча фориғ бўлган Меъмор Ҳожи табиб измидан чиқмай, эрта билан одатдагидек яна битта-битта юриб ҳовли ўртасидаги қудук тепасига келди. Меъмор от суғораётган кишидан табибининг сув ичгиси келиб, боғлоқлик ерида бетоқат бўлаётган байталини ҳам суғориб қўйишни илтимос қилди. Қудуқдан сув торгаётган киши челякни ерга қўйди-да, қаддини ростлаб, Меъморга тикилди. У бир нима демай анча вақтгача тикилиб турди. У, ориқ юzlари қаҳрабодек сарғайиб кетган, соқол-мўйлаби йўқ кўса эди. Пешанасини тириштириб, ўқрайиб қараб туришидан менинг илтимосим малол келди хаёл қилиб, Меъмор узр сўради:

— Мен сизнинг бандлигингизни пайқамай иш бу юрибман. Афв этасиз, биродар.

Заъфарон заҳил одам жавоб қилмади. У яна эглиб ердан челягини кўтарди-да, нарироқда боғлоқлик турган отни суғора бошлади. Мен билан гаплашгиси келмади, деб Меъмор орқасига қайтиб кетаётган эди,

ўзини кўрмаганликка олиб турган бўлса ҳам, аслида зийраклик билан кузатиб турган ҳалиги одам Меъморнинг орқасидан гап отди:

— Ҳой, қария, тўхта!

Меъмор орқасига қайрилиб каради.

— Тўхта, отингни сугориб бераман!

— Барака топинг.

— Савдогармисен? Бекмисен? Самарқанддан Балхга кетяпсанми ёки Балхдан Самарқандга?

— Мен устамен. Бино қурамен. Бухорога кетяпмен...

— Бухорога бориш шартми! Бинони шу ерда куравермайсанми?

Меъмор ўйланиб қолди. Уни девона хаёл қилиб, бош иргадию жавоб қилмади. Бир зумдан кейин у яна ўртадаги сукутни бузди. Рўпарасидаги кўса одам ниҳоятда камгап, тўнг, кўзлари чақчайганча тикилиб турарди. Меъмор бир оз ундан хайикди ҳам.

— Ҳа, шу ерда курса ҳам бўлаверади... — деди Меъмор.

— Кимга!? Амирзодагами?

— Одамларга, фуқарога...

— Йўқ, амирзодага қургин, инъом оласен! Хотининг, қизинг борми? Уларни ўша қурган уйинг ичига олиб кириб, амирзодага кўшиб кўй!

— Ҳой, ҳой, тилингни тий! — деди ўз хужрасидан чиқиб келаётган табиб бояги одамнинг шанғиллаб гапираётган хақорат гапларини эшитиб. — Сенга нима бўлди! Бу зот меъмор Нажмиддин Бухорий ҳазратлари бўладилар! Амирзодалардан алам чекиб сарсон-саргардон бўлиб юрибдилар. Сен, Меъмор ҳазратларига ноҳақ, носазо сўзларни айтадурсен! Агар яна бир оғиз сўз айтсанг, мен сендан юз ўгирамен! Дархол узр сўра!

— Бу одам амирзодалардан кўп ситам чекканга ўхшайди, — деди Меъмор табибга, — билмай гапириб юбордилар, майли, хафа бўлмаймен.

— Менга яна таряқдан сотинг, табиб, — деди жим бўлиб, хўмрайиб турган у одам. — Мен ҳалидори ютганим йўқ. Ҳамма ёғим оғриб, тиришиб кетяпмен...

— Юр, менинг хужрамга! — деди табиб у одамни

орқасидан бошлаб. Табиб Меъморни ҳам ўз хужрасига таклиф қилди.

Хужрага киришгач, Меъморни юқорига ўтқизиб, икки томонга табиб билан кўса одам ўтириши. Табиб дори халтасидан бир тунука қутича олиб, қоғозга ўралган қора майиздек нарсани у одамга узатди.

— Уч бўл.

— Хўп бўлади, — деди у одам бир оз очилиб, хонтахта устидаги пиёлага бир култум қайнаган сув кўйиб, тарякнинг учдан бирини чимдидиб узиб пиёлага солиб, бармоқлари билан эзди. Эритиб, қулт этиб ютиб юборди.

— Бу йигитнинг номи Тожи. Йигирма олти ёшда, — деди Ҳожи табиб секингина. — Асли Шахрисабздан бўлиб, домланинг ўғли, бошига оғир мусибат тушиб, бу томонларда тентираб юрибди. У хозир эски пайтавадан ҳам хор.

— Шундоқми... — деди Меъмор ҳайратомуз унга тикилиб. Унинг назарида олтмишларга борган кекса одамга ўхшарди. Айни қирчиллама йигитча пайтида бунчалик заъфарон ва тажанг бўлиб қолганига ҳам таажжубланди, ҳам афсусланди.

— Амирзода Иброҳим Султон Шерозда бу йигитни туттириб олиб келиб номус жазосига гирифтор қилған. У бир умр ҳақоратга ташланган... Шўрлик Шахрисабзга ҳам қайтиб боролмай дарбадарликда юрибди. Ўлиб-нетиб кетмасин, деб дори-дармон бе-риб юраман. Ўлиб кетганида ўзига яхши бўлар эди. Иродани ҳам амирзода олиб қўйган. У хозир карвон-сарой соҳибининг хизматкори...

Тожи чўкка тушиб, бошини ҳам қилиб ўтиради. Унинг ғазабу тажангили тарқаб, анча юмшаган, йўловчининг юзига тик боқолмасу, лекин ҳар замон-ҳар замонда бошини кўтариб, табибга мамнуният билан тикиларди. Таряк уни юмшатиб, оёқ-қўлини бўшашибтириди.

...Бу воқеага беш йилча бўлди. Шаҳар бозорида отаси берган пулни сармоя қилиб, дўкон очган Тожи савдо-сотиқни авж олдириб, қаддини ростлай бошлади. Шаҳарда анча-мунча ошналар ҳам орттириди. Жума кунлари тенгқур йигитлар билан тўпланиб базмлар

куришди. Унинг жуда оғзи ботир, гап келганида ҳеч кимни аямасди. У аслида жуда кўркам ва полвон йигит бўлиб, қоп-қора, чакмок мўйлаби ўзига жуда ҳам ярашиб турарди. У сўзамол, серҳаракат ошналиридан ҳеч нарсани аямайдиган қўли очик, улфати эди. Тез кунда бозор-тижорат ахли ўртасида ном чиқариб, «Тожиддин-бойвачча» бўлди. Тожи ошиқи бекарор бўлиб, бир ошинасининг жуда чиройли синглисини тўю-томоша билан олди. Ёш хотинини ниҳоятда яхши кўрар, унинг тўйи учун бор-йўғини сарфлаб юборган эди. Иттифоқо кунлардан бир куни Тожини навкарлар дўконидан ушлаб олиб, қозихонага олиб боришади. Мансабдор бир одам у билан қамти ўтириб: «Сен, амирзода Иброҳим Султон олий ҳазратлари ишратбоз деб гап тарқатибсан!» деб сўрайди. Тожи тонади. Ундан сўнг мансабдор Тожининг баъзи ошналари номини атаб, «шулар ёнида «амирзода ҳам ишратбоз, ҳам бачча.... Шундок қилиб ўз ҳирсини қондиради...» дебсан? Агар тонсанг, ўша ошналарнинг билан юзлаштираман» дейди. Тожи ошналарининг бунда олиб келиниши ва юзлаштирилишидан чўчиб: «Билмай гапириб юборибман, тавба қилдим» дейди. Мансабдор кимса бу сўзларни қофозга ёзиб, ҳеч қачон тонмаслиги учун каломуллони ўртага қўйиб, қасам ичдиради. Шундан сўнг уни навкарлар олиб чиқиб, заҳ бир ертўлага қамашади. Орадан бир неча кун ўтгач, Тожини амирзода ҳарамига олиб боришиб, ойнавон ганжина ўртасига қўйилган бақувват курсига ўтқазиб, қўл-оёғини унга маҳкам боғлашади. Оғзига рўмолча тиқиб, катта деразадан ичкари хонага қараб ўтиришини ва ичкари хонадаги воқеани яхши кўриб олгач, кейин бўшатиб юборишажагини айтишади. Кўп ўтмай бу хонага Тожининг ҳарир ипак кўйлак кийған хотинини кекса бир аёл олиб киради. Улар тўшалган ўрин ёнида бир муддат ўтиришгач, ҳалиги аёл чиқиб кетади-да, бу хонага бошида жигадор бўрк, кимхоб чопонини елкага ташлаган амирзода Иброҳим Султон кириб келиб, бир пиёла май ичади-да, Тожининг чиройли ўш хотинини қучоқлаб, тўшакка босади... Бу манзарани кўриб турган Тожи бир неча бор оҳ уриб, харакат қилади, аммо овози чиқмайди, ўридан ҳам қўзгалолмайди. Бир муддатдан сўнг ўридан турган амирзода боши қийшайиб

осилиб қолган Тожига яқинроқ келиб, «бундан буёқ сен ҳам, хотининг ҳам хизматимда бўлласанлар...» деб бошқа хонага ўтиб кетади. Шу куни кечқурун обдан калтакланиб, кейин доруий бехуш бериб, ухлатилган Тожини бичиб қўйишади. У бир неча кун ҳарам ичида ги ҳужрада ётади. Ўзига келгач, шу ҳовлида ҳарам оғаси бўлиб ишлаб юради. Бир-икки ой ичида унинг соқол-мўйлаблари тўкилиб, кўса бўлиб қолади. Ранги ҳам зальфарон. Шу вақт ичида амирзода унинг кўз олдида хотинини уч бор булғайди. Тутқун канизак бўлиб қолган у жувон кейинги кунларда ўзини томдан ташлаб ўлдиради. Доимо дарғазаб, заъфарон юрадиган Тожи бир неча ойдан кейин ҳарам қоровуллари кўзини шамғалат қилиб, бу даргоҳдан қочиб кетади. Мана, неча йилдирки, бир оғиз сўзи учун хонавайрон бўлиб, ҳақоратланган Тожи Хуросондан чиқиб ўзи туғилиб ўсган Шаҳрисабзга ҳам боролмай, бунда сарсон-сарардон бўлиб юрибди. Ким эдиму энди кимман, деб ўласа керак. Ҳамма нарсадан ғазабланиб юради. У әммани ёмон кўради, умуман, ёруғ дунёдаги ҳамма имирлаган нарсани ёмон кўради. Дафъи савдо деган-эй, фақат тарякни тан олади, шунга жонини беради...

Бир лаҳзадан сўнг, у Меъмор билан табибга ўмрайиб бир қараб қўйди-да, ташқарига чиқиб кета уриб, яна тўнғиллади:

— Соҳиб, отларни суғор деган, эди, лаънати отлар сув ичмай бир-бирини тишлишяпти! Ҳамма ёқ расво! Мен бу ердан кетаман! Соҳиб ҳақ тўламаяпти! Расво! Дунёда ҳақиқат йўқ, ҳамма ёкни вайрон қилиш керак!..

У чиқиб кетди. Меъмор билан Ҳожи табиб бир-бирларига карашди, унинг орқасидан ачиниб тикилиб қолишиди.

ХХХI б о б ЧУҚУР ОҚИМ

Бозорма-бозор тентираб, жазирама иссиқда эрталабдан кечгача сув сотадиган Али мешкобчи хусусида аввалги бобларда сўз айтган эдик. Ҳиротдалигига Меъморнинг меҳри гиёси тушган бу одам мадраса

қурилишига ҳам кириб, бунда ғишт тераётган кишиларга муздек чашма сувидан заранг косада улашар, биринчи косани Меъморга суниб, ундан кейин мадраса ховлисини айланиб, ҳаммага «Чашмаи Хизр» сувидан ичириб, кейин хайр-хўшлашиб жўнарди. Бу гариф ва кимсасиз киши асл Сабзавор шахридан бўлиб, фалакнинг гардиши билан Ҳиротга келиб қолган. У қирқ ёшларга борган, жуссаси кичик, миқтидан келган, овози ўткир қорача одам эди. Аслида тузуккина бир устанинг ўғли экан. Отаси вафотидан кейин бошига тушган бир қайfu ўз юртидан узоқлаштириб, Ҳирот бозорларида мешкобчилик қиласкан. Дастребки йиллари Меъморнинг эски-тускисини кийиб, пул олиб юрди. У юз-кўзлари, гап-сўзлари ўз отасига жуда ўхшашиб кетадиган ва бунинг устига мусофирипарвар, мурувватли Меъморни яхши кўриб, баъзан уй хизматини ҳам қилди. Кейинчалиқ, мадраса қурилишида ишлади. Эри қазо қилиб кетган бир бева хотинға уйланиб, унинг ховлисига кўчиб борди. Ўз наздида мешкобчилик сердаромад бўлганлиги учун шу ишни қиласди. Аммо бошқа бегона одамдан пул сўрамас, сув ичирап, ким нима берса олар, ишқилиб бозору кўчаларни айланиб юриб, чарчаган одамга бир коса муздек сув тутиб, яна йўлида давом этаверарди. Ҳар куни эрта билан икки меш сувни «Чашмаи Хизр»дан олиб келиб, бирини Меъмор хонадонига, иккинчисини ўз кулбасида мис кўзаларга тўлдиради. Дастребки вактларда Маъсума бека пиширган овқатлардан, шогирдлар қатори у ҳам тановул этиб, «Саховатли Меъмор ҳазратларининг умрлари узоқ бўлиб, доимо сихат-саломат бўлсинлар», деб дуо қиласди. Низомиддинни кўриб «худойи таоло менга ҳам фарзанд берса, мана шунаقا удлик-шудлик бўлсин», дерди. Ўз иши билан доимо машғул бўлиб юрган Али мешкобчи кейинчалик Низомиддиннинг ҳибс этилиб, Ихтиёриддинга ташланганини эшитиб, эрта билан келиб Меъморнинг кўнглини сўради... Орадан бир неча ой ўтгач, Низомиддиннинг осилганини эшитиб, бўйнида сувсиз меш, растама-раст, кўчама-кўча дод солиб, бошидан тупрок сочиб, йиғлаб юрди. Ихтиёриддин қалъаси ёнига келиб худога ёлворди. Мусалло атрофига «Мирзо» мадрасасини кураётганлари орасига ҳам

кириб, Низомиддиннинг ҳам, бошқа йигитларнинг ҳам гуноҳи йўқлигини айтиб, дод солиб бақирди. Унинг ноласига Меъмор хонадонидан бўлак кишилар лоқайд қаради. Бозорда ясовулбоши унинг қилиб юрган ишларидан жирканиб: «Хей, мешкобчи, агар сен яна шундок бақириб юрсанг, оғзингга қамчи билан ураман, ўттиз икки тишинг синиб тушади!» деб дўқ урди. Али мешкобчи ичидা: «Сен кўпакнинг қўлингдан шу иш келади, албатта» дедиую индамай жўнаб қолди.

Орадан кўп ўтмай Меъморнинг ҳовли-жойлари ни сотиб шаҳардан чиқиб кетганини эшилди. Хайрлашиб, кузатиб қолмагани юрагини ўртаб, аzonда мени тўла «Чашмаи Хизр» сувини кўтариб, «Дахаи дорул Ҳуффо» маҳалласига келди. Жуда таниш бўлган дарвозани тақиллатди. Ҳозироқ шогирдлардан бири ёки Бадиа бекам чиқиб очади, салқин чашма сувини ошхонадаги хумга қўйдириб, очик чехра билан ташаккур айтади, хаёл қилиб турган Али мешкобчининг айтгани бошқача бўлди. Илгари очик турадиган бу дарвоза танбалаб бекитилган. Шарак-шуруқ қилиб, занжирлари олиниб, ярим очилган дарвозадан башараси совук бир одам кўриниб, жим қараб турди.

— Меъмор ҳазратларининг ҳовлилари шу эди-а, сиз жаноб кўчиб келдингизми?

— Сотиб олдим!

— Мен Али мешкобчиман. Меъмор ҳазратларининг ташқари ҳовлиларидағи ҳужрада турганман. Соғиниб, кўмсаб келдим. Зарур ишим йўқ, бошим оғиб келиб қолганимни ўзим ҳам билмай қолибман. Қандай яхши инсон эдилар. Бундок мусофирипарвар, саховатли одамлар кам учрайди...

— Орқасидан югурсанг, етиб оласан! У «саховатли» кишинг ҳали Бухорога етгани йўқ, — деди у одам мешкобчига кўзларини ўқдек қадаб. — Ёки ўша ҳужра сеникимиди?

— Алҳазар, жаноб! Мен бир ғариф одамман, мен факат кўмсаб келдим...

— Яна бошқа гапинг борми?!

— Йўқ.

У одам эшикни «тарс» эткизив ёпиб, ичкарига кириб кетди.

«Ох, қандай замонларга қолдик — деди ўзига ўзи мешкобчи, — одам одамга шундай муомала қиласди?» У мешдаги чашма сувидан күчада юрган болаларга қуйиб бериб, жўнаб қолди. Пули Молондан ўтиб, гала миноралар ёнига келганида, узокдан офто бачини кўрган Мажнун-девона томоги қақраб унинг ўйлини тўсди:

— Сув бер!

— Мана, ич, — деди мешкобчи заранг косани тўлдириб узатиб, — ич, жигарим, энди сирлашадиган фақат иккимиз қолганга ўхшаймиз.

— Яна бер, — деди девона биринчи косани симириб бўлиб. У яна тўлдириб берди. Девона иккинчи косани ҳам ичди.

— Яна куяйми?

— Бас, — деди у мешкобчига илжайиб. Шундан сўнг кафтини очиб, duo қилаётган мешкобчига мурожаат қилди: — Сен ғариб одамсан, сенинг дуойинг ижобат бўлади; э худо, дашту биёбонларда қон йифлаб кетаётган Меъмор ҳазратларининг мушкулларини осон эт, жувонмарг бўлган ўғиллари Низомиддинни раҳмат қил!

Улар иккови ҳам юзларига баробар фотиха тортилар.

— Меъмор ҳазратлари кўчиб кетибдилар, кўмсаб борган эдим, ичкарига киритишмади, — деди мешкобчи илжайиб, мамнун турган девонага.

— Тунда Афросиёб қўшин тортиб келди. Зулфи коримни олиб чиқиб, мана шу ерда чунонам жанг килдимки, мажусийлардан биронта ҳам қолмади. Бугун кечаси Афросиёб яна келади, сиз ҳам хушёр бўлиб туринг! Ўз куёви Сиёвушнинг бошини олган ҳам шу Афросиёб, лашкари беадад билан келади. Ҳаммасини кириб ташлайман!

Али мешкобчи девонага караб, унинг айниётганини сезди. Шундан сўнг хайрлашиб Бозори Қандахор томонга жўнаб қолди. Дорул Ҳуффо маҳалласи илгаригидек эмас — бу маҳалла фариштаси йўқ, совук ва бефайз бўлиб қолган эди. Нима сабабдан бу томонга келганини ўзи ҳам билмади. Ҳарқалай, инсон яхшилик кўриб, туз ичган ерини қўмсар экан.

Меъморнинг ҳовли-жойини сотиб олган одамнинг

совуқ муомаласи гўё мешкобчини елкасига тушган калтак бўлди: у юзини ўгириб индамай жўнаб қолди. Ҳиндиларнинг дайди сигири ҳам шунақа бўлар экан; қисир қолиб, уйдан чиқарилиб юборилгач, бир неча ой боши оғиб яна ўз уйига кириб келаверар экан. Лекин муомаланинг илгаригидай бўлмаганини сезган сигир кейинчалик ўз ҳовлисини тарқ этиб, кўчадаги дайди сигирларга қўшилиб кетар экан.

Меъморнинг ҳайдалиб кетишида корфармо Аҳмад Чалабийнинг қўли борлигини, уста Жўржий ва куллолларнинг ҳам Хиротдан чиқиб кетишига шу одам сабаб бўлаётганини эшитган қизиққон ва тили ботир Али мешкобчи бозорда бакириб: «Эътиборли кишилар Хуросондан қувилмоқда. Мансабдор шахсларнинг зулми ошиб кетди!» — деб юрди. Хотинининг қазосидан сўнг у ҳам Хиротдан бош олиб, Сабзавор томонга кетмоқчи бўлади. Аммо у томонга қайси юз билан боришини билолмади. Меъморнинг бирдан бир яқин ошнаси устод Қавом эканлигини эшитган эди; у зотнинг ҳовлисига бориб, зиёрат қилиб келди. Хайрият, бу зот Меъмор номини тилгà олиб, бўзлаганини сезиб, дарҳол олдига дастурхон ёзди. Кейинги пайтларда у Худододбекнинг никоҳ тўйида хизмат қилди. У устод Қавомдан, Бухоройи шарифга кетаётган бирон карвонга уни қўшиб, жўнатиб юборса, то қиёмат дуо килажагини айтди. Устод Қавом аниқ ваъда қилмаган бўлса ҳам, шу бир офтобачининг Нажмиддин Бухорийни қанчалик яхши кўришини сезиб, ҳайрон бўлиб қолди. Шу ёшга кириб ўзига бирон ихлосманд одам йўклиги кўнглидан ўтди.

Али мешкобчи яна мадраса қурилишига кириб одамларга сув тутди. Лекин қамти келиб қолган Аҳмад Чалабийга сув бермай, юзини тескари қилди. Буни сезган Аҳмад Чалабий мешкобчига мурожаат этди:

- Ҳей, сувингдан бир коса бер.
- Сув йўк!
- Ана, меш тўла сув-ку?
- Бу Чашмаи Хизрдан. Сизга ҳайф кетади!
- Тентак!
- Сиз жанобга мол бозоридаги шалтоқ сувни ҳам раво кўрмайман!
- Йўқол бу ердан!

Али мешкобчи корфармо Аҳмад Чалабийга хўмра-йиб сўнгра жўнаб қолди.

Рамазон ойи охирларида Ал-Жазойир амирининг Ҳиротга келиши ва бу тантанавор кунлар Ҳирот ахлини масруру маст қилиб, салтанатнинг ас-асаю дабдабаси одамлар дикқатини ўзига жалб этиб, нигохини хиралаштиради, хаёл қилди, ҳукмдорлар. Улар янгилишди; қатлу талон-торожлар, қувфину пўписалар, фарибу фуррабонинг аянчли ҳаёти — қашшоқлик, мулкдорларнинг керилишларию амирзодаларнинг адовати фуқаро тинкасини қуритган эди.

Бозорма-бозор санғиб, сув сотиб юрган Али мешкобчи ҳамма ерда «қиёмат яқин қолгани»ни, мансабдорларнинг хиёнаткорлигию одамларда меҳру оқибат қолмаганини бақириб айтиб юрди. Кечкурунлари чарчаб ҳужрасига келгач, токчадаги китобни кўлга оларди. Бу китоб «Чор дарвеш» бўлиб, Меъмор ҳадя қилган эди. Али мешкобчи ёшлигида мактаб кўрмаса ҳам, хат таниб олган, қийналиб ўқирди. Энг қизиги, бу китобнинг қатида Меъмор умри давоми йиккан ҳикматли сўзларни шилдироқ қоғозга ёзиб қўйган бўлиб, уларни доимо ўқиб, ёдлаб юарди.

Бу гапларда одамийлик, ахлоқ-одоб, ҳалол меҳнат, мардлик, шарму ҳаё, инсоф, тадбиркорлик каби фазилатлар улуғланар, танбаллик, ҳаромтомоқлик, пораҳурлиқ, жаҳолат, ёлғончилик, адоват, ҳasad, фийбат, хиёнат, кибр-ҳаво сингари иллатлар қораланар эди. Али мешкобчининг бу гапларни айтиб юриши, табиики, сарой атрофидагиларга ёқмасди.

Бозорма-бозор югуриб, замонаю мансабдор кимсаларнинг берахму бешафқатлигидан, пораҳўру бемурватлигидан шикоят қилиб юрган мешкобчини кунлардан бир куни икки ясовул чашма бошида: «Сен ярамас келгинди сувни булғатдинг», деб қамчи билан чунонам савалашди. Ерда чўзилиб қолган Али мешкобчининг бикинига тепишди. Унинг оёкларига қамчи уриб, иккинчи бор бозор кезмайдиган қилиб ташлаб кетишиди.

Чўзилиб ётган мешкобчини кечга яқин қандайдир номаълум одамлар кўтаришиб ҳужрасига элтиб қўйишибди. Ҳушига келган мешкобчи эрта билан ковоғи

тепасидаги ёрилиб қон оққан ерларини кимдир рўмол билан боғлаб кетганини, ёнига бир коса сув, нон қўйилганини пайқади.

Бу ким бўлди? Ахир у сўққабош, кимсасиз, мусо-фир-ку? Унинг кўнглини олиб турадиган меҳрибон Меъмор ҳам ҳайдалиб кетган-ку! Қашқирлардек йиртқич ясовуллар қўлидан олиб, ўз ҳужрасига ётқизиб кетган ким экан? Бу шаҳарда унинг яқин ошнаси қолмаган-ку?! Мешкобчининг аъзойи бадани зирқираб, бош кўтаришга мажоли келмай ётганида, куннинг ўрталарида, ҳужра эшиги очилиб, рўмолчага озгина хўрак туғиб олган икки йигит кирди. Улар мешкобчи-га салом бериб, эҳтиёткорлик билан ёнига ўтиришди. Уларнинг бири — йигирма ўшларда, чиройли қилиб салла ўраб олган мадраса муллаваччаларидан бўлиб, иккинчиси, ҳам эндиғина мўйлаби сабза урган, гавда-си йўғон йигит эди. Муллавачча биринчи бўлиб, ярим овозда кеча кечқурун чашма тепасида ётганини, икковлари кўтариб олиб кириб кўйганини айтди. Қимир-лолмай, калтак зарбидан инграб ётган мешкобчи, агар унинг қўлида Ҳазрати Алиниңг зулфиқори бўлганида барча мансабдорларни, амирзодалару подшоҳгача, ҳамма-ҳаммасини бир кунда қириб ташлашини айтиб, оҳ урди. Бир фариб одамга шунча ситам бергани худо-дан қўрқмайдиларми, деди яна инграб.

— Йўқ, улар худодан қўрқмайдилар! — деди муллавачча ярим овозда босиклик билан. — Фуқаронинг чумолича ҳам қадри йўқ. Биз ҳам, кудратли мешкобчи, сизга ўҳшаб жабр чекдик.

— Сизлар ким бўласиз? — мешкобчи икки йигит-нинг меҳрибонлик кўрсатганидан мамнун бўлиб сўра-ди.

— Бизлар Низомиддин ва Аҳмад Лурнинг дўстла-римиз.

— Тушундим, — деди мешкобчи, — Низомиддин асл йигит эди! Танийман. Шерикларингиз қатл этилиб, сиз икковингиз қутулиб қолдингизми?

— Йўқ, бизлар жуда кўпмиз, — деди муллавачча. — Бизлар қатл этганлари билан адo бўлмаймиз.

— Тушунарли.

— Ёнингизга келишдан мақсадимиз — биринчидан, сиз фариб ва софдил кишига қўлимиздан келган-

ча муруват килмок, иккинчидан, бундан буёқ ўз ёғингизга қовурилиб юрмай, хоҳласангиз, бизнинг ёнимизга келиб, биргалашиб иш тутмоккликин айтиш эди. Ёлғизлик ёмон, йиғласак ҳам бирга йиғлайлик, ёмонлар билан ёқалашсак ҳам бирга бўлиб ёқалашайлики, ҳақиқатни бирликда топайлик.

— Испингиз нима, азиз укаларим? — сўради мешкобчи.

— Менинг исмим — Талаба, шеригимнинг исми — Интиқом. Тузалганингиздан кейин келинг, бизларни Мадрасаси Олиядан топасиз...

Икки йигит хайр-хўшлашиб ўринларидан турдилар.

— Албатта бораман, — деди Али мешкобчи номлари яширин, меҳрибонлик кўрсатаётган икки хушфөъл йигитга тикилиб.

Чоршанба куни эрта билан Дорул Хуффо маҳалласида пайдо бўлган яна бошқа икки нотаниш одам Меъморнинг эшигини тақиллатди. Эшикни кия очиб, нотаниш кишиларга совук назар ташлаган юзлари гўштдор уй эгаси сипоҳларга хос пурвиқорлик билан «Хизмат?» дегандек қаради.

— Ассалому алайкум! — деди эшик тақиллатганлар баробарига, — Меъмор ҳазратларида ишимиз бор эди, марҳамат қилиб чақириб берсангиз.

— Бу ер қозихона бўлганми?

Эшик тақиллатганлар жим бўлиб қолишиди.

— Бу ховлини мен сотиб олганман! Бу ерда меъмор-пеъморинг йўқ! Уни бекорга хайдашмаганга ўхшайди. Хоиннинг отасида ҳам бир гап бор экан!

— Соҳиб, бизни авф этинг, биз бу ерга янгишиб келиб қолибмиз.

Эшик қарсса ёпилди.

Кўчада қолган бу икки нотаниш одам бир-бирига ҳайрон бўлиб караб қолди.

— Бу тушимми ё ўнгимми?

— Ўнг, — деди сокол-мўйлаби сийрак, лўмбиллаган семиз, ўрта яшар одам рўпарасидаги шоп мўйлабли қотма кишига.

Бу одамларнинг бири — Фармон кал лақабли этикдўз косиб бўлиб, ёшлигида боши ғоятда кирмоч кал бўлган, ёши ўтиши билан у тузалиб кетган бўлса

ҳам, қулогигача бостириб ҳожи дўппи кийиб юарди. Кўнгли очиқ, кулгию ҳазилни ёқтиар, улфатлари орасида ҳаммадан аввал бир бошини очиб кўрсатиб, ўз лақабидан гап бошлар, гапга чечан эди. У меъморнинг хонадонига маҳси, кавушу этик тикиб берар, баъзида Меъмор Бозори Қандаҳордаги унинг дўконига келиб гаплашиб, дилкашлиқ қилиб ўтиар эди. Иккинчи киши — Парфи сўтак бўлиб, уйида косибларга сағри тайёрлаб сотарди. У ўзига етгунча беғам, гап билмас сўтак эди. Улар бир-бири билан ёшлиқдан ошна бўлиб, икковлари ҳам Меъморга ихлосманд, кўп масалаларда келиб маслаҳатлашиб туришарди. Низомиддиннинг қатлидан хабарлари бор, келиб дардлашиб, ҳасратлашиб кетицган эдию, аммо шундай мўътабар зотнинг ҳайдалиб кетиши асло хаёлларига келмаган эди. Бунинг устига эшик очган совук кимсанинг: «Бу ер илгари қозихона бўлганми?!» дегани уларни ўйлатиб қўйди. Улар, дарҳақиқат, ҳозир қозихонадан чиқиб келишаётган эди. Уларнинг бир камбағал косиб ошнаси меҳнат ҳақини тўламай, анча вақтдан буён муттаҳамлик қилиб келаётган хўжайини — улгуржибуруш бойвачча устидан қозига арз қилган эди. Бу иш анча вақт судралиб юриб, бугун ҳал бўлган эди. Улгуржибуруш бойвачча пора бериб, кутулиб кетди. Бойвачча ҳақ, арз қилган косиб муттаҳам бўлиб колди. Қозихонадан кўксини чанглаб фифон қилиб чиқиб кетган косибга тасалли беришди. Аммо косиб, бу ярамас одам бошқа бир жиноятни ҳам пул билан ёпиб юборганини кўрган — у бировнинг хотинига кўз олайтирган номард эди.

Фармон кал билан Парфи сўтак ўз ҳамкарабаларига сабр қил, сабрдан бошқа илож йўқ, деб тасалли беришди. Лекин уларнинг Меъмор ховлисига йўл олганларининг боиси бу эмас, бошқа масала эди. Меъморнинг мана шу бир ой ичидаги Ҳиротдан чиқиб кетганидан хабарлари йўқ эди.

Парфи сўтак билан Фармон кал орқаларига қайтиб, Пирмуҳаммад тандирчи ёнига келишди. Кенг ватекис ҳовлида пешанасини танғиб олиб, ўғиллари билан тандир ясаётган гавдаси йўғон киши қўлидаги тахтачасини кўйиб, ошналари билан қўл сиқишиб омонлашди. Болалардан холироқ, айвон соясига бо-

риб ўтиришди. Фотиҳадан кейин, Фармон кал гапни лўнда қилди:

— Куломизга ёмон гап чалинди; Муҳаммад Арғун маҳкамаси худо раҳмат қилгур Низомиддиннинг отаси Меъморга кўз тикиб, у зотни орадан кўтариб ташламоқ ниятида эмиш. Бу гап жуда аниқ кишидан эшитилди. Мавлононинг маслаҳатларига кўра, Меъморни хабардор қилиб қўяйлик, деб борган эдик, у зот ҳовли-жойларини сотиб, кўчиб кетибдилар.

— Кечиккан бўлсангиз ҳам ҳарқалай бу гапни Талаба жанобларига ҳам маълум қилиб, маслаҳат сўраш керак, — деди тандирчи. — Мен бир нима дёёлмайман. Ўзингизга маълумки, Талаба жаноблари ҳамма нарсани маслаҳатлашиб олмоқ кераклигини айтган эдилар. Мавлонога ҳам бу гап маълум, нечун у киши Талаба ҳазратлари билан маслаҳатлашмай, сизларни Дорул Ҳуффога юбордилар экан?

— Бу гапингиз маъқул, — деди сухбатга аралашиб Парфи сўтак. — Мен ҳам йўлда сизга айтдим-а, олдин мадрасага боришимиз керак деб.

— Боришдан қочмаймиз, — деди Фармон кал.

— Эҳтиёт бўлинглар, — деди Пирмуҳаммад тандирчи, — бирон жуфт этикми, маҳсими, қўлингизга олиб олинглар. Ҳовлиқманглар, ҳовлиқкан одамга ҳамма қарайди.

Кал билан Сўтак бир пиёладан чой ичиб, ўринларидан туришди. Тандирчи ўргатганидек рўмолга янги этик туғиб, мадрасага боришди. Шу атрофда айланиб юришди. Орадан кўп ўтмай, қўлида китоб бошида чиройли салла, муллавачча келиб, улар билан омонлашди. Бу йигит «талаба» эди. Улар кўчада янги этикни кўриб, савдолашаётган бўлиб, асосий гапга ўтишди. Фармон кал Талабага ҳамма гапни лўнда қилиб айтди. Муллавачча бўлса шошмасдан этикнинг у ёқ-буёкларини айлантириб кўрган бўлди.

— Бу ишнинг чораси кўрилган. Мархум Низомиддиннинг отаси соғ-саломат Бухорога жўнаб кетди. Ўзимизга тегишли бир одам аравакашлик қилиб, у зотни олиб кетди. Биз ўйлаймизки, Меъмор ҳазратларининг сафарлари бехатар бўлғай.

— Хайрият, — деди Фармон кал.

— Этигингиз қиммат экан, уста, — деди мулла-вачча, — биз ўзимиз бозорга бориб савдолашиб оламиз. Тушундингизми?

— Тушунарли. Хайр, саломат бўлинг! — деди Фармон кал.

Фармон кал билан Парфи сўтак яна орқаларига қайтишди. Улар йўл-йўлакай Талабанинг жуда хушфеъл, доно йигит эканинин гаплашиб кетишиди. Ситамгар фалак, бешафқат подшохлар ўзи сабаб бўлиб, фуқаро мана шу интиком йўлига, хуруфия фирмасига жамулжам бўлаётганини, бу ҳам тангрининг иродаси эканини айтишиб, ўзларига тасалли беришади. Башарти кўлга қиличу найза ушлаш лозим бўлиб қолса, бу фармонни Талабаю Ҳорун бўзчи берса, қон тўкишга тайёр эканликлари, тангри марҳаматига шоҳу амир эмас, ҳалойик лойиқ эканини сўзлашишиди.

— Мархум Низомиддин отасига шикаст етказмаслик чорасини ҳаммадан аввал ўйлаб, ўз одамимизнинг кўшиб юборилиши, бу жуда зукколик бўлибди, — дейишиди улар бир-бирига. — Демак, биз Талабага суюнсак, ишонсак, у жаноб айтганини қилсак, жонимизни фидо қилсак арзиди ва бизнинг чеккан заҳматимиз зое кетмайди.

Жума куни Жоме масжидига — намози пешинга оқиб келаётган одамларнинг кети узилмасди. Шу одамлар ичиди амирзода Иброҳим Султон Шерозга жўнаб кетганидан кейин Бойсунқур иродаси билан ўз мансабидан бекор қилинган митти Сулаймонбек ҳам боши кўйи ғарибона келарди. Қамчинидан қон томган учинчи жаллод, яъни Мухаммад Аргун, Корайлондан кейинги, «сарой синчларини маҳкам ушлаб турган мих»-нинг пораю фаҳш ишлари фош этилиб, омбур билан суфуриб ташлангани бир кундаёқ фуқаро қулоғига етиб, оғиздан-оғизга кўчди. Кўрининида хокисор, бақирмай, секин гаплашадиган, одамларнинг «пешанасини силаган» бўлиб, чоҳга тепиб юборадиган бу маккор шахс анчадан бўён Мирзо диққатини тортарди. Бу одам Иброҳим Султоннинг баджаҳл, каттиққўллигидан фойдаланиб, ўз манфаати йўлида кўпларнинг ёстигини қуритиб юборган эди. Унинг маҳкамасига уч бор кириб, йиғлаб-ёлвориб, ўғли гуноҳини андак

юмшатиб, катлдан олиб қолишини илтимос қилган Меъморга ҳам жуда юмшоқ, мулоийм муомала қилиб, аслида ўзининг «салтанатга садоқати»ни изҳор қилиш баҳонасида амирзодадан шу «хуруфия тӯдаси»ни тезда осиб ўлдиришни бир неча бор талаб қилган эди. У мақсадига етган. Энг даҳшатлиси шу бўлган эдики, бу кимса юмшоқ гапириб, ҳаммага ўзини «дўсара» кўрсатиб, қабих ишларни қиласарди. Унинг «ширинсўз», «мулоийм», «одампарвар»лиги фақат бир никоб эди, холос. Бу кимса ўз мансабидан бекор бўлгач, бир неча ой хонанишин бўлиб ётди, ҳеч кимга қўшилмади. Бирон кимсага арз ҳам килолмади — сабаби унинг жирканч шахс экани Шоҳрухга ҳам маълум эди. Иккича ойлардан сўнг Сулаймонбек бошини секин шиллиқкуртдек чиқариб атрофига аланглади. Жимжитлик. Шундан сўнг ён қўшнисиникидаги никоҳ тўйига чиқди. Ҳизмат қилиб юрган йигитчалар унинг ёнига нон, қанд-қурс қўйиб кетдию, аммо ҳеч ким у билан гаплашиб, ёнида ўтирмади. У ёлғиз, якка-моҳов бўлиб ўтирди-да, кейин тўйдан чиқиб кетди. Яна бир куни жанозага чиқди. Тўпланган одамлар ундан ўзини тортиб, у билан ҳеч ким мулоқотда бўлмади. Унга тобут кўтаришга ҳам гал бермай, бир томонда қолдирди. Жоме масжида ҳам ундан одамлар узоқлашиб, пойгакларда намоз ўқидилар, аммо унга яқин туришмади. Одамлар миқ этишмас эдию, лекин ундан ўзларини тортишарди. Сулаймонбек буни жуда яхши пайкаса ҳам, бари бир сурбетлик қилиб одамларга суркалаверарди. Кунлардан бир куни Фармон кал Парфи сўтакка мурожаат этди:

— Бу ярамасни тинчтиб қўя қолсам нима дейсан? — у этиги қўнжига солиб қўйган дудама ханжарга ишора қилди.

— Савоб бўларди! Аммо Талаба билан бир маслаҳатлашиб қўриш керак.

— Бу гапинг маъқул, — деди Фармон кал Парфи сўтакнинг лўмбиллаган юзларига жилмайиб қараб, — сендан ҳам балодек ақлли гаплар чиқади-я!

— Ҳамма ақл ўзимда дейсанми! Ақлингнинг кўплигидан бошингга шира тушиб, шафтоли қоки қилиб қўйган.

— Балли, сўтак! — деди хаҳолаб Фармон кал, —

шунинг учун экан-да, аммамнинг бузогидек кечаси билан бошдаги ширани ялаб чиққанларинг.

— Вой, вой, ошна, қўй, кўнглимни айнитма! Яхши ҳам қирмочингни калгир билан сидириб ташлаганлар, бўлмаса етти маҳалланинг пашшаси орқангдан фувиллаб эргашиб юарди.

— Об-бо, сўтаг-е! Енгдинг. Бас! Ўтмас пичоқ қўл қесар деб шуни айтадилар-да! Туриб-туриб оласан. Ўзи бир вақти келиб қолади-да, миянг ўлгур бирдан ишлаб кетади. Офарин! Худо ҳаммага ақл улашганида сенга жуда узуни тегиб қолган-да, а!

— Ўшанда сенинг елкангдан ушлаб турувдим-да. Худо: — тила тилагингни, деди. Мен ақлдан тўрт энлик ошироқ бериб юборинг, дедим. Мана, жонингни киритяпман, дўстим!

— Бас, биз енгилдик, сиз енгдингиз! Энди тўғри гапга ўтайлик; хўш, нима қиласиз? Талаба бизнинг дўконимизга келмаяпти. Ёки яна мадрасага борамизми?

— Бу жуда шошилинчми?

— Сулаймонбекни кўрсам ғашим келиб, юролмаяпман. Шу ярамаснинг боши оғирлик қилиб юрибди чамамда!

— Эртагача сабр қилайлик.

Эртаси куни, дарҳақиқат, Бозори Қандахорда, тим ичида Талаба пайдо бўлиб, у этик харид қилиш баҳонаси билан Фармон кал дўконига кириб, курсига ўтириди. Саломалиқдан сўнг, Фармон кал дарҳол мақсадга ўтиб, ниятини айтди.

— Бундоқ иш қилмоққа биз рухсат этолмаймиз, — деди ярим овозда Талаба, — бу «Саркарда» ҳазратларининг ҳам фикрлари. Сотқинлик, авомга жабру зулм истаганлар мана шундок хор бўлишини одамлар кўрсин. Уни сўйиб юборсангиз қутулади-кетади. Кўтир мушукдек хеч қаерга сифмай, одамлар ундан ҳазар қилиб юргани бошқа одамларга катта ибрат-ку. Бир-икки йил кўйиб бериш керак, ўзи ўлиб кетади. Ҳали бунақа хор бўладиган мансабдорлар анча-мунча. Агар бир-икки йилдан кейин ҳам сурбетларча яшайверса, сиз билан маслаҳатлашиб уни йўқотиб юборамиз.

— Жуда маъқўл.

— Пес — бу дард. Тузук одамлар ҳам бу дардга мубтало бўлиши мумкин. Аммо бу пес ёмон пес, бадтарин пес. Бунга даво йўқ, бундан биз ҳазар килишга хаққимиз бор.

— Жуда тўғри.

— Этигингиз киммат, уста. Биз талабаларнинг кудратимиз етмайди. Яна бир келаман.

— Келинг, мулла, арzonроғи ҳам бўлади. Яхши кунлар ҳам келиб қолар...

— Худо хоҳласа, албатта, — Талаба хайрлашиб дўкондан чиқиб кетди.

Хиротни айланиб ўтадиган Ҳерирўд дарёси жимирлаб оқиб ётарди. Бу сувнинг мавж уриб жимирлашлари, бурилишлари остида кучли оқим доимо шитоб билан шимолга, Мурғоб томонларга югуради. У бир қарашда кўзга кўринмас ва лекин унинг кудратини хуросонликлар сезиб турардилар.

XXXII б о б

ЧЎЛИ БОБО МАСКАНИ

Уч арава Толлимаржон, ундан сўнг дашт карвонсаройидан чиқиб, Қарши шахри қайдасан, деб йўлга тушди. Учинчи аравада Халач бўронидан омон колган баъзи қакир-қукурлар, Меъморнинг темир-терсак асбоблари; кетмон, белкурак, андава, ганчхок тогоралири, сим, элак ва ҳоказолар... От устида Favvos Мухаммад ўтиради. Икки хуржунини дори-дармонлар билан тўлдириб олган табиб ўзининг ювощ байталида биринчи аравага ёнма-ён, Меъмор билан гаплашиб келарди.

Икки кун йўл юриб, Қарши карвонсаройига етиб келишди. Шаҳарга кириб келишда дарё кўпригига пойлаб ўтирган хизматкор йигитлар табибни кутиб олиб, бек ҳовлисига жўнашди. Табиб бекнинг бир ўғли оғир касал эканини, чоршанбага унга етиб боришини Меъморга айтган эди. Табиб йўлдошларини карвонсаройга жойлаб, бир кеча хордиқ олганларидан сўнг, эрта билан келиб Бухоро йўлига чиқариб, кузатиб кўйишини маълум қилди. Меъмор ҳам, Ҳорунбек

ҳам табибга миннатдорчилик изҳор этишди. Табиб байталидан тушиб, бек кишилари олиб келган аравада шаҳар ичкарисига кириб кетди. Кечкурун икки йигит каттакон дастурхонгà ўроғлиқ нон ва шириналклар, иккинчи бола хурмачада қатиқ кўтариб келди. Булар бек ҳовлисидан юборилганини, Меъмор ҳазратлари мана шу қатиққа пиёз тўғраб ичиб олиш лозимлигини таъкидлашди.

Эрта билан табиб бекнинг кичик укаси билан бирга карvonсарайга келиб, бек жаноблари нонуштага таклиф этаётганларини айтди. Йигитчанинг ҳовлида Ҳорунбек билан гаплашиб турганини кўрган табиб, Меъморга имо қилди.

— Бек ёмон одам эмас. Сизнинг келганингизни эшитиб, атай тайёргарлик кўряптилар.

— Борамиз, — деди Меъмор. — Бек ҳазратлари чақирадиу бормаймизми? Сиз учун ҳам борамиз.

Табиб билан Меъмор олдинда, эрта билан улар бир неча кўчани кесиб ўтиб бекнинг ҳовлисига кириб келишди. Ҳовлида турган бек дарвозагача юриб келиб, Меъмор билан қўл беришиб омонлашди. У эллик ёшлардан ошган, қора соқол, юмалоқ одам эди. Маъсума бека билан Бадиа ичкари ҳовлига кириб кетишли. Ҳорунбек билан Меъморнинг шогирдлари бек укаси билан пастки айвонга ўтиришди. Табиб, Меъмор, бек ва яна бир кекса одам катта, нақшин меҳмонхонага тайёрланган дастурхон атрофига ўтиришди.

Нонушта пайтида, бек, ички оғир ва мусибатли гаплардан хабари йўқ, Меъморнинг Бухорога ўтиб кета туриб, унинг ҳовлисига тушишганидан бенихоя хурсандлигини, илм кишиларининг пойқадами шарофати билан унинг ўғли бугун анча чиройи очилиб, кўзини очганини айтди. Бек подшохнинг «алломайи замон» мунахжим эканликлари, Мирзо Улуғбек илму фан кишиларини ўз қаноти остига олаётганига таасусуф қилиб, майда ҳокимлар, беклар ҳам хаттоту шоирларга, мударрису меъморларга яхши кўз билан қараб, гўё шундай қилса, подшоҳ ҳазратлари олдида обрўлари ошишини билади. Бундек зиёли одамлардан четда қолмасликка ҳаракат қиласди. Бекнинг гапларидан Меъмор унинг мутлақо мадраса кўрмаганини пайқади. Ёнида ўтирган мўйсафид, шаҳардаги Жоме

масжидининг имоми экани ҳам билинди. Мехмонлар бек ўғлига худо шифо бериб, тезроқ ўрнидан туриб кетсин, деб дуо қилишиди. Бек Хиротда бўлмаганини, лекин Мусалло Жоме масжид, миоралар таърифу тавсифини кўп эшитганини айтди. Табиб ҳам Меъморнинг оғир мусибат билан Бухорога кетаётганини маълум қилишни лозим топмади. Йўлда, Хорунбек ҳам бек кишиларига Низомиддин қисматини гапириб ўтиришнинг ҳожати йўқ, деган эди.

Гапдан гап чиқади, деганлариdek, нонушта пайтида бек тўсатдан Меъморга мурожаат этиб, бу ерда бирон ой қолиш иложи йўқмикан, муҳим бир илтимосу узримиз бор эди, деди.

— Мен шошилинч бир иш билан Бухорога кетяпман, деди Меъмор. Афтидан, бек бу ерда бирон масжид куриш нияти бор, хаёл қилди. Ёнида ўтирган имом бунга ишора бериб тургандек бўларди. — Яна, бек ҳазратлари, мен бетобман, дўстим Ҳожи Абдул-асад яхши биладилар. Юмуш бўлса, жоним билан қилиб берар эдим. Агар бир-икки кун қолиб, усталарга лойиҳасини чизиб, кўмаклашиб юбориш лозим бўлса, бош устига.

— Бир-икки кунда бўлмайди, — деди яна бек, — биз сизга катта ҳақ тўлаймиз. Ихтиёргизга анча одамлар берамиз. Сизнинг келганингизни кечаёқ табибдан эшитиб шу фикр кўнглимиздан ўтган эди. Ўслим бетоб бўлмасидан илгари Самарқандга одам юбормоқчи бўлиб турган эдим, боламнинг дарди бу ишни хаёлимдан кўтариб юборди.

— Қандай юмуш экан? — Меъмор сўради.

— Хўжа Муборак деган жойимиз бор. Бу томонда катта чорва, қанчалаб мол боқилади. Чўпонларнинг мендан илтимоси шуки, йўл ёқасига сардоба курмомғимиз лозим. Шундок бир жой борки, кўрсангиз ўзингиз ҳам кетолмай қоласиз. Бундан неча юз йил илгари ўтган Яланғоч авлиё ҳам Хўжа Муборак яқинига сардоба куриш кераклигини айтган экан. Бунинг учун ҳар бир чўпон менга юз қўй ваъда этди. Бир-икки йил ичida бизнинг кўлимизга юз мингга яқин қўй киради. Иккиласми, Улувбек Мирзо ҳазрати олийлари ҳамма амиру бекларга кўпригу сардобаю ҳаммомлар қуриш ҳақида фармойиш берганлар.

— Савоб иш, — деди Меъмор.

— Имконинг бўлса, яхши иш бу, — деди табиб.—
Меъмор ҳазратларининг саломатликларию хошишларига ҳам қараш лозим. Лекин йўлингиз Хўжа Муборак орқали ўтади, ўша жойларни кўриб кетсангиз зарар қилмайди. Сиз кўпроқ сут, қатиқ ичишингиз керак, бир кун, ярим кун чўпонлар меҳмони бўлсангиз, бу факат фойда!

— Мухтарам бек, — деди Меъмор, — биз ўша ердан ўтиб кетамиз, мен ахволни бир кўрай, йўл дошларим билан маслаҳатлашай, бундан сўнг сиз жанобга ўз фикримни айтаман. Бир ўртача сардoba учун юз эллик мингга яқин оби фишт ишлатилади. Ундан сўнг ганчхок ва пойdevor учун қир тайёрлаш ва ҳоказолар...

— Фиштнинг ярми бор; Косон ва Пўлоти қишлоғларида. Биз етказиб берамиз. Пўлоти қишлоғида уста Обид ва уста Худойберган деган кишилар ҳам бор, улар сизга кўмаклашади.

— Ҳозир бир нима демоқ қийин, аммо жойни бориб кўриб, кейин бир фикрга келамиз. Аммо, мухтарам бек, бундек хайрли ишга бел боғлаганингиздан ниҳоятда хурсандман. Бундек ишлар ҳамма бекларимизнинг ҳам кўнглига кела бермайди.

— Хорун ар-Рашид кўп яхши бинолар қурғанлар,— деди гапга аралашиб табиб. — Минораи Калонни корахонийлардан Арслон қурдирдилар. Етти тош йўлдан у кўриниб туради. Карвонлар қумда адашиб, саргардон бўлмайдилар. Бухорои шариф марказида турган Минораи Калон уларни чорлаб туради... Қарши билан Шахрисабз оралиғида бир неча сардобалар борки, улар сомонийлар, корахонийлар замонида қурилган. Абу Райхон Беруний Фазна шаҳрига ўтиб кетаётганларида сардoba ёнида бир ҳафта колган эканлар...

— Кўпчилик бўлиб сиз ҳазратга таъсир кўрсатяпмиз, — деди бек жилмайиб, — шояд, Оллоҳ кўнглингизга бу ерлар муҳаббатини солса.

Меъмор бош қимирлатиб, Ҳожи табибга қараб жилмайди: «ичимдаги дардни билмайсизлар, агар мен ҳам сизлардек ғаму ғуссасиз бўлганимда, бу ерларда анча вақт қолиб кетардим. Қандоқ қилайки, дили пора

бўлиб, қувилган Меъмор ўз тупроғи сари ошиқяпти...» дегандек бўларди у.

— Ўйлаб кўрайлик, тўсатдан бир фикр айтиш қиёнин бўляпти, — деди Меъмор бекка яна мулойимлик билан.

Нонуштадан сўнг карvonсаройга қайтиб келган Меъмор ўз ҳужжрасига йўлдошларини тўплаб, эртага эрта билан жўнашажаги, Косондан ўтгач, Хўжа Муборак яқинида чўпонлар орасига киришажагини, бу ер йўл устида эканини ҳамда бекнинг илтимосини ҳам айтди. Ҳеч кимдан садо чикмади. Бир кишидан ташқари, ҳамма тезроқ Бухорога етиб олишни, йўл азоби жонга текканини билдириди. Факат Ҳорунбек сукут саклар ва кам гапиради. У Меъмордан ҳеч вакт узоқлашмас эди-ю, аммо ҳеч сўз айтмасди. Бу ҳолни сезиб юрган Бадиа ҳамманинг олдидаги унга муоржаат этди. Негадир унга нисбатан юрагида бир шубҳа пайдо бўлган эди.

— Отамларнинг фикрларига сиз нима дейсиз?

Ҳорунбек ялт этиб Бадиага қаради. Унинг Калиф қумлигида бўлган воқеадан сўнг андак шубҳаланиб юрганини сезган Ҳорунбек жуда босиқлик билан гапириди:

— Аравалар шай, худо хоҳласа, эрта билан йўлга чиқамиз. Лекин бекнинг таклифига келганда, бу масалани мен эмас, Меъмор ҳазратлари ҳал қилишлари керак. Менинг вазифам, сизларни соғ-саломат Бухорога етказиб кўйиш. Менинг фикрим, мана шундок, Бадиа бекам.

— Агарда отамлар бу ишни олсалар, биз анча колиб кетамиз. Бунга сиз нима дейсиз? Бизларни ташлаб яна Ҳиротга қайтаверасизми?

— Меъмор ҳазратлари аввал бориб ўша жойни кўрсинлар, кўрмасдан туриб бир фикрга келолмаётганликларини ҳаммамиз сезиб турибмиз. Бу ёғи ҳам бир кунлик йўл...

— Ҳорунбек тўғри айтдилар, — деди Меъмор, — ўша ерга борайлик, бир фикрга келамиз.

Бу гал ҳам Бадиа камгап Ҳорунбекни ушлолмади.

Одатдагидек эрта билан улар яна йўлга тушишди. Карvonсаройга келган табиб Меъмор билан хайрлашди. Бек ўз укасини то Хўжа Мубораккача улар билан кўшиб юбораётганини айтди. Бекнинг укаси ўзига

ўхшаш яна икки отлик билан қўлларида тугун, бирга йўлдош бўлиб боришга шай туарди. Меъмор табибга миннатдорчилик билдириди:

— Бизга кўрсатган меҳрибончилитингиз учун ташаккур! Асло унутмаймиз, — деди Меъмор.

Бекнинг укаси қийик кўз, нигоҳи ҳеч нарсани назарписанд қилмай, мағрур юрган Бадианинг қалдирғоч қошларида эди.

Аравалар жўнаб кетди.

Биринчи арава атрофида қаршилик уч отлик гаплашиб бораради. Бу ҳол Ҳорунбекка негадир ёқмади. У кўп ўтмай ўз ўрнига Зулфикарни ўтказиб, ўзи иккинчи аравага чиқиб олди.

Йўлда бир тўхтаб, кечга яқин Косондан ўтиб, кенг бир ўтлокда тўхташди.

— Мана шу жой Хўжа Муборок билан Косоннинг ўрталиги, — деди отликлардан бири, — сал ичкарироқда қудук бор. Оғамлар шу ерни кўрсат, деганлар. Бари бир шу ерда тунашга тўғри келади.

— Тунаймиз, — деди Меъмор негадир тетикланиб. Ҳар гал у кечга яқин аравадан тушишда чарчаб, беҳол бўларди. Бу гал унинг тетиклигини, иштиёқ билан у ёқ-бу ёқларга аланглаганини кўрган Бадиаю шогирдларининг чехраси очилди. — Сизлар нима дейсизлар. Яхши, баҳаво ер экан, ўша қудук ёнига борайлик. Бекзода, ўша сардоба куришга мўлжалланган жойни кўрсатинг!

— Мен билмайман, — деди йигит. Агар оғаси буйруқ қилмаганида улар билан шунча йўлни босиб келишга мутлақо тоқати йўқ эди. — Шу атрофда қудук ёнида Чўли бобо туради, деганлар, ўша одамни чақирайлик.

— Йўқ, бўтам, ўша Чўли бобо ёнига ўзимиз бора қолайлик, — деди Меъмор. Кейин Ҳорунбекка буйруқ қилди. — Қани, ҳайданг, ўша ерга борамиз!

Катта йўлдан чиқиб, бир чақиримча ичкарига киришди. Кунчиқар томонда тепаликлар бўлиб, кунботар томон текислик, ундан нари қумликлар. Қудукдан сал нарироқда сочилиб ётган кулбаларнинг биридан арава ҳамда отликларни кўриб Чўли бобо чиқиб келди. Одамларни кўриб хурсанд бўлиб кетди. Одат-

дагидек Ҳорунбек сакраб отдан тушиб, жиловини ушлаб турди. Зулфиқор билан Заврак арава остидаги шотичани олиб, орқага кўйиши. Эҳтиёткорлик билан Меъморни, ундан кейин Маъсума бекани ва Бадиани пастга тушириши.

— Жуда баҳаво жой экан, — деди шу лаҳза Бадиа. — Қарши шаҳрини аслида мана шу ерга қурадиган экан!

— Худди мана шу қудуқнинг ёнига! Тўғрими, бекам? — гап қотди Заврак.

— Табиатнинг хатосини қарангки, баҳаво ерлар қолиб, катта шаҳарларни бир чеккага қуради.

— Масалан, Бухорони, — деди яна Заврак, — шунча дарёлар ёқаси қолиб, бир жазирамага...

— Нишопур шаҳрини ҳам бир ҷалдивор ўрнига қуришган, дейишади.

— Нишопурни кўрмагансиз, бекам. Нишопур жуда яхши жойда.

— Ҳар кимга ўз шаҳри ёқади.

— Бекзода жаноблари, сиз асли Қаршида туғилганимисиз? — сўради Заврак ғўдайиб турган бекнинг укасидан.

— Ҳа, — деди у от устида турганича. Негадир у сұхбатга киришолмай совук турарди, — биз асли — шахрисабзлик, барлос уруғиданмиз. Отам сарбоз бўлганлар.

— Тушунарли, — деди Заврак, — беклик ўша вақтдан денг. Бунинг устига барлос уруғидан бўлсангиз, сиздан буюк одам йўқ бунда, — деди киноя билан.

Меъмор аравадан тушганидан сўнг бу томонга келётган серсоқол Чўли бобо қархисига чиқиб, у билан эски танишлардек кўл беришиб омонлаши.

— Чўли бобо сиз бўлсангиз керак?

— Ҳа, мен бўламан, — у йўғон овози билан дадил гапиради, — биз томонларга хуш келибсизлар! Қалай, мол-жон омонми, саломатмисизлар!

— Шу ерда, кудук бўйида тунаб, тонгда жўнаб кетмоқчимиз.

— Кудук бўйи эмас, уйларимиз сизнинг ихтиёриңгизда, марҳамат.

— Ташаккур!

— Сизлар ким бўласиз?

— Мана бу йигит бек ҳазратларининг инилари, — деди Меъмор. — Бизлар йўловчилар, Бухорога кетяпмиз.

— Қани, отларни аравадан чиқаринглар, — деди чол, бу орада қулбалардан болалар, йигитчалар ҳам чиқиб келишди. Бир неча катта итлар ҳам пайдо бўлди. — Ҳали замон ўғилларим ҳам молдан келиб қолишади.

Одатдагидек ҳамма ишга тушиб кетди; чиройли ер танланиб, намат, шолчалар ёзилди, отлар аравадан чиқарилди... Бекнинг иниси ҳам отдан тушиб, карашгандек бўлди.

Меъмор Чўли бобо билан ёнма-ён юриб, қудук атрофларини айланди. Қудуқдан нарироқда, кунчиқар томондаги тепаликлардан тушиб келган кичкина бир ариқча анча нарига бориб, кумликка сингиб кетарди.

— Кўп баҳаво жой экан, — деди Меъмор чолни гапга солиб.

— Жуда яхши жой. Бунақа жой ҳеч қаерда йўқ, иним. Мана шу ариқ кирдан оқиб келади. Аммо сартоңга бориб қуриб, кунимиз факат қудуққа қолади. Бу атрофда, — у кенг, тақир далаларни кўрсатди, — болаларимдан ташқари, тўққиз чўпон бор. Биз қоракўл боқамиз. Ишимиз яхши, аммо сув чатоқроқ. Мана шу ерга сардоба қурилганида одамларга ҳам, молларга ҳам, сизга ўҳшаш йўловчиларга ҳам, хатто кушларга ҳам яхши бўларди. Мен буни йигитлигимдан орзу қилдим. Лекин бўлмади, қўлимиз қисқа. Юзбонни ҳам, бек ҳам билади, аммо нима учундир бу ишни қилишмайди. Биз ҳокимларга мол ваъда қилдик. Аллақаёқда уста Обид, уста Худойберган деган кишилар келиб кўришди. Бари бир яна қолиб кетди.

— Қаерга мўлжаллагансиз?

— Мана, манави ер. Бу ер ўзи сардоба учун мўлжаллангандай, пастлик ва жуда қулай. Буни кўринг, шундоқ ерга қурилмаса, қаерга қурилади! Гузар, Файзобод атрофидаги сардобаларни кўрганман. Аммо бу ер жуда қулай ер...

Меъмор кечки салқинда, даштнинг фир-фир шабадаси эркалаб турганида, «ниҳоятда баҳаво» ва «жаннат» даштда Чўли бобо кўрсатган пастликни айланиб

юриб кўздан кечирди: қадамлаб ўлчаб ҳам кўрди. Чўли бобо Меъморни кузатиб, унинг қадамларида бир ҳикмат борлигини, бежиз савол бермаётганини сезиб, агар мана шу ерда гумбаз кўтарилса жуда зўр иш бўлишини такрор-такрор айтарди. Икки кекса-нинг қудукдан нарироқда айланишиб, гаплашиб юрганини кузатиб турган Хорунбек арава фиддиракларига отларни боғлаб, хашак ташлади. Шундан сўнг кексаларга яқин бориб, гапларига қулоқ солди.

— Хорунбек, иним, сиз нима дейсиз? — гап қотди Меъмор, — кечаги гап мана шу ерда экан. Мана бу куриб ётган ариқ жилғалардан йигилиб, анов тепаликлардан тушаркан. Саратонга келиб куриб қоларкан. Шу ерга сардоба зарурлиги кўриниб турибди.

— Тушунарли, уста.

— Илгари ҳам сизларга ўхшаб кўриб кетишган,— деди Чўли бобо, — лекин натижа бўлмади. Бу ерда сувни сақлаш учун гумбаз жуда зарур. Бу томони юз чакирим, то Қоровулбозоргача, бу томони Қамашию Бешкентгача бир тузук сардоба йўқ. Чўпонларга ҳам, йўловчиларга ҳам бу жуда зарур. Савоб бўлади.

— Агар мендан сўрасангиз, — деди Хорунбек. — Бухорога шошилиб кириб боришнинг ҳожати йўқ.

— Нечун? — сўради Меъмор.

— Сиз ҳамма вакт, уста, фуқаро тарафида туриб, хайрли ишдан қайтмагансиз. Бу ишга раҳбарлик қилсангиз, мен ўйлайман, яна бир хайрли ишни юзага чиқарган бўласиз...

— Укажон, мен бу ишдан қочмайман. Лекин сизнинг вактингиз ва араваларингизни вактида бўшатиб, ҳақини тўлашим керак. Ана шу мулоҳаза бор. Менку, ишдан қочмайман. Бунинг устига, бу иш на амиру на подшоҳ учун! Бу көъфар фуқаро ҳожати учун.

Чўли бобонинг жой солаётганлар ёнига кетганидан фойдаланиб, Хорунбек Меъморга оҳиста сирли бир гапни шивирлади:

— Уста, буёги Бухорогача озгина қолди. Мен ҳамма гапни сиз ҳазратга Бухорода айтиб, яна орқамга қайтиб кетмоқчи эдим. Шу ерда, холи турганимиздан бир гапни айтмоғим лозим. Бу ерда иш бошласангиз қанча вақтга чўзилади?

— Бир, бир ярим ой.

— Бир, бир ярим ой кечикиб Бухорога кириш айни муддао! Ҳозир ҳам кириб бора бериш мумкин, лекин озгина кечикиш — бу ҳар қандай хавфу хатардан бизни йироқ қиласи. Табиб айтганидек, сутқатикни кўпроқ истеъмол қилиш, далада юриш сизнинг саломатлигингиз учун жуда зарур. Гапнинг очиғини айтсам, сизни Бухорогача омон-эсон етказиб қўйишни менга Талаба жаноблари ҳамда ошноларим топширишган. Сизлар билан бирга юравераман, отравалар сизнинг ихтиёргизда! Бухорога етказганимдан кейин, қайтиб кетаман. Талаба жанобларига бу хабарни айтиб тинчлантираман. Андхуд юқорисида, кум ичида, ўлдирганимиз икки шахснинг бири Қораилон эди...

— Сиз ўзингиз кимсиз?

— Мен — ўғлингиз Низомиддиннинг дўстлариданман. Мени Ҳорун бўзчи дейишади... Сизни оиласиз билан эҳтиёт саклаб Бухорога етказиш бизларнинг вазифамиз!

— Бизларингиз кимлар?

— Бизлар — хуруфийлармиз. Бу ерда мендан бўлак ҳеч ким йўқ.

— Таажжуб! Шу вақтгача, қанча йўл юриб мен сизни билмабман-да. — Майманадаги Ҳорун бўзчи — сиз бўласизми?

— Ҳа. Пинҳонийлик — бизнинг касбимиз. Лекин зарур бўлиб қолган чоғда сиз жанобга очиқ айтиш ҳам менга топширилган. Мана, сирни очдим. Аммо бу сирдан йўлдошларимизнинг хабари бўлмагани маъқул!

— Хўп, — деди Меъмор. — Хўш, қоламизми, кетамизми!

— Қолайлик.

— Эрта билан бекка инисидан хабар йўллайман. Чўли бобога ҳам айтамиз. Эрталабгача дам олайлик.

Ҳорунбек отларга қарагани кетди.

Шу куни йигитлар далада ётиб ухлашди. Меъмор хотини, қизи билан Чўли бобо уйида тунади. Эрта билан очиқ ҳавода қилинган нонушта пайтида Меъмор шогирдлари билан маслаҳатлашиб, бек инисига сардоба қуришга рози бўлганлиги, тезликда одам ва фишт етказиб беришни бек ҳазратларига маълум қилишни сўради. Уста Обид ва уста Худойберганларни ҳам

чақириш кераклигини келадиган одамлар кетмону бел-курак, ганчхок қоришга тогора ва замбилларни олиб келсинлар, деди. Бекнинг иниси наридан-бери нонушта қилиб, икки сувори ошинаси билан Қаршига от чоптириб кетди. Сухбатдошининг уста экани, сардоба қуриш учун келганини билган Чўли бобо дарҳол ўғилларини чақириб, жонлик сўйиб юборди. Ишнинг фоятда муҳимлигини сезган шогирдлар нонуштадан кейин бири қалам-қофозга, бири ернинг пасту баландини кўришга, бири — режа тортишга тушиб кетишиди. Тезрок Бухорога етиб олиш учун ошиқкан Бадианинг тарвузи қўлтиғидан тушиб, отасига қаради.

— Шу гапингиз аниқми?

— Ҳа, қизим, шундок қиласак бўлмайди. Бу жуда хайрли иш.

— Соғлиғингиз яхши эмас-ку, отажон?

— Ишламай турсам соғлиғим ёмон бўлади. Ишласам ҳеч касал бўлмайман.

— Аравакашнинг вақти қандоқ бўлади?

— У рози. Уники, рози қилганимдан кейин, сен ўзимнинг фарзандимсан, рзилиғингни сўрамай қўя қолдим.

Бадиа индамади. Үнинг унча рози эмаслиги сезилиб турарди. Лекин қандоқ қилсан, отасининг баъзан шундок фавқулодда ишлари, ўжарликлари бўлиб турарди.

Бу воқеа ноҳуш хабардек Зулфиқор билан Бадиани ўйлатиб қўйди — улар Бухорога етиб олиш учун ошиқишарди. Севикли устознинг кутилмагандаги буйруғи Зулфиқорнинг ҳафсаласини пир қилди. У ўз ота-онаси бағрига ошиқар, устозини иззату икром билан кутишиб, тўю томоша билан Бадиага уйланиш орзуси бор эди.

— Отамлар бу ерда қолмоқчилар, сардоба қуришни ўйлаяптилар, — деди Бадиа аравакаш Ҳорунбекка қамти келиб. — Сиз бу гапга нима дейсиз!

— Отангиз бебаҳо, олижаноб одам. Умр бўйи авом учун заҳмат чекдилар. Яна шундай қилмоқчилар. Бундок ишлар ҳамманинг ҳам қўлидан келавермайди.

Бадиа миқ этмай қолди. Бир лаҳзадан кейин сўради:

— Сиз энди кетасизми?

— Мен у одамни ташлаб ҳеч қаёққа кетмайман!

— Эътиқодингиз учун ташаккур! — деди Бадиа бошқа сўз сўрашга ҳеч ҳожат қолмаганидан кейин.

Орадан кўп ўтмай бу сухбатдан бехабар Зулфиқор хам Ҳорунбекка мурожаат этди:

— Устодимиз яна бирон ой бунда қолишни айтяптилар. Сиз қоласизми ёки кетасизми?

— Хурматли Шоший жаноблари, мен ўз фикрими бўлғуси қайлифингизга, афв этасиз, Бадиа бекамга айтдим.

— Гапингиз қизиқ-ку?

— Устоз нима деса шогирд шуни қилмоғи даркор! Ана, Фаввос жанобларига бир қаранг! Бу ишдан хурсанд бўлиб, ҳозироқ ишга тушиб кетмоқчилар. Меъмор ҳазратлари ҳаммадан кўра сизни яхши кўрадилар. Бу ишончни оқлаш лозим-ку, ахир, дўстим!

— Узр. Юзта жоним бўлса, ҳаммасини устодга бағишлайман, — деди Зулфиқор қизариб.

— Мана бу — ўғил боланинг сўзи!

XXXIII б о б

САРДОБА

Шу куниёқ узок-яқиндаги чўпонлар тақирикдаги қудук ёнига — Чўли бобо уйи атрофига одамлар келиб туришганини эшитишди. Баъзилар ўзи, баъзилар чўлиқни юбориб, тафсилотини Чўли бободан эшитиб хурсанд бўлишди. Кечга яқин бу ер яна гавжум бўлиб кетди: бир неча қозон осилиб, дастурхонлар ёзилди. Болалар кўп эди. Чўли бобо бошлиқ ўн чоғлик чўпон йигитлар бир томон, Меъмор бошлиқ олти уста бир томон, ерга ташланган шолчаю наматлар устида маслаҳат мажлиси қуришди. Чўли бобонинг келинлари, ёш-яланглар хизмат қилиб туришарди. Чўли бобо мана шу ўн йигит, ўзи билан ўн бир киши устанинг ихтиёрида бўлишини, анави тепалик орқасидаги Қоратош деган жойда харсанг борлиги, чўқмор билан уриб бемалол кўчириб олиш мумкинлигини айтди. Қоратош бу ердан бир ярим чакиримча масофада бўлиб, харсангни чўпонларнинг ўzlари аравада керагича келтириб беришларини ваъда этишди. Лекин обиғишт жуда зарур эди.

— Косонда икки хумдон бор, — деди Чўли бобо

Меъморга, — бу ер билан хумдонлар ораси уч тош келиб қолади. Араваларимиз қатнаб турса, бир ҳафта ичиди оби ғиштни ташиб келса бўлади.

— Уни кўпrikка ишлатиб юборишган, — деди бошқа чўпон.

— Йўқ, турибди, — эътиroz билдири Чўли бобо, — яқинда бозорга борганимда ўз кўзим билан кўрдим.

— Ерни ковлаш ишлари бўлса, мана бу оға-иниларга қўйиб берасиз, — деди ёш чўпон чап қаторда ўтирган ака-укаларини кўрсатиб, — кудук қазишида буларнинг тенги йўқ. Мана шу кудукни ҳам улар ковлаган.

— Кўйиб берсангиз ерни илма-тешик қилиб ташлашади, — деди Чўли бобо ёнида ўтирган ошнасига ҳазил қилиб, — юмону кўр каламушга дарс беришади.

— Тўғри! — деди кулиб ака-укаларнинг бири. Унинг бир кўзи қисик бўлиб, «кўр каламуш» лакаби бор эди, — кудукقا ўтириб қўядиганлар ҳам бор, тўғрими, Чўли бобо?

— Қаттиқ кетманглар!

— Бизларга касал теккан, — деди бояги ҳазиллашган чўпон, — тўрт юз қўйни эвлаштирамиз, аммо мана бу ўн киши — бир бўлолмаймиз. Яхши ҳам Чўли бобо борлар.

— Кўздан гапирманглар, — деди Зулфиқор сухбатга аралашиб, — бизга ҳам тегиб кетади.

Заврак Нишопурий ялт этиб Зулфиқорга, ундан кейин илжайиб ўтирган Бадиага қаради.

— Ҳа, бизнинг ҳам сизлардан камчилик еrimiz йўқ, — деди Заврак дарҳол, — шу ўн саккиз киши орасида фақат бир яримта кўзу яримта ақл этишмас экан.

Бирдан кулги кўтарилиди..

— Бу гапни мен эмас, — деди бостирма қилиб Заврак қўли билан Зулфиқорга ишора этиб, — бу гапни «Бухоронинг жарчиси» ошкор қилди.

Яна гуррос кулги кўтарилиди. («Бухоро жарчиси» деб ҳангى эшаклар кўзда тутилган эди).

— Сизлар ҳам қаттиқ ҳазил қиласизлар, — деди Чўли бобо, — бизнинг чўпонлар ёмон, гап келгандан хеч аяшмайди.

Боядан бери сукут сақлаб ўтирган Меъмор Чўли бобога қаради:

- Қум борми?
- Ҳамма ёқ қум-ку?
- Бу қум бўлмайди.
- Нега?
- Сув қуми керак.
- Косондан, Қашқадарёдан олиб келамиз.
- Ёғин-сочинга ҳали анча бор-а?
- Э-ха, вақт кўп. Биз томонда Самарқандга қаранганд ёғин-сочин кам бўлади.
- Эрта билан фотиха берасиз, ер қазиш ишларини бошлиб юборамиз.
- Саломат бўлинг! — деди қўзлари чақнаб Чўли бобо, — бекдан хабар келишини кутмаймизми?

— Бекдан хабар келади. У кишининг ўзлари мендан бу ишни илтимос қилганлар. Бизлар учун энг муҳими шуки, бек ҳазратлари оби ғишт ҳамда кирқ-эллик одамни ўз вақтида юборсалар, иш яхши кетарди.

Меъмор эртасига эрталаб шогирдлари билан сардоба қурилажак жилга ёнига барвакт келди. Бу чоғ Чўли бобо ўғли қўмагида бир катта қўчкорнинг оёқларини боғлаб, ётқизиб турган жойида Меъморга «фотиха беринг», деб қўлини жуфтлади. Меъмор юриб кетаётган ерида бир лаҳза тўхтаб, фотиха берди. Чўпон йигит қўчкор бўғзига пичоқ тортди.

— Қозонга босинглар, — деди Чўли бобо, — аёлларга айт, кулчатойни шўрванинг сардагига килсин!

— Хўп, бобо, — деди чўпон йигит.

Ернинг текис, кия томонларини обдан кўздан кечириб бўлгач, Меъмор уч шогирдини уч томонга юбориб, ўзи сардобра қурилажак жойда турди. Кунчиқиши, кунботиш томонларни ҳисобга олди. Ҳорунбекнинг қибланомасини олиб ерга кўйди. Заврак, Зулфиқор, Favvos узоқдан туриб бўлғуси сардобани кўришди, кўлларидаги қофозга уч эшик ва тепада уч туйнук чизишиди. Кейин учала шогирд Меъмор атрофига тўпланиб, шу ернинг қулагилигини, бўлғуси гумбаз олислардан ҳам яхши қўринишини айтишди. Юқоридаги икки туйнук офтоб чиқиши ва ботишига тўғри қилиниб, кириш эшиклари чап бўлганини маъқул кўришди. Меъмор Чўли бободан кўп вақт бу даштда шамол қандоқ юришини сўради. Чол шамолнинг кун ботишдан кунчиқиши томонга юришини айтди. Демак,

сардобага кириш эшикларини шамолга терс очиш кепрак, деди Меъмор. Меъморнинг ишораси билан Зулфикар эрта билан учини ўткир қилиб ясаган бир газлик қозик билан тешани Чўли бобо қўлига берди.

— Чўли бобо, — деди Меъмор баланд овоз билан, — биз мана бу ерларнинг ҳандасавий ҳисобини олдик. Шу қозикни, мана, оёғингиз остидаги ерга қоқинг. Шу ер сардебанинг қоқ ўртаси бўлади.

Чўли бобо катта қозик учларини ерга ботириб, қўлини фотихага очди. Ундан сўнг қозикни теша билан уриб, ерга киритди. Зулфиқор бобонинг қўлидан тешани олиб, яна ҳам мустаҳкамлади-да, Меъморга қараб, энди устига мих қоқиб, каноп тортаверсак бўладими, деб сўради. Худди шу аснода узокдан отлиқлар кўринди. Даشتда Чўли бобо атрофига сочилган одамлар катта йўлга боқишиди. Беш отлиқ олдинма-кетин келиб, аравалар ёнида отдан тушишиди. Улар ичида бекнинг иниси ва яна бошқа шахслар ҳам бор, орқада, бешинчи отда табиб ҳам келган эди. Улар отларини чўпон йигитларга топшириб, узокда ер ўлчашаётган Меъмор ва шогирдлар томон юришиди. Меъмор узокдан табибни кўриб, бир неча қадам босиб унинг истиқболига чиқди.

— Хуш келибсиз, табиб, саломатмисиз? — деди Меъмор.

— Бор бўлинг. Ўзингиз қалайсиз? Сут, қатиқдан кўпроқ истеъмол этяпсизми? Шундок бўлиши керак. Пишлок, саримойни ҳам ҳар куни эрта билан тановул этмоқ лозим. Бош оғрири, кўз тиниши йўқми?

— Йўқ, — деди кулиб Меъмор, — бу ерга келиб жуда яхши бўлиб қолдим. Даشت хавоси ёқяпти.

— Айтмадимми! Худо хоҳласа, «қобус»дан асар қолмайди.

Меъмор бошқалар билан омонлашди.

— Бу қарорингиздан бек ҳазратлари жуда миннатдор бўлдилар, — деди табиб. — Мана бу киши — Камбар хўжа, бек ҳазратларининг мирзолари. Булар ҳазратнинг яқин кишилари, Қарши шаҳрининг эътиборли одамлари.

— Бек ҳазратлари сизга салом айтиб, ҳамма ашёларни вақтида етказиб беришни бизга топширдилар, — деди Мирзо.

— Бек ҳазратлари илгари Қарши яқинида кўприк ҳам қурганлар, «Бек кўприк» деб атایмиз, — деди келган мансабдорлардан бири.

— Маърифату ободлик чирогини ёққан киши тоабад ўлим билмайди, — деди Меъмор.

— Мана, сардоба битиб, бу ерлар ҳам обод бўлиб, Бекобод ўлса ажаб эмас, — деди яна Қамбар Мирзо.

— Иншоолло, — деди табиб.

Меъмор индамади.

— Ишни ҳам бошлаб юборибсизлар, бўладиган ишнинг вақтида бўлганини бек ҳазратлари яхши кўрадилар, — деди гапга аралашиб бекнинг иниси.

— Мана шу ернинг эгаси Чўли бобо қозикни коқдилар, — деди Меъмор, — ҳандасавий иш бошланди ҳисоб. Бу ёри бўлаверади.

Қамбар Мирзо «Бу ерларнинг эгаси Чўли бобо эмас, бек!» демоқчи бўлиб турган эди, тилини тишлади. Чунки илм ахли инжиқ бўлади, борганингизда эҳтиёткорлик билан гаплашинг, фуқарога қиласиган дағалликларингизни Меъморга қила кўрманг, бу одамларнинг сиркаси сув кўтармайди, иккиласми, подшоҳ шунаقا ахл фузалопарвар бўлганлиги сабабли, улар билан ҳисоблашишга мажбурмиз, деган эди бек.

Тушдан кейин от-аравада уста Обид ва уста Худойберган деган косонлик усталар ҳам келиб қолишибди. Усталар аравадаги асбобларни ерга тушириб, Меъмор билан бек ноиблари турган ерга келди.

— Ассалому алайкум! Ҳорманглар!

— Ваалайкум ассалом! Бор бўлинглар! — деди Меъмор.

— Сиз устоднинг Бухорога ўтиб кета туриб, мухтарам ва олихиммат бек ҳазратларининг бир оғиз сўзларини аъло билиб, бу ишни ихтиёр қилганингиздан жуда миннатдор бўлдик, — деди жиккақдан келган уста Обид шанғиллаб. — Уста Худойберган Қаршидан чиқмаганлар, мен Ҳиротда, Балхда, Фазнада, Самарқандда бўлганман. Устод Қавом, устод Исмоил бинни Тохир Йисфаҳоний, устод Нажмиддин Бухорий амал этган мадрасаларни кўрганман... Муборакномингиз Хуросону Мовароуннаҳрда машҳур. Яхшидан от қолади, дейдилар.

— Жуда ҳам унчалик эмас, — деди Меъмор, — одамзодни ўз юрти тортар экан, Бухоройи шарифга қайтиб келяпман.

Меъморнинг рўпарасида турган Ҳорунбек секин йўталиб, «ички гапларни очиб қўйманг», дегандай бўлди. Меъмор дарҳол гапни бошқа томонга бурди, чунки уста Обид ҳам баландпарвоз гапларни ёқти-рарди.

— Бек ҳазратларидан сизнинг бу ишга тайёр экан-лигингизни ва ҳазратнинг ҳовлиларидағи меҳмонхонани ўзингиз қурганингизни билиб, хурсанд бўлдим. Мехмонхона бағоят чиройли қурилган.

Бу гап уста Обидга жуда ёқиб тушди. У ипакдек мулоийим тортиб, гапи оғзидан тушиб кетди. Бекнинг иниси, мирзою бошқа мансабдорлар ҳам бу гапдан жуда миннатдор бўлишди. Фақат қозик ёнида турган серсоқол Чўли бобо билан Меъмор шогирдлари сўмрайишиб туришарди.

— Қозиқни ҳам қоқибсизлар. Маъкул, — деди уста Обид атрофга аланглаб, — доира ярми неча газ бўлади, устод?

— Биз йигирма газни белгиладик. Сиз нима дей-сиз?

— Айни муддао! Менинг кўнглимдан ҳам шу ўтган эди, тиккасига қирқ газ бўлади.

— Пойдеворни йигирма газ мўлжалляпмиз. Файз-ободдаги сардобанинг ичи узунасига ўттиз газ. Биз ўн газ оширдик.

— Айни муддао!

— Пойдеворни уч газ чуқурликда ўйиб, манави Қоратош деган жойдан харсанг майдаларини олиб келиб, бир қатор ташлаб, устидан қир тўксак...

— Айни муддао.

— Пойдевор ердан ярим газ кўтарилгач, ундан сўнг оби фишт терсак. Сардoba йигирма газча баландга кўтарилиши керак. Менга хабар беришларича, оби фиштнинг бир қисми бор, қолганини Косондаги икки хумдан етказиб берар экан...

— Жуда тўғри, устод.

— Фотиха берилди. Қора қўчкор катта қозонда пишяпти, — деди Меъмор Чўли бобога қараб. — Шу бугундан ишни бошлаб юбордик.

— Ҳақини қанча гаплашинглар? — сўради уста Обид, — усталарга қанчаю шогирдларга, ундан сўнг мардикорларга қанча хақ тўланади?

— Буни биз билан гаплашасиз, — деди Қамбар Мирзо.

— Биз буни суриштирганимиз йўқ, — деди Меъмор, — корфармо Мирзо биладилар.

— Ҳисоблик дўст айрилмас, дейдилар, хафа бўлмайсиз гапимга, устод.

— Бемалол, — деди Меъмор, — қани, Зулфиқор, Заврак, Favvos! Азизлар, канопнинг учини олиб, ерга доира чизинглар. Пойдевор икки газ бўлсин. Чўли бобо!

— Лаббай, уста!

— Йигитлардан Қоратошга юборинг, чўкмор билан тош синдиришсин. Сиз, уста Обид ва уста Худойберган, фишту ганчхок келгунча уч-тўрт азамат йигитларни олиб, янтоқ, юлғун, жилға ёқасидаги қамишлардан кетмон, ўроқ билан қирқиб, ёқишига бош бўлинглар. Кулига қум кўшиб, қир тайёрлаймиз. Мирзо жаноблари! Манави шўрвадан кейин, шаҳардан келадиган одамларни чиқариш керак. Дастрлабки арава фиштларни ҳам жўнатиб, қум, ганчни ҳам араваларга ортиб юборинглар. Ишни жадаллаштирумасак бўлмайди. Мана бу лойиҳани бек ҳазратларига кўрсатинг, агарда биронта ислоҳ киритиш лозим топсалар, bemalol ислоҳ киритиш мумкин, — Меъмор сардоба лойиҳаси чизилган қофозни Зулфиқор қўлидан олиб Қамбар Мирзога узатди. Мирзо лойиҳага бир кўз ташлади-да, буклаб қўйнига солди.

Одамлар ишга тушиб кетишиди.

Куёш тик келганда Чўли бобо ҳаммани овқатга чақирди. Одамлар ўзлари ишлаб турган ерларидан қудук атрофига тўпланишиди.

Яқиндагина тўсатдан касал бўлган, рангидаги синикиш-заъфаронлик кетмаган Меъморнинг дашт офтобида сардoba қуриб бераман, деб жон чекиб юрганини кўраётган шогирдлари устодга ачинишарди. Устод ҳам бир ишга жон-жаҳди билан киришиб юрганида ўзлигини тамоман унутарди. Бошқанинг ҳар бир гапи қўлини ушлаб, йўлига ғов бўлаётгандай туюларди. Шу сабабли на Зулфиқор, на Заврак ва на Favvos чурқ этарди. Ачиниш ҳам, илтимос ҳам, меҳрибончи-

лик, тергаш ҳам бефойда эди шу топда. Меъморни ўз ҳолига қўйиб бериш керак. У шуни хоҳларди. Ҳатто Бадиа: «Отажон, иш топилади, ўзингизга қаранг...» деганида чолнинг жаҳли чиқиб, умрида бирон марта койимаган қизини «Нодон, бу гап ақлсиз гап!» деб жеркиб ташлади. Масъума бека ҳам Зулфиқору Фаввосга «Қўяверинглар, бу чол ўзи шунаقا. Ишлаб турганида унга ҳеч қанақа гап ёқмайди. Сут билан кирган жон билан чиқади», дея насиҳат қилиб қўйди.

Меъмор малла ранг салласи пешига манглайи терларини артиб, пойдевор қазиётганлар тепасида турар, доиранинг бузилмаслигига риоя қилишни уқтиради.

Хорунбекнинг от-аравалари ҳам харсангтош ташишга тушиб кетди.

Бадиа билан Маъсума бека Чўли бобо келинлари билан бирга овқат тайёрлашга ёрдамлашишди. Икки забардаст чўпон йигит терлаб-пишиб тинмай қудукдан сув тортишарди.

Эртасига эрталабдан бошлаб гишт ортган аравалар Косондан Чўли бобо қудуғи ёнига етиб келди. Йигитчалар жуда эҳтиёткорлик билан уларни тушира бошладилар...

Учинчи кисм

XXXIV б о б

МҮЙТАДИЛ ИҚЛИМ

*М*еъмор одатдагидек эрта билан ҳаммадан аввал туриб, сардоба пойдевори қазилган ерга келди. Уюб қўйилган ғиштларга кўз ташлади. Бир оби ғиштни кафтига қўйиб, теша билан уриб кўрди. Сарриқ ғишт устидаги тўрт бармоқ чизиклари хаёлини олди: «Отангга раҳмат! — деди ичида. — Бу ғишт эмас, мармар». Шундан сўнг, кунчиқар томонидаги қоратош тепалигига бориб, сочилиб ётган харсанг бўлакларига кўз ташлади. Чўпон йигитларнинг астойдил иш қилишаётганини ҳам кўрди: сардoba бек жанобларидан кўра ҳам уларга зарур эканлигини тушунишибди... Тепаликка чиқиб, атрофга кўз ташлади; дарҳакиқат, ернинг нишаби ўша қозиқ қоқилган жойга қаратилган экан. Ёмғиру жала, қишки қор сувлари ҳам шу ерга оқиб келиб тўпланиши аниқ. Чўли бобонинг мўлжали жуда тўғри экан. Агарда сардoba ичими яна ҳам чуқурлаштириб, ҳовуз қилинса, бу ерда доимо сув бўлади.

Чўли бобо боядан бери Меъморнинг сахарлаб узодаги тепаликка чиқиб, атрофни кузатаётганини кўриб турарди. У Меъмордан ҳам аввал туриб, кўтондаги моллардан хабар олган, Қоплон ва Арслон деган шерсифат қўнғир бўрибосар итлар ҳам чолнинг орқасидан лўкиллаб эргашиб юрар эди. Чўли бобо Меъморнинг фикри хаёлини бузмаслик учун унинг ёнига бормади; молларига қаради, ҳашак ташлади, сугорди.

Меъмор тепалиқдан туриб бепоён даштга кўз ташлади: текис ва қўнғир дашт устида мовий гумбаз — осмон гумбази ҳам улкан бир сардобага ўхшарди. Машриқ уфқи аста-секин ёришиб келарди. Кенг, қўнғир даштда бир неча қора нуқтадек бўлиб, Чўли бобонинг узоқдаги пастқам уйлари, ундан нарироқда-

ги қўтон атрофида оту аравалар, ғишт уюмлари, асбоб-ускуналар сочилиб ётарди. Чексиз қўнғир дашт ичидаги бир кафтдаккина жойни эгаллаган, холос. Меъмор тепаликда айланиб атроф-жонибга кўз ташлар; яхшироқ тикилган одам шу дашт текислигига ҳам олис қирлар силсиласини, яшилликни, қирлардан илон изи бўлиб тушган жилгаю ариқчаларни, қамишзорларни, Қоратош тепалиги этагидаги жарлигу юмалаб ётган харсангларни, олис-олисларда қачонлардир одамлар яшаган тупроқ қалъалар харобаларини кўриш мумкин эди. Бу қамишзорлару сада юлғулар кимсасиз ва бўм-бўш эмас, улар ичидаги баҳайбат қоплону шерлар бўлиши керак, деди Меъмор фикран, кейин яна хаёлан давом этди: улар ичидаги ваҳший даррandalар бўлмаганида ҳам, беҳисоб қўю қўзилар, қўчқорлар, қорамоллар юрибди... Бу дашт, тирик дашт! Юлғунлар, гужуми қамишлар орасида ётган паррандалар ҳам Қоратош тепасига чиқиб турган нотаниш одамни кузатиб тургандир!

Меъмор атрофига, табиат жамолига сукланиб тикиларди. Ранг-бўёклар йиллар ўтиши билан хиралашиб аста-секин ўчиб кетади. Фиштин бинолар нурайди, кошинларни шамоллар ялаб, рангини ўчиради... аммо бу замин ҳуснини — икки дарё оралигидаги жаннат мисол мамлакат ҳуснини на шамол, на довул ва на оташ ўчира олади! Бу ерларда доимий майсалар гуркирайди, ариқлару дарёлар оқади, сардобаю қалъалар кад қўтариб тураверади. Бу замин шундай бекиёс замин!

Бир муддат ўтгач, жанубдан, Қарши томондан Бухорога тия карвонлари даранг-дурунг қўнғиронини чалиб, қатор тизилиб ўта бошлади. Меъмор турган жойида эринмай туяларни санади, кирк тия... Нор тиялар устида кажавалар тўла мол. Меъмор тия карвони ортидан қараб қолди — улар она шахри Бухорога кетяпти. Эҳтимол, улар Хуросондан келаётгандир? Ҳаёли яна Низомиддинга кетди. Меъмор таажжубланаарди; бир фарзанди хуруфияга қўшилиб, подшохларни таҳтдан тобутга тортмоқ бўлса, иккинчи фарзанди — Бадиа йигитча либосни кийиб, ёнида ханжар олиб юрса... Тавба, бир меъмор оиласидан шундака жангари фарзандлар чиқса! Сарбозу саркардалар хо-

надонидан бундок болалар етилса, таажжубга ўрин қолмасди. Қилич эмас, давоту китоб ушлаган, умр бўйи иморат солган бир мўмин уста хонадонидан ханжарбозлар!..

Меъмор гўё чексиз денгизда, у соҳил билан бу соҳилга етолмай тахта порада қалқиб сузаётган Синдибоди Баҳрийга ўхшарди — у ёқда Ҳирот, бу ёқда Бухоро, на унга ва на бунга ета олар, баҳри муҳит тўлқинларида қалқиб ётарди.

Офтоб ёйила бошлади. Меъмор тепаликдан пастга тушиб, сардоба пойдевори қўйилажак ерга келди. У томондан Чўли бобо ҳам етиб келди. Бир неча ерга дастурхонлар ёзилиб, нонушта тайёрланаётган эди. Бир муддатдан сўнг ҳамма ишга кетди. Ишнинг учинчи куни шаҳардан яна ўн беш киши чиқиб, Меъморнинг ихтиёрига берилди. Чўли бобо кулбаларининг қарши томонига бир неча чодирлар курилди. Кимсазиз, ўлик кўринган дашт одамлар билан жонланиб кетди. Ишнинг тўртинчи куни шаҳардан бек ҳам чиқиб келиб, Меъмор билан гаплашди, сарdobани айланниб кўрди, ёнидан Меъмор ғериб юборган лойиҳани чиқариб, «бу тасвир жуда маъқул», деб Меъморга қаради. Меъмор шогирдларининг илтимоси билан атай икки қатор фиштни гир айлантириб терди. Ундан сўнг икки ҳавозаларни тайёрлаётган уста Обид билан Зулфиқор ҳам фишт теришга тушишди. Кунчиқар томонда Favvos билан уста Худойберган, ора-чора Заврак ҳам Зулфиқор ёнида туриб фишт терарди. Бек бунда кўптурмай, яна одамлари билан шаҳарга тушиб кетди.

Тушдан кейин катта йўлдан Бухоро сари ўтиб кетаётган тuya карвони негадир ўз йўлидан қайрилиб, сардоба курилаётган томон юрди. Карвон бунда ишлатётган одамларга яқин ерда тўхтаб, бир неча одамни юклари билан қолдириб, яна йўлида давом этди. Юкларни ерга қўйибок, узокдан Меъмор ёнига келаётган ўрта яшар, лўмбиллаган бир одам қушлардек канотини ёзиб, Меъмор билан қучоқлаша кетди. У икки кўзи ёш бўлиб, Меъморни бағридан бўшатиб, белбоғлари уни билан кўз ёшини артди.

— Хуш келибсиз, азизим Ҳасанбек! — деди Меъмор бу кутилмаган учрашувдан ҳайратланиб. — Соғ саломатмисиз? Бола-чақаларингиз омонми?

— Шукур, уста, ҳаммаси саломат.

Шу лаҳза яна уч одам келиб, иккиси Меъмор билан қучоқлашди, учинчисини Меъморнинг ўзи бағрига босди. Бу — Низомиддиннинг қадрдон ўртоги Абуали эди. Қолганлар — уста Ҳусайнбек, кулол Абутолиб эдилар.

— Хуш келибсизлар! Қадамларингизга ҳасанот! Ҳўш, қайси шамол учирди? Нега карвондан ажралиб қолдинглар?

Бу лаҳза Меъмор ўз қадрдонлари билан топишганини кўрган Чўли бобо, Ҳорунбек ва устаю шогирдлар ишни ташлаб, уларни ўраб олишди. Заврак, Фаввос, Зулфикорлар Ҳасанбек уста ва Абутолиб кулол билан қадрдон оғалар каби омонлашишди. Уларнинг бу ерни топиб келишганлигига ҳайрон қолдилар. Айниқса, ўз аравасида Қоратошдан харсанг ташиб келаётган Ҳорунбек от жиловини ушлаган ҳолда жилмайиб, таажжубланарди.

— Қидириб Маккани топибди, деганларидек, биз ҳам Бухорони кўзлаб йўлга чиқдик. Қарши карвон-саройига тушиб, бу ерлик эски ошнамиз уста Обидни излаб уйига бордик. Болалари Ҳиротдан Меъмор ҳазратлари келганию устани Ҳўжа Муборакка олиб кетишганини айтишди. Мана, полапон кабутарчалар онаси кетидан учганидек, азизим, биз ҳам бу томонга учеб келавердик. Биздан икки кун илгари йўлга чиқкан карвонда Жаъфар Табризий ҳазратлари бир неча хаттоллар билан Самарқандга кетдилар. Ундан бир хафта илгари уста Жўржий ҳам Самарқандга, «Даҳай насарон»га, ўз хешу ҳамватанлари ёнига кўчиб кетди. Сизни эслаб, кўп гапирди...

Меъмор қадрдонларини ўз чодирига таклиф этди. Бадиага дастурхон тайёрлашни, уларнинг юкларини чодир ичига олиб кириб қўйишни буюрди. Уларни чодир ёнидаги наматга ўтқазиб, Чўли бобо билан Ҳорунбекни олиб қолди-да, тўпланиб турган бошқаларни иш жойларига юборди...

Энди икки оғиз сўзни Ҳиротдан эшитинг:

Вақтики, меъмор Нажмиддин Бухорийнинг Ҳиротда турмоғи номатлуб деб топилиб, пойтахтдан чиқариб юборилгач, Мирзо мадрасаси курилиб битиб, ишга тушган вакт эди. Корфармо Аҳмад Чалабий явлил-

лаб, Бойсунқур ҳузурига тез-тез бориб, бу бино битишини тантанавор ўтказиб, зарбоф чопонлар кийишни мўлжаллаб юради. Меъморнинг бедарак «йўқолиб-йтиб» кетгани гўё унинг йўлини очган, ундан «буюк» одам йўқ эди. Усталар, нақошлар, сангтарошу нажжорларга буйрук берар, мадраса биносининг баъзи қолған-кутган ерларини тезликда тугатишни айтиб, шоширарди. Ўзини кўрсатиш учун уста ва шогирдларга ақчаларни кўп-кўп берарди. Одамларга турли ваъдалар қилиб, усталар ҳақида Бойсунқур Мирзога яхши сўзлар айтганини, Мирзо уни хурмат қилишини, нима деса, унинг гапидан чиқмаслигини айтиб, валдирарди.

Аммо, бари бир, отаси ўлган хонадондек устаю шогирдлар тўй арафасида хомуш бўлиб қолишиди. Талабчан ва зукко устозлари ҳайдалиб, илмсиз, меъморчиликка ҳеч қандай алоқаси йўқ бир оми одам бош-кош бўлиб қолиши ҳеч кимга ёқмасди. У юзларча меҳнат қилаётган кишилар ўзини ниҳоятда ёмон кўришини, уларнинг фикри хаёли Меъморда эканини сарой мансабдорларидан яширишга ҳаракат қиларди. Мансабдор шахслар ёки Мирзо қурилишда кетаётган иш билан қизиқиб қолса, дарҳол ўзи қалқон бўлар, бошқани ўйлатмасди, ўзини «салтанат кишиси», саройнинг «садик или» қилиб кўрсатар эди. У қилиб юрган ишларни кўрган одамлар энсаси котар, бу та-магир, мансабпарамаст ўз манфаати йўлида отасини ҳам танимайдиган бир расво эканлигидан газабланардилар. Баъзан эса, корфармо устидан «Арслоннинг ўлиги — сичқоннинг тириги» деб очикдан-очиқ кулишарди ҳам.

Меъморни у салтанату сиёсатга ёт, хуруфия тўдасининг оқсоқолларидан, деб вайсаб, орқасидан тош отиб ҳам кўрди. Аммо унга ҳам ҳеч ким ишонмади, аксинча Меъморнинг таъсир-эътибори яна ошиб кетди. Дарғазаб Аҳмад Чалабий Меъмор масаласини ҳал қилиб, номини тамоман ўчириб юборишни кўзлаб, янги бир гап тарқатди: «Нажмиддин Бухорога боргач, одобсиз, ахлоқсиз ишлар қилиби. Бу ҳолни илгаридан сезиб юрган хотини Маъсума бекам куйиб ўлиби. Маҳалла аҳли Меъморни тошбўрон қилиб ўлдирмоқчи экан, у қизини олиб қаёққадир кочиб кетибди...»

Бу гап тезда шаҳарга тарқалиб кетди. Оғиздан-оғизга ўтиб, баъзи одамлар чалғиб: «қабоҳат йўлига кирган» Меъморни лаънатлади. «Жўржий билан дўстлашгани ҳам бежиз эмас эди... — деди Аҳмад Чалабий. — Нажмиддин Бухорийнинг асли ота-боболари шиа мазҳабидаги одам, сарбадорлар уруғидан. Диндан қайтган бу коғирни тез орада топиб, йўқ қилиб юборишлари аниқ...»

Пойтахт бўйлаб учиб юрган бу бўхтон саройга ҳам кирди: Мирзо ҳам, Шоҳруҳ билан Гавҳаршодбеким ҳам ёқаларини ушлашди: «Ё, алҳазар! Шу дараҷада нобакорлик!» Бу ҳакда хатто ўғли Мирзо Улубекка хабар қилиб, бу «ярамас кимса»ни топиб ўлдириб юбориш лозимлигини айтмоқчи ҳам бўлди-ю, аммо аниқ далиллар бўлмагани сабабли ҳамда Меъмор билан юзма-юз гаплашмай туриб, бундай қарорга келиб бўлмайди, деб ўзини босди. Бу гапларни Меъморнинг энг қадрдон дўстлари Абутолибу уста Ҳасанбек-Хусайнбеклар ҳам эшитган эди. Уста Жўржий ҳам бу гапдан хабар топиб кўл силтади: «Очиқдан-очик, бўхтон! — деди у, — Бу гап Меъморнинг душманларидан чиққан! Тухматнинг умри қисқа». Устод Қавом, мавлоно Табризийлар шу кунлари ховлиларидан ташқарига чиқишимади. Ҳарқалай улар ҳам бу гапга чидашолмай, хайрият, Меъмор бу ерда эмас, агар у Ҳиротда бўлиб, бу гапларни эшитганида шу лаҳзанинг ўзидаёқ юраги ёрилиб ўлиб қоларди, дейишди.

Дув-дув гапга сабабчи бўлган бу бўхтон бир ярим ойлардан сўнг ўзидан-ўзи сўниб кетди. Шу давр ичida мадраса ишга тушиб, саройнинг топшириғи билан устод Қавом, Мусалло ва Мадрасаи Олиянинг мударрислари янги мадраса дарвозаси олдида Бойсунқур Мирзони тантанавор кутиб олиб, хутба ўқишиди... Мирzonинг диққати Хурсоннинг эътиборли уламо ва фузалоларида бўлиб, Аҳмад Чалабий бир чеккада қолди. Бу ҳол Аҳмад Чалабийга қаттиқ таъсир этди. У амирзода атрофидаги мансабдорлардан бирига: «Нега Мирzonинг диққатлари бошқа шахсларга қаратилди?» деган эди, у мансабдор: «Жаноб, сизга меҳнат ҳаққингиз тўланган. Сиз меъмор эмассиз-ку, нега обрў талаб қиласиз? Амирзода олиму фозиллар, эътиборли одамлар қолиб, сизга мурожаат этсинларми? Сиз ўзи-

миз қатори одамсиз...» деди. Бу гапдан сўнг Аҳмад Чалабийнинг тарвузи қўлтиғидан тушди. Бу ҳолни кузатиб юрган кулол Абутолибга ўшанда жон кирган: «Мансабдорлар ҳам бу ўпкаси йўқни унча хуш кўриш мас экан», деди ўзига ўзи. Мадраса тугаллангандан кейин кулол ўз ишини қиласкерди, аммо Аҳмад Чалабийни ҳеч бир устаю меъмор корфармоликка чақирмади. Ҳиротда солинаётган янги ҳаммомга ҳам бошқа одамлар ишбоши бўлди. Бозори Қандахорда қурилаётган янги тимни ҳам усталарнинг ўзи байлашиб, Аҳмадни аралаштиришмади. Пойтахт атрофидаги махаллардан бирида миноралик катта масжид солаётган устод Қавом ҳам бу ерга иш юритувчи сифатида Аҳмад Чалабийни эмас, яқинда мадрасада таҳсил кўрган бир йигитни чақирди. Аҳмад Чалабийнинг бир неча бор одам қўйиб гаплашишига қарамай, устод Қавом уни бу ишга йўлатмади. Бозори касод бўлган Аҳмад Чалабий етти бўғинлик чаёндай нишини кимга уришини билмай юрган кунлардан бирида иттифоқо бозорда кулол Абутолиб билан учрашиб қолди. Бу совуққина учрашувда Аҳмад Чалабий кулолни тилқисик қилиб қўймоқ ниятида, унга гап қотди.

— Кулол, ёдингизда бўлса керак, мен кошинлар учун сизга эллик қадоқ қўрошин кукуни, ложувард, сабз ва қора бўёкларни ортиқ берган эдим. Уларни нима қилдингиз?

— Зард бўёқни ҳам ортиқ берган эдингиз, тўғрими?

— Тўғри. Хайрият, ёдингизда бор экан.

— Ўшаларни сизга қайтариш керак, шуни айтмоқ чимисиз?

— Ҳа.

— Ҳисобдан янгилишибсиз, ҳаммаси ишлатилиб кетган.

— Инсоф керак! Мана кўряпман, ясаётган идишларингизга ўша бўёқларни ишлатяпсиз.

— Мухтоҷ бўлиб қолдингизми, Аҳмад Чалабий?

— Бировнинг ҳаққини бериш керак, ха, мухтоҷ бўлиб қолдим.

— Шу ростми? Астойдил айтяпсизми?

— Ҳа, рост.

— Мухтоҷ бўлиб қолганлигинги ростлигини би-

лишим керак. Сизнинг гапларингизга ҳеч қачон ишонмаганман. Агар ҳозирги гапингиз чиндан ҳам рост бўлса, шунга қараб бир гап айтаман.

— Рост, жуда рост. Ишонаверинг! Ёлғон гапирсам отамнинг арвохи урсин! Каломулло урсин!

— Ишондим, — деди кулол Ахмад Чалабийнинг доимо айёrona ўйнаб турадиган кўзларини бу гал сўниқ, маъюс кўриб, — хор бўлганингиз рост бўлсин! Отангизнинг арвохи урсин сизни! Каломулло урсин сизни! Сиз аглаҳ одамсиз!

— Ия! Бу — ҳақорат-ку!

— Ҳа, жаноб, бу — ҳам ҳақорат, ҳам ҳақиқат! Бу кам сизга! Ўша менга берилган рангу кўрошин күкунлари кошинларга ишлатилиб, мадраса пештоқию гулчамбарларда ярқираф турибди. Мен, кошинлар чиройли бўлсин, деб бўёқни аямадим, ўзимнинг буёқларимни ҳам қўшиб юбордим. Бироннинг ҳаққини егани худодан қўрқаман. Аммо сиз разнага ҳам, ғарифурабо чўнтағига ҳам қўл тиқиб келгансиз. Сиз бироннинг ҳаққини емаган кунингиз ухлолмайсиз!

— Лаънати!

— Ҳозир гирибонингдан ушлаб тумшуғингга соламан! Мен сенга бўҳтон қилаётганим йўқ. Қиззингни... Сен ярамасни отангнинг арвохи урсин! Сен, энг мўътабар Меъмор ҳазратларига тухмат қилдинг! У зотнинг ҳайдалишига сен ярамас сабабчи бўлдинг! Энди сенинг гирибонингдан ушлаб, қорнингга мана шу пичофимни тиқиб ўлдирмасам, юрган эканман! Мен ҳам дунёга келиб бир савоб иш қилиб кетай! — кулол Абутолиб Ахмад Чалабий ёқасига қўл узатган эди, у бирдан дод солиб қочди.

— Вой-до-од, мусулмонлар, бормисизлар! Бу жинни кулол мени ўлдириб қўймокчи!

Ахмад Чалабий лўкиллағ қочганича, ҳамманинг кўз олдида бозордан чиқиб кетди.

— Бопладингиз, кулол! — деди томоша қилиб турган Али мешкобчи, — пичоқни ишлатмай, бу амалдорни ўласи қилиб урганингизда жуда жойида бўларди. Биз ҳам қўшилиб, икки мушт уриб қолган бўлардик. Ҳозир ҳам ёмон бўлмади. Майли. Лекин қўлим қичиб турувди...

— Мени жинни дейди-я! У амалдормас, фирибгар!

Ундан қўрқадиган жойимиз қолгани йўқ! Кўлидан нима келарди у ярамаснинг!

— Мансабдорлардан фуқаронинг ихлоси қайтган, кулол, — деди Али мешкобчи, — бир алдади, икки алдади, энди алдашолмайди! Авом улардан юзини ўтириган. Фақат андак қўрқади, бола-чақаси бор-да. Бўлмаса ҳаммасини қиличдан ўтказиб, яхши одамларни подшо қилиб кўтарардик. Лекин энг ёмони шу патагига қурт тушган мансабдорлар ўзларининг хор бўлганини билишмаётир, билганида яхши бўларди.

— Мешкобчи!

— Хо, лаббай!

— Бу сўзлар сизнинг сўзингиз эмас, эҳтиёт бўлинг!

— Хўп, кулол, эҳтиёт бўламан. Лекин пичоқ сувякка бориб етди-да!

— Ёмонларни дўップослаб уринг-ку, подшоликка тил тегизманг! Оқибати ёмон бўлади.

— Хўп бўлади.

— Шундок бўлсин, укажон. Сиз ўзингиз ғариб одамсиз, бир шикаст етмасин дейман-да.

— Гапингиз жуда тўғри. Агар мансабдорлар ҳадидан ошиб кетаверса, фуқаро ҳам қараб турмайди!

Мешкобчининг гаплари тагида қандайдир бир залворлик фикрлар бор эди, унинг кимларгайдир ишонишини пайқаган кулол ҳайрон бўлиб, уйига жўнади. Шундок эътиборли Меъморни пух деб учирив юборган салтанат билан ўйнашиб бўладими, деди ўзига ўзи.

Лекин Сулаймонбекдек катта мансабдорларнинг ҳам бекор бўлиб, уйга кириб қолгани, Низомиддиндек урушда жон олиб, жон берганларнинг дорга осиб юборилганини ўйлади. Дунё иши — қисмати мураккаб, деди у ўзига ўзи. Нима қилмоқлик керак? Ҳақиқат қайда?

Бу томони Чин, бу томони Ҳалаб, бу томони Миср ва Истамбул, бу томони Ҳинд ва бу томони Олтин Ўрдаю дарёйи Йртишгача мусаҳхар этган Темурхон салтанати таназзулга юзтубан кетдими?! Бундок давлат ҳижрия ҳисоби билан саккиз юзини йилда дунёда бўлмаган-ку! На Дорою на Искандар, на Чингизу, на Маъмуну ва Жамшиду на Махмуд Фазнавий бунчалик буюк салтанат туза олган! Ҳуруфия — темурийзодалар сантанатининг инқирози яқинлигидан даракмикан?..

Бўлган воқеаларни юрагига сиғдира олмаган Абутолиб кулол эртасига, чоршанба куни ўста Ҳасанбекнига борди. Ўғли Шодмонбекнинг Фарғона жангидан қайтмагани, уни ўз қўли билан тупроқка топширган Низомиддиннинг ҳам ҳозир тупроқка қўшилиб кетгани ёмон из қолдирган бу усталар хонадонида анчадан бўён хафаконлик, мотамсаролик ҳукм сурарди. Абутолиб бўлган воқеанинг ҳаммасини муфассал гапириб берди. Усталар Али мешкобчи фийрини маъқулладилар; пойтахтда норизо одамлар кўпайиб, ахли фузалою шуаро Мовароуннахрга — Самарқанд ва Бухоро шаҳарларига — илмпарвар Мирзо Улуғбек панохига кўчиб кетаётганликларини айтдилар.

— Улуғбек Мирзо Бухоро ва Самарқандда, ундан сўнг Фиждувонда мадраса қурадилар, деган овоза бор,— деди уста Ҳасанбек.

— Иш кўп, — деди Абутолиб, — бозоримиз доимо чакқон. Лекин касби бўлмаган Сулаймонбек билан Аҳмад Чалабийнинг бир куни хор бўлишини билардим. Мана ўша кун келди...

Улар аллавақтгача гаплашиб ўтириб, Меъморни эслашди. Устозсиз Ҳирот ҳувиллаб қолгандай туюлди. Устоз ҳақида тарқалган хунук гаплар аслида Аҳмад Чалабийдан чиққани ва кунлар ўта бу мишишларнинг заҳарли бўхтон экани ҳаммага маълум бўлди. Меъморнинг номи яна илгаригидай ярқираб, фахр билан тилга олина бошлади. У яна Жаъфар Табризий, «маликул калом» Лутфий, устод Қавом, мавлоно Шарафиддин Али Яздийлар... қаторида турди.

Одамларга қўшилолмай, яккаланиб қолган Сулаймонбекнинг Шерозга, Иброҳим Султонни паноҳ тортиб қўчиб кетганини эшитган Аҳмад Чалабий ҳам бор-йўғини сотиб, қўчиб кетаётган пайтида тўсатдан бир томон оёқ-қўли шол бўлиб, тилдан қолди. Уч ой ётиб, бокизмаган табиб қолмади. Аста-секин ғўлдираб гапирадиган бўлди-ю, аммо чап томон оёқ-қўли ишламай, ингичка тортиб, шол бўлганича қолди. Лекин бу бир томони шол бўлиб қолган одамдан ҳам Муҳаммад Арғун кишилари хуруфия тўдасини ушлашда фойдаланишарди. У гузаргоҳ майдонда ўтириб, Али мешкобчига ўхшаш «шубҳали» одамларни кузат

тиб, қаёққа ўтганини, ким билан гаплашганини, Мадрасаси Олия томонга — талабалардан бўлак кимлар ўтганини пойлаб ўтиради... Кечга яқин унинг ёнига келган махфий кишилар бир лаҳза гаплашиб, яна тезда ғойиб бўлишарди...

Орқасидан одам қўйилгани, бозордами, кўчадами, юрганда нотаниш кимсалар изидан пойлаб юрганини сезган Абутолиб бу гапни аввал ўғли Абуалига, ундан сўнг Ҳасанбек-Хусайнбекларга айтди. Шу орада ҳуруфия тўдасидан бўлган яна икки муллавачча қўлга тушиб, Ихтиёридин қальасига ташлангани, кўп ўтмай қатл этилгани ҳаммага маълум қилинди. Бу гаплардан хабардор бўлган уста Жўржий ҳам изига одам қўйилганини пайқаб, катта пул билан Самарқандга кўчиб кетган эди. У кўчиб кетаётуб, ўз ошналарига эҳтиёт бўлишни, Аҳмад Чалабий меъмор Нажмиддин Бухорийга яқин ва сирдош бўлган одамларни бирмабир сотишини айтди.

Изига одам тушганини уста Ҳасанбек ҳам пайқаб укасига айтди. Хаттот Жаъфар Табризий, Хўжа Юсуф Андугоний, уста Ҳожи Муҳаммад ва бошқалар орқасига ҳам одам қўйилган эди. Кунлардан бир кун иш нима бўлаётганини билмай, дўконларга идиш-товоқ бериб гаранг бўлиб қайтиб келаётган Абутолиб қаршисидан Али мешкобчи чиқиб колди. У бир хумча кераклигини, агар уйида тайёри бўлса ҳозир сотиб олишини айтди. Мешкобчи кулол билан бирга келиб, уйидан хумча олиб чиқиб кетди. Лекин йўлда кутилмаган бир қалтис гапини унга маълум қилди. Унинг орқасидан одам қўйилгани, ўғли Абуали Низомиддин билан Фарғона юришида бўлганию ҳуруфия тўдасига алокадор, деб шубҳа остида эканини айтди. Вакти бевакт кўча-кўйда юрмасликни, тилига эҳтиёт бўлишини тайинлади: «Биз ҳам Меъмор ҳазратлари яхши кўрадиган кишилардан эдик, сиз ҳам шундоқ кишисиз, кулол! Ҳазрат Фазлуллоҳнинг эркесвар, баҳодир кишилари ҳуруфийлар қўлга тушмайди! Аммо сизга ўхшаган бегуноқ кишиларнинг қатл этилиб кетиши жуда ачинарли. Шу сабабли бизнинг раҳнамомиз сизларнинг бепарво бўлмаслигингизни, маҳкама мансабдорлари сизларга кўз тикканини айтиб қўйишни топширдилар. Хумча сотиб олиш бир баҳона».

— Бу ишлар қачон тугайди, жонга тегди-ку! — деди кулол.

— Бу ишлар золимлар йўқолган куни тугайди.

— Мен сизни мешкобчи деб юрар эдим, сизда гап кўпга ўхшайди!

— Ҳа, кулол, гап кўп. Аммо битта гап бор — ҳақиқат. Мен жабр кўрган одамман. Лекин ҳақиқатни излайман...

— Меъмор ҳақида ёмон гаплар тарқалди. Хабарингиз бор. Сизларнинг раҳнамоларинг бу борада нима дейди?

— Бўхтон, факат бўхтон! Бу гапларни Меъмор ҳазратларининг душманлари тарқатган. Ёлғоннинг умри қисқа, мана одамлар ишонмади-ку.

— Меъмор саломатмилар?

— Меъмор саломатлар, — деди мешкобчи кулолга жилмайиб, — сиз мендан жуда кўп нарсаларни сўраяпсиз, кулол. Энди хеч нарса сўраманг, билмайман! Сизни пок диллик одам деб биламан. Саломат бўлинг, хайр, мен кетдим.

— Хайр! — деди эшик олдида хаёл суриб қолган кулол.

Нима қилмоқ керак?

Мана шундай бир савол кулоллар хонадонини ўйлатиб қўйди. Улар бу гапни Ҳасанбек билан Ҳусайнбекларга ҳам айтишди. Улар ҳам ўзларининг нотинчликларини айтиб: «Агар бизнинг Шодмонбегимиз ўлмай, жангдан қайтганида ҳам тинч қўйишмас экан...» деб, фифон бўлишди. Шундан сўнг, ёлғиз бир йўл — сафар ихтиёр қилмоқлик, деган хulosага келишди. Мавлоно Лутфий айтганлариdek, ўз юрtingда таъкибга учрасанг, ўзга юртни ихтиёр этмай илож йўқ... экан. Лекин улар аввал меҳрибон Меъморни топиб олганларига қадар бола-чақаларни бунда қолдириб, Мирзо Улуғбек мадрасасида ишлаш баҳонаси билан Самарқанд томонга йўлга чиқмоқчи бўлишди. Мавлоно Табризий ва Андугонийларнинг Самарқандга кетиши, сўнгра, уларга яқин кишиларидан баъзиларининг ҳам бир кечада хайёхув деб жўнаб қолганликлари кулолу усталарни ҳам ўринларидан қўзғатди. Улар тuya карвонига қўшилиб, Самарқанд эмас, Меъморни топиш мақсадида Бухорога йўл олишди. Каршида эски

ошналари уста Обид кўмаги билан, мана, сардоба кураётган Меъморни эсон-омон топиб дийдор кўришишди.

XXXV б о б

МОВИЙ ГУМБАЗ ИЧРА ЯНА БИР ГУМБАЗ

Хўжа Муборакдан анча нари Чўли бобо қудуғи атрофидаги кимсасиз дашт, бу ердаги ясси қирлар, янтоқзору, тошлоқлар умрида одамлар билан ҳеч қачон бунчалик гавжум бўлмаган эди. Бу ерларда бир-икки ўпон хонадони қудук туфайли умр ўтказарди. Жазира ма офтобда қоракўл қўйлари тошлар ора яккамдуккам ўтларни кемтиб, кечки салқинда қўтонга тўплашишарди. Уч хафта ичида гиштин сардоба ердан иккича газ қад кўтариб, узок-узоқлардан кўзга ташланадиган бўлиб қолди. Ҳар ҳафтада бу ерга келиб турган Ҳожи табиб катта йўлда ўзининг йўрга байтали устида туриб, ичкариликда — кенг сайҳонликда турган тепасиз, чала гумбазга тикиларди. У чумолидек бетиним ғимирлаб меҳнат қилаётган одамлар нималарга қодир эканини кўрди. Сардоба узокдан дўпписиз яланг бошга ҳам ўхшаб кетарди. Табиб тўппа-тўғри келиб, гумбаз устида гишт тераётган Меъморга:

— Ҳорманг, Меъмор! — деди.

— Э-э, саломат бўлинг, мулла Абдуласад ҳожи!

— Бу ёғи жуда тез кўтарилибди-ку? Салламно, салламно!

— Ишлаб тургандан кейин ҳеч гап эмас.

— Сиз ҳам ҳорманг, уста Обид, уста Худойберган! Сизлар ҳам ҳорманг, уста Ҳасанбек, уста Ҳусайнбек, уста Абу оғалар! Ҳорманглар!

— Саломат бўлинг! — деган овозлар хар томондан эшитилди.

Бек ҳазратларининг ўғиллари ҳам ўринларидан турриб, юриб кетди.

— Кўп яхши бўлибди-да, — деди Меъмор.

— Сизга салом айтдилар.

— Саломат бўлсинлар!

— Сардобанинг битишига ўzlари келмоқчилар.

Ишлари бафоят кўп бўлгани сабабли Қамбар Мирзодан ҳамма гапни эшитиб турдим, дедилар. Худо хоҳласа, сардоба битадиган куни келиб, бунда сиз ҳазратни ва бошқаларни хурсанд қиласман, ундан кейин сиз бошлиқ ҳамма усталарни Қаршига таклиф этиб, катта зиёфат бераман, Меъмор ҳазратларининг зардӯз чопонлари маҳкамамда шай турибди, дедилар...

— Зарурати йўқ, — деди тепада фишт қўяётган Меъмор кулиб, — бек ҳазратлари хурсанд бўлсалар бўпти-да, — деди киноя билан. Ҳожи табиб бекнинг гапини кўпиртираётгандан энсаси қотса ҳам, аммо табибнинг ўзи жуда беғубор, яхши одам эканлигини биларди. — Фиштларни жуда мустаҳкам теряпмиз, биздан кейингилар ҳам бу ерга келиб сув ичади — ҳаққимизга дуо қиласми!

— Салламно! Салламно!

— Қадрдоним Абутолиб кулол ўз ўғиллари билан, дўстим Ҳасанбек билан Ҳусайнбеклар бунда келишиб, бошим осмонга етди, Ҳожи Абдуласадхон! Мен бу олижаноб усталарни дўстим деб хато қилмаган эканман!

— О-о, салламно, салламно! Мен сизнинг донғин-гизни узокдан эшитган эдим, бунда жамолингизни кўриб бафоят баҳтиёр бўлдим.

— Саломат бўлинг!

Узоқ ўйл босиб келган ҳиротлик Абутолиб ва ўғли Ҳасанбек, Ҳусайнбеклар ўша куниёқ Меъмор ёнига кириб, ишга тушиб кетишиди. Улар Ҳиротда бўлган ҳамма гапни Меъморга бир бошдан айтиб беришиди. Сардобани тамомлашгач, Бухорога бирга бориб, жой топиб олишмокчи бўлишиди. Куз ойларида хотин, бола-чақаларини ҳам олиб келиб, Бухоройи шарифда туришни мўлжаллашди. Уларнинг айтишича, Мовароуннаҳр иқлими Ҳурсонга нисбатан анча мўътадил экан.

Чўли бобонинг айтишича, кўй қўйни кўриб иштаҳаси очилармиш. Меъмор ишни ҳаммага тақсимлаб, ўзи қўл қовуштириб караб турадиган одамлардан эмасди. Унинг эрталабдан кечгача гумбаз устида пешана-сини танғиб фишт тераётганини кўриб, юзга яқин

одам тинмай ишларди: бирор ҳавозалардан туриб ғишт узатарди, бирор бу ғиштни эҳтиёткорлик билан кўта-риб келиб, сардоба пойдевори ёнига кўяр ва яна бирор ғиштларни биттадан тогорадаги сувга тикиб, вижиллатиб, қондириб оларди. Бирор ганчхок қорар, уни челакларга солиб, ҳавозаларда андава ушлаб турган усталарга узатар, бири бўлса синган ғиштларни теша билан текислаб камгак ерлар учун ҳозирларди. Бир неча йигит, кетмону белкурак билан сардоба ичини ўйиб, ҳовузга тайёрлар, эшикдан кираверишда икки-уч поғоналиқ зинапоялар ясашар, яна бир неча одам қирдан оқиб тушадиган ариқ ўзанини ковлаб, Қоратош тепалигигача сочилишган эди. Бу ерлик чўпонлар хотин-қизларига ўхшаб қават-қават олача кўйлагу бўйнига маржонлар такиб олмай, бир қават кўйлагу оёғига этик кийиб, бошини танғиб олган Бадиа онаси билан бирга қозон тепасида овқат пиши-рар, қозонлар бикиллаб қайнарди. Чўли бобо бошлиқ бир неча чўпон ҳар куни бир-икки жонлиқ сўйиб, қозонга босишарди. Қўнғирот уруғидан бўлган барча чўпон аёллари Ҳиротда туғилган бўлса ҳам, асли бу-королик — мангит уруғидан бўлган, шаддод ва эп-чил, сўзамол ва ниҳоятда чиройли Бадиага маҳлиё бўлишар, унга таклид қилиб гаплашишга, қадам ташлаб юришга ҳаракат қилишарди. Маъсума беканинг ота-боболари Сайхун бўйи — Шош шахридан, ўзбек уруғидан эканини, бошига катта famу фусса тушганини, ёлғиз ўғли Низомиддиннинг ўлдирилганини билишди. Ҳорунбекнинг Зулфиқорга, баъзан Завракка мурожаат этиб, бу гапни ҳаммага айта бериш керак юмас, деганига ҳам қарамай, Меъморнинг кисмати бу сарда ҳаммага маълум бўлди. Аммо қандайдир бир гайри табиий куч ва салобат Меъмор жисмида доимо ғарқарор бўлиб, каттадан кичик уни хурмат қилас, уни тикилиб кузатар, у илтифот этиб, сийлаган одамнинг боши осмонга етарди. Меъморнинг ўзи ишнинг оғирида туриб, тинмай ғайрат кўрсатиши ҳаммага ибрат бўлиб, бир ярим ойларга мўлжалланган иш бир ондаёқ ўзини кўрсатиб қўйди.

Сардoba рўйирост қад кўтарди. Гумбазнинг энг гепаси — беш газ очик жой қолди. Бу жуда муракаб иш эди, Меъморнинг ўзи ғишт қўйишга қарор

килди. Фақат ичкарида, ҳавозалар устида турган уч шогирди унга қараашарди. Бошқа усталар ердаги ишлар билан машғул бўлишди...

Гумбаз кўтарилиб, сардоба битишга яқинлашган, бугун чоршанба куни кечга яқин қум ичидаги узок яйловдан баҳшилар етиб келди. Чўли бобо Жумабозор, Қоровулбозор, Оқёлшўрча, Зомук, Жейнав томонлардан чўпон ошналарини чақиртирган, бу томони Қарнобчўл ичидаги Кўйкудук, Тошқудук, Шўркудук, Раимсўфи, Олачабоб томонларидан ҳам чўпонлар меҳмон бўлиб, ўзларининг баҳшиларини олиб келишибди. Ҳар бир меҳмон отда, аравада жонлик олиб келган эди. Хўжа Муборакдан пастроқдаги Чўли бобо кудуғи ёнида катта сардоба курилаётгани ҳақидаги хабар Қизилқум, бу томони Қарнобчўл ичидаги ҳамма чўпонлар кулоғига етган. Уларнинг сўровига кўра, Чўли бобонинг «Чоршанба кунига келаверишсин», дегани юриб етиб бўлмас ерларга икки кун ичидәёқ тарқалди.

Ман-ман деган бобочўпонлар эрталабдан бошлаб топган-тутганини кўтариб, бу ерга келиша бошлади. Катта майдон одамлар билан тўлиб, Самарқанд бозоридан ҳам гавжум бўлиб кетди. Ҳамма билан кўл сикиб, қучоқлашиб ҳол-ахвол сўраб, кутиб олаётган Чўли бобо уларни бирма бир Меъмор ёнига олиб келиб, танишитирар, чўпонлар билан Меъморнинг кўл сикишиб омонлашаётганини кўриб завқланар, кўзларидан ёш чиқиб кетар эди. Чўли бобонинг айтишича, бундан саксон йил илгари, у ўн яшар болалигида отабоболари Йўлчи чўпон, Элчи чўпонлар бу ерга сардoba курмоқчи бўлиб, обдан ҳаракат қилганлару хеч иложини тополмаганлар. Кеш шахрида турган Кебакхоннинг ноиблари сардoba тугул қудук ҳақида ҳам ўйламаган эканлар.

Оталари билан бирга келган ёш-яланг йигитчалар овқат пиширишни ўз қўлига олиб, хотин-халажни далаға ёзиб ташланган намату шолчаларга жой қилиш, дастурхон ёзишга қўйишиди. Юкорига, каттагина икки қизил гилам ёзилиб, доира шаклида қилиб ўнга яқин намату шолчалар ташланди. Ўчоқ қазилиб яна икки катта қозон қурилди. Икки семиз танача ва бир неча қўй сўйилиб, қозонларга ташланди.

Кечга яқин меҳнат қилиб чарчаган одамлар овқатланиб, дам олишарди. Кенг далада чигирткалар күйи авжга минган. Бугун на чигирткалар күйи тингланди ва на хордик: сардоба гумбази ёнида катта доира қилиб ўтирган одамлар — кексалар, ёш-яланглар, хотин-халаж, болалар ғала-ғовури беҳудуд даштда ҳоким эди. Юқорида, тўрда — қип-қизил такаёвмит гилами устида Меъмор ва унинг Ҳиротдан келган қадрдонлари Ҳожи табиб, уста Обид, уста Ҳудойберганлар ҳамда меҳмонга келган чўпонларнинг оқсоқоллари, баҳшилар ўтиради. Чўли бобо бугунги бўлажак «базми Жамшид» зиёфатнинг саркори сифатида, факат буйруқ бериб, меҳмон кутиб юради. Тошқудук, шўрқудукликлар олиб келган икки хум мусаллас юқорига — Меъмор рўпарасига келтирилди. Бўза, айрон, қимиз қимронлар идишларда дастурхонларга тортилди. Лочираю патирлар, ширинликлар, товоқларда эту кулчатой, косаларда шўрвалар...

Қизил туркман гиламнинг иккинчисида бир-икки кампир, Маъсума бека, Бадиа ва бир неча ёш келинлар, иккинчи томонда Меъморнинг шогирдлари — Зулфиқор, Favvos, Заврак ва Ҳорунбеку Абуалилар, Қоратошдан харсанг кўчирган қийик кўз азамат чўпон йигитлар ўтиришарди.

Тўрдаги ёши улуғлар фотихадан сўнг таомларга қарашди. Одоб билан уларни кузатиб ўтирган ёшлар қимизга ружу қилиб, овқатга қўл узатишди. Меҳнат завқи, файзли дала шукухи, кулги, ширин сўзлар, ҳазил-мутойиба гаплар билан ғала-ғовур кучайиб кетди. Узок-яқиндан келган чўпон йигитларнинг нигоҳи шахар қизи Бадиада эди. У бугун ясаниб, Халаҷ бўро-нидан омон қолган энг яхши либосларини кийиб, сочларини икки ўрам қилиб, оркасига ташлаган. Бадиа йигитлар нигоҳи ўзини тийри-борон қилаётганини, бу ҳолат Зулфиқорга унча ёқинкирамаётганини ҳам се-зиб ўтиради. Кеча Чўли бобонинг кичик ўғли — никтидан келган чўпон йигит Бадиага хушомад қилиб, атрофида айланишаётганини кўрган Зулфиқорнинг ранги оқарди. У ҳатто отаси Бухорода бетоқатлик билан қутаётганини ҳам унтиб, Бадиага сехрланиб юради. Ёлғиз ишонгани Бадианинг чўпон йигитлар билан кулишиб юргани Зулфиқорнинг юрагига фулғула солди.

Наҳотки у шунақа! Наҳотки у енгилтак қиз! Наҳотки у севгилисидан сал келишганроқ йигитни кўрса эла-
кишиб кетади?! Наҳотки у!.. Наҳотки у!..

Зулфиқор дардини ичига ютиб, шериклари ёнида
йнданмай ўтираверди. Кенг далада доира ясаб ўтирган
одамлар орасидаги деярли ҳамма йигитларнинг кўзи
Бадиага, «муҳандис олим», «усталар устаси»нинг ёлғиз
кизига қаратилган эди.

Улуғлар бир-икки пиёладан мусаллас ичишгач, эт
еийиши. Чинни лаганда олиб келинган калла дастав-
вал Меъморнинг олдига қўйилди. Ундан кейин меҳ-
монлар оқсоқоли — хиротликлар кексаси кулол Абу-
толиб олдига, Даشتி Қипчоқ удуми бўйича Меъмор
қўй калласининг ўнг қулогини ўзига, сўл қулогини
Чўли бобога узатиб, кейин лагани билан кўтариб ёни-
даги шерикларига узатиб юборди. Бостириб-бостириб
мусалласдан ичиб, этни жигарга қўшиб еди. Нимага
эътибор бериб, кўпроқ ейишни ёнида ўтирган Чўли
бобо ўргатиб турарди. Ҳамма Чўли бобо билан Меъ-
мордан кўз узмас, чўпонлар оқсоқолининг имо-ишора-
сига қаттиқ риоя қилишарди. Чўпонлар диёрида одам-
нинг қадри ниҳоятда баланд эканини ҳиротликлар
пайқаб ўтиришарди. Негадир кейинги йилларда пой-
тахтда одам қадри пасайиб кетган, бирор ўлиб, бирор
тириладими, ишлари йўқ. Баъзилар бунда одам кўпа-
йиб кетганидан шундок инсон бекадр бўляпти, дейи-
шарди. Дарҳақиқат, Ҳиротда одам одамга бўри, одам-
лар бир-биридан ҳайнишиб, бад олишарди. Бу эса —
«қиёматнинг яқинлигидан далолат» дейишарди. Чўпон-
лар даштида қиёмат эмас, дунё янгидан туғилиб, энди
бошланаётганга ўҳшарди. Бу ерда ҳамма нарсага эъти-
бор кучли. Ҳиротликлар буни сезирлик билан пайқаб
туришар, ҳаёт ниҳоятда содда, бир қадар зерикарли ва
жўн бўлишига қарамай, кувлик-шумликдан, бўхтону
иғводан, димоғдорлигу манманликдан, бирорнинг ҳақига
хиёнат қилишдан тамоман узок эди. Бир қараашда
дўлвор, қўпол ва исқирт кўринган одамлар, бу гуппи
тўну олача қўйлаклар ичидаги сийнаю қалблар булоқ
сувларидай мусаффо, биллурый эди.

Кўп ўтмай, элнинг: «Сўраймиз, бу ерга Элтузар
бахши келганлар, «Алномиш»дан ўқиб берсинлар!»
деган илтимоси янгради. Чўли бобо оқсоқоллар ёнида

ўтирган, белида заррин камар, бошида сувсар телпаклик баҳшига мурожаат этди.

— Элтузар шоир, нима дейсиз? Биз ҳам сўраймиз!

— Биз тайёрмиз, Чўли бобо.

— Башланг. Йўлга тушинг.

Элтузар шоир ўз ёнига шогирдини чакириб, дўмбирачини духоба филофидан суғурди. Бир муддат ўзини чоғлаб, овозини ва дўмбирани созлаб, зиёфатда ўтирганларнинг дикқатини жалб этди.

Ҳамма ёкка сув қўйгандек жимлик чўкди.

Элтузар шоир куйлай кетди: «...Алпомишхон Қалмок элда, Чилбир чўлда бораётib кўрди: бир ерда тўқсон қўра қўй ёйилиб ётипти. Бу тўқсон қўра қўй Бойсарининг қўйи эди, чўпонларнинг маҳмадонаси Кайқубат кал эди. Кайқубатга қараб, шул ороға бир Элибой келдими деб, Алпомиш сўраб турипти:

Ассалом алайкум, чўлда чўпонлар,
Устида кийгани эски чопонлар.
Кононокқа тўйиб ётган гуппонлар,
Шул орага бир Элибой келдими!..

.....

Элтузар баҳши Алпомишнинг одамийлиги, Барчинойга садоқати, элга ғамхўр, ғанимга шафқатсизлигини ифодалайдиган манзараларни ўзини ўраб олган халқ қўзи олдида шундай куйладики, сомилар чурк этмай жон қулоқлари билан тинглаб ўтирас эдилар.

Айниқса, Нажмиддин Бухорий, акаси Бойбўрининг зулмидан бошқа юртларга кўчиб кетган Бойсари қисматида ўз қисматини кўриб, кўзларидан ёш чиқиб кетди. Отасининг адолатсизлигини қоралаган Алпомиш тимсолида ўғли Низомиддин гавдаланиб, чукур ўйга чўмди, юрагидаги дарди янгиланиб, ўқраб йиғлаб юборишига сал қолди. Буни кузатиб турган шогирдлари унинг ахволига тушунишар эди... Бунда ҳам ҳақ билан ноҳақлик ўртасидаги можаролар ҳикоя қилинар, ҳокимларнинг зулми қораланиб, адолат, ҳақиқат шарафланар, меҳнаткаш халқнинг эзгу орзу-армонлари ифода этиларди...

...Элтузар шоир билан Хуррам бахшилар достон-ларидан қисқа намуна айтиб бергач, ерўчоқлар ёнида чирмандаларини қиздириб ўтирган икки йигит меҳмонлар доирасига келиб, Чўли бобонинг «Олинглар!» ишорасидан сўнг «гиж-банг...»ни бошлаб юборишид. Ўртага икки чўпон йигит тушди-да, катта доирани аввал бир айланиб чиқиб, сиполик билан ўйинга тушишди. Ундан кейин яна икки йигит ўртага тушди... Йигитларнинг шўх ўйинлари, чирмандаларнинг ҳамоҳанг гиж-банглари Меъморнинг оғир хаёлларини бирлаҳзада тарқатиб юбориб, унинг кўнглини ёзгандай бўлди. У бир хўрсиниб кўйди-да, анча енгил тортиб, сардобанинг битишини тантана килаётган оддий кишилар хурсандчилигига шерик бўлиб, беихтиёр карсак чала бошлади.

Хотин-халаж тўдасида завқланиб ўтирган Бадиа назарида, чўпон йигитлар ўйини анча сипо ва сокин эди. Яна бир йигит ўртага тушиб «Гум-гум, гиж-банг»-ни кучайтириб юборади, деб кутиб ўтиради. Аммо ҳеч кимдан дарак бўлмади. Рўпарада ўтирган Заврак Бадиага ишора қилиб: «Қани, ўзингиз чиқинг, Бадиа бекам!» дегандек энгагини кўтарди. Бундай пайтларда Бадианинг ўйинга тушиб кетишини, у яхшигина ўйнашини Заврак Нишопурий билан Favvos Мухаммад билишарди.

— Нима деяпсиз энгак қоқиб? — сўради Бадиа.

— Ўртага тушинг! Шу ерда ўйнамасангиз қаерда ўйнайсиз! — деди Заврак.

Зулфиқор ҳам кулимсиради. У ҳам Бадианинг дутору дафга яхши ўйнашини эшитган эди. Завракнинг дадил илтимоси Бадиани руҳлантириб юборди. У одамларни, бир-бирлари билан ғала-ғовур қилиб гаплашиб кетишганини кузатиб турарди. Акасининг азаси юрагида зил эди. Маъсума бека рухсатидан сўнг у ўртага тушди. У ёқ-бу ёрини тортиб текислаб доирачиларга имо қилди. Бу билан у «Дадилроқ, жонлироқ чалинглар!» демокчи эди. Бадиа кулоchlарини ёзиб, чирмандаги «гиж-банг»ига ҳамоҳанг ўйинга тушиб кетди. Ўртадаги йигитлар дарҳол четга чиқишид. Ғала-ғовур, ўзаро гаплашишлар шу ондаёқ тўхтаб, ҳамма ўртага тушган устанинг қизига тикилди. Беихтиёр чирмандага мос чапак янграй бошлади. Шу лаҳза ўчоқ ёнида

юрган яна уч чирмандачи ҳам югуриб келиб, икки чирмандачига қўшилди. Чексиз даштда беш чирманданинг «гиж-банг»и янгради. Ҳаяжонга тушиб, ниҳоятда чиройли ўйнаётган Бадиа даврани айланиб чиқди. Бу — бошларига тушган фожиадан кейинги биринчи хурсандчилик эди. Бунинг устига, бу ўйин кимнингдир тўйи, кимнингдир зиёфатида эмас, катта меҳнат самараси — сардобанинг шарофати туфайли бўлаётган хурсандчилик йигинидаги ўйин эди. Узоқ-яқиндан келган чўпонлар ҳам шаҳарлик гўзал қиз ўйинига маҳлиё бўлиб қолиши. Бадиа ўзини жуда эркин тутиб, дам айланиб, дам шох ташлаб ўйнаб, аёллар тўдасига қараб муқом қилиб, палапон қушчалардек елкаларини силкиб, дам эгилиб, таъзим этиб, дам кимгадир кўз кирини ташлаб, кимгадир фазабнок, кимгадир уялинқираб товусдек хиром қиласди. У файрат ва ҳаяжон билан ўйнарди, бунда ўтирган катта-кичикнинг оғзи очилиб қолди. Меъмор ҳам, Маъсума бека ҳам, Хорунбегу ҳиротлик усталар ҳам фаҳрланаб ўтиришарди. Беш чирманд ҳам авжга миниб, йигитлар уни ёриб юборгудай урадилар. Бадиа бутун санъатини кўрсатиб, чирмандалар янграб турганда осмонда учган юлдуздек ялт этиб, ўнг томонга хотин-халаж тўдасига бурилиб, жойига ўтирди.

Қийқириқ, чапак авжига минди.

Бадиадан кейин ўртага тушган бошқа йигитлар ўйин ҳароратини ўша даражага олиб чиқиша олмади. Бадианинг донғи ўтирганлар ичидаги оғиздан оғизга кўчди. Чўпон қизлардан ҳам бири чиқиб ўйнади, лекин соврин Бадиада кетди.

Зиёфату ўйин-кулги аллавақтгача давом этди. Ярим тунда, ой тиккага келганда Чўли бобо фотиха қилди, ҳамма ўз ерига кетиб, дам олишга хозирлик кўра бошлади. Аммо ҳамманинг хаёлида Бадианинг рақси эди. Унинг қиликлари, муқомлари ҳамманинг кўз олдидаги турарди.

Базмдан сўнг Бадиа ўз оғалари — Хорунбек, Заврак, Favvos, Зулфиқор ва яна беш чирмандакаш сағида сардoba гумбази атрофида айланиши. Бир тўда бўлиб сардoba гумбазини айланишаётганда Заврак шумлик қилиб, Favvos билан Хорунбекларнинг қўлидан ушлаб, орқага торти. Улар билан бирга чирман-

дакаш йигитлар ҳам жўнаб қолишиди. Бу ҳолатни сезмаган Зулфиқор атрофига бир қараб, уларни кўрмач, Бадиага буни сездирмай гаплашиб кетаверди. Улар сардоба ичига киришаётганида Бадиа гап қотди.

— Уни қаранг, осмон тўла юлдузлар... Худди қўлим етаётгандай... Улар жуда яқинга ўхшайди. Даشتда юлдузлар жуда яқин кўринар экан. Катта гумбаз ичида яна бир гумбаз...

— Ҳа, — деди Зулфиқор, — тилла тангачалар қадалган бахмал гумбаз ичида яна бир олтин гумбаз. Дунё ичида дунё...

— Чиройли айтдингиз!

— Сиз жуда чиройли ўйнадингиз, — деди Зулфиқор сардоба ичига киргач, Бадианинг қўлларидан ушлаб.

— Сизга ёқдими?

— Жуда... — Зулфиқор Бадиани бағрига тортаётган эди, у балиқдек сирғалиб, хаҳолаб ташқарига чиқди.

— Қани улар?

— Билмайман.

— Бунақа қилиқ Нишопурий жанобларидан чиқади. Фирромлар! Биламан, — деди Бадиа у ёқ-бу ёққа қараб, уларни қидириб, — буни қаранг, биз иккимизни атай ташлаб кетишибди!

— Наҳотки?!

— Ҳа, юринг тезроқ! У фирромларни топайлик!

Бадиа билан Зулфиқор дарҳол сарdobанинг нариги томонига ўтиб, анча нарида кетаётган оғалари орқасидан чопиб етиб олишиди.

— Бундоқ ишлар факат Нишопурий жанобларидан чиқади! — деди Бадиа энтикиб Зулфиқор билан ёнма-ён олдинга ўтиб кетаётиб. У жўрттага Зулфиқордан узоклашмай, ҳатто унинг қўлидан ушлаб, ўзларининг яқинликларини намойиш қила бошлади.

— Менда айб йўқ, бекам, — деди Заврак кулимсираб, — мана, Favvos Мухаммад жаноблари кетамиз, дедилар...

— Ёлғон гапни қўйинг! Ўзингиз бошладингиз! — деди Favvos бирдан тутакиб.

— Favvos жанобларини яхши биламан, у киши сипо одам. У кишида бачканалик бўлмайди. Мен бўридан қўрқаман, бу атрофларда бўри бор, дейишади.

Шундок тунда дўстини ёлғиҙ ташлаб кетиш кимнинг кўлидан келади?

— Авваламбор, сиз бекам, ёлғиз эмас эдингиз, — деди тили қичиб Заврак, — жаноб Зулфиқор Шоший борлар. Иккиламчи, мен дўстимни ёлғиз ташлаб кетадиган одам бўлсам, Ҳиротдан то бу ергача хизматингизда бўлиб келмаган бўлар эдим! Бу дашт ҳам баҳаволикда Кўхисиёҳдан қолишмас экан. Равоч сайили эсингиздами? Ишқилиб, охири бахайр бўлсин, бекам. Бўри сизни олиб қочолмайди, сиз бўрини олиб қоча-сиз. Иккиламчи, биз бўрилар атрофингиздамиз...

— Офарин! — деди Бадиа қах-қах уриб кулиб. — Гапда биз енгилдик. Нишопурий жанобларига асло гап топиб бериб бўлмайди. Анчадан бери нафасингиз ичингизга тушиб кетган эди, хайрият бугун чиқди.

Шундан сўнг улар иноқлашиб, яна қўшилиб, ётоқлари томон кетишиди.

Тонг отди.

Дашт тонги нақадар гўзал; ҳаво беғубор, ғир-ғир шабада эсиб, қуёшдан қайноқ нурлар куйила бошлиди. Эчкию қўйларнинг маъраши, баъзан кўпракларнинг йўғон овозда салмоқли вовиллаши дашт бўйлаб ёйилиб, бу тонгни янада сафоли қилиб юборди.

Эртасига кечга яқин меҳмон бўлиб келган чўпонлар яна Чўли бобо ва Меъмор билан хайрлашиб, отувловларида ўз жойларига жўнашди. Меъмор, усталар енг шимариб ишга тушиши. Яна одатдагидек бошқалар ҳам белгилаб берилган ўз вазифаларини бажара кетишиди. Орадан уч кун ўтиб, шанба кунига сардоба курилиб битди. Тепадаги «Чангароқ»ка ҳам фишт қўйилди. Якшанба кунига бек ўз одамлари билан бу ерга чиқиб келишини ҳамма кутарди.

Якшанба куни куннинг ўрталарига бориб, катта йўлда уч отлик пайдо бўлди. Сардoba атрофига ўтирганлар хайрон бўлишди, наҳотки бек бу ерга икки одам билан чиқиб келса?!

Ха, дарҳақиқат, шубҳа тўғри чиқди, — бек йўқ, унинг кичик ииниси, Қамбар Мирзо, Ҳожи табиб учовлон шаҳардан чиқиб келишган эди. «Нима гап? Бек келмадиларми?» — дегандек Чўли бобо Мирзога қаради.

— Бек ҳазратларининг муҳим ишлари чиқиб қолди. Ҳисоб-китобни ўзимиз қиласиз, — деди совук

нигоҳ ташлаб турган Қамбар Мирзо билан бекнинг иниси.

Ҳожи табиб бөши қўйи, сухбатга аралашмай, нарига бориб сардоба ичига кирди.

Ахволнинг ўзгариб қолганини пайқаган Меъмор, бир муддат қараб турди. Кейин серрайиб турган Қамбар Мирзога мулоиймлик билан гап қотди.

— Қани, ундоқ бўлса, ҳисоб-китобни бошлай беринг!

Қамбар Мирзо бир тош устига ўтириб, қўйнидан қоғоз чиқариб ўқиди.

— Меъмор Нажмиддин Бухорий, ўттиз икки кун ишладингиз. Ҳар кунингизга икки тангадан тўланадиган бўлган экан. Мана марҳамат, олтмиш тўрт танга, — у халтасидан шоҳрухия кумуш тангаларидан санаб Меъморга узатди. Меъморнинг ўнг кўли тангаларга тўлди.

— Уста Обид, сизга ўттиз икки танга. Санаб олинг!

— Мирзо?

— Лаббай.

— Бизга бек ҳазратлари тилло танга ваъда қилган эдилар. Меъмор ҳазратларига ҳам. Бу кумуш-ку?

— Менга нима айтилган бўлса, шуни қиласман. Майда гапларни йиғиштириб, шунга шукур қилиб ола-веринг?! — деди Қамбар Мирзо хўмрайиб.

Уста Обид у ёқ-бу ёққа аланглаб, одамлар қўзидағи совук бир қарацдан нима қилишини билмай, тангаларни олди.

— Уста Худойберган, сизга ҳам ўттиз икки танга!

Уста Худойберган ҳам олди.

— Меъмор жанобларининг уч шогирдларига, ўн тангадан берамиз. Бек ҳазратларининг инъоми деб қабул қиласиз. Акс ҳолда, биз талабаю шогирдларга ҳеч қачон ақча тўламаганмиз.

Фаввос бу тангаларни олиб Мирзонинг башарасига урмокчи бўлиб турган эди. Меъмор лабини тишлади. Олинг, дегандек ибора килди. Фаввос, Зулфиқор, Завраклар ҳам ўн тангадан олишди.

— Вассалом! Менга берилган ақчалар шулар, — деди Қамбар Мирзо ва этагини қоқиб, ўрнидан турди.

— Жуда яхши, — деди Меъмор, — бекнинг химматларига ташаккур айтамиз! Агар шуни бермаганларида ҳам бир нима дея олармидик.

— Бизда бошқа гапингиз борми?

— Йўқ.

— Мана, хисоб-китобни ҳам қилдик, — деди Қамбар Мирзо бек иниси билан бирга бориб сардoba ичига киришди. Ҳовуз ичи муздек сувга тўлиб туради. Ундан кейин, гумбазни айланиб, томоша қилишиди. Ҳамма ёқни кўришгач, бир-бирига жуда зўр бўлганини шивирлаб гаплашиб отларга минишиди. Нарироқда турган Ҳожи табибга: «Юринг, кетасизми?» деб мурожаат этишиди. Ҳожи табиб шаҳарга кечки салқинда тушиб боришини айтгач, икки мансабдор отларга қамчи босиб жўнаб қолишиди.

— Ўзи нима гап? Нима бўлди? — деди таажжуб ичидагаросимага тушиб уста Обид.

— Мен шундок бўлишини сезган эдим, — деди Меъмор.

— Меъмор ҳазратлари, тақдир шундок экан, — деди Ҳожи табиб, — Ҳиротдан бир хабар етган...

— Биз ундан ўзимизнинг кимлигимизни яширганимиз йўқ! — деди Меъмор, — нонушта пайтида ўғлим қатл этилгани сабабли Ҳиротдан чиқарилиб юборилганим, ўз она шахрим Бухорога кетаётганимни айтган эдим. Бек «ҳечкиси йўқ» деган эди. Жуда таажжуб!

Ҳамма жим бўлиб қолди.

— Хафа бўлманг, Меъмор ҳазратлари, нимаики етмаса, биз ўзимиз тўлаймиз, — деди Чўли бобо.

— Хафа бўлманг, — деди Ҳорунбек секин Меъморнинг қулогига. — Менинг ёнимда, Favvos Муҳаммад ёнларида халтачамиз тилло тангаларга тўла. Асло хафа бўлманг.

Меъмор яна кулди.

— Азизларим, мен асло хафа бўлмайман; биз бу ерга сардoba кўтарган бўлсақ, фуқаро учун кўтардик. Чўпонлар учун кўтардик. Бу ердаги жоноворлар, ўловчилар ва ҳатто қушлар учун ҳам у керак. Биз савоб иш қилдик. Қилинган савоб ишга миннат қилмайдилар. Мен қилган меҳнатимдан розиман. Ҳеч кимдан шикоятим йўқ.

Бу сўздан кейин фифон бўлиб турган уста Обид, уста Худойбергандар ҳам бир оз бўшашди.

— Мана шу тангаларни икковинглар бўлишиб ола-

сиз, — деди Меъмор ҳовучидаги кумуш тангаларни уста Обид ҳовучига тўкиб. — Сидқидилдан! Дарҳақиқат, тилла танга берилиши керак эди, — бизнинг сиёсатга аралашган ишимиз касофатига қолиб, сизларга кам ҳақ тўланди.

— Йўқ, кўйинг, Меъмор! — деди уста Обид.

— Олмасангиз қаттиқ хафа бўламан!

Бу сўздан кейин Заврагу Фаввос, Зулфиқор ҳам қўлларидағи тангаларини уста Обид билан уста Худойберган ҳовучларига тўкишди.

Чўли бобо уйига кириб, бир янги поча пўстин олиб чиқиб, Меъморнинг елкасига ёпди.

— Мендан ёдгорлик бўлсин, Меъмор, — деди Чўли бобо, — ҳозир кун иссик, совуқ кунларда кийиб юрасиз. Бодингиз бўлса жуда даво.

— Ташаккур! — деди Меъмор.

Чўли бобонинг ўғиллари ичкаридан қоракўл қалпоклар олиб чиқиб, уч шогирдга, уста Обид, уста Худойбергандарга, ундан сўнг Ҳорунбек, Ҳасанбек-Ҳусайнбек, Абутолибу Абуалиларга ҳам кийгизди. Маъсума бека билан Бадиага ичига тулки тери, сирти қизил духобадан тикилган нимча кийгизиши.

Ҳорунбек билан шогирдлар кечгача араваларни тайёрлаб юкларни ортишди. Кечки салқинда бу ердаги чўпонлару косонлик усталар билан хайрлашиб йўлга тушишди. Чўли бобо билан Ҳожи табиб Меъморни то Ҳўжа Муборак қишлоғигача кузатиб боришди. Бу ерда улар қучоқлашиб, йиғлашиб хайрлашишди. Меъмор карвони шитоб билан йўл босиб, шу куни кечаси Қоровулбозорга етиб бориб, карвонсаройга жойлашди.

Эртасига эрта билан, Бухоро, қайдасан, деб яна йўлга тушишди.

XXXVI б о б

ОҒУЛИ ХАНЖАР

Сардобани қуриб битириб, бекдан номардлик кўрган Меъмор ўша куни йўлга тайёргарлик кўраётганида яна хаёлидан Ҳиротда бўлиб ўтган таҳқирланишларни

ўтказди. У бу ердаги ўз меҳнатига ҳеч кимдан ҳеч нарса кутмаган эди. Сидқидилдан бу ишни чўпонлар учун қилганини ҳам кўнглидан ўтказди. Аммо бекнинг бир оғиз ташаккури бўлмагани, келиб «Хорманг!» демагани кўнглига наштардек ботди. Ҳарқалай инсон — инсонда, у тош эмас! Меъмор «қувғинди» бўлгани учун ҳам бек бунда келмади. Худо урганин пайғамбар ҳам ҳассаси билан туртади, деди у ўзига ўзи. Аммо Меъмор хаёлидан ахли нафосат оламида Фирдавсийга Махмуд Газнавий томонидан ваъда этилган тилла тангалар ўрнига кумуш тангалар тўлангани, танга ортилган тuya бу дарвозадан кириб келаётганида, бу дарвозадан шоирнинг тобути чиқиб кетаётгани воқеаси ўтди. Ҳозир одамнинг таҳқирланиши янгилик эмаслиги, бундек ишлар илгари ҳам бўлиб келганлиги кўнглидан ўтди. Лекин Ҳирот воқеаси жуда ҳам заҳарли ва ҳеч ёддан чиқмайдиган иш бўлган эди. Меъмор рақиблари тарқатган совук гаплар аввал амирзода Иброҳим Султон қулоғига етиб, уни дарғазаб қилиб юрган бўлса, кейинчалик Шоҳруҳ қулоғига ҳам етди. У Меъморнинг: «Биз бу биноларни раият учун курмокдамиз...» деган сўзини шу ҳафта ичи Аҳмад Чалабий амирзода қулоғига етказган эди. Устод Қавом ҳовлисидаги бир зиёфатда, Меъмор дўстига мурожаат этиб: «Амали устод қавом Мусалло то қиёмат бу Ҳирот бағрида турғай. Келгуси авлод сиз ҳазратдан миннатдор бўлғай...» дегани Аҳмад Чалабий орқали амирзодага етган, у эса подшоҳга етказган эди. «Келгуси авлод устод Қавомдан эмас, сиз, ҳазрати олийларидан миннатдор бўлмоғи керак, чунки Мусалло сизнинг амалингиздир. Нечун қавом ёки Бухорий авлод таҳсинига сазовор бўлар экан?» Бу гап подшоҳга кечки пайт етказилган эди. Негадир тажанг ўтирган Шоҳруҳнинг чакка томирлари шишиб, тишини тишига қўйди. Иккала меъмордан ҳам энсаси котди. Айниқса, меъмор Нажмиддин Бухорий унинг кўзига чаёндан ҳам ёмон кўриниб кетди. «Мен буларга ишонсанму бу ярамаслар энди подшоҳни ҳам мэнсимай қолишмокда!» — деди муштумини қисиб Шоҳруҳ.

Бу фитналардан сўнг орадан бир ой ўтгач, подшоҳ ўрдасида мухаррам ойи — рамазон тугаши, катта хайит чин арафасида мамлакатнинг номдор кишила-

рига инъомлар улашилди. Ўрда ҳовлисига тўпланган мансабдорлар, устодлару мавлоноларга заррин чопонлар кийгизилди. Номи аталиб, вазири аъзам хузурига таъзим қилиб борганлар тўн кийиб, баъзилар тилло тангалар ва ҳар турли инъомлар олиб, жойларига мамнуну масрур келиб чўкишди. Зиёфату базм тонгга уланиб кетди...

Бу анъанага ҳамма казо-казолар таклиф этилиб, фақат биргина устод Нажмиддин Бухорий чақирилмади. Ёр-биродарларининг подшо ўрдасига кетганидан хабардор Меъмор тонггача кўксини болишига қўйиб, ўз хонасида ётган эди.

Бадиа ҳам, Маъсума бека ҳам ҳеч нарсага тушунмай, таажжубланишарди. Нечун ҳаммани чақириб ва ҳатто Аҳмад Чалабийдек бетайин кимсаларгача таклиф этилиб, бизнинг отамиз чақирилмади? Ёки бу бир жузъий нуқсон бўлиб, майда мансабдорларнинг ўз вазифасига лоқайд қараганликлари сабабли бўлдимикан? Ундоқ бўлса, нечун анжумандада Меъморни кўрмаган Бойсункур Мирзо дархол одам юбормади экан?

Йўқ, бу атай қилинган эди. Подшоҳнинг «Оғуга суворилган ханжар»ни шу йўл билан Меъмор юрагига ботирилган эди.

Меъмор Бухорий бу воқеадан сўнг бир ҳафта кўчага чиқмади. Унинг таъсирчан, жizzакироқ одам эканлигини билиб, атай бу иш қилинган эди. Бўлмади! Меъмор бу аламни ҳам мардонавор ўтказди...

...Сардоба қурилишини тамомлаб, субҳи содикда, даштда ёлғиз қаққайиб турган Меъмор хаёлидан мана шулар ўтди. Подшоҳларнинг таҳтда узок ўтириб қолгани — фуқаро заволи, уларнинг тез-тез ўзгариб тургани маъкул. Бу дунёда ўлмайдиган одам йўқ, бирор га ўлим тилаш яхши эмас, аммо ҳарқалай, ғарибларнинг эмас, подшоҳларнинг ўлиб тургани яхши, деди Меъмор ўзига ўзи хулоса қилиб.

XXXVII б о б

БУХОРО

Узоқнинг иши қийин; ўғлидан олган кейинги номада бизлар ҳаммамиз Бухорога кўчиб кетаётирмиз, тез кунларда етиб борамиз, дейилганига қарамай, мана, бир ярим ойдан ҳам ўтдики, улардан ҳамон дарак йўқ. Уста Нусрат карвон кириши мумкин бўлган ҳамма дарвозалардан хабар олди. Кўп карвонлар Бухорога кириб келдию, аммо меъмор Нажмиддин Бухорийдан дарак бўлмади. Уста Нусрат хонадони хавотирда колди. Шундай кунларда, кечга яқин шаҳарнинг айланма тор кўчаларидан бирига шалдир-шулдир қилиб уч арава кириб келди. Меъморнинг: Эски Намозгоҳ маҳалламга бораверай, уруғларим бордир, деганига қарамай, Зулфиқор ҳаммани ўз ҳовлисига олиб келди. Бу тадбир аравакаш Ҳорунбекка ҳам ёқди: «Уста, чиқиб кетганингизга йигирма йилдан ошган бўлса, ким ҳозир сизни дастурхон ёзиб кутиб ўтирибди? Зулфиқор Шоший жанобларининг ҳовлиларига тушганимиз маъқул. Шогирд ҳам фарзанддек гап», деди. Ҳорунбекнинг фикри Меъморга ёқди, чунки Меъмор дўсти Қавомнинг ўғли Ҳудододбекни жини ёқтиргмаган, қанча йигитларни менсимаган, тоғ кийигидек ҳеч кимга бўй эгмай ўсган Бадиа шу Зулфиқор ёнида итоат сақлашини, шаддодликлари ҳам пасайишини сезган эди. Маъсума бека билан Меъмор шу ҳакда гаплашиб қолишарди. Тўғри сўз Ҳорун бўзчининг Зулфиқор тўғрисида бирон ёмон сўз айтмагани Меъмор кўнглига таскин берди. Дарҳақиқат, уч шогирдининг ўзига ярашиқ уч фазилати бор эди. Аммо Зулфиқорда қандайдир бир салобат ҳам бор эди. Камгап ва айтганини қиласидиган, қадди-қомати бошқалардан кўра келишган, кучли йигит эди. Бухоронинг Қарши дарвозасидан ўтишда бир муддат тўхташди, Меъмор аравадан тушиб, ҳамманинг кўз олдида ерга чўкка тушиб ўтириб, қиблага караб фотиха ўқиди; бармокларини тупроққа тегизиб, бошига сурди. Ундан сўнг дарвозабонларнинг бирига тилло танга, яна бирига кумуш танга берди. Улар ниҳоятда хурсанд бўлиб, мўътабар зотлардан бири келяпти, хаёл қилиб, араваларнинг

қораси йўколгунча орқаларидан таъзим билан кузатиб туришди. Ҳар қанча босик, ҳар қанча сипо одам хам она шахрини кўриш ҳаяжони олдида бундай харатклар қилиб кўйганини ўзи ҳам билмай колади...

Уч арава айланма, тор кўчада уста Нусрат эшиги олдида тўхтади. Бир варакайига шунча одамни кўриб, хурсандчиликдан ўзини йўқотиб кўйган ота ҳамма билан кучоклашиб кўришгач, қўни-кўшниларга ўхшаб ғала-ғовур ичиди бир чеккада тураверди. Ўғлини бағрига босиб, йиғлаб турган онаси Малоҳатбону эрига ишора қилди:

— Азиз меҳмонларни ҳовлига бошланг!

Унинг ўзи ҳаммадан аввал ҳовлига югуриб кириб ҳокандозга исириқ ташлаб, ўт ёқиб тутатди. Ҳовли ўртасида турган Меъмордан бошлаб ҳаммани айланниб, исириқ солди. Кичик ўели ва қизларига обдаста ва дастшўйлар олиб келиб, янги ироқи совунни олиб чиқишни буюрди. Ҳорунбек билан шогирдлар аравалардан юкларни тушираётганида косаларга қатиқ солиб, наридан-бери устига пиёз тўғраб, йўл босиб келгандарга тутишди. Уста Нусратнинг катта қизлари югуриб қўшникидан яна икки хурмacha қатиқ олиб чиқиб, косаларга қўйди, уста Нусрат зўрлаб бўлса ҳам ҳаммага қатиқ ичирди. Аравадан кўпроқ қақир-қуқирларни; белкурагу кетмон, тоғораю мис кўза ва эски сандиқларни тушираётган шогирдларга қараб туриб, Меъмор кулимсиради.

— Ҳалач яқинида жуда кучли бўрон бўлди, — деди айвонда чордана қуриб ўтирган Меъмор фотихадан кейин уста Нусратга. — Гирдибодлар кумдан келиб шундок устимиздан ўтди. Бир кори ҳол бўлади, деб жуда кўркдик. Йўқ, ҳамма нарсамизни юлиб олиб кетдию, жонимиз омон қолди. Ўтники-ўтга, сувники сувга қолди қатиқнинг пули, деганларидек, бу ҳам худонинг иродаси экан, унисини ҳам кўрдик...

— Кечикканингизга сабаб бор экан, — деди уста Нусрат, — хайрият, худо бир асрабди.

— Кечикканимизга сабаб бошқа нарса, — деди Меъмор кулимсираб.

— Ҳа?

— Даштда чўпонларга сардоба қуриб бердик.

— Бундок денг, —деди уста Нусрат ҳайрат билан Меъморнинг оғзига тикилиб. Меъмор ҳамма гапни бир бошдан айтиб берди...

Шу куни аллавақтгача дастурхон устида гаплашиб ўтиришди, сўнг уста Нусрат меҳмонларнинг ҳордик олишларини айтиб, энг яхши ясатиғлиқ хонасини Меъмор, Маъсума бека, Бадиага беришди. Заврак, Фаввос ва Хорунбекни бошқа хонага киритишиди. Абутолиб ўғли билан, Ҳасанбек, Ҳусайнбеклар ҳам бир хонага кириб ётиб ухлашди.

Эрталабки нонуштадан сўнг Нажмиддин Бухорий-нинг илтимоси билан кизи Бадиа ёнида, уста Нусрат билан бирга Эски Намозгоҳ маҳалласига боришди. Маъсума бека Зулфиқорнинг она-опалари билан гаплашиб ўтириди. Уларга гапириб берадиган хикоялар ниҳоятда кўп эди. Бошқалар Зулфикар билан бирга Бухорони томоша қилгани бозорга чиқиб кетишиди. Йўлда Меъмор устага сиёsat ишларидан, ас-аса, дабдабалардан фоятда зерикканини, мансабдор шахслару ҳокимлар, беклар жонига текканини, қолган умрини бир чеккада тинчгина, ғарифона ўтказмоқчи эканини, катта ишларни олмай, иложи бўлса кўпригу ҳаммоллар лойихасини тузиб, ўзи ишбоши бўлиши ниятида эканини айтиб, Бухорога кўчиб келганини мансабдорларга зинҳор маълум қилмасликни айтди.

— Деггарон томонларда яхши ҳовлилар бор, олиб берайми? — деди уста Нусрат.

— Ҳасанбек-Ҳусайнбек ва кулолга ҳовли топиб беришимиз керак. Мен ўз ҳовлимни амакимларга ташлаб кетганман. У киши қазо қилдилар. Ўғиллари бор, улар турса керак. Шундок ёнгинада ўзларининг ҳам ҳовлилари бор... Бориб кўрайлик, уста. Анча йил ўтиб кетди. Амакиваччаларим билан гаплашиб, рози бўлишса, пул билан хурсанд қиласман.

— Ҳовлингизни кўрганман, Меъмор ҳазратлари, — деди уста Нусрат. Бадиа билан Меъмор унга ялт этиб қарашди.

— Хиротдаги ҳовлимизча эмас. Кичкина, уйлари ҳам қоронғу...

— Мен сизга жуда яхши ҳовли олиб бераман. Гир айланган хоналарини ўзим қурганман, ҳовлиси кенг, гулзор. Хоналари ганчхок билан ишланган, нақшин

шипию тоқларини биз ўзимиз олти ой ишлаганмиз. Яна бир одамнинг ховлиси ҳам сотиладиган бўлиб қолди. Бир ойдан бери сизга ушлаб ўтирибман. Баҳосини келишганимиз, Мен ўзим тўлайман. Сиз билан кейинчалик узилишиб кетамиз.

— Ташаккур! — деди Меъмор. — Лекин биз аввал Намозгоҳга бориб, ховлимизни бир кўришимиз керак.

Нажмиддин Бухорий узоқ сафарда бўлган бъязи «ҳангома»ларни уста Нусратга айтиб берди. Аслида тия карвонига қўшилиб келганида маъқул бўлармиди,— деди у. Аравада анча-мунча қийналишганини кўз олдига келтиргандек бўлди.

Эски Намозгоҳ маҳалласи шаҳар марказидан четроқ бўлиб, айланма тор кўчалар, пасту баланд томлар — бунда одамлар ари уясидек зич яшарди. Маҳалладан ариқ айланиб ўтарди, катта ҳовуз ҳам бор. Аравалар сифмас, факат от-улов кира оладиган шу тор кўчаларнинг бирида Меъморнинг отаси уста Шамсуддиннинг ховлиси бўлиб, торгина ўймакор эшиқдан киргач, болохоналик, ости икки уй ва бир айвон кўзга ташланарди. Меъмор орқасида турған қизи Бадиага бир қараб қўйиб, жилмайди. Бу табассумда Бадиа отасининг ёш болалардек содда, хурсанд бўлганини яхши пайқаб турарди.

— Мана шу кўчага бир қарагин, қизим, — деди Меъмор, — шу кўчада катта бўлганман...

— Мунча тор?

— Бизнинг кўчамиздан ҳам торроқ кўчалар бор.

— Бу кўчаларда одамлар юрганми ёки чумолилар? Супуриб туришмайдими дейман! — Бадиа атробиғига аланглаб, бурнини жийирди.

Бу кўчалар Бадиага унча ёқинқирамаётганини, Ҳиротдагидек дабдабалар йўқлигини сезиб турарди Меъмор.

— Сен бу кўчаларга менинг кўзим билан қарагин! Меъмор секин эшикни итарди. Ундан кейин тақирлатиб ҳам қўйди. Эшик очик экан, ичкарига киришди. Ҳеч ким йўқ, жимжитлик. Меъмор айвонга қаради; пешайвоннинг ўша тўрт устуни кўзига оловдек кўринди. Бу устунлар Меъморнинг ёшлигини эслатди; ўша мих ҳамон турибди. Бу михга у мадрасадан келгач, китоб-дафтарлари солинган жилдини илиб қўярди.

Ховли юзига ётқизилган оби ғиштлар ўша-ўша... Пешайвонга чиқаверишдаги ғишт синган бўлиб, ярмига бошқа ғишт синифи қўйилган эди. Бу ҳам ўша-ўша. Айвон устунига хижрия ҳисоби билан мадраса таҳсилни ёзиб қўйган эди, у ҳам ўчиб кетмабди. Ховли ўртасидаги бир туп тут яна ҳам каттароқ бўлибдию, бари бир ўша-ўша. Меъмор ошхонага, ўтинхона, хужра ва болохона зиналарига ҳам чиқиб кўрди, ҳаммаси ўша-ўша. Ховли ўртасида, бир қўлини тутга тираб, отасининг ҳаракатларини кузатиб турган Бадиа таажжубланиб, ёнида турган уста Нусратга қараб қўйди.

— Отамлар ҳеч тўймаяптилар.

— Одамзод учун туғилиб ўсган еридан азиз ер йўқ дунёда, қизим.

— Кўриб бўлдингизми? — деди Бадиа ҳайратланниб.

— Кўрганим билан тўймайман. Буни қара, ўша йигирма йил илгари ўзим қўйган тарнов ҳам шундок турибди. Амакиларим яхши қарашибди... Бу ҳовлида инсон яшётгани сезилиб турибди.

Шу пайт айвон ёнидаги қўшни ҳовлига чиқадиган кичик бир эшик очилиб, бир бола ҳовлига чиқди. Нотаниш одамларнинг берухсат ҳовлига кириб юрганини кўриб, ранги оқариб кетди:

— Ҳей, сизлар кимсизлар?

— Сен ўзинг кимсан? — сўради Бадиа.

— Мен Абдулвоҳидман!

— Ўҳ-ҳў, сен Абдулвоҳид бўлсанг, мен Бадиаман!

— Бу, менинг ҳовлим!

— Бу менинг ҳовлим! — Бадиа жўрттага жиддий туриб ҳазил қилди.

— Сиз кимсиз?

— Сен ўзинг кимнинг боласисан?! Жамолиддин бувангнинг набираси бўлсанг керак, а?

Бола «ҳм» деб уялинқираб, бир оз бўшаши. Бадианинг тахминий гапи тўғри чиқди. «Мен хозир бувамни чақириб чиқай» деб бола яна эшикчадан нариги ҳовлига чиқиб кетди. Орадан озгина фурсат ўтгач, кекса бир аёл ҳовлига тушиб, Бадиа билан уста Нусратга тикилди. Сўнгра айвон ёқасида турган Меъморга ҳам қаради:

— Сиз мулла Нажмиддин эмасмисиз?

— Шундок, Назминисо биби. Омонмисиз, болачақаларингиз соғ-саломатми?

— Шукур, шукур! Вой, мени қаранг, кўзим хиралашиб, сизларни танимай қолибман. Эсон-омонмисиз? Бола чақаларингиз омон-эсонми? Маъсума бекамиз омон-эсонмилар? Ўғлингиз, қизингиз... Хуш келибсизлар! Қани, айвонга чиқинглар!

— Бу, қизим — Бадиа.

— Вой, эсон-омонмисиз, айланиб кетай, қизим! Бўйларингга холанг қоқиндиқ! Мен ҳозир бошқаларни чақириб чиқай. Ҳой, Абдулвоҳиджон, ютур, отангни чақириб кел!

Аёл нариги ҳовлига чиқиб кетгач, Меъмор Бадиага қаради.

— Бу кампир амакимларнинг хотинлари. Назминисо бувинг бўладилар.

— Эшитганман, — деди киборлик билан.

— Сенинг кўзингга шунақа кўрингани билан, Бухоро жуда улуғ шаҳар. Ҳали сен хеч ерни кўрганинг ўқ. Бунақа маҳаллалардан Бухорода мингларча. Ҳиротга нисбатан Бухоро юз чандон юкори. Самарқанд ундан ҳам юкори!

— Ҳа, мактайверманг, отажон! Мовароуннаҳр сизнинг жаннатингиз. Сиз билан баҳслашиш ниятим ўқ. Бари бир мен енгиламан.

— Офарин!

Орадан бирор соат ўтар-ўтмас, Жамолиддин боюю ўғиллари, қўни-қўшнилар, шу атрофдаги ёш-яланг, ҳамма ҳовлига кириб келаверди.

Ҳамма таажжубда! «Бу ердан кетиб, Ҳиротда машхур бўлган уруғлари Меъмор Нажмиддин Бухорий маҳаллага келибди... У асли мана шу маҳалладан чиққан... Бухоро шаҳрининг Эски Намозгоҳ даҳалик меъмор Ҳиротдаги неча мадрасаларни курган...» деган гаплар маҳаллада айтилиб, аввало унинг уруғлари, ҳаммаҳаллалари ва бутун Бухоро ахли фаҳрланарди. Нажмиддин Бухорийнинг Ҳиротда, подшо хизматида эканлиги билан ҳатто Бухоро ҳокими Шоҳ Малик тархон, қози қалону муфти — Ҳожи Мухаммад Порсо ҳам фаҳру ишонч билан аташарди. Бухоро фарзанди Ал-ҳиротда мўътабар экан, демак, темурийзодалар Ҳожи Мухаммад Пор-

со ҳазратларига ҳам, Шоҳ Малик тархонига ҳам яхши кўз билан қарайдилар...

Ховлига тўпланганлар юзида ҳам фахр, ҳам таажжуб: нега бу Хурносону Мовароуннаҳрга донги кетган одам карнай-сурнайсиз, бедабдаба кириб келди? Бу ўша Нажмиддин Бухорийми ёки бошқа одамми? Нажмиддин Бухорий келармиш-у, биронта мансабдор, жуда бўлмаганда юзбоши ҳам билмайдими?

Одамлар хайрон.

Бу хайронликни сезиб турган Меъморнинг ўзи муаммони очиб қўя қолди.

— Азиз ҳамشاҳарларим. Дарҳақиқат, мен ўша сизларнинг ҳаммаҳаллаларингиз Нажмиддин бўламан. Бoshимга иш тушди: фарзандим Низомиддин қатл этилди. Шундан сўнг Ҳирот менга ҳаром бўлиб, ҳамма нарсадан кечиб, ўз шахрим Бухорога қайтдим. Мана бу қизим Бадиа. Рафиқам дўстим уста Нусратникида. Йўқотган бир фарзандим ўрнига уч фарзанд ва беш ошнам билан бирга Бухорога келдик. Улар ҳам уста Нусратникида. Сизларнинг олдингизда гуноҳкорман, вақтида келиб хабар ололмадим, ишинингизга яролмадим...

— Йўқ, ундоқ деманг, азизим укам! — деди ҳўнграб йиғлаб, Меъморни қучиб Жамолиддин амаки, — гуноҳкорман дейишингиз тўғри эмас! Сиз катта ишлар қилдингиз. Биз, ҳамма уруғларингиз сиз билан фахр этамиз. Қани, укажон, айвонга чиқинг.

Меъмор, уста Нусрат, Жамолиддин бува ва бошқа ёши улуғлар айвонга чиқишиди. Бадиа билан Назминосо биби ҳам фотиҳадан кейин нариги ҳовлига чиқиб, атрофини ўраб олган буҳоролик уруғлари билан сухбатда бўлди. Ҳиротдан келган гўзал қизга ҳамма маҳлиё бўлиб тикиларди. Ёш жувонлар, укасини кўтариб олган жамалак соч қизлар, болалар... ҳамма-ҳамма унинг атрофига эди.

Дастурхон устида ҳамма гап Жамолиддин бувага маълум бўлиб, ҳовли Меъмор учун бир кундаёқ бўшатиб берилиши ва ҳеч қандай пул тўлаш керакмаслигини айтишиди. «Одам ўзи туғилиб, ўсган ўз ҳовлисига ҳам пул тўлайдими? Ҳафа бўламиш!» — дейишиди. Уста Нусрат тайёрлаб қўйган Деггарон маҳалласидағи ҳовлига бормаслиги, ўз ҳовлисига кўчиб келиб, умрини тоат-ибодатда ўтказажагини айтди. Деггарон

маҳалласидаги ҳовлини Ҳасанбек, Ҳусайнбекларга ва кулолларга сотиб олиб беришни, пуллари етмаса, Меъмор карашиб юборишга тайёр эканини, Ҳиротдаги ҳовли-жойларининг акчаси шундок турганини айтди.

Бу фикр Бадиадан бошқа ҳаммага ёқди.

Эртасигаёқ Меъмор ўз ҳовлисига юкларини ташиб, кўчиб келди. Заврак, Фаввос ва Хорунбекка бо-лохона жиҳозлаб берилди Шу ҳафта ичи Деггарондаги кенг ва ажойиб ҳовли Ҳасанбек билан Ҳусайнбек, оға-иниларга катта пулга сотиб олиб берилди. Ундан сал нарироқ, майдон ёнидаги бир ҳовли Абутолибга сотиб олиб берилди. Меъмор иккала ҳовлининг ҳам ярим-ярим пулини тўлади. Боши қўкка етган кулов билан Ҳасанбек-Ҳусайнбеклар Меъморга кай йўл билан миннатдорчилик билдиришни билишмасди. Улар хозир бунда ишлаб, бола-чакаларини Ҳиротдан кузда олиб келишадиган бўлишди. Аммо яна Ҳиротга қайтиб кетишга отланаётган Хорунбекнинг Меъмор яна бирон ҳафта Бухорода қолишини илтимос қилди. Сабаби бу бирон ҳафта ичида Бадиа билан Зулфикор тўйини ўтказажаги, бу тўйда унинг иштирок этишини илтимос қилди. Хорунбек бунга рози бўлди. Лекин у ҳар куни қарvonсаройга қатнаб, от-араваларидан хабар олиб турди. У карvonсарой сохиби орқали Бухорода бир неча косиблар билан учрашиб, хиротлик дўстларининг саломини топширди, нихоятда хуфия баъзи гапларни гаплашиб ҳам олдики, унинг ўз таъбири билан айтганда: бу гапларни фақат «бир худонинг ўзи биларди...»

Лекин Хорунбек бу сирни Меъморга очди:

— Устод, мен араваларимда Ҳурсонга бирмунча кишиларни олиб кетмоқдаман. Улар савдогарлар эмас, адолатсизликка қарши жангга кирадиган баҳодирлар. Амирзодалар лашкари олдида биз озмиз, аммо жафо-каш раият бизнинг томонимизда. Аналҳақ кишилари пиrimiz Фазлуллоҳ учун, бошқа қурбон бўлганлар учун жангга кириб ўч оладилар! Низомиддин учун ҳам ўч оламиз. Интиқом кунлари яқин. Бизнинг бир қанотимиз мадраса талабалари ичида, бир қанотимиз хунарманду косиблар ичида... Биз, айрим аждарларнинг бошини янчмагунча ором билмаймиз!

Меъмор Хорунбекнинг сўзларини диққат билан

тинглаб турарди. «Сиз уларни ўлдирсангиз, тахтга яна бир амирзода чиқади. Лекин у сизни эмас, амирзодаларнинг деганини қиласди», демокчи бўлиб турди-ю, бу сўзни тилига чиқаролмади. «Боринглар, истибоддни кунпаякун қилинглар!» демокчи бўлди. Аммо бу сўзни ҳам тилига чиқармади. У ўз рўпарасида рустамворий бир паҳлавонни кўриб ўтиради. Агарда Хурросону Мовароуннахрда шундок адолатпарвар одамлар яна қўп бўлса раият баҳти эди. Илму фан камоли эди, деган сўзни кўнглидан ўтказди.

— Иним, эҳтиёт бўлинг, худо ёр бўлсин сизга, — деди Меъмор чин юракдан.

Келаси хафтада Бадианинг тўйи бўлди. Икки севишган қалб — Зулфиқор билан Бадиа бир-бирини топиб, муроду мақсадларига етишди. Меъморнинг шаддод қизи уста Нусрат хонадонига келин бўлиб тушгани ҳамманинг қулоғига етди...

Тўйни ўтказиб, Ҳорунбек яна Ҳиротга қайтиб кетди. «Агарда ҳаққингизни олмасангиз, мен бир кекса одамни қиёматгача қийнаган бўласиз, олинг, иним», деди Меъмор тилло тангалар солинглан халтачани узатиб. Ҳорунбек олди. Нечундир тўйдан кейин анча бўшашиб қолган Favvos Мухаммад, агар устод хафа бўлмасалар Ҳиротга, ота-онам ёнига қайтиб кетардим, деди. Аксинча, Меъмор ўзининг бундан кейинги ҳаёти хонанишинликда, илгариgidек катта бинолар қуриш нияти йўқ ва бунга ҳожат ҳам йўқлиги, шу сабабли истаса, шогирдлари ҳам хижолат бўлмай ўз жойларига қайтиб кетавериши мумкинлигини айтди. Оғир кунларда бирга фарзанд бўлиб келганликлари учун юракдан раҳмат айтди. У учала шогирдидан ҳам мингдан-мингга рози эканини айтди, энди мустақил иш қилаверишларингиз мумкин, деб фотиха ҳам берди. Favvos Ҳорунбек билан бирга қайтишга тайёргарлик кўраётганида, Меъмор Заврак Нишопурийга ҳам мурожаат этди:

— Ўғлим, сиз ҳам хижолат бўлмай қайтаверинг. Менга йўлдош бўлиб, кузатдингиз. Келиб Бухорони ҳам томоша қилдингиз. Кунларимиз бекорга ўтмади — йўлда чўпонларга сардоба ҳам қуриб бердик. Энди уйингизга қайтишингиз мумкин.

— Мен қайтолмайман, — деди Заврак Нишопу-

рий ранжиб. — Сиз қаерда бўлсангиз мен ҳам шу ерда бўламан. Менинг ота-онам ёшлигимда вафот этган, етим ўсганман... Мен шу атрофдан ўзимга жой топиб тураман, албатта.

— Йўқ, гап жойда эмас, — деди Меъмор, — мана жой, хоҳлаган хона сизники. Аммо мен сизнинг ёш вактингиз, кунларингизга зомин бўлмаслигим керак. Мен энди илгаригидек донг таратиб, катта ишларга қўй уролмайман, ўғлим. Мен дунё ишларидан зерикдим. Колган умримни чолу кампир бирга, хокисору фарибликда, тоат-ибодатда ўтказмоқчиман. Мана, менинг бахтимга ўз ховлим ҳам бор экан, омон-эсон етиб келдим. Салтанатнинг фармони, Мирзо Бойсун-қурнинг фикри ҳам шу: ҳажга кетмаганингизда ҳам қолган умрингизни сиёsatга аралашмай, тоат-ибодатда ўтказинг, деган. Ҳокимият фикрига амал қилмай яна илгаригидай ўзимни ўтга-чўқقا урсам, кексалигимда гуноҳ ортираман, бўтам. Мен кекса одамни ҳурмат қилганингиз, сизнинг олижаноблигингиз. Аммо ҳадеб унга ёпишаверишингиз — ўз йўлингиз ва истикболингизни ёпиб қўйиш демак. Менинг шавкатли кунларим ўтди, энди тунларим яқинлашмоқда. Мен сизнинг ниҳоятда иктидору қобилиятли меъмор бўлаётганлигингизни билиб, бу гапларни айтяпман. Бир лаҳзали ҳиссиётга берилмай, Ҳиротга қайting!

— Устод, мен сизнинг жонингизга тегдимми? Шуни айтинг, фақат!

— Асло! Сиз кетсангиз менинг юрагим узилиб кетади. Лекин мен ҳақиқатни айтишим керак.

— Мен кетмайман! — деди Заврак Нишопурий қатъий бир оҳангда.

— Қийнаманг, уста, — деди Маъсума бека кўзига ёш олиб, — Заврак кетмайдилар. Мен фарзандим деганман, бизни ёлғиз ташлаб хеч қаёққа кетмайдилар!

Шу билан гап тамом бўлди. Favvos Муҳаммад билан Зулфиқор Шоший, Ҳиротда, Меъморнинг «ертўла синови»дан ўтган эдилар-у, аммо етим ва юпун Завракни бу синовдан ўтказишга раҳм қилиб, Меъмор ўз хонадонида олиб қолган эди. Заврак ҳаммадан кейин бўлса ҳам, Меъмор синовидан жуда ҳам аъло даражада ўтди.

Эрта билан сахарлаб карвонсаройда от-араваларни шай қилиб, катта карвонга қўшилган Ҳорунбек ёнига кузатгани келган Меъмор, уста Нусрат, Зулфиқор ва Заврак Ҳорунбек билан ҳам, Фаввос Муҳаммад билан ҳам кучоқлашиб хайрлашиди.

— Сизларга оқ йўл, омон-эсон боринглар. Борганингиздан кейин нома йўллаш ёдингиздан чиқмасин. Мұхтарам Қавом ҳазратларига мендан салом айтинглар. Эслаб сўраганларга ҳам салом айтинглар. Ихтиёриддин қалъаси томонга ўтсангизлар, Низомиддин арвоҳини хурсанд қилиб, дуо ўқиб қўйинглар... — деди Меъмор кўзига ёш олиб. Катта карвон дарвозадан чиқишида, Меъмор яна Ҳорунбек билан Фаввосга муруожаат этди:

— Келган йўлмиздан борасизларми?

— Албатта, устод.

— Сардобани бир кўра кетинглар. Мендан Чўли бобога салом денглар!

— Албатта у ерда тўхтаймиз, саломингизни Чўли бобога етказамиз, — деди Ҳорунбек.

Карвон жўнаб кетди. Улар ғамгин бир ҳолда ўз уйларига қайтиб келишди.

Кунлар бир хилда ўта бошлади. Дарҳақиқат, Меъмор хонанишин бўлиб, тоат-ибодатда кун ўтказарди. Баъзан жума кунлари маҳалла кексаларига қўшилиб, Намозгоҳ масжидига борар, маҳаллада жаноза ва таъзиядан четда қолмас, бирон маслаҳат сўраб келган усталарга нимаики билса шуни айтиб, ёрдам берар, аммо катта мансабдорлар тўйларига, дабдабадор зиёфатларга бормасди. Узини касалликка солиб, узр айтиб, уйда ётарди. «Дикқинафас бўлиб ётгунча, борсангиз кўнглингиз ёзиларди, — дерди баъзан Маъсумга бека, — сиз бормасангиз, уларнинг зиёфату анжуман мажлиси ўтмай қолармиди!»

— Бормайман! Мени навкар юбориб, зўрлаб олиб кетолмайдилар! Кўнглимга ёқмаган жойда нима қиласман! Мен у мансабдор ҳокимлардан жирканаман! Улар еб-ичиб, семириб, кекириб, бир қуртдек ўлиб кетадилар... Улардан фуқарога фойда йўк, улардан из колмайди, улардан...

— Ҳа, тушунарли! — деди Маъсумга бека, — «улардан, улардан!» Сиз шунаقا деб ўлиб кетасиз,

улар кўп, улар яшайверади. Улар илгари ҳам кўп бўлган, бундан кейин ҳам кўп бўлади. Улар сизнинг жигибийрон бўлишингизга парво қилмайди. Лекин сиз ҳам биладиганлардан хафа бўлинг-да, уларнинг нима-сидан хафа бўласиз! Улар шунақа одамлар. Замон ўшаларники!

— Ўшаларга бош эг, демоқчимисан? Эгмайман! Шундок ўлиб кетаман, локин уларга бош эгмайман! Улар менинг хизматларимни билишмади! Улар ўғлимни ўлдириши! Улар мени қувғин қилиши! Улар... Мана, Меъморнинг аҳволи қандай! Биз жой соламиз, улар тўрга чиқиб ўтирадилар! Биз буғдој экиб, нон қиламиз, улар ейдилар. Биз меҳнат қиламиз, иззату обрўни улар оладилар! Аблаҳлар!..

— Шуни билар экансиз, четда қолмай ўшаларга қўшилинг!

— Вой, нодон! Ҳали, мен келиб-келиб сенга гапиряпманми! Ке, бу гапларни кўй, носқовоқ қаерда, нос чекайлик!

Кунлар шундай бир хил ва бир меъёрда ўта бошлиди. Ора-чора Бадиа келиб, ота-онасидан хабар олиб турарди. Заврак бўлса болохонада яшар, уста Нусрат кўли остида Зулфиқор билан бирга катта бир бой солдираётган ҳовлида ишлаб, Меъмор билан Маъсума бекани бокарди. Чолу кампирни хижолат қилмаслик учун баъзан ўзи бозорга борар, баъзан чолга пулни Бадиа орқали илтимос қилиб берарди.

Бир йилдан кейин Бадиа ўғил туғди. Икки хона-дон фоятда хурсанд бўлишди. Уста Нусрат чақалоққа катта буваси ҳурмати учун Меъмор деб ном қўйди. Катта бобоси унинг қулогига «азон» айтиб, танглайини кўтарди.

Меъморнинг ғарибу ҳақирликда ўтаётган осуда кунларидан бирида Самарқандга — уруғлариникига бориб келган кулол Абутолиб «Даҳаи носарон»нинг каттадан кичигигача подшохнинг амри билан қатли ом қилинганини айтди. Бир неча кундан кейин яна эски «Қобус» дарди қўзғаб, тўшакда ётган Меъмор ёстиқдан бошини кўтариб, кулолга бақрайиб қаради:

— Не сабабдан?

— Файри динлар Самарқанд аҳли ичида ёмон одат-

лар тарқатиб, куфр ишлар қилган эмиш... Шу сабабли қатли омга фармон берилиби.

Меъмор оғзини очиб, бақрайиб қараб қолди...

XXXVIII б о б

МЕЪМОР ВА МУНАЖЖИМ

Бухорода тантанавор кутиб олинган Мовароуннаҳр подшоҳи Улуғбек Мирзо, мана, учинчи кундирки, шаҳар марказидаги қадимий Аркда, унинг шарафига берилаётган базмда ўтирибди. Ўнг томонда Бухоро хокими Шоҳ Малик тархон билан шайх Ҳожи Муҳаммад Порсо, чап томонида ўзи билан Самарқанддан ҳамроҳ бўлиб келган саркарда Амир Довуд барлос ва бошқа олий мансабдор шахслар. Мирзо Самарқанд таҳтига ўтирганидан кейин, Мовароуннаҳрнинг иккинчи улуғ шахри — Бухорога биринчи бор келиши эди. У саркарда Амир Довуд барлоснинг минг чоғлиқ навкарлари ҳимоясида Каттакўргон, Янгиработ, Кармана, Тошработ, Бўстон, Фиждувон, Вобкент... орқали келди. Шоҳ Малик тархон билан Ҳожи Муҳаммад Порсо бошчилигида Бухоро аъёнлари подшоҳни Фиждувонда кутиб олишди. Одамларнинг айтишича, Мирзонинг бобоси Амир Темур ҳам Бухорода бунчалик тантанавор кутиб олинмаган экан. Темурхоннинг юриши Бухоро, Қоракўл ва Фороб орқали ўтиб, Бухорода атиги икки кун бўлиб, шитоб билан Кум йўлига чиқиб кетган экан. Мирзо Улуғбек масжиди Калонда жума намозини ўқиб, кейин мўътабар ерларни зиёрат қилди; Чашмаи Айюб, масжиди Намозгоҳ, Сайфиддин Боҳарзий, Буёнқулихон мақбараларига бориб фотиха ўқиди...

Подшоҳнинг Бухорога келиши муносабати билан кўчалар тозаланди, қоровулу ясовуллар тинмай йўлларга сув сепишарди. Бозорлар гавжум; ҳамма ёқда моллар — матолар уюб ташланган. Фуқаро ясаниб олган, хонадонларда хурсандчилик. Одамлар подшони дуо қилишар, гўлаху гиёвандлар бозорга чикмас, ғайри динлар масжиди Калон ва Арк атрофида, тоқилар тагида юрмас эди. Ҳар қандай жанжал ва тартибсиз-

ликлар қаттиқ жазоланиши айтилиб, ҳоким ҳазратларининг фармони растаю мадрасаларда, бозору тоқи телпакфуруушон, тоқи заргарон, саррофон ва тимлар ичидаги жарчилар баланд овозда эълон килган эдилар. Бозори Шаб ҳам обод ва туну кун миршабу ясовуллар ҳамма ёқни тартибга солиб турарди. Баъзи кунлари Тархон подшоҳни шаҳар четидаги Боги насимга олиб чиқар, истироҳат, базм авж олар эди.

Шу тантанавор кунларнинг бирида, кутилмаганда шаҳарнинг ичкари маҳаллаларидан бири — Намозгоҳдаги кўримсизгина эшик олдида Шоҳ Маликнинг ясанган мансабдорлари пайдо бўлди. Тор ва айланма кўчада ўйнаб юрган майдага болалар отлиқларни кўриб, гурра уй-уйларига қочиб кетишиди. Эшикка чиқиб ўтирган кексалар ҳам кўчада пайдо бўлиб қолган сипоҳ амалдорларини кўриб, ҳайратомуз ўринларидан туриб, отлиқларга таъзим қилишди. Отлиқ амалдорлар сунъий илжайиб, камчинлари дастаси билан эшикни оҳиста тақирлатди. Ичкаридан хотин кишининг овози чиққач, ёш мансабдорлар овоз чиқаришиди.

— Биз, меъмор Нажмиддин Бухорий жанобларига келдик. Ишимиз бор, чақиринг!

— Нима юмушингиз бор? У киши бетоб.

— Эна, қўрқманг. Бизлар яхшилик билан келганимиз.

— Кўрқавериб зерикиб, қўрқмайдиган бўлиб кетганимиз. Эшик очиқ, ана, кириб, у кишининг ўзлари билан гаплашаверинглар!

Бир йигит отларни ушлаб, икки амалдор ичкарига кирди.

— Ассалому алайкум!

— Ваалайкум ассалом! — деди супачада қўрпатўшак қилиб ётган Меъмор.

— Сизни олиб кетгани келдик.

— Лаббай? — Меъмор чўчиш ўрнига кулди, — мен ҳам сизлар қачон олиб кетаркансизлар, деб кутуб ётган эдим.

— Ана, дилимиз бир экан. Қани, жаноб, кетдик!

— Зиндонгами?

— Аркка! — деди мансабдор таажжубланиб, — биз сизни базмга, ҳоким ҳазратлари хузурига олиб борамиз.

— Базмга бормайман! Зиндонга бўлса бораман!
Чунки мажбурман.

— И-би, бу жаноб девонами?

— Ҳушим жойида, навкарлар, мен факат «қобус»
дардига мубтало бўлганман. Гапимга кирмай зўрла-
санглар...

— Гапимга тушунинг, усто! Яхши ният билан кел-
дик, — деди ўрта яшар, қирғий бурунлик иккинчи
mansabдор. — Эҳтимол, сиз жаноб билан подшоҳ
гаплашар. Бир зарур гапи бордир... Биз қаёқдан би-
лайлик.

— Боринглар, кетаверинглар. Мени сўрашса, кел-
мади, деб айтинглар!

Амалдорлар бир-бирларига қараб кулишди.

— Эй, усто, сизни бахту саодат кутадир. Тулинг
ўрнингиздан, усто!

Шу пайт ховлига Зулфиқор кириб келди. У ҳам
ясанган, шай мансабдорларни кўриб ҳайрон бўлиб
колди.

— Зиндонга бўлса бораман, аммо базмга бормай-
ман, деяпман буларга, — деди кулимсираб Меъмор
Зулфиқорга.

— Нима гап ёзи? — Зулфиқор юмшоқлик билан
сўради. У шаҳарда бўлаётган подшо тантаналари ва
умуман, зиёфату базмлардан хабари бор эди.

— Сиз ўғилларимисиз?

— Ха, ўғиллариман.

— Айтинг, биз билан борсинлар, — деди қирғий
бурун, — ахир бизни Тархон ҳазратлари юбордилар.
Отангиз ўз фойдаларини билмаётирлар.

— Борадилар. Локин бир яхши арава олиб келиш
керак. Иккиласми, сизлар эмас, кексароқ кишилар
келсин, — деди Зулфиқор Меъморнинг кексаларни
яхши кўришини ва унинг тажанг бўлиб турганини
пайқаб, — мен ҳам отам билан бирга бораман.

— Жуда маъқул.

— Бориб, арава олиб келинглар.

Ёш мансабдорлар зудлик билан чиқиб кетишиди.

Аслида гап мана бундек бўлган эди; бир йил муқад-
дам «Мирзо Бойсунқур мадрасаси», кўпригу сардоба-
лар мезмори Нажмиддин Бухорийнинг Хуросондан
чиқиб кетиб, Бухорода тургани Мирзо Улуғбек қуло-

ғига етди. Меъморга катта ҳурмат кўрсатиб, ўз номидан мактуб йўллаб, уни Самарқандга чакирди. Аммо меъмор ўзининг хастаю қариб қолганини, қолган умрини хилватда ўтказажагини айтиб, жавоб нома юборди. Номани олиб кетаётган Тархон амалдорларига подшо уни ҳурмат қилиб, нома ёзгани учун дуо қилиб, миннатдорчилигини изҳор қилди. Подшо Аркда, зиёфатда ўтириб негадир хаётида хеч учрамаган, терс жавоб ёзган бухоролик Меъморни иттифоқо эслаб қолди. У шу лаҳза бу гапни Тархонга айтиб, у билан бақамти ўтириб гаплашгиси келди. Чунки Нажмиддин Бухорий ҳақида унга Али Қушчи ҳам, Машҳадий ҳам, Самарқандий ҳам бир неча бор гапирган эдилар. Бу гап ситам чеккан ўжар чол билан гаплашиш, ҳозир бу катта базмлару ва бошқа ишлардан кўра ҳам муҳимроқ кўринди. Иккиласми, кеча Мирзо Бухородаги аҳли фузало — мунажжиму аҳли шуарони чорлаб, мулокотда бўлганида уста Исмоил ибн Тоҳир Исфаҳоний иштирок этди-ю аммо «Хуросондан ихрож қилинган» Меъмор кўринмади. Бу ҳол Меъмор Нажмиддин Бухорийни чакиришига даъват этган эди.

Кечга яқин Меъмор бир мударрис ва яна бир мансабдор ҳамроҳлигида шогирди Зулфиқор билан бирга кўхна Арк дарвозасидан обхоналар ёнидан ўтиб, юқорига кўтарилиди. Катта ҳовлидан ўтиб, кенг хоналардан бирида ўтирган Мирзога рўпара бўлиб, унга таъзим этди. Унга мулозимлар кўрсатган, подшохга яқин қўйилган курсилардан бирига ўтириди. Мударрис билан мансабдор ичкарига кирмади. Зулфиқор устод билан бирга кириб, пойгакда тик турди. Мирзо Улубек ёнида Тархон ва яна бир меъмор ўтиради. Зулфиқорнинг тахминича, бу зот — Исмоил ибн Тоҳир Исфаҳоний бўлиши эҳтимол. Мирзо салом-алик қилиб ҳол-аҳвол сўрашгандан сўнг, Меъморни дастурхонга, нозу неъматларга таклиф этди. Шу билан бирга Меъморга савол берди.

— Самарқандга чорлаб, сиз жанобга нома йўлланган эдик...

— Ташаккур! — деди Меъмор ўрнидан туриб, — мен қімматли номангизни олдим!

— Жавобингиз бизни таажҷубга солди. Биз, аҳли фузало бу жавобдан ўйланиб қолдик.

— Ахли фузало ўйланиб қолган бўлса ҳам, харқа-
лай мен номага жавоб қилдим-ку, аъло ҳазратлари.

— Бу сўзни қандоқ тушунмоқ мумкин? — Мирзо Улуғбек таажжубланиб кулди. У негадир кекса Меъ-
морни сўроқ қилаётганидан хижолат бўлиб, бу савол-
ларни юмшатишга, аслида у билан бир нимани гапла-
шиб олмоқчи, иложи бўлса чолни Самарқандга олиб
кетмоқчи эканини билдиримоқчи бўларди. Меъмор чол-
нинг қўрс ва тўнг жавоблари Шоҳ Малик тархонни,
андак ғазабга солиб, ора-чора унга хўмрайиб қараб
кўяди. Мирзо Меъморга навозиш кўрсатгандай, унинг
Ҳиротда қилган ишларига юксак баҳо бериб, у билан
гаплашмоқчи ва эртага Самарқандга жўнаётгани са-
бабли уни чорлатиб олиб келганини айтди. Бу сух-
бат — мунахжим билан меъмор сухбати ҳисоблан-
син, деди у яна таъкидлаб. — Аниқроқ айтинг, хур-
матли Меъмор, сўзингизга тушунмадим?

— Ҳиротдалигимда сиз ҳазрати олийларига нома
йўллаган эдим, — деди Меъмор жиддий бир тусда.—
Паноҳ тортиб, факат сизга йўллаган эдим. Ўғлимни
катл этилишдан олиб қолишини сўраган эдим. Жавоб
бўлмади. Ўғлим катл этилди...

— Мен ҳеч қандай нома олганим йўқ, — деди
Мирзо Улуғбекнинг юзларидаги табассум бир лаҳза-
да учиб.

— Менга саройдаги мансабдорлар номани, албат-
та, Самарқандга, Мирзо ҳазратларига етказамиз, деб
ваъда беришган эди. Таажжуб! — деди Меъмор Мир-
зо Улуғбекка тикилиб. — Локин менинг ўғлим Низо-
миддин, сиз, аъло ҳазратлари Фарғонага юриш қилга-
нингизда салтанатимиз учун жанг қилиб, ярадор
бўлган. У, Амир Довуд барлос сарбозлари ичida
Ҳиротдан то Хўқандгача борди. Жангда баҳодирлик
кўрсатгани учун сиз ҳазратнинг инъомингизга сазо-
вор бўлган. Ўғлимнинг қиличи ҳамон уйимда сақла-
нади. Гумону шубҳалар уни ўлимга маҳкум этди, ас-
лида у Хурросону Мовароуннаҳрнинг яхши фарзандла-
ридан эди. Менга ҳар қандай жазо берганингизда ҳам
бари бир мен бу аччиқ ҳақиқатни сиз аъло ҳазратга
айтмай иложим йўқ.

— Ҳақиқат айтилгани учун жазо берилмайди.

Мирзо Улуғбек чукур сукутга толди. Меъморнинг

кўрс сўзлари остида катта норозилик борлигини, мансабдорлардан ёмонлик кўрганини пайқади. Атрофда ўтирганлар унинг нима дейишини кутишарди. Тархон хўмрайиб ўтиради. Мирзонинг ёдига «сүнқасд» воқеаси келди. Бир-икки айбдор шахсни жазолаш ўрнига ўнларча киши қатл этилиб, фуқарога пўписа қилинганини ҳам биларди. Унинг кўз олдидан «қаттиқўл» укаси Иброҳим Султон ҳам ўтди. Лекин Мирзо сукутга чўмиб, Меъморга тикилганча қараб қолди. Ёлриз фарзандининг қатли — бундан ҳам ортиқ ситам борми!

Мирзо Улуғбек ҳеч нарса демади.

— Сиз аъло ҳазратлари, — деди яна Меъмор, — ўша қимматли номангида уста Жўржийни ҳам, Абутолиб ва уста Ҳасанбек, Ҳусайнбекларни ҳам ўзингиз билан бирга Самарқандга олиб келинг, деган эдингиз?

— Ёдимда! — деди Мирзо Улуғбек.

— Жўржий бағоят моҳир усто эди. У Самарканда «Даҳаи носарон»¹ қатли омида ўлдириб юборилган... Махалла тамоман қатли ом қилинган.

— «Даҳаи носарон»да ёмон кишилар салтанатга қарши иғвою бўхтон гаплар тарқатган. Зино ишлар билан машғул бўлиб, Самарқанд аҳлини бузишган ва ҳаром ишларга ружу кучайиб кетган. Шу сабабли биз пойтахтни улардан тозаладик...

Мирзо Улуғбек хаёлидан унга етказилган маълумотлар ўтди.

— Баъзи маълумотларга қараганда, «Даҳаи носарон» қирғинига уйдирма «Лў ва Ли қиссаси» ҳам сабаб бўлган эмиш. Саройга етиб келган маълумотларга қараганда: «Файри динлар ҳар ҳафта базм тузиб, эркак билан хотин қучоклашиб, ўйинга тушар эканлар ва ҳар йили бир маротаба наврўз ойида «муҳаббат куни» бўлиб, оиласи бошқа бўлишидан мустасно ҳушига ёқкан эркак билан хотин қўшилишиб кетаверар экан...» Булардан ташқари, Лў деб аталмиш кимса ўз синглиси Ли билан эру хотин бўлгани тўғрисидаги «маълумот» сарой аҳлини оёққа турғазди. Бу гап Мирzonинг

¹ Даҳаи носарон — Самарқанддаги христиан динидаги кишилар махалласи. (XV аср)

кулогига ҳам етди. Бу гап уйдирма, асло бундок бўлиши мумкин эмас, деди Мирзо. Аммо сарой аъёнлари бу гапни «исботловчи» «пухта далиллар» кўрсатдилар. Шундан сўнг, Мирзо «Даҳай носарон» ахлини разолатга юзтубан кетган, деб ҳисоблади. Унинг кўзига уста Жўржий ҳам кўринмади. Жаҳоннинг энг улуғ шахри бўлмиш Самарқанд бағрида шундок «жирканч ходисалар бўлиб тургани» Мирзони газаблантириди. У катли ом фармонига муҳр босди...

Меъмор ерга қаради.

Яна сукут.

Бир лаҳзадан кейин Шоҳ Малик тархон билан хожи Мухаммад Порсо: «Бу малъунни чиқариб юборайми?» дегандек Мирзо Улугбекка қаради. Дарғазаб бўлиб: «Тили ачик бу ўжар чолни чиқариб юборинглар!» дейди хаёл қилиб турган тархон бошқача бир холни кўрди: Мирзо Улугбек бош чайқади.

Ҳиротда, «Мадрасай Мирзо Бойсунқур» қурилишида жонбозлик кўрсатиб, астойдил ишлаган гуржистонлик усто Жўржий Меъмор кетганидан сўнг туролмай маъмуриятга бир неча бор мурожаат этиб, охири рухсат этилгач, хотини билан ўғлини олиб, Самарқандга, бунда яшаб турган ватандошлари: гуржилар ёнига — «Даҳай носарон» маҳалласига кўчиб келгани сиз, азиз ўқувчиларга маълум. Бунга сабаб: ўзга юртда бўлса ҳам ўз юртдошлари орасида бўлиш нияти ва бунинг устига золим Иброҳим Султон қўлидан чиқиб, олим — Мирзо Улугбек кўл остига ўтиш эди. Қанчалаб устаю шоиру муҳандисларнинг Самарқандга жўнаб кетиши умумий тус олгани ҳам сабаб бўлди. Бу кўчиб кетишилклар Ҳурсон мансабдорларига унча ёқмасада, йўлдаги қанчалар тўғонғу қийинчиликларга қарамай, ўлиб-тирилиб Самарқанд сари — шамъ нурига интилган парвонадай учиб кетиша берди. Бу оқим, асосан, Ҳиротда ҳаммага маълум бўлган «меъмор Нажмиддин Бухорий воқеаси»дан кейин умум тус олди. Ахли фузалонинг Мирзо орқасидан шувиллаб Мовароуннаҳрга оқиб кетиши, фақат Ҳирот мансабдорларинигина эмас, Шоҳруҳ Мирзони ҳам ўйлатиб қўйди. Бу ишда Самарқанд хокими — ўз ўғли Мухаммад Тарагайнинг «қўли бормикан...» деган шубҳа ҳам пайдо бўлиб, Самарқанддаги, ўғли атрофидаги ўз кишила-

ри — олий мансабдорларидан вақт вақти билан Хиротга чақириб, суриштириб ҳам турди. Бу ишга жуда зийраклик билан қараб бормоқлик лозимлигини таъкидлаб, одам қўйган Шоҳруҳ назарида, «салтанатга нисбатан садоқати айнигандан мансабдор шахсларни йўқ қилиб юбормоқ унча мушкул иш эмас эдию, аммо айнигандан ахли шуарони йўқотиб юбормоқ фоятда мушкул ва бу иш авом орасида катта гап-сўзларга сабаб бўлиб, фуқаронинг салтанатга нисбатан комил ишончини барбод этарди, мисқоллаб йигилган обрў ботмонлаб тўкиларди. Шу сабабли Меъморнинг Хуросондан бадарға этилиши кейинчалик хато иш бўлиб чиққанини уни шу ернинг ўзида, вақт ўтказиб туриб, бирор сабаб билан йўқотиб юбормоқ мақсадга мувофик... эканини фаҳмлашди. Аммо иш кечиккан, тилни тишлишдан бошқа илож қолмаган эди. Бу иш Иброҳим Султоннинг шошқалоқлик билан чиқарган хато хукмининг оқибати, деб тушунди Шоҳруҳ.

Сукут ичида турган Мирзо Улуғбек яна бир фавқулодда куч билан юзларидан учиб кетган табассумини кайтариб олди. У Меъморга қаради:

— «Даҳаи носарон» фожиаси иккинчи бор эслатилди. Менинг энг яқин дўстим Али Қушчи ҳам сизга ўхшаб юзимга очиқ айтган эди. Худо ўзи кечирсин. Биз сиз билан бир мунажжиму меъмор сифатида гаплашаётимиз. Ўғлингизни қатл этилишига таасусуф изхор қиласман, тақдирни азал шундок ёзиғлик экан. Тангридан сиз Меъмор ҳазратларига сабри чидам тилаймиз...

— ...
— Бу зот — Исмоил ибн Тоҳир Исфаҳоний жаноблари. Сиз Меъмор ҳазратлари, илтимосимизни қабул қилгайсиз, деб умид қиласмиз. Сизнинг раҳнамолигингизда Исфаҳоний жаноблари хизмат қилишга илгариёқ розилик берган эдилар. Сизнинг розилигинингизни ва лойиҳаларингизни мен энди Самарқандда кўурман, деган умиддаман. Исфаҳоний жаноблари, эҳтимол, Самарқандга, бизнинг хузуримизга қелиб кетарлар...

Гап шу ерга етганда, ҳурматли китобхон, диққатингизни бир лаҳза тарихий саналарга тортаман.

Вақтики, милодий ҳисоби билан тўққиз юз тўқсон бешинчи йилга келиб Мовароуннаҳр ва Хурсоңда муҳим сиёсий воқеалар юз берди: қорахонийларнинг сиртдан берган зарбалари сомонийлар давлатини кучли ларзага солди ва оқибатда уни инқирозга олиб келди. Бу даврда Хоразмда Кот шаҳри, Мовароуннаҳрда — Бухоро энг йирик шаҳарлардан бири бўлиб, дунёга Абу Райхон Беруний, Абу Али ибн Сино ва Наршакийларни берган эди. Ундан анча аввал, ҳалқ тилидаги ривоятларга қараганда, Кўхиндузни қурган Сиёвуш ва унинг қайнатаси Афросиёб замонида, бу заминда мажусийларнинг муқаддас китоби — «Авесто» яратилди. Самарқанд, Кеш, Нақшаб, Гурганч ва Кот, Фазнаю Исфаҳонлар ой атрофидаги юлдузлардек Бухоро теварагида ярқираб турарди... Милодий ҳисоби билан 1220 йилга келиб, Бухорони мўғуллар бошиб олди. Бухоролик сарбозлар Арк дарвозаларини бекитиб, ўн икки кун душман билан курашдилар. Чингизхон обдан шаҳарни талагач, тилла ва кумуш, қимматбаҳо буюмларни тортиб олиб, Бухорода ўзининг нўёни ва бир қисм қўшинини қолдириб йўлга чиқди. Ўзини Искандари Зулқарнайн деб атаган Мухаммад Хоразмшоҳнинг қочиб кетгани, шайху руҳонийларнинг Бухоронинг ўн икки дарвозаси калитини топширганликлари Чингизхонни андак хавфдан тушириб, нигоҳини Самарқандга йўналтирган эди. Аммо Бухорода қолган нўён Чингизхондан кейин шаҳарни талаш у ёқда турсин, хотин-қизларни тортиб олиб, зўрлаш, тажовузкорликлар авжга миндириб юборилгач, оломон мўғул нўёнини ўлдирди. Бу хабарни эшитган Чингизхон яна Бухорога қайтиб келиб, тўппа-тўғри оти билан Жоме масжиди ичига кириб, меҳробда ўтирган имоми олий ёнига келиб, унинг соқолидан чанглалаб тортди: «Сенлар нега менинг одамимни ўлдирдиларинг?!» Имом эса, Чингизхон башарасига тупуриб: «Биз шаҳар вайронга бўлмасин, деб калитни топшириб таслим бўлдик. Аммо сен ва сенинг ноибинг бизни талаб, аёллари мизни зўрлади!» деди. Шу лаҳза Чингизхон буйруғи билан имомнинг боши кесилган ва шу Жоме масжид

мехроб гумбази остида ўтирган юздан ортиқ кекса бухороликларнинг ҳам боши кесилиб қудукқа ташланди... Шу куни мӯғул қўшини шаҳарга ўт қўйиб, биноларни вайрон қилди. Аммо қанчалик найзаю ойболта урганлари билан Минораи Калонни қулата олмаганлар...

Кейинчалик чингизийлар авлодлари орасида тахт талашув, низо кучайиб, салтанат тарқоқ давлатларга ажралиб кета бошлади. Гуюхон даврида амакиваччалар жанги авж олди. Мӯгулларнинг Эрондаги хукмдори Хулокухон катта қўшин билан Мовароуннахрга ҳужум қилиб Кеш ва Нақшони, ундан сўнг Бухорога бостириб кириб, талон-тарож этди, мадрасаларни бузиб, кутубхоналарга ўт қўйди. Кўп қон тўкилди. У чиқиб кетгач, бошқа мӯғул хукмдори — Ангухоннинг ўғиллари — Чолай ва Каранлар ўн минг кишилик қўшин билан Бухорога кириб, уч йил мобайнида ниҳоятда оғир ёвузиликлар қилди. Ҳамма ёқ шипшийдам бўлди. Шундан сўнг етти йил мобайнида бу шаҳарда ҳаёт буткул тўхтаб қолди, деб ёзган эди тарихчи Рашидиддин. Кебакхон, ундан сўнг Козонхон ўлдирилиб, икки дарё оралиғи Қозоғонхон қўлига ўтга, мӯғул хони Туғлиқ Темур томонидан Қозоғонхон ҳам ўлдирилиб, шу билан юз эллик йилга чўзилган мӯғул хукмдорлиги тугади.

Мӯгуллар хукмдорлиги даври Бухоро тарихида фоятда аянч ва вайронагарчилик, талон-торож, мислсиз таназзул даври бўлгандирки, бу даврда на бир бино курилди ва бир ариқ очилди. Бу давр Бухоронинг шўри бўлган. Аммо фалакка бўй чўзиб турган бобо минора — Минораи Калон Бухоронинг ёнган, вайрони бўлган, қонга беланганд кунларини ҳам ўз кўзи билан кўриб, наслларга ҳикоя қилмоқчидай қад кўтариб турибди...

Зулму вайроналиклар, талон-торожлар тинкасини қуритган бухороликлар, Мирзо Улуғбекнинг биринчи бўлиб Бухорода мадраса қурмоқчи эканини эшишиб, фоятда қувонди ва фуқаро орасида баланд рух ҳамда ватанпарварлик ҳислари авж олиб, одамлар у ишга бош қўша бошладилар. Мирзо Улуғбекнинг бу режаси мӯғул вайроналиклиридан кейинги биринчи ва қалдирғоч бино бўлмоғи керак эди...

Гап шу ерга етганда, хурматли китобхон, қисқагина бу кириш сўздан кейин яна асосий воқеага ўтамиз:

Вақти-ки, Меъмор мухташам Аркдан — Мирзо Улувбек хузуридан чикқач, дарвозадан анча пастда уни кутиб турган Заврак Нишопурий югуриб, унинг истиқболига келди. Чолнинг бир қадар кайфи чоғ, чехраси очиқ эди. Меъмор ёнидаги Зулфикарнинг ҳам чиройи очиқ, шод кўринарди.

XXXIX б о б

ТИРИЛИШ

Дунё ташвишларидан холи — ўзи туғилиб ўсган ҳовлининг ярим қоронги хоналаридан бирида Меъмор кун бўйи ёнбошлаб ётар, чўкиб кавш қайтараётган нор түялардек кўрган-кечиргандарини қайта бошдан эслаб, яхши-ёмон одамларни кўз олдидан ўтказар эди. Пар тўшагу пар ёстиқка ботиб, эрталабдан кечгача ўйлар эди. Баъзида Маъсума бека: «Хой, уста, бир мундоқ кўчаларга чиқиб келсангиз-чи», дерди. Меъмор энсаси қотиб: «Ҳа, кўчада маймун ўйнатаётидими?! Ўтиrolмаётган бўлсанг ўзинг чиқиб келгин, хурсанд бўласан!» дерди. Бу гапи билан у ўзига ўзи тасалли бермоқчи бўларди: «Қизимни чиқардим, шогирдларимни тинчтдим, масжиду мадраса, кўпригу минора, ҳаммому сардоба куриб бердим. Энди менда ҳеч кимнинг ҳаққи қолгани йўқ. Яхшини ҳам, ёмонни ҳам кўрдим, энди ётаманми, тураманми, бирорвнинг иши бўлмайди...» У баъзан кампирига ҳам дағ-даға қилиб қоларди: «Ҳа, топиб-тутиб турганимда керак эдим, энди «пуф сассиқ» бўлдимми! Замбилга солиб, гўристонга олиб бориб ташлаб кела қолинглар! Мен энди сенларга керак бўлмай қолдим!» дерди. Маъсума бека дарҳол паст келарди: «Э, отаси, ундоқ деманг, яхши ҳам сиз борсизки, мен бу дунёда юрибман. Сиз бўлмасангиз, мен кимга керак бўлардим! Сиз уйда ўтириб ўзингизни ўзингиз билмаяпсиз, бутун Бухоро сизни дейди. Самарқанду Тошкенту Шахрисабзларда сизни танимаган одам йўқ. Меъмор Нажмиддин, деса одамлар соянгизга кўрпача ёзади».

Чол индамай қолар, бу гаплар унинг асабини юмшатиб, чиройи очилиб, хотинига:

— Бир кўчага чиқиб келайми? Нима дейсан? Қайтишда нос олиб келарман, — дерди.

— Чиқиб келинг, уни-буни кўриб ёзиласиз. Сиз келгунингизча мен кўрпачаларингизни қоқиб, супуриб қўяман.

Меъмор сарпойчан, кавушини кийиб, кўчага чиқиб кетарди.

Баъзи кунлари пар ёстигу пар тўшак ҳам биқин-биқинига харсангтошдек ботиб, ух, деб ўрнидан турар, нима қилишини билмай, керишар, ҳовлида обиғишиллар орасидан тешиб чиқиб, ўрмалаб юрган чумолиларга тикилар, соатларча уларни томоша қилиб ўтиради. Хотинига қараб: «Энди оёғимни уқалаб, ўтириб чумолини томоша қилишдан бошқа ишимиз қолмади. Шундок бўлгандан кейин худойи таоло ҳам омонатини вақтида олиб, ташвишлардан холи қилиб қўя қолса, нима қиларди!» дерди. «Ношукур бўлманг, уста! Қачон олишини эгамнинг ўзи билади», дерди кўзини ола-кула қилиб Маъсума бека.

Шундок кунларнинг бирида шогирди билан совсалом кўтариб, Исмоил ибн Тоҳир Йисфаҳоний кириб келди. У эллик беш ёшларга борган, қора соқол, новча киши бўлиб, ўзининг ўта хушфеъллиги, ширинсуҳанлиги билан таникли эди.

— Ассалому алайкум, Меъмор ҳазратлари! — деди у эшикдан кириб келиб, гўё кўп йиллик қадрдон кишилардек ўзини жуда яқин тутиб. Ваҳолонки, Меъмор уни иккинчи бор кўриши эди. — Тобингиз қалай? Гузарларга кам чиқасиз? Бухоро иқлимига ўрганолмаяпсизми?

— Иқлимда гап йўқ, бир оз бетобман, — деди Меъмор бошини кўтариб. Маъсума бека дастурхон ёзди. Йисфаҳонийнинг шогирди — ёшгина муллавачча ошхонадан чой олиб чиқиб, пиёлага қуйиб устодларга узатди. Меъмор ортиқча гап, эзмаликларни ёқтирамаслигини эшитган Йисфаҳоний жаноблари гапни чўзиб ўтирамай, мақсадга ўта қолди:

— Мен сиз ҳазратнинг шогирдлигингизга яраб, ўз шахримизда подшоҳ ҳазратларининг илтимосларини ерда қолдирмай, мадраса бино этсак, деган ниятда

келдим. Ўзингизга маълумки, мӯгул вайроналикларидан кейин Бухорода бирон катта бино, бирон мадраса қурилгани йўқ. Ўша куни сизнинг келишингизни эшитиб, мен ҳаммадан аввал Аркка етиб келган эдим. Буни қарангки, Тархон жаноблари эмас, олий ҳазратнинг ўзлари дарҳол мени чақиртирилар. Сизнинг Ҳиротдан оғир бир вазиятда келганингизни Мирзо ҳазратларининг ўзлари бизга маълум қилиб, Тархону ҳожи Муҳаммад Порсо ҳазратларига: «Меъмор Нажмиддин Бухорийни парвариш қилинглар, зора вақти соати билан юрагидаги гинаю андух бартараф бўлса... Самарқанд ва Бухорода шу меъморлар файрати ила катта ишлар бошлаймиз», дедилар. Сиз, Меъмор ҳазратлари бу гаплардан ўша куни огоҳ бўлмаган эдингиз...

Меъмор Исфаҳонийнинг ҳаяжон билан гапираётган гапларига қулоқ солиб ўтиради. Бир оздан сўнг, тўсатдан гап бошлади.

— Мен ҳокимларнинг сўзига ишонмайман! — Исфаҳоний бақрайиб қолди. — Алдашади! Менга айтинг-чи, хурматли Исфаҳоний жаноблари, сиз ўзингиз асли қаердансиз?

— Мен — Бухороданман. Бухорода туғилганман. Отам Тохир ҳожи ҳам бухоролик. Бобомиз Исфаҳон шахридан экан...

— Тушундим, — деди Меъмор Исфаҳонийга ўткир қараб. — Биргаликда мадраса қуришни ўйляяпсиз. Олий ҳазрат ҳам ўша куни шу гапни айтдилар. Менинг қартайиб қолганимдан, янги бир лойиха тузишга ожизлигимдан хабарингиз борми! Мени ўзингизга шерик қилсангиз, ютиказисиз, азизим! Бу ишни ўзингиз мустақил бошлайверинг. Мен подшоҳлар учун битта ҳам фишт қўймасликка қасам ичганман. Мана, бор гап шу!

— Биз, ҳокимлар учун эмас, Меъмор ҳазратлари, бухороликлар учун фишт қўямиз.

— Сиз қандай қилиб бу сўзни айтдингиз! Ахир бу сўз учун бош кетадиу?!

— Мен ҳамма вақт, хурматли Меъмор, фуқаро учун фишт қўйиб келганман. Ҳокимлар бир сабаб, холос. Иккиласмчи, олий ҳазрат ҳам ҳоким, ҳам мунахжим, у зот бундек ҳақ гаплар учун аҳли фузало-

нинг бошини олмайдилар, аксинча, онҳазрат аҳли илмга тарақкий бермокдалар. Инчунун сиз, ҳазратнинг ўша кунги «Даҳаи носарон» қатли омини эслатиб, танбех беришингиз бошқа амирзода ёнида бўлганида ёмон оқибатларга олиб келиши мумкин эди. Мирзо ҳазратлари бу нарсага анча совуқконлик билан қараб, сиздан ранжимадилар-ку!

Меъмор Нажмиддин Бухорий Исфаҳонийга тикилганича ўйланиб қолди. Бир муддатдан кейин, ишга кўшилиши ҳақида уни кўп шоширмаслик, у бетоб эканлиги, бир ҳафталар ичida ўйлаб жавоб айтишини маълум қилди. Исмоил Исфаҳоний хурсанд бўлиб, Меъморга сиҳат саломатлик тилаб, хайрлашиб чиқиб кетди.

Исфаҳонийнинг келгани ҳақида шу куни кечқурун Заврак билан Зулфиқор хабар топишди. Икки шогирд ҳам бу илтимосни қабул қилиш кераклигини баробар айтишди. Меъмор ҳайрон бўлиб кулди:

— Сизлар менинг иш билан овора бўлишимни истаяпсизлар! Шундок эмасми?

— Йўқ, устод, биз сал бошқачароқ ўйляяпмиз, — деди Зулфиқор.

— Хўш?

— Юз йилдан бери Бухорога ҳали бир катта бино тушгани йўқ. Борларини мӯгуллар вайрон қилди, янгисини қуришгани йўқ. Ёмон ҳукмдорлар ўтди. Аммо бу ҳукмдор фуқаро учун бино қураман, дер экан, азбаройи Бухоро шаҳримиз фойдаси учун бўлаётганини тушуниб, бош қўшиш керак бўлади.

— Дарҳақиқат, бор биноларни ҳам Қовар¹ гиёхи босиб кетибди. Бу, қаровсизлик оқибати. Сиз ҳам шу фикрдамисиз, Заврак Нишопурий? — сўради Меъмор кўзларини ўткир қадаб. Меъморнинг бундок қескин қарашлари илгари кўнгилсиз гап билан тугарди. Лекин бари бир Заврак ўз фикрини очиқ айтди.

— Ҳа, устод. Шу фикрдаман.

— Фикрларингизни дадил айтганингиздан мамнуман. Ўйлаб қўришим керак.

¹ Қ о в а р — бу ўсимлик тарихий ёдгорликларнинг кушандаси. Европада ҳуни Каперс спиноза деб аталади.

Бу ўжар чолнинг анча бўшашганидан дарак берарди. Эскй ярасига қалампир сепган Қарши бегининг номуносиб харакати то қиёмат Меъморнинг ёдидан кўтарилимаслигини шогирлари яхши билишарди. Меъмор соқол-мўйлаби шаъну шавкатга зеб берган бу нодон бекнинг туриш-турмушидан жирканган, ўша куни Улуғбек Мирзога, Тархону Мухаммад Порсоларга худди шундоқ назар билан қараган эди. Унинг кўз олдида кориндор, тез-тез кекириб турадиган, чўнтағида яхши тиш ковлагичлар сақлаб, тишини ковлаб турадиган, мақсади емоқ-ичмок, кийинмок ва обрўтаб бўлган нодон бек турарди...

Индамай овқат тайёрлаб юрган Маъсума бека билан холи ўтиришганида, Меъмор очилиб, шогирди билан куёвининг дадил гапирашаётгани, уни ўрнидан турғазмоқчи бўлаётганини айтиб, унга сен нима дейсан, дегандек қараш қилди.

— Шоҳ ҳам ўтади бу дунёдан, гадо ҳам. Ҳаммамизнинг бориб ётадиган еримиз бир. Бизга зулм қилиб ёмонлик қилган, Низомиддинни ўлдирган подшоҳ битта ёки иккита. Фуқаро кўп. Фуқародан биз ёмонлик кўрганимиз йўқ. Бас, шундай экан, бошингиздаги илм, юрагингиздаги жавҳарни гўрга олиб кетиб нима қиласиз! Сиз бу меъморликка осонликча етибсизми? Шоғирдларингизни гаплари тўғри!

— Бунчалик доно бўлиб кетганингни пайқамаган эканман, турмуш сенинг ҳам ақлингни ошириб, аллома қилиб қўйибди.

— Такаббур бўлиб кетгансиз чол! Доимо ўзингизни билағон, бошқаларни нодон ҳисоблайсиз. Бугун мен билан маслаҳатлашаётганингиз қўнглимни кўтарди. Ҳандаса ҳисобини билмаганим билан одамгарчилик ҳисобини биламан...

— Тушундим. Дарҳақиқат, гапларинг тўғри, — деди Меъмор. Маъсума бека буни фаҳмлаб гапни тўхтатди, Меъмор яна сўради. — Қалин дафтарим бор эди, кўрмадингми?

— Дафтар, китобингиз кўп, қайси бирини сўраяпсиз?

— Халач бўрони пайтида мен ўша дафтарга бир лойиҳа чизган эдим, хабаринг бор, қалин муволовалик дафтар. Андхуддан ўтгач, Калиф даштида

кўзимга бир нималар кўриниб, лойиҳалар чизиб кўйган эдим. Равоқлар, арку «гулчамбар»лар тасвирини...

— Топиб бераман. Ўнтача дафтaringиз бор, хаммасини олиб келаман, ўзингиз топиб оласиз.

Меъмор дафтарларини титкилаб, ўша бўрон бошланадиган куни, гирдибоду узокдаги тепаликларга қараб, хаёлан чизган лойиҳаларини кўздан кечирди...

Эртасига эрта билан Ҳасанбек билан Ҳусайнбеклар ишлаётган бой ҳовлисига келиб, улар билан бир муддат гаплашиб ўтирди. Улар ҳам Меъморга лойиҳага киришишини маслаҳат беришди. Устодларни ишдан қолдирмаслик ниятида кўп ўтирмай, ундан чиқиб Абутолибникига кирди. Ота-бала тинмай лой ийлаб, идиш ясашаётган эди. Улар билан ҳол-ахвол сўрашгач, маслаҳатлик гапини айтди. Тажанг кулол ҳам ҳалигиларнинг гапига кўшилди: «Сиз ўз Бухоронгиз учун қанча иш қилсангиз шунча оз», деди у. Меъмор ундан чиқиб тўппа-тўғри қизиникига борди. Уста Нусрат ҳам, куёви ҳам ишлаётган жойга кетишган экан. Чолнинг қизи билан гаплашадиган мухим гапи борлигини пайқаган қудағайлар уларга халақит бермай ташқариға чиқишиди.

— Дадажон, бу ишни дарҳол қўлингизга олинг! — деди Бадиа, — бизга Хуросон ҳокимлари ёмонлик килди, Улугбек Мирзодан ёмонлик кўрганимиз йўқ...

— Ҳаммаси ҳам бир гўр, улардан шафқат кутиш...
Бадиа ўйланиб қолди.

— Ҳамманинг фикри бир ердан чиқяпти, — деди ичиди Меъмор, — тўғри, мен бу ишни зиммамга оламан. Мени катта қилган, ўқитган, одам қилган Бухоро учун ҳеч нарса қилганим йўқ. Мен она шаҳримдан қарздорман. Шунинг учун ҳам шу ишга киришаман. Улар бир томондан Низомиддиннинг отаси хуруфияга алоқадор кимса сифатида ва яна бунинг устига Ҳиротда курган мадрасадан бошқа ерга ҳам курмасин, деган ниятда мени йўқотиб юборишмоқчи бўлдилар. Биламан, улар бу ишни қилиша олмади. Аммо Мирзо Улурбек мени ишга чорляпти, энди хавф йўқ, у менинг йўқолишимни эмас, иш кўрсатишмни истайди. Бизга ўхшаганлар унга керак, энди

хонадонимизга ажал кўз тикмайди. Энди бемалол ишлаш мумкин. Мен энди, лойиҳалар устида бош қотираман, бирон ой кетади. «Тўрва қоқди» ишимни кўпдан бўён пишиқлаб, ўйлаб юрадим. Яхшики, Бухорога буюрган экан. Эрта ё индин уста Исмоил Исфаҳоний келадилар, у кишига розилигимни айтаман...

Меъмор қизиникида ҳам кўп ўтирумай, ўз ҳовлисига қайтиб келди.

Шу ҳафта ичи у мунахжим ва подшоҳ номи билан боғлиқ бўлган янги мадраса лойиҳаси устида бош қотирди. Кенг хонтахта устида чизғичу қаламлар, паргору бурчаклар, лосу учлари ҳар хил қирқилган қамишу савағич қаламлар, Тусий ва Фисоғурсларнинг китоблари, ҳандасавий ўлчов асбоблари, уч бурчакли чизғичлар, бир неча яхлит хитойи қоғозлар тахт турарди. Меъморга халақит бермаслик учун Заврак ҳам ҳовлида кўп юрмас, устод ўзи чакирмагунча кирмасди. Маъсума бека ҳам баъзан чолнинг керакли нимарсаларини ҳозирлаб бергач, қўшниникига чиқиб кетар, кўчада майда болаларнингчувиллашларига йўл қўймай, уларга обаки улашиб, алдаб, нарироққа олиб кетарди. Меъмор ғоятда жимликни ёқтирап, тақиртуқур, ғала-ғовурга асло тоқати йўқ эди.

Бирон ҳафталардан кейин у ўз шогирдларини истаб қолди. Заврак кечга яқин югуриб Зулфиқорни бошлаб олиб келди. Меъмор, икки шогирд ёнида, ярим тунгача лойиҳани мухокама қилишди. Баъзи кунлари Меъмор туни билан ухламай, лойиҳа устида тонг оттириб чиқарди, Чолнинг бир ишга киришса қаттиқ ишлашини билган шогирдлари ҳам, хотини ҳам обдан ўз холига қўйиб беришарди. Бундок кунлари у намози жумага бориш, масжидга чиқишини ҳам унутарди. Сўраганларга чол бетоб деб айтишарди.

Иккинчи ҳафтага ўтганда тоқати ток бўлган Исмоил Исфаҳоний одам келишини кутиб ўтирумай, яна Меъморнинг ҳовлисига кириб келди. Ўзини ҳовли юзида ишшайиб кутиб олган Меъморга қараб туриб, аввал ҳайрон бўлди. Кейин айвонда, катта хонтахта устида бир неча лойиҳаларни, бўлак-бўлак қоғозларда равоқу «гулчамбар», ангобу шикофта чизиқлари, пештоқу хонақоҳ шарафалари лойиҳаларига кўзи тушиб, жилмайди:

— Мени ҳам қанотингизга оласизми?

— Бирга бўламиз, уста, — деди Меъмор Исмоил Исфаҳонийни айвонга, лойиҳалар ёнига таклиф этиб.— Бирон нималарни чизиб ўтирибман. Сиз ўша келишингизда менинг юрагимга учқун ташлаб кетдингиз...

— Офарин, уста, офарин! — деди хурсанд бўлганидан Исмоил Исфаҳоний, — шу кеча яхши туш кўриб, кўнглимга келган эди. Сиз ҳазрат рози бўласиз, деб ўйлаган эдим. Эркакларнинг туши ўнг келади, дегани рост экан. Бу қарорингиздан мен бағоят хурсандман.

— Мана бу машқ лойиҳаларимга бир кўз ташланг.

— Офарин, офарин!

— Мен, Мирзо Улуғбек мадрасаларини тамоман бошқача ўйлајпман. Бу мадраса — фалакиёт илманинг сардори, риёзиёт, илми дунёвийнинг устозиномига ярашуқ, бошқа мадрасаларга нисбатан кўркаму қулай бўлмоғи лозим. Мен гулчамбару пештоқларга ложувард кошинларни, зарду сиёҳларигача кўпроқ ишлатмоқчиман. Кошин устаси — ҳиротлик Абутолиб кулол ҳам ҳозир Бухорода...

— Офарин, офарин!

— Бўлмаса, яна икки ҳафтага рухсат этасиз, токи мен ишни охирига етказиб, сиз жанобнинг ҳукму муноварангизга ҳавола қиласай.

Исмоил Исфаҳоний кулди. У мамнун эди.

— Сиз жаноб, шогирдларимиз Зулфиқор Шоший, Заврак Нишопурйлар, бу ишга киришиб, ёрдам беринглар. Лойиҳани олий ҳазратнинг ўзлари ҳам кўрмоқлари зарур. Чоғимиз келса уч, бўлмаса икки лойиҳа билан Самарқандга бориш керак. Худо хоҳласа, ўзингиз бориб келгайсиз. Макбул топилган лойиҳа устида сиз билан биз оға-ини бўлиб, иш бошлаймиз.

— Жон-дилим билан...

— Азизим, сизга яна бир гапни ҳам айтиб қўяй, мен нимаики десам, шуни маъқул кўраверадиган шерикни ёқтирамайман. Маслаҳат ва мунозара бўлиши керак, биз сиз ҳурматли Меъмор билан бирга бешолти йил учун эмас, агадул-абад турадиган бино кура-

миз. Бунинг учун бизнинг анча-мунча мунозараларимиз бўлмоғи керак.

— Албатта, — деди Исфаҳоний қизаринқираб.

Чолнинг эшиқдан келган меҳмон билан қаттиқ гаплашаётганини кузатиб турган Мъсума bekанинг юраги шифиллаб, ичида ранжиб, тишини тишига қўйиб ўти-рарди. Сухбатнинг охири яхши бўлиб чиқди.

— Келаси ҳафта Самарқандга тайёргарлик кўра-версак бўладими?

— Бўлади, азизим, — деди Меъмор устага чой узатиб, — лекин иккаламиз, агар рози бўлсангиз, бориб Деггарон маҳалласи ва ўша Хинд саройи ёнидаги — мадраса учун мўлжалланган майдонни яна бир карра кўриб келсак. Нима дейсиз?

— Жуда маъқул, — деди табассум қилиб Исфаҳоний, — бу гапга эътиroz билдиrolмайман ва мунозара ҳам килолмайман...

Икки меъмор баробар ҳахолаб кулишди.

— Қани, кетдик, устод! — деди Исфаҳоний.

Икки меъмор кўчага чиқишиди. Улардан бир қадам орқада Заврак ҳам келарди. Худди шундай, Хиротда, Мирзо мадрасасини куришда, бориб майдонни кўриш жараёнида Заврак ўзи билан ўлчов асбоблари, дафтару чизғичлар, аргамчию газларни лозим бўлмайди, деб олиб келмагани учун танбех эшитган эди. Бу гал Меъмор айтмаса ҳам, у ҳамма керакли ўлчов асбобларини жилдига солиб олди. Ҳатто обтароз билан шловуни ҳам олди. Ўртада Меъмор, ўнгда Исфаҳоний, чапда — Заврак улар айланма тор кўчалардан ўтиб, қадимий Арк майдонига, ундан сўнг, Минораи Калону Жоме масжиди ёнидан ўтиб, Деггарон маҳаллага келишиди. Хинд саройи ёнида, тепаликда туриб, бу ердаги майдонни, майдон атрофидаги дўкончаларни кўришиди. Атрофни айланиб, ерларнинг пасту баландигини кўздан кечиришгач, бу ерда ҳам ҳали майдон сатхини очиб олгунча анча-мунча иш борлигини сезган Меъмор Исфаҳонийга мурожаат этди:

— Тархон ҳазратлари бир файратлик, инсофлик одамни корфармо қилиб белгиласалар яхши бўларди. Вақтдан ютар эдик. Корфармо одамларни жалб этар эди...

— Корфармо белгиланган. «Файратлик» ва «ин-

софлик» корфармо ёнингизда, — деди кулиб Исфаҳоний. — Лекин у сиз айтган, ҳазрат айтган икки фазилатга эгами-йўқми, бунисини айта олмайман.

Меъмор қаҳ-қаҳ уриб кулиб юборди. Заврак ҳам Исфаҳонийга ҳайрат билан қаради.

— Бундок денг! Икки ишни бирлаштирасизми?

— Авваламбор, сиз устод, бош меъморсиз. Бизлар сизнинг ёнингизда бўламиз, ҳамда ҳазрат менга бутун маблағу ақча ихтиёрини бердилар. Мен — корфармолик вазифасини ҳам бажараман. Бу олий ҳазратнинг шахсан илтимослари.

— Жуда маъкул иш бўлди, — деди Меъмор мамнуният билан, — Ҳиротда меъморчиликни билмайдиган бир кимсани бизга корфармо қилиб қўйишиб, тоза қийнашди. Унинг нияти пул топиб, шу баҳона билан бир нималик бўлиб қолиш экан. Бизнинг мадраса қураётганимиз билан унинг бир чақалик иши йўқ эди. Шундоқми, Заврак Нишопурний?

— Худди шундоқ. У бизни жуда қийнади. Устод, сиз ҳамма гапни айтганингиз йўқ. У жуда ёмон одам эди...

— Қачонки, илму фанга алоқаси йўқ одам бир нималик бўлиб қолмоқ, бойимоқ, текин обрў олмоқ ниятида орамизга суқилиб кирса, барчани қийнайди, фирибгарлигу бўхтон авж олиб кетади. Худо шундан сакласин!

Орадан анча вақт ўтгач, Меъмор номига Ҳиротдан мактуб келди. Уни устод Қавом йўллаган эди. У дўстининг Бухорога кўчиб келиб, соғ-саломат яшаб турганини, қизига тўй қилганини Фаввос Мұхаммаддан эшитиб, хурсанд бўлиб, Мирзо Улуғбек Бухорода мадраса қуришга жазм этганилари, бу мадрасанинг меъмори этиб, уни белгилаганликлари билан ҳам муборакбод этиб, сиҳат-саломатлик, ҳатто истаклар билдиради. Меъмор ҳали лойиҳаларини Самарқандга юбормай туриб, бу гапнинг Ҳиротга қандай етиб борганидан таажжубланди.

— Йўқ, устод, — деди бу масала мағзини чақиб Заврак Нишопурний, — мунажжим ва Меъмор, бари бир ахли фузало. Олий ҳазрат сиз билан келишиб, бир тил топишга кўзи етган. Наҳотки, икки олим бир-бирини тушунмаса!

— Бу гапингизда жон бор, — деди фикри ёришиб Меъмор, — лекин харқалай ризо бўлганимиз тўғри бўлибди. Бу ишни меъмор Қавом ҳазратлари ҳам мақбул кўрибдилар.

— Устод, биз ахир бирор савдогар ҳовлисига пешайвон солаётганимиз йўқ, — деди Заврак, — биз мадраса солаётирмиз.

Меъмор сукут ичра жим бўлиб қолди. У жуда ҳайратланиб, ҳаяжонга тушган онларида сукут ичра жим бўлиб қоларди. Бу холатни сезган шогирдлар «пинакка кетган» устоднинг хозир аъзойи бадани мумдай юмшаб, дили яйраб турганини пайқашарди.

Бир ҳафтадан кейин Исмоил Исфаҳоний лойиҳани олиб Самарқандга жўнади. Бу лойиҳалар атай уч нусха бўлиб, бирини Меъмор, иккинчисини Меъмор ва Исмоил Исфаҳоний, учинчисини эса Меъмор раҳбарлигида Зулфиқор Шоший билан Заврак Нишопурий тузишган эди.

XL 606

ДАСТЛАБКИ ҚУВОНЧЛАР

Исмоил Исфаҳоний Самарқанддан Бухорога қайтиб келди, у уйига ҳам кириб ўтирмай, отда тўппа-тўғри Меъмор ҳовлисига йўл олди. Эшик олдида кутиб олган Заврак Нишопурий дарҳол отни кўчадаги бир ёғочга боғлаб, корфармони ҳовлига олиб кирди. Меъморнинг ҳовлиси ҳам, эшиги ҳам кичик бўлганидан от киролмасди. Меъмор ичкари хонадан чиқиб, ҳовлида турган Исфаҳоний билан қўл сиқишиб, илиқ омонлашди:

— Омон-эсон келдингизми, хуш келибсиз!

— Шукур! Ўзингиз бардаммисиз, устод! Мана, ҳамма иш ҳал бўлди! — деди Исфаҳоний, — ҳазина эшиги бизга ланг очилди, лойиҳага олий ҳазратнинг ўзлари муҳр босдилар...

— Муборак бўлсин! — деди ҳаяжонланиб Заврак.

— Пойдеворни кўяверамиз энди! — деди Исфаҳоний.

— Ҳа, албатта, — деди сиполик билан Меъмор. Кейин хўрсиниб кўйди.

— Лойихага боқинг! — Исфаҳоний айвондаги чорси хонтахта устига Меъмор лойиҳасини ёзиб, ёнига босилган Улугбек Мирзо нигин — муҳрини кўрсатди,— Самарқандда, ҳазрат хузурида ўтирган ўн чоғлик меъморлар бир қараашдаёт уч нусха лойиҳадан мана бу лойиҳага диққатлари жалб бўлди. Мен ҳеч сўз айтмасимданок, Мирзо ҳазратлари: «Бу лойиҳани меъмор Нажмиддин Бухорий жаноблари тузганлар. Бу Ҳирот мадрасаларини асло эслатмайди, локин Самарқанд услубларини сақлабдирлар. Пештоқу равоқларда, гулчамбарларда ложувард кошиннинг кўплиги ҳамда тўғри чизиқларнинг мўллигидан меъмор Нажмиддин Бухорий услубини пайқадим», дедилар. Бошқа икки лойиҳага ҳам боқиб, шогирдларингиз лойиҳасидан баъзи ҳужраларнинг икки қабат бўлиши, менинг лойиҳамдан хонақоҳ билан дарсхонанинг дарвоза ёнида бўлишини маъқулладилар. «Агар Меъмор жаноблари фикримизни маъқул кўрсалар, мана шу жузъий ислоҳлар билан бирга биз лойиҳани тасдиқ этдик», дедилар. Ақча жуда мўл берилди. Биз энди кўпгина усталарни ишга жалб этиб, шитоб билан курилишни бошламоғимиз лозим...

— Офарин! — деди Меъмор, — икки лойиҳадаги гулларни олиб бу лойиҳага қўшамиз! Дарҳақиқат, жуда адолатли фикр айтилган, — деди яна Нажмиддин Бухорий умрида биринчи марта мағур туриб, — сиз, Исфаҳоний жаноблари, бориб дам олинг. Эртанги келишингизда, агар имконияти бўлса, менга фалакиётга доир нимаики китоб бўлса, ола келинг. Айниқса, Абу Райхон Беруний ва ёки Жалолиддин Румий китобларини келтирсангиз, ғоятда миннатдор бўлурман. Яна бир ўқиб чиқишга иштиёқмандман. Ҳалач бўрони китобларимни йўқотди. Улугбек Мирзо мадрасалари қурилишига алоқадор томонлари бор бунинг, Ҳазратнинг «тўғри чизиқ» ҳамда «ложувард кошинлар мўл» демокларида хикмат бор. Лойиҳада мен атай тўғри чизиқларни кўп ишлатганман. Гириҳ¹ нақшлар ҳам кўп. Мехроб ра-

¹ Гириҳ — мураккаб геометрик нақшлар бўлиб, асосан, Самарқанд нақкошлари кашф этган.

воқига ложувард кошинлар устига субҳи содик кавкаблари нақшланган.

— Буни кўриб, Мирзо табассум қилдилар, — деди яна Исфаҳоний. — Меъмор бизнинг ниятимизни тушунибдилар, дедилар Мирзо ҳазратлари.

— Ёмон даллол ёнидан беради, деганлариdek, сиз, жаноб, Самарқандга бориш харажатларини ўзингиз кўтардингиз. Менда, дарҳақиқат, ақча ҳам йўқ эди.

— Устод, — деди Исфаҳоний, — хайрли ишга пул эмас, жонимни бераман.

Инсон гўзал. На чаман боғлару на товусу шалолалар, на юлдузлару жавоҳир тошлар гўзалликда унга тенглаша олади! Аммо инсон танида бебаҳо юрак билан бирга беҳис тирноғу аччиқ ичаклар ҳам бор. Биз кўпроқ юракка қулоқ солишимиз керак. Юрагу онг инсонни ғоятда гўзал қилиб турибди.

Исфаҳоний ҳақида баъзилар ундоқ, баъзилар бундок, деб Меъморнинг бошини қотиришган эди. Иккиласми, худди шундоқ бошқа корфармо унинг таомонан энка-тинкасини чиқариб, «нафосату илм саройига кириб олган эшондай» оз булмаса мадрасани ўзига мослаб қуриб, усталар ҳаққини шилиб, айшу ишрат тузмокчи бўлди. Худо бир асрар, бу шилимшиқни ўз вақтида меъморчилик танидан сидириб ташлади. Меъморнинг хаёли ўша шахсга кетиб, Бухорога келганидан сўнг атрофида айланишиб юрган Исмоил Исфаҳонийдан бир қадар чўчиб юрган эди. Аммо Исмоил Исфаҳоний у ўйлагандек эмас, акси бўлиб чиқди.

«Инсон кўзи тушган нуқтага етиб бориши мумкин...» Меъмор Нажмиддин Бухорий улуғ мунахжим Улувбек Мирзо таълимотидаги бу сўзнинг мағзини чакиб, хаёл ичиди ўтиради. Ҳа, мен равоку пештоқларга сипехр тасвирини нақш этарман, демак, кўлим юлдузларга етади, улар ҳам фалак сипехрлари каби агадул-абад чакнаб туради!

Отасининг гўшанишин бўлиб ётмай, ғусса узлатидан чиқиб, меъмор сифатида қайтадан тирилаётгани, мунахжим Мирзо билан Исмоил Исфаҳоний чолнинг

сўниб бораётган гайрат гулханига қайта оташ ташланниклари фақат шогирдларни эмас, Бадиани ҳам оёққа турғазиб эски шодниклари қайта бошлади. Бадиа Низомиддин фожиасидан кейин, отасининг фақат қизи эмас, ҳам ўғилу ҳам шогирди, ҳам маслаҳатгўйи бўлиб қолган эди. Хуросонда энг буюк меъмор устод Қавом ҳисобланса, Мовароуннаҳрда меъмор Бухорийнинг ундан ҳам ўтқир эканлигини эътироф этишларини Бадиа билар эди. Аммо унинг бухоролик, ҳуруфияга «алоқадор» экани Меъморнинг салтанат олдида ярқираб турмаслигига сабаб эди. Бу адолатсизликни яхши биладиган Бадиа отасига юз чандон меҳрибон бўлиб, унга қанот бўлишга, бало-қазолардан муҳофаза қилишга тайёр эди. Отасига манфаати тегадиган ҳар бир ишга ўзини урар, бунинг акси бўладиган ҳар қандай ҳаракатдан ўзини тияр эди. Зулфиқордан буваси ва амакиларининг Бухорога нома йўллаб қайнатасини Шошга¹ чорлаётганникларини эшитган ёш келин кечга яқин ҳеч ким йўқлигига эрининг бўйнига осилди:

— Оғажон, мени ҳам олиб боринг!

— Мен эмас, қайнатангиз таклиф этилган, — деди Зулфиқор хотинининг хипча белидан қучиб. Дераза пардалари ёпиқлиги, ҳовлида ҳеч ким кўринмаётганини сезган Зулфиқор Бадианинг дудоқларидан ўпди. У эрининг кучоғидан сирғалиб чиқишга ҳаракат қилиб, тағин эркаланди:

— Оғажон! Отамлардан илтимос қилинг, Шошга иккимиз ҳам борайлик. — Бу сўзни у шу қадар чиройли айтдики, ёзмоқ билан ифодалаб бўлмас эди. Зулфиқор Бадианинг бундай чиройли талаффузини фақат Хуросонда, Кўхисиёҳ этакларидаги равоч сайлида эшитган эди, холос. — Биз Ҳиротдан Бухорога

¹ Милоддан илгари, II ва I асрларда Тошкент ва шу атроф ерлар Чоч деб аталган, VIII асрга келиб, араб истилоси даврида Шош дейилиб, йирик савдо ва хунармандчилик маркази бўлган. Эронийлар уни Бинкент, деб ҳам атаган. Шахар баланд деворлар билан ўралган бўлиб, ички қисмини — Рободи дохил, сиртини — Рободи хариж дейилган. XI—XII асрга келиб, қораҳонийлар Тошкент, деб атаган. Шахар XIII асрда Хоразмшоҳ, ундан кейин мўгуллар ҳамда 1214 йили Кучлихон томонидан вайрон этилган. XIV асрга келиб яна қайтадан тиклана бошлаб, Соҳибқирон Амир Темурнинг муҳим иқтисодий ва стратегик нуктасига айланган.

ча ғам-ғусса чекиб келдик. Бухородан Шошга сафар роят қувончли бўлса, мен сафарни яхши кўраман, оғажон. Сизнинг бобокалонларингиз Шошдан, менинг ҳам онамларнинг асли уруғлари ўша томондан экан. Қадимий Шошни кўргим келади.

Зулфиқорнинг қариб қолган буваси ва ёмакилари бу томонларга бир келиб кетишларини, айникса, жигарлари уста Нусратни илтимос қилишган эди. Устанинг Ўқчи маҳалласидаги ҳовли-жойи ҳам амакилари қўлида эди. Маъсума бека Бухорода туғилганлигига қарамай, узоқ уруғлари шошлик экани, шаҳарнинг Шаршин таги маҳалласига бориб, Ёрлакаб Ҳожининг уруғларидан борми, деб сўралса, бирон қариндоши чиқиб қолишини биларди. Уруғларидан топилса, ўзининг соғсаломат бор эканини маълум қилишни жуда-жуда истарди. Мирзо Улуғбекнинг машриқдаги сарҳад-азм шаҳарларидан бири бўлмиш Тошканд, Астрободу мавроунаҳрликларнинг «Султоним» зиёратига боришдаги энг катта боргоҳлари экани ҳам маълум эди.

Келинининг ниятини эшитган уста Нусрат мамнун кулди:

— Она шаҳримиз Тошканд кейинги йилларда биз учун жуда овлок бўлиб қолган. Бир неча бор Дашиб Қипчоқ хони Бароқ ўғлон қўлиға ўтди. Суюкли келинимиз у ердаги қариндошларимиз ёнига борар экан, биз жуда қувонамиз.

Бу гапни эшитиб Меъмор ҳам кулди:

— Кизлар узатилган жойидан ота-онасиникига келса, ҳовлида ётган супурги ҳам титраб қўрқиб тураркан; мени олиб кетиб қолмасалар яхши эди, деб... Бадиа Шошни бунда кўчириб олиб келмаса, денг ҳали!

Заврак Нишопурый гапга аралаши:

— Бу иш бекамнинг қўлларидан келади. Бутун Хуросонни Қораилон ваҳшатидан халос этган одам учун Шошни бунда олиб келиш ҳеч гап эмас.

Маъсума бека ҳам тиззасига уриб кулди.

Чой олиб кирган Бадиа гап ўзи ҳакида кетаётганини, бу қочирим гаплар Нишопурийдан чиқаётганини пайқаб, яна ишни бузиб қўймасин, хаёл қилди:

— Отажон, Тошкандга боришимга рухсат беринг. Нишопурий жаноблари ҳамма вакт бир ҳунар чиқариб, йўлимга тўғаноқ бўладилар.

— Нишопурний жаноблари ҳеч нима деяётганлари йўқ, қизим, — деди кулиб Меъмор, — аксинча.

— Бекам ҳамма вақт ёмонлиқни мендан ахтарадилар, — деди Заврак қизариб, — бу ерни Бухоро дейдилар! Тошканд ҳам Бухорога ўхшаган. Ҳурматли бекам, сиз йигит либосини кийиб, от чопадиган Хурросон орқада қолиб кетди!

Бадиа бир нима демоқчи бўлдию қайнатаси ёнида дарҳол ўзини қўлга олди. Қизишмасдан охиста гапирди:

— Кичик отамлар ҳам, катта отамлар ҳам рухсат бердилар. Биз, Зулфиқор оғам билан бирга мустакиллик олғанмиз. Сизни ҳам, Нишопурний жаноблари, отам узатганларидан кейин мустакиллик оласиз...

Ўтирганлар гурра кулиб юборишиди. Завракнинг ўзи ҳам.

— Шош хусусида мавлоно Фирдавсий: «Бимолид Чочи камонро ба даст, ба ҷарми гавазн андар овард шаст» деганлар. Шош — буюк шаҳар, — деди гапни бошқа томонга буриб Меъмор.

Бир ҳафтадан кейин Зулфиқор билан Бадиа катта карвонга қўшилиб, Шошга кетишиди. Унда икки ойча туриб, куз киришига яқин Бухорога қайтиб келишиди. Улар билан бирга уч амакилари ва катта амакилари уста Кудратнинг бўйи етган қизи — Қорақиз ҳам келди. Амакилар йигирма йил деганда ўз жигарлари уста Нусрат билан дийдор кўришиб, кўп шоду хуррам бўлишиди. Бу яхши ишларнинг сабабкори Бадиа бека ҳақига дуо қилишиди. Яна бир яхши иш шу бўлдики, орадан бирон ҳафта ўтгач, отасиникида Бадиага рўпара келган Заврак Нишопурний ўз синглисига йўлиққандай, бачканаликни қўйиб, сиполик билан Қорақизни суриштириди.

— Ҳа-а, Нишопурний жаноблари! Кесакдан ҳам товуш чиқаркан-ку! — деди Бадиа ҳаяжонланиб, — ўзимнинг Нишопур шаҳримга бориб уйланаман, демабмидингиз? Нишопурлик кўзи кўк, эроний қизлар доно бўлади, демабмидингиз?! Менинг томирларим — қорақўз туркий қизлар кам ақл бўлади! Қорақиз яқинда кичик амакиси билан Тошкандга қайтиб кетади, унда тўйи ҳам бўлади...

— Жуда сайраб юбордингиз, бекам! — деди илжайиб Заврак, — сизни бир қадрдон синглим деб хурмат қилиб гапирмоқчи бўлган эдим. Бир зумда шунча гап! Дарҳақиқат, мен Нишопурга борганимда уйланаман. Бунда мен бир ғариб мусофириман, нимамга ҳам уйланар эдим. Мен бутун эътиқодиму умрими ни устодимга бағишлаганман, уйланиб нима қиласман! Уйланадиган кишининг бирон нимаси бўлади. Менда эски коржомадан бўлак нима бор! Худо мени ёлғизлику ғарифликка яратган. Майли, мен шундок ўтиб кетаман! Бу дунёда кўрмасам, у дунёда менга аталган хури-филмонлар бордир...

— Ҳа-а, мугамбир Нишопурий! Сиз уйланаман десангиз, устодингиз қарши бўлармидилар! Ўзингизнинг ҳафсалангиз йўқ! Бунақа нолангиз энди чиқди.

— Ҳафсала бор... Нима қиласай, шунча йил оҳ-воҳ уриб юрдим, сиз тегдингизми? Менинг ҳам ҳеч бир йигитдан камлик ерим йўқ...

— Ҳей Нишопурий! Чегарадан чиқиб кетяпсиз!

— Тўғрисини айтаман-да! Мен бир бедаво... бир кўзлик одамга сиз тегармидингиз! Мен устодимдан бўлак ҳеч кимга керак эмасман! Итдек шу остоноада ўлиб кетаман...

— Гап ҳуснда эмас!

— Қизлар учун биринчи галда керак бўлган ҳусн деган нарсадан худо мени қисган, ғариб хизматкорингизни баҳтини очмай сарсону саргардон қилиб кўйган. Менга ким ҳам тегарди. Қора майиздаккина бўлса ҳам шу тошкандлик қиз менбопга ўхшайди...

— Қора майиз эмас, бу жавоҳир! Бунақа қиз Буҳорода йўқ. Бунинг донолигини, бунинг оташлигини асло сўраманг, — деди ҳаяжон билан Бадиа. — Ниятингизни ойимларга айтаман. Отам ўртага тушиб, оғиз солсалар, менимча, яхши бўлади. Бир ҳаракат қилиб кўрамиз, оға!

Чақнаб, йигитларга ўхшаб елка ташлаб юриб кетаётган Бадианинг орқасидан Заврак «бутун умидим, бекам, сиздан. Менинг ҳам бошимни икки қилиб, шу сержозиба Қорақизни олиб беринглар», дегандек, боши кўйи, илтижо билан қараб қолди.

XLI б о б

БЕҲАЛОВАТ КУНЛАР

Бу йил Бухорода ёғин-сочин кам бўлиб, куз ойла-ри куруқ келди. Ақраб ойи ўрталарида қора совуқ бошланди. Жума куни майда «тугмача» кор ёғиб, эрта билангача том ва мўриларни, йўл четларини юпқаги-на кор қоплади. Айланма кўчалар бўйлаб баданга игна санчувчи аччиқ изғирин турди. Юпун кийинган ғариб-ғурабо ўзини тим ва тоқилар ичига ураг, кўча-га чиқиб, офтобда, эшик тагларида ўтирадиган кекса-лар ҳам, югуриб-елган болалар ҳам хоналардаги сан-даллар атрофига тикилишган, бозорлар товсилган, зарур бир иши бўлмаган кимса изғиринда юрмас эди. Мадрасалар ҳовлиларини тўлдирадиган муллавачча-лару карвонсаройларни тўлдирган мусофиirlарни ҳам қора совуқ, хужраларга хайдаб киритган эди. Ақраб, қора совуқ ойида Бухорода ўлим кўп бўлди — баъзи илиниб юрган кексалар куз япроғидек чирс-чирс узи-либ кета бошлади. Айланма кўчаларда, эшик олдида бел боғлаб турган кишиларни кўп учратиш мумкин эди. Баъзилар бу йил илон йили бўлгани учун ўлим кўп, дерди... Бу сўзни бозор кезиб юрган қаландар-ларнинг «маҳшар куни» деб саннашидан пайқаш мумкин эди. Мавлавия, жаҳрия зикрларида ҳам «илон йили» даҳшати айтиларди. Аммо қораҳонийлар шаън-шавкатидан ёдгор — Минораи Калон шаҳар ўртасида фалакка бўй чўзиб, мана, неча юз йилдан бўён қад кўтариб турибди. У на қора совуқни ва на «илон йили»ни писанд қиласди! У бухороликларга далда бе-риб, қаддингизни букманг, бошингизни баланд ту-тинг, демоқчи бўлаётгандай пурвиқор гавдасини ба-ланд тутиб, ҳамма ёқдан кўриниб турарди.

Шу қора совуқ кунларининг бирида Меъмор икки шогирдини етаклаб қозиқ қоқилган майдонда кезарди. Исфаҳоний бошлиқ усталар билан қилинган мас-лаҳатга мувофиқ, Деггарон маҳалласидаги кенгликда, улардан узоқ бўлмаган бу ерни танлашган, мухандис-лар Арк, Минораи Калон, Жоме масжидларига мўлжаллаб, куёшга ўнг, шаҳарнинг ғарбидан доимо эсиб турадиган насимга юз очган ҳолда қозиқ қоқишини

маслаҳат беришган эди. Меъмор яна бир карра ўлчаб, қоқилган қозикларни маҳалла томларига чиқиб кўздан кечиравар, узоқ бўлмаган Минораи Калон, Арк дарвона — пештоқлари билан қиёс этиб, ўлчагич тахта асбобларини том устига кўйиб, тахтача устидаги чизиклар, даражаю рақамларни айлантириб, яна бир карра ўз ҳисобларини текшириб кўрарди. Ундан сўнг пастга тушиб, бир ҳафтадан бери Қарноб тоғларидан араваларда ташиб олиб келинаётган харсангтошларни кўздан кечиравар, Заврак билан Зулфиқорга уларни бир ерга уймай, пойдевор қазиладиган жойдан узоқ бўлмаган жойга қатор теришни таъкидларди. Ўзи бўлса, анча иссиқ кийинганига қарамай совуқда дилдирап, икки шогирди совқотиб, қулок-бурунлари кўкариб кетганини пайқамасди. Бугун жума куни бўлиб, ҳамма уй-уйида дам олиб ўтиргани, қариндош-уруглар хаста кишиларни кўриб, кўнгил сўраб келаётган бир пайтда ўжар чол Деггарон маҳалласида, совуқда изгиб юриши шогирдларга ҳам ёқинқирамасди. У на кор изғирилларини, на эшикларга чиқиб, таажжубланиб қараб турган одамлару ва на оёқларидан совуқ ўтиб кетган шогирдларининг «бозиллаган сандал» ҳакидаги қочиrimларини фахмларди. Унинг хаёли эрта-индин бу ерда қазиладиган мадраса пойдеворида эди.

— Ҳо-о-й, уста, дунёга неча марта келмоқчисиз? — эрта билан наридан-бери кийиниб, асбобларини кўтариб кўчага чиқиб кетаётган Меъморга хотини Маъсумा бека гап қотди: — Бугун — жума... Бошқа чолларга ўхшаб тоат-ибодатингизни қилиб, худо деб ўтирангиз шогирдларидими?!

— Яна тилимни қичитяпсан-а!

— Бу мадрасани ҳам қуриб берарсиз... Бошингиздан тилла сочишар... Ахир, менинг ҳам тилим қичиди-да, ҳақиқатни айтмай иложим йўқ! Қариган чоғингиизда кўчаларда йиқилиб қолсангиз нима қиламан!

— Итнинг ўлигидек чўзилиб қоласан демокчисанда, а? — деди Меъмор бир лаҳза ҳовлида тўхтаб. — Аммо сен шуни эсингдан чиқармагинки, бошимдан тилло сочадилар, деб иморат қураётганим йўқ! Ҳамма вақт кунимиз шу! Сен, нодон хотин менинг мулк орттириш ниятида югуриб-елмаётганимни билсанг ҳам гапирасан-а! Ё курратингдан, э худо! Оғиз дегани

гапга чиқарған деб, қақшайверасанми?! Гапирганинг билан йўлимдан қолармидим! Хотин деганни худо мунча кам ақл қилиб яратди экан!

— Э, билганингизни қилинг, чол! Сизга гап тушунириб бўладими! Сиз Афлотуну Арастусиз, сизга ақл ўргатиб бўлмайди! Бухоронинг эгалари Ҳожи Мұхаммад Порсо ҳазратлари ҳам сизчалик жонини жабборга бераётгани йўқ!

— Ҳа, балли! Ана энди ўзингга келдинг! Агар сен кеча жабру жафолар чекмаган бўлганингда мана шу кўлимдаги тешам билан бошингга бир тушириб, ми янгни мажақлаб ташлардим!

— Боринг, чиқиб кетаверинг, — деди Маъсума бека ҳам аччиқланиб. Чолнинг яна қаттиқ ўжарлиги тутиб, кўзлари ола-кула бўлаётганидан, эски «қобус» дарди тутиб қолаётганга ўхшайди. Қора совуқда дилдираб, шамоллаб касал бўлиб келса яна азобини тортиш ва айниқса Ҳиротда шунча югуриб-елиб қилган ишларини бир пакирга олмаганликлари, ҳозир Маъсума бека тилига куч бериб қақшатган эди. Чолнинг йўлидан қайтмаслигини пайқаган Маъсума бека илжайгандай бўлиб, ошхонага кириб кетди.

Меъмор ҳовли ўртасида серрайиб қолди. Ҳозироқ хотини кетидан ошхонага кириб, боплаб сўкиб чиқсанмикан? У бу ишдан фойда йўклигини пайқаб, ўзини тутиб, индамай кўчага чиқиб кетди. Чунки Деггаронда уни икки шогирди кутиб турган эди. Хотинининг аччиқ сўзини йўл-йўлакай ўйлаб келди: «Дунёга неча марта келмоқчисиз, дейди-я! Уч марта келмоқчиман! Билдингми? Уч марта! — Чол яна ғазабланиб, ўзига ўзи дерди: — Бир марта келиб, мана бу мадрасани кураман. У битгандан сўнг, яна бир келгандек бўламан! Мен дунёга қайта-қайта келавераман! Сен нодон нодонлигингча қолаверасан!»

Кор ҳам ҳаловат экан, эртасидан бошлаб қаттиқ кора совуқ бошланди. Кексалар «түф» деса тупук қотадиган бундок қаҳратон қишининг бундан ўттиз йил илгари бўлганини айтишарди. Бунақа совуқ Бухорода камдан-кам бўлади. Одамлар уй-уйларига кириб кетишган. Оёғи ачиб, устод ёнида юрган Зулфиқор бундан бир неча йил муқаддам Ҳиротга борганида сув сепилиб, яхлатиб қўйилган ертўлага эрталаб-

гача қамаб кўйилганини эслади. Шу лаҳза унинг совқотиб кетаётган оёқлари исиб кета бошлади, у негадир совқотмай, Меъмор кетидан эргашиб юраверди. Аммо очиқ майдонда, катта харсангошлар ёнида юрган Меъмор тез-тез бошидан қалпогини олиб, бўйнини қашиши, кулоғига кўйган қамиш қаламни сиёҳга ботиришини кўриб турган Зулфиқор устодига қалпокни бошдан олмасликни, ҳаво жуда совуқлигини айтди. Меъмор мулойимлик билан «Ҳа, дарвоке», деб қўя қолди. Зулфиқор хаёлидан Дасти Қипчоқда боши шамоллашдан қазоси етган Амир Темур воқеаси ўтди...

Бухоро усталаридан бири Деггарон маҳалласида корфармо маҳкамаси учун вақтинчалик ижарага олинган ҳовлида, кўпчилик ичида: «Шу ишни баҳорга қолдирилса маъқул бўлмасми?» — деган гапни айтди. Ер қаттиқ музлаган, қиру ганчхок қориш машаққат, деб ўз фикрини исботлагандек бўлди. Маслаҳат мажлисида, хона тўрида ўтирган Меъмор ялт этиб у одамга қаради. Бир нима демадию, аммо унга бир лаҳза тикилиб хаёлга чўмди. Меъморнинг зардаси қайнаб кетади, хаёл қилиб турган Заврак Нишопурий хоҳласа-хоҳламаса бирдан гапириб юборди:

— Жаноб, ернинг фақат тўрт энлик юзи музлаган, таги юмшок.

Ҳеч кимдан садо чиқмади. Заврак Нишопурий яна гап қотди:

— Корфармо жанобларининг хабар беришларича, Самарқандда мадрасани бошлаш ва тугаллаш муддати аниқ айтилган, уни тезроқ тугаллашни Меъмор ҳазратларидан илтимос қилинган. Биз, усталар со-вукдан қўрқмай Меъмор ҳазратлари нима десалар, шунга рози бўлмоғимиз шарт. Кўз — қўрқоқ, кўл — ботир!

Бухорога келиб, Зулфиқор билан Завракка «уста» деган унвон берилди. Улар мустақил иш қилишлари мумкин эди. Бу усталик «таксили»ни Меъмор, уста Нусрат, меъмор Исфаҳонийлар берган эди. Аммо Заврагу Зулфиқор ҳеч қачон устод ёнидан кетмаслик ва у зотга шогирдликни давом эттираверишга аҳд қилинган эди. Бухорога келгандан сўнг Заврак Нишопурий Меъмор номига «ҳазрат» сўзини қўшиб атай бошлади. Агар бундан кўра ҳам улуғроқ ном бўлса, у билан

атарди. Унинг фикрича, Ҳожи Мұҳаммад Порсою амирзодалар әмас, бу зот «хазрат» эканлигини ўзига яқин кишиларга айтарди.

Меъмор бу гапларга индамади. Кейин яна ўз ишида давом этди — хонтахта устига ёзиб қўйилган лойиха бўйича усталарга гап тушунтира кетди.

Эртасига эрта билан пойдевор қазиш бошланди. Меъмор режасидан ҳеч ким чеккага чиқолмади; уч юздан ортиқ мардикор азамат йигитлар ер ўйишга тушиб кетишиди. Улар тепасида усталар туришарди. Лойихага биноан, ер қазиш ўн бир бўлакка бўлинниб, ўн бир уста ўз одамлари билан иш олиб борарди. Меъмор корфармо билан ерга ташланган ёғочлар устида — мадраса олди, дарвозаю гулчамбарлар пойдевори қазилаётган ерда туришарди. Баъзи кишилар араваларда ташиб олиб келинаётган харсангтошларни уриб икки, учга бўлишарди. Баъзилар оби фиштларни синдирамай аравадан тушириб текис ерларга тахлашарди, Меъмор, корфармодан бўлак ҳамма ишга тушиб кетган. Қўл қовуштириб ўтирадиганларни Меъмор ёмон кўришини билганлар бир лаҳза тинмай ишлашарди. Бу қандайдир ҳайиқиши, ишдан ҳайдаб юборишидан кўркиш әмас, балки нуроний чолнинг салобабати босиб ишлашарди. Ҳамма ёқдан йигилиб келган мардикорлар орасида «Нажмиддин Бухорий хазрат»нинг донги тарқалиб, бу алломаи замонга ишлаб туриб, узоқдан дамо-дам қараб қўйишарди ҳам.

Кечқурун Меъмор корфармо Исмоил Исфаҳоний, уста Нусрат, куёви Зулфиқор билан хайр-хўшлашиб, Заврак ёнида, ўз ҳовлисига қайтиб келди. Йўл-йўлакай кечаги маслаҳат мажлисидаги бир устанинг «шу ишни баҳорга қўйсак бўлмасмиди?» деган гапи хаёлини чулғаб олган эди. Меъмор чарчаган пайтида камгап ва умуман, индамай қолишини биладиган Заврак устодининг то Намозгоҳ маҳалласига етиб келгунча индамаганига таажҷубланмади. Бу одатий бир ҳол эканини биларди. Йўқ, аслида Меъмор бошида фикрлар талоши авжга минган эди. «Шу ишни кўкламга қўйса бўлмасмиди? Бўлади! — деди Меъмор гўё рўпаратсида ўша одам тургандай, — бўлади, нега бўлмайди! Сиз учун бу мумкин! Аммо мен учун, бу мумкин әмас. Мен кўкламни кутиб ётадиганлардан әмасман!

Менга ишлаган вақтимнинг ўзи кўклам! Ўша кўклам мени кутсин!»

Бухоро шаҳрининг ҳар ерида турли қурилишлар бошланиб кетди. Уларнинг энг йириги ва хатто мӯғул истилосидан кейинги энг улкани Улуғбек мадрасаси эди. Меъмор Нажмиддин Бухорийнинг бевосита таклифи билан уста Ҳасанбек, Ҳусайнбеклар, кулол, кошинпаз Абутолиблар ишга тушиб кетиши. Меъмор ёнида Зулфиқору Заврак ҳамда корфармо Исмоил Исфаҳоний шай турарди. Меъмор бу мадраса алоҳида кўрку ҳуснга эга бўлади, деб Абутолиб ва Абуалиларга хозирданоқ ложувард зард кошинларни ясаб, пиширавериш лозимлигини айтган. Нома ёзиб, Косондан уста Обид ва уста Худойбергандарни ҳам чақирди. Улуғбек мадрасаси курилаётганини эшитиб, Каршидан нажжор Абдулазиз Наманганий ва бошқалар ҳам етиб келиши. Бадиа билан Зулфикор Тошканндан бошлаб келган уста Қудрат, уста Йисмат, уста Ҳикматлар оғалари уста Нусрат билан бирга ишга тушиб кетиши. Бухоро шаҳри атрофидаги ўнга яқин хумдоңларда гишт пишириларди. Уба ва Қарнобдан қуму тошлар келтирилди. Шаҳардаги энг яхши сангтарошлар, наққошу ганч усталари бевосита Исфаҳоний ташаббуси билан бу ерга жалб этилди. Бошқа ердаги қурилишларга нисбатан бунда иш ҳаки кўпроқ тўланарди. Устолардан ташқари бу ерга оқиб келаётган мардикорларнинг ҳам санофи йўқ.

Мадраса қурилишининг пойдевори қўйилиб, гишт терила бошлаганида, Favvos Муҳаммад Ҳирий ҳам етиб келиб қолди. Бу гапни эшиитган Favvos Ҳиротда ортиқ туролмай яна халтачасини ақчага тўлдирган эди. «Мени чол бўлиб, алжиб қолди деб ўйлабмидингиз, йўқ, мен чинакам мадрасани энди қураман», дегандек, Меъмор унинг кўз олдида мағрур турарди. Меъмор Favvosни илиқ кутиб олиб, яна ўз қаноти остига олди. «Мен ҳам, онангиз ҳам бу хабарни эшиитганингиз ҳамон Ҳиротда туролмай қоласиз, деб ўйлаган эдик. Шунча йўл юриб, бизга тирак бўлмоқ ниятида келганингиздан фоятда миннатдорман», деди Меъмор Favvos Муҳаммаднинг елкасига қоқиб.

Favvos Муҳаммаднинг гапига қараганда, бир кўл, бир оёғи шол бўлиб қолган Аҳмад Чалабий кейинги

пайтларда Ҳирот четидаги рофизийлар маҳалласига кўчиби. У аввал таносил дардига мубтало бўлиб, кўз жияклари, лаблари, бурун учлари яллигланиб, яра бўлиб юрар экан. Анча ирганчиқ ва исқирт бўлиб қолган Аҳмад Чалабийдан таниш-билишлари ўзларини четга тортган. Аҳмад Чалабийнинг дарди кейинчалик ўзгариб, башаралари қизариб, ола-була бўлиб қолган... Унинг корфармо бўлиб олиши ҳам қиморга боғлиқ экан... У яқинда ўлибди.

Ҳиротлик, тошкандлик, самарқандлик, бухоролик ҳамма уста ошнолари яна Меъмор атрофига тўплашиди.

Бадианинг таъбирича, сочилган дурлар қайта тўпланди... Шу қиши ойларида Ҳурносондан катта карвон билан келган савдогарлар орасида Ҳорунбек ҳам бўлиб, у Талаба Фармон кал, Али мешкобчиларни ҳам бошлаб олиб келибди. Улар Меъморнинг Бухорода яна мавқеи барқарор бўлганини эшишиб, хурсандликларидан бир муддатга ҳашарга келишибди. Улар эл кўзига мардикор бўлиб ишлайтган бўлсаларда, аслида Меъмор ёнида эканликлари, садоқату эътиқодлари илгаригидай мустаҳкам экани, қатл этилган бир Низомиддин — юз Низомиддин бўлганини билдиримоқчи бўлардилар. Уларни Меъмор оиласидан бўлак ҳеч ким танимасди. Ўзларини бошқаларга маълум қилмасликни Меъмордан ҳам, Завраку, Зулфиқору Бадиадан ҳам илтимос қилишган эди.

— Уста, сиз бизнинг суюнган төғимизсиз, — деди ёлғиз турган Меъморга Ҳорунбек бир куни. — Сиз бизнинг қаторимизда туриб, золимларга қилич кўтармасангиз ҳам, бари бир ўзингизнинг олижаноб дилингиз, фуқаропарварлигинги билан бизнинг суюнчифимиз, төғимизсиз, Фазлуллоҳ Астрободий, Сайид Имомиддин қатл этилди. Амир Қосим Анвар бадарға қилинди. Каклик ўз тогини қандоқ яхши кўрса, биз ҳам Ҳирот деган қафасдан учеб, соғиниб, ўз «төғимиз»га келдик. Бир муддат сиз ҳазратни зиёрат қилиб, соғ-саломатлигингизни кўриб, яна Ҳурносонга учеб кетамиз.

— Сизларни соғ-саломат кўрганимга юз қатла шукур қиласман! Сизларни кўриб ўғлимни кўргандек бўлдим. Доимо саломат бўлинглар!

Аммо кейинчалик Фаввос Мухаммаднинг отасидан келган номада ёзилишича, баҳор ойларида Хурсонга қайтиб борган Ҳорунбек ва яна бир қанча одамлар ушланиб, осиб ўлдирилган. Бу одамлар ичида «Тала-ба» номи билан юрган Абдулрашидхон Ҳиравий, ўзларини «Саркарда» ва «Интиқом» деб юритган хуруфийлар — Кулмуҳаммадхон, Оллобердихон, ҳамда Али мешкобчи, Фармон кал ва Парфи сўтаклар ҳам бор экан. Сарой жарчилари «Маймана шахрида исён кўтарган Ҳорун бўзчи шериклари билан кўлга тушиб, осилди...» деган гапни бир хафта жар солган.

Бу гапни эшитган Меъмор бирдан бўшашиб, хомуш бўлиб қолди. У дуо ўқиб, ўлган ошнолари арвоҳига бағишилади. Шу куни ишга ҳам чиқолмади...

Баҳор кириши билан «Улуғбек Мирзонинг Бухорода қураётган мадрасаси» донғини эшитган устод Қавом ўғли билан бирга Бухорога келди. Бир ой мобайнида меъмор Нажмиддин Бухорийнинг азиз меҳмони бўлиб, ундан сўнг Самарқандга жўнаб кетишиди. У Меъмор лойиҳасию ишнинг боришини кўриб, дўстига таҳсинлар ўқиди. Гарчи тилига чиқармаса ҳамки, дилида фарзанди қатлидан кейин руҳий тушкунликка тушиб, уйга тикилиб, ғам ичида ўлиб кетади, хаёл қилган. устод Қавом Меъморнинг гайрату шижоат билан, иштиёқу баланд руҳ билан иш олиб бораётганини кўриб таажжубланди. Ошнасига худодан мададу ривож тилади. Ҳўмрайиб юрган Худододбек катта мансабдор бир хонадонга куёв бўлганига қарамай, Зулфиқор қаршисида маъюс бош эгди. Аслида Зулфиқору Бадианинг бахтига ҳasad билан қараётган бўлсада, Бухоро унинг кўнглига ёқмаётганини айтиб, отасини бундан тезроқ кетишга қистади.

Ёз ойларида Бухорога келган Ҳўжа Юсуф Андугоний билан Жаъфар Табризийлар ҳам Меъморнинг азиз меҳмони бўлиб, мадраса қурилишини томоша қилишиди. Бир муддат туриб, сўнгра улар ҳам Самарқандга жўнашди.

Меъмор Бухорийнинг илгариги қурилишларини тасвирлаганимиздек, бунда ҳам қизғин меҳнат жараёни бошланди. Мадрасанинг ғиштин деворлари ҳамманинг кўзи олдида қад кўтара бошлади. Меъморнинг пар тўшакда ётиб оҳ-воҳ уришлари тугаб, нос чекишига

ҳам вақт тополмас, уни гоҳ лойиха устида, гоҳ ганчхок қораётганлар ёнида, гоҳ ғишт тераётганлар, гоҳ аравакашу нажжорлар орасида кўриш мумкин эди. Ҳамма ишлар Меъморга келиб туташган; ҳамма жойда бош-қош, ҳамма унинг маслаҳати билан иш қиласди.

Улуғбек мадрасаси жадаллик билан қурилаётган бир кўтаринки пайт эди.

Меъмор ҳеч қачон бунчалик файрат ва иштиёқ билан ишга киришмаган, уста Ҳасанбек, уста Обидлар буни кўриб ҳайратланишарди. Меъморнинг шижоати уларга файрат бағишларди.

Баъзан Бадиа ҳам овқат тайёрлаб, қайнатаси, отаси ва эрига қолдириб кетарди; Меъмор қизининг бунда пайдо бўлиб қолиши бухороликларга анча эриш туюлиб, ёш, келишган жувоннинг одамлар ичидан ўтиб, Зулфиқор ёнига бориши кўпларнинг ғашини келтиради. Гарчи Ҳиротда бу одат одамларнинг унча эътиборини тортмаса, ортиқча ўраниш одати бўлмаса-да, Бухоро бунга асло йўл кўймасди. Зулфиқор ўз онасию сингилларига: «ҳиротликлар эркинроқ, кейин-кейин жойига тушиб кетади, ҳайратланманглар», дерди. Бадиа бўлса, мадраса қурилишига бориб, отасининг ишларига аралашибдан асло тортинмас, бу мадрасанинг катта равоқларига кошин билан юлдузлар тасвири тушажаги, бунда Улуғбек Мирзо фармони билан йигит-қизлар ҳам илм олажаги... ҳақидаги гаплар унинг қулогига етган. Отасининг янгидан бошлиниб келаётган шаъну шавкати, кўтаринки рух Бадианинг яна илгаригидай шаддодлигини кўзғаб турарди. Қайнана, қайнинг сингилларининг баъзи таажжубланишларига ҳам парво қилмасди. «Самарқанд шахрини мӯгуллардан химоя қилишда, сарбадорлар орасида эркаклар билан бир қаторда аёллар ҳам яроғ кўтариб кўчага чиқкан бўлса, Сароймулк хоним, Гавҳаршод бегим давлатни идора қила олган бўлсалар... нечун мен ўз отамга қарашолмайман! Мен ҳамма бино қурилишларида аралашибганман...» дерди.

- Ҳарқалай, бу шаддод қизнинг энди ўзини қўлга олиб, фақат ўз хонадонининг бекаси бўлишини бу ердагилар жуда-жуда истарди. Бухоро Хуросон эмаслигини ётиғи билан тушунтиришга ҳаракат қилишарди.

Лекин энг мухими — ғайрат ва иштиёқ билан меҳр қўйиб ишлаётган Меъморнинг Бухоро шаҳри ўртасида, Минораи Калоннинг шундок биқинидаги Деггарон маҳалласида кун сайн қад кўтараётан мадрасаси эди. Унинг кўз олдида кўркам равоқлар, ложувард кошинлар, бекиёс шарафалар ўзини кўрсата бошлиётган эди.

Иш қизғин кунларнинг бирида Меъмор билан уста Нусрат ўртага тушиб, Заврак билан қорақизни унашириб қўйди. Меъмор бу икки ёшчинг никоҳ тўйини кечиктирмай, шу яқин кунларда ўтказишни тайинларди.

Бу воқеа хаммадан кўра Бадиани шод этди, у ўз оғасидан ҳам аъло кўрадиган Заврак Нишопурийнинг баҳт топаётганидан ниҳоятда хурсанд эди.

XLII

ИЛОН ҚАСДИ

Жуфти ўлдирилган илон ўч олармиш...

Пайшанба куни тушга яқин юпқа пишириб, мадраса қурилишига кетаётган Бадиани айланма тор кўча муюлишида турган довдирнамо бир бола тўхтатиб, Зулфиқор оға сизни мана бу ҳовлида кутяпти, деди. Бадиа аввал ҳайрон бўлиб болага қаради, Зулфиқорнинг номини эшитгач, рўпарасидаги очик эшик ёнига келиши билан қандайдир бир кучли кўл унинг оғзини маҳкам бекитиб, кучоқлаганча қоронги бир хонага судраб кетді. Унинг баркашдаги юпқалари ҳам қоронги далонга сочилди. Капалаги учиб кетган Бадиа нотаниш бир бадбашара одам рўпарасида турганини кўрди. У одам дарҳол эшикни қулфлаб, этиги қўнжидан пиҷоқни суфуриб олди. Бадиа нимқоронги хона охиридаги эшикка тисарилди; бу ланг очик эшик ҳовлига олиб чиқади, хаёл қилиб, қочди. Кетидан пичоқ ушлаган одам ҳам кирди. У хона фиштин бир қоронги ҳужра бўлиб, ҳовлига очилган биттагина туйнуги бўлиб, чиқиб кетадиган биронта ҳам эшик ёки дерасаси йўқ эди.

— Кўлга тушдингми? — деди одам пичоғини яр-

қиратиб, эшикни гавдаси билан қоплаб. — Мени танимаяпсанми? Мен сени анча вақтдан бери пойлаб юрган эдим. Мен сенинг изингдан қанча ақча сарфлаб бу ерга ҳам келдим. Равоч сайлига изингдан чиқиб, сени ўғирлаб кетмоқчи бўлдим, аммо ошнам пичноқ еб ўлиб кетди. Мен сени қумда тутиб, олиб кетмоқчи эдим, аммо овчи тирандозлар менга халақит берди. Мана, изингдан Бухорога ҳам келдим... Аммо отанг сени ўз шогирдига берди... Мен сени ўн уч яшар вақтингдан яхши кўраман, ҳамма вақт сени кузатиб юрганман. Сенинг қилиқларинг, гапларинг, сенинг кошу кўзларинг... Мен Ҳиротдаги бир гўлахнинг ўғлиман, ортиқча давлатим йўқ, ақчам ҳам. Энди гап битта! Мен билан бир лаҳза бирга бўласан! Шунда умр бўйи омадсизлигимни ювиб юборган бўласан! Бир умрга сендан ризо бўламан. Мен сени деб неча ўлимга дучор бўлдим, азоб чекдим, ақчаларим кетди... Мен ҳозир мадраса қурилишида мардикор бўлиб ишляпман. Ҳиротда ҳам Аҳмад Чалабий жаноблари кўлида ишлаган эдим. Кел, Бадиа!

— Яқинлашма! — деди Бадиа ўрнидан туриб, ҳозироқ сапчишга тайёрланаётган ёввойи мушукдек. Унинг кўзлари катта очилиб, хужумга шайланди.

— Гапларимни тушунмадингми?

Бадиа миқ этмади.

— Гапир!

У яна тикилганча, ҳозироқ хужум бўлишини пойлаб миқ этмай тураверди.

— Бизнинг овозимизни ҳеч ким эшитмайди. Дод солсанг ҳам бу ердан овоз чиқмайди!

— Номард экансан!

— Нима десанг ҳам майли. Фақат...

— Ўлдиришинг мумкин, лекин ниятингга етолмайсан!

— Етаман! Агар сен ҳозироқ рози бўлмасанг, бу ерда қолиб кетасан! Бир-икки кундан кейин, бари бир сенинг номинг қора бўлади. Очикда юролмайсан! Отанг ҳам бу шармандалика чидолмай ўлади. Оғанг Низомиддиннинг ўлдирилиши — отангнинг номини қора қилган. Бу воқеа хонадонингизни эмас, динсиз амирзода Улубек курдираётган мадрасани ҳам таққа тўхтатади. Одамлар тарқаб кетади, фишт хумдонлар совийди...

— Йўқол, аблаҳ!

— Ўйлаб кўр, бекам! — деди ҳалиги одам нариги хонага ўтиб, йўлакда ерга сочилиб ётган юпқаларини баркаши билан Бадианинг олдига ташлаб, иккала эшикни ҳам қулфлаб ташқарига чиқиб кетди.

Бадиа шу турганча қотиб тураверди.

Нима бўлди ўзи? Оёқ остида, қопқон бор экану буни пайқамай қўлга тушиб ўтирибди-я! Бир қўлга тушдинг, ханжар ёрдам берди. Икки қўлга тушдинг, яна ўша ханжар қутқарди. Энди сени ким қутқарди? Ўлимдан ҳам шармандалик оғир. Ҳатто унинг сўйиб ташланган ҳолда бир хужрадан топилиши — қандай даҳшат! Зулфиқор бош кўтариб юролармикан?! Отаоналари ҳам тамом бўлади. Дарҳақиқат, мадраса қурилиши ҳам тугайди. Наҳотки, бу газандани Аҳмад Чалабий йўллади экан? У Мирзо Улуғбекни ҳам динсизликда айбламокда, демак, унинг ҳам душмани. Бу ерда катта гап бор... Яна отамнинг шўри. Мен нодон қизга, явлвиллаб юрма, бу ер сенга Ҳирот эмас, деб неча маротаба тайинлашган эди.

Мен нима иш қилиб қўйдим?

У атрофига, фиштин деворларга кўз югуртириди. Қалин деворнинг кичкина туйнугидан ҳовлига қарди, жимжитлик. Эшик ниҳоятда мустаҳкам, қалин ёғочлардан ясалиб, зулфинида каттакон қулф турарди. Эгалари кўчиб кетган ҳовлига ўхшарди.

Бадиа эшикнинг маҳкам қулфланганини кўргач, заҳ хонани яна бир айланиб, қўлга илинадиган бир нима қидирди. Бўйраю наматдан бўлак ҳеч нима йўқ. Фиштин деворни титкилаб кўрди — девор метин. Ҳамма вақт нимчаси ичига тақиб қўядиган кичик ханжар ҳам йўқ. Келин бўлганидан сўнг бунаقا ишларни йиғишириб қўйган. Пичок олиб юришни, ўғил болаларга ўхшаб кийиниши Зулфиқор ёқтириласди. У ёқтиримайдиган ишни қилмас, чунки азамат Зулфиқор уни ўз аслига — хотинлигига қайтарган эди... Бадиа қўркув ичida яна хужрани айланиб чиқди; девор фишларини жон-жаҳди билан тортди. Бўйра тагидан бир ҳовуч тупроқ йиғиб олиб, уй бурчагига қўйди. Туйнукдан ҳовлига қаради, ҳовли жимжит. Туйнук атрофини тимирскилай бошлади. У тирноқларининг қонаб кетганига ҳам қарамай, туйнук ёнида бир синик фишт парчасини кўчириб олди.

У ҳозир пичоқ ушлаган бадбашара одам унга ёпишиб наматга босишини кутар, қўлидаги фишт парчаси билан мўлжалга уришга чоғланарди.

Бир муддатдан сўнг ўша одам яна қулфларни очиб, қўлида пичоқ, ичкарига кирди. Бадиа қўлидаги фиштни орқасига бекитди.

— Ўйлаб кўрдингми? Гапимга уна! Бир лаҳзадан кейин сени чиқариб юбораман...

Бадиа миқ этмай, ўкрайганча турарди.

— Кел энди, жаҳлингдан тушгандирсан. Ҳеч нима бўлмайди, бир лаҳза... Тақдирга тан бериш керак. Гўзал бўлишнинг, шўх бўлишнинг мана шунаقا томонлари ҳам бор, мен сени фақат кучоқлайман. Мен ҳам дунёга умид билан келганман. Орқангдан юриб шунча азоб чекдим, бир лаҳза мени хурсанд қилсанг, умримдан розиман. Мен сени қийнамайман, кела қол. Бир лаҳза мени подшоҳ қил, Бадиа!

— Яқинлашма!

— Ҳали шундоқми? Бўпти! — у эшикларни қулфлаб яна ташқарига чиқиб кетди. Шу кетганича, кечгача кўринмади.

Уйида юпқа пишаётганини, ҳали замон Бадиа олиб келиб қолишини кутиб, деворда фишт тераётган Зулфиқор дамо-дам кўча томонга қараб кўярди. У отасини, устодни, Заврагу Favvosni юпқа келишидан огоҳлантириб, бирга овқатланишажагини айтган эди. Вакт тушдан оғиб кетган, Заврак бетоқат, узоқдан Зулфиқорга ишора қилиб, қорнини кўрсатди: «Пиёзнинг пўчоғи бўлиб кетди... Юпқа қачон келади?» «Бир оз сабр килинг, ҳозир келади», деди Зулфиқор кўчадан кўз узмай. Бадиадан ва сингилларидан дарак бўлмагач, Зулфиқор ҳайрон бўлиб отасига қаради.

— Бетоқат бўлиб ўтиргандан кўра югуриб уйга бориб кела қолсанг бўлмайдими! — деди уста Нусрат ўғлига қараб. У терлаб-пишиб ганчхок ташлаб, фишт терар, ёнидаги фишт олиб бериб турган шогирдларни ҳам шошираётган эди. У ишни қўйиб, уйига жўнади. Келса, Бадиа йўқ.

Онаси унинг баркашга юпқа териб, олиб чиқиб кетганини айтди. Улар ҳайрон бўлишди. Қаёққа бориши мумкин?

— Кудағайимизнинг ёнларига кетдимикин?

— Эҳтимол... — деди Зулфиқор ҳайрон бўлиб турган онасига тикилиб. — Мен югуриб бориб келай, — Зулфиқор шу лаҳза яна кўчага чиқди. Атрофга аланглаганча жадал қадам ташлаб Намозгоҳ маҳалласига жўнади.

Эшикдан шошиб кириб келаётган Зулфиқорни кўрган Маъсума беканинг ранги учди. Зулфиқор ўзини қўлга олиб, салом-алиқдан кейин сўради:

— Бадиа келмадими?

— Йўқ! — деди айвонда ўзига тикилиб турган қайнанаси.

— Тушда юпқа қилиб, мадрасага олиб бораман, деб чиқиб кетган эканлар. Анча кутдик, келмадилар. Бу томонга, ўтдиларми, деб ўйлаган эдим.

— Йўқ, болам, келгани йўқ. Қаёқقا кетган бўлиши мумкин?

— Эҳтимол, қўшнимизникига киргандир, — деди Зулфиқор, — хабар олай.

— Бунақа одати йўқ эди-ку? Наҳотки сизларни куттириб, қўшниникига кириб ўтирса! Тавба, бундай одати йўқ эди-ку?

— Мен яна хабар қиласман, — деди эшикдан чиқа туриб Зулфиқор.

— Албатта хабар қилинг! Мен кутиб ўтираман.

Зулфиқор кўчаларни айланиб, яна мадраса курилишига келди. Давра қуриб чой ичиб ўтиришган Меъмор ҳам, отаси ҳам, Заврак ҳам, Ҳасанбек-Ҳусайнbekлар ҳам, уста Обид ҳам... бу ерга келмаганини айтишиди. Зулфиқор яна юрганича уйга келди.

— Борми? — жонхолатда сўради кампир.

— Йўқ.

— Наузамбилилло!.. Ё қудратингдан! Қаёқда бўлиши мумкин?

Зулфиқорнинг ҳам, онасининг ҳам ранги учди.

— Билмасам! Унга ҳадеб кўчага чиқаверишни ким қўйган? Оч қолаётгани йўқ эди-ку! Укалари олиб бора колса ҳам бўларди-ку! — Зулфиқор тутака бошлади.

— Бир оз сабр қил, болам.

— Нимасини сабр қиласди? Унинг бу ерда борадиган жойи йўқ! Қаерга боради?! У ҳали шаҳарни ҳам яхши билмайди!

— Сабр қил, келиб қолар.

Зулфиқор боши қотган, лаблари гезарган, секин пешайвон зинасиға ўтирди.

— Қаёққа кетган бўлиши мумкин? Тавба!

У яна ўрнидан дик этиб туриб, мадраса курилишига югурди. Чой ичаётганлар ўринларидан туриб, ишга тушиб кетишган эди. Девор тепасида турган Меъмор «Борми?» дегандек Зулфиқорга ишора қилди. Зулфиқор бош чайқади.

Ҳамма ҳайрон.

Кечгача Зулфиқор зир югурди, аммо ҳеч ерда Бадиа йўқ. Кечкурун Меъморнинг бетоқат бўлаётганини кўрган корфармо Исмоил Исфаҳоний унинг рухсати билан отга миниб, хоким маҳкамасига жўнади. Мухим ишлар билан келган мансабдорларни дарҳол қабул қилишини билиб, муншига маълум қилди. Кўнгилсиз гапни эшитган маҳкама амалдорининг ўзиёқ шу лаҳза, ховлида шай турган олти отликни шаҳар дарвозаларини бекитиб, шубҳали кимсаларни ушлашни топширди. Отлик навкарлар чопганча, дарвозабонларга хабар қилгани жўнашди. Айниқса, Шайх Жалол ва Мозори Шариф дарвозаларига одам қўйиш кераклигини уқтириб, илгари ҳам шундай бир қиз олиб қочиш воқеаси бўлган, бу ишни бухороликлар қилмайди, қумдан келган қароқчилар қиласди, деди маҳкамамирзоси. Шу лаҳзанинг ўзидаёқ Тархон ҳазратлари номидан ясовулбоши раҳбарлигида Деггарон, Сўфиён, Заргарон, Равгангарон, Намозгоҳ маҳаллаларини тафтиш қилишни, хонадонларни ҳам тинтишни, қандай бўлмасин, Меъмор кизини тезда топиш кераклигини буюрди. «Сиз бориб дам олаверинг, бу иш учун ҳазрат ёнларига кириб ўтиришнинг хожати йўқ, биз топмай қўймаймиз! — деб Исфаҳонийни тинчлантирди. — Қаёққа кетарди?!»

Исфаҳоний маҳкамадан чиқиб, Меъморникига келди.

Зулфиқор тун бўйи Бухоронинг у дарвозасидан бу дарвозасигача югурди. Ясовулбоши одамлари билан шубҳали ховлиларга кириб ҳам чиқишли. Бадиа ҳеч қаерда йўқ.

Эртасига Меъмор ишга чиқолмай, уйда ётиб қолди. Юраги ёмон бўлиб, юришга ҳам мажоли келмади.

Қурилишда ишлаётган кишилар орасида парокандалик, ҳар хил миш-мишлар пайдо бўлиб, ишнинг мазаси қочаётганини сезган Меъмор хотини ва Завракнинг қаршилик кўрсатишига қарамай, тағин мадраса қурилишига келди. У индамай, ўтган кунги йишини давом эттираверди. Пастда, деворлар устида ишлаётган одамлар Меъморга қараб қўйишар, у юрагида мислсиз алам билан фишт терарди. У кўп вақт лойиха чизиб, одамларга буйруқ ва маслаҳат бериб ўтиrmай, ўзи бир ердан ишга тушиб кетарди. Дарвоза ва хонақоҳ тепасидаги гумбазларни, меҳроб равоқи фиштларини аксар ўзи қўярди. Меъморнинг миқ этмай ишлаётганини кўрган уста Нусрат, уста Обид, уста Худойберган, уста Ҳасанбек, Ҳусайнбеклар, шогирд ва мардикорлар ҳам миқ этмай ишлашарди...

Кеча кечқурун яна эшик очилиб, рўпарада ўша даҳшатли башара пайдо бўлди: бир қўлида пичоқ, бир қўлида косада сув эди. У сувни Бадиага яқин ерга қўйди.

— Кел энди...

Бадиа миқ этмади.

— Бекорга нобуд бўлиб кетасан!

— Яқинлашма! Пичноқ уриб ўлдиришинг мумкин!

Бундан бошқа нарса қўлингдан келмайди.

— Нодон! Мен сени аллақачон чиқариб юборган бўлар эдим.

Бадианинг кўзлари катта очилган, у ўзига ташланиб ғажимоқчи бўлаётган қашқирни кузатиб турарди. У ниҳоятда чанқаб, лаблари қуриб кетган эди. Ўйламай ташланган бир қадам уни не ҳолга солиб қўйди? «Нега мен ўйламай-нетмай у йўлакка кирдим? Наҳотки мен шу даражада нодонман! Энг даҳшатли пайтларда ҳам кон тўкиб бўлса ҳам қутулиб чиқкан эдим-ку? Ихтиёридин қалъасидан ҳам қутулиб чиқкан эдим-ку? Наҳотки шу ҳужрада қопқонга тушиб шармандаларча ўлиб кетаман!»

— Ётавер бўлмаса! Ана, сувни ич! — халиги одам яна эшикларни қулфлаб чиқиб кетди.

Бадиа сувни ичмоқчи бўлдию дарҳол ўзини тўхтатди, сувга доруий бехуш қўшилган бўлса-чи? У сувни тўкиб юборди.

Туннинг ўрталарида эшик очилиб, бир қўлида шам, бир қўлида пичоқ билан яна ўша одам кирди.

Бадиа яна ўша ерда турганича индамай, хужумни кутди.

— Тўкиб юборибсан-ку, нодон! — у Бадиага бошдан-оёқ тикилди. Бадиа титрар, аммо ҳозироқ қурбон бўлиб кетишга тайёр эканини, пичоқдан қўрқмаётганини пайқаган ҳалиги киши дағдага қилди. — Ётавер! Шу ерда чириб кетасан!

У яна ташқарига чиқиб, эшикларни қулфлади.

Тонг отганда бадбашара одам яна кирди. Яна ўша ҳол. Куннинг ўртасида, кечқурун ҳам аҳвол бир хил бўлаверди.

— Сен нима, шу ерда ўлиб кетасанми?

Бадиа индамади.

— Гапир!

— Мени чиқариб юбор!

— Сен менинг ошнамни ўлдиргансан!

— Ошнанг мени олиб қочмоқчи эди. Мен ўзимни кутқараман деб... Бу ишингдан наф чиқмайди. Зўр келса пичоқ уриб ўлдирасан. Агар ниятинг шу бўлса, ур пичорингни!

— Ёш жонингни хазон қилма! Ота-онангга зомин бўласан...

Бадиа миқ этмади.

— Ётавер шу ерда! Сўзимга кирмадингми, ўзингдан кўр!

Бадиа миқ этмай тураверди.

У одам яна ташқарига чиқиб, эшикларни қулфлади. Ҳовлига чиқиб туйнук ёнига келди:

— Эшит! Агар гапимга кирсанг, мен сени Бухордан олиб чиқиб кетаман. Сен мени мардикор деб ўйлама, мен ҳам катта мансабдор кишининг ўғлиман... Ҳали тунда бу хонага каламушлар, жинлар келади.

Яна жимлик.

Номаълум одамнинг ҳовлидан чиқиб кетаётган шарпаси сезилди.

Ҳолдан кетган Бадиа унинг қораси йўқолиши билан ерга ўтириб, деворга суюнди. Беҳол бўлиб, чўзилиб қолмаслик учун ўзи пиширган юпқадан бирини олиб еди. Чўнқайиб ўтирганича яна тонг оттириди...

... Икки кундан бери югуриб, ҳолдан кетган Зулфикар эрта билан яна уйдан чиқиб, Мозори Шариф, Шайх Жалол дарвозалари томон кетаётганида уйларидан унча нари бўлмаган тор кўча муюлишида ўтирган девона бола уни тўхтатиб, қўли билан рўпарадаги бекик эшикни кўрсатди.

— Ажина, ажина... — деди у кўзларини ола-кула қилиб. Девона болага қўл силтаб, эътибор бермай шошиб кетаётган Зулфикар анча нарироққа борганда тўхтаб, унга қайрилиб қаради:

— Ажина?

— Ҳа, ажина бор, — у тошга ўтирган жойидан туриб, бориб, эшикка қулоқ осди, — ана, ажина!

Зулфикар ҳам бир муддат тўхтаб беихтиёр бориб, эшикка қулоқ осди. Йичкаридан хотин кишининг «Ким бор! Кутқаринглар!..» деган товуши секин эшитиларди. Зулфикар эшикни итарди, зич танбаланганд. У сакраб деворга, ундан томга чиқиб, ҳовлига тушди. Яна жим қулоқ осди. Чап томонда, кичик бир туйнукдан яна ўша овоз эшитиларди: «Кутқаринглар... кутқаринглар...» Зулфикар ютурганча бориб, эшикка ёпишди. Эшик зулфинига отнинг тақасидек қулф солинган. У жонҳолатда эшикни итариб, кесакиси билан бирга бузиб кирди. Иккинчи хона эшигини ҳам тепиб, бузилган эшик билан уриб, кесакларини бўшаштирди. У югуриб бориб уйдан тешами, болта олиб келишга ҳам сабри чидамай, киравериш эшикка тираб қўйилган танба ёғоч билан бир неча бор уриб, ичкари эшикни ҳам қулатди. Ярим коронги хонага кирди. Унинг рўпарасида фиштин деворга суюниб, қўлида фишт парчаси ушлаб турган Бадиа Зулфикарга тикилиб қараб қолди. Зулфикар ерда ётган баркашу юпқаларга, ундан сўнг телбасифат, кўзларини ола-кула қилиб турган Бадиага тикилди:

— Нима бўлди?

Бадиа индамади.

Зулфикар бориб Бадиани кўтариб олди. Ўзини аранг тутиб турган Бадианинг қўлидаги фишт ерга тушиб кетди. У Бадиани кўтарганча, коронги хоналардан зинфиллаб борарди. У то уйга етиб олгунча ўша девона бола билан яна бир хотин кўрди. Бадиани ўз хонасига олиб кириб ётқизиб қўйди. У сув

сўради. Бадиа сувни ичиб, беҳол Зулфиқорга қаради: «Чалабий кишилари» дедиую ҳушидан кетди. Зулфиқор Бадианинг олдига онасини, сингилларини қолдириб, табибга, шунакаси мадрасага бориб, устодга, отасига, ундан сўнг, Намозгоҳга югуриб, «оҳ-воҳ» қилиб ётган Маъсума бекага хабар етказди.

Орадан бир муддат ўтмасданоқ ҳамма қариндошу қадрдонлар Бадиа топилганини эшитиб, Зулфиқорларникига югуришди. Корфармо Исфаҳоний орқали хабар топган ясовулбоши от чоптириб келиб, ўша уйга бостириб кирди. Уй эгасини қидиртиришди.

Тушга бориб кўзини очган Бадиа ҳамма гапни Зулфиқорга айтиб берди. Машъум ниятига етолмаган одам асли хурросонлик бўлиб, отасининг душмани Аҳмад Чалабийнинг одами экани, Меъморнинг қўлини ишдан совутиб, оҳу надомат билан ўлиб кетишини кўзлаб, анчадан буён Бадианинг изига тушгани маълум бўлди.

Маҳкамадан: «Қизил чопон, иягида ямоги бўр, япаски бурунлик, ўттиз-ўттиз бешларга кирган одам қайси дарвозадан чиқиб кетишга харакат қилса, ушлансин! Чиқиб кетаётган карвонлар ҳам пухта тафтиш этилсин!» деган фармон берилди. Ўша тор кўчада юрадиган девона бола ҳам маҳкамага олиб келиниб тафтиш этилди. Уй эгаси Галаосиёда тегирмончилик қилаётганини аниклаб, у томонга одам юборилди.

Бир ҳафта ичида ҳаммаёқ қидирилиб, тафтиш этилди. Аммо «Чалабий одами» ҳеч қаердан топилмади.

У учинчи куниёқ шаҳарда отлик ясовуллар тинтуб қилаётганини сезиб, Қарши дарвозасидан эшакда чиқиб кетаётган шу атрофлик дехқонлар орасида Қоровулбозор томон жўнаган эди.

Шу кунлари, Меъморнинг янги мадраса куришга киришганини эшитган ҳожи табиб атай Меъморни кўргани Бухорога келган эди. Бу воқеа устидан чиқиб, Меъморнинг илтимоси билан уста Нусратникига келиб, Бадиани кўрди. У ҳар куни икки маҳал келиб, Бадиани даволай бошлади.

Хурросонлик мансабдор шахсларнинг Мовароуннахрга тумшук тикиб душманлик қилаётгани Шоҳ Малик тархон орқали Самарқандга, Мирзо Улуғбек қулогига етказилди. «Меъмор қизининг йўқолиши»дан ташқа-

ри яна бир неча шунга ўхшаш хатти-харакатлар со-дир бўлган эди. Айниқса, Ҳожи Мухаммад Порсо ҳазратлари ва ахли уламонинг фуқаро орасида эъти-бори ниҳоятда кучайиб, маҳкама фармонлари эмас, шайхулислом сўзларига қулоқ солаётганликлари Са-марқандга етиб борган. Бу ишларда узоқдаги ўз ука-си Иброҳим Султон кишиларининг қўли борлиги маъ-лум бўлди.

— Хайрият, худо бир асрари, — деди Меъмор Бадиани қўргани келганида, кўрпачада Ҳожи табиб билан бақамти ўтириб, — бўлмаса сен икки амирзо-да фитнасининг қурбони бўлиб кетардинг. Амирзода-лар тахт талашиб, саройда фитнани авж олдирадилар ва лекин унинг азобини фуқаро тортади. Шундок эмасми, Абуласад ҳожи?

— Ҳудди шундок, — деди табиб, — Қарши беги асли кешлик бўлиб, ота-боболари сарбоз ўтган. Улар Иброҳим Султонни маъкул кўришади, улар салтанат-ни илим билан эмас, қилич билан кенгайтирмоқчи бўладилар. Улугбек Мирзо рўйи заминда қанча ша-ҳарлар туриб, фалакка тикилиб ўтирибдилар, дейи-шади. Бекнинг ўшандаги қилган ноинсофлигидан қат-тиқ ранжидим. Кела туриб, бир муддат Чўли бобо сардобасида тўхтадим. Сиз ҳазратни дуо қилмаган чўпон йўқ. Сардoba қад кўтариб туриби.

— Бухоро Ҳирот эмас, кизим. Бу ерда очилиб-сочилиб, ялавиллаб юриб бўлмайди. Бу ернинг феъли менга маълум; сенга неча маротаба айтган эдим. Мана, оқибат!

— Хайрият, худо бир асрари, — деди Ҳожи табиб.

— Сизни кўзлаган одамлар бор экан, — деди Бадиа, — ўша Чалабий... Уни ўлди, дейишган эди-ку?

— Чалабий бўлмаса бошқалари бор. Улар мени ўлдиришлари мумкин. Бу жуда осон. Аммо улар ме-нинг илдиз-томирларимни узиб, секин-аста қуритмоқ-чи. Шу йўл билан мени: «у меъмор эмас, шунчаки жўн одам эди. Мана, Бухорода мадраса қурмоқчи бўлди, курби етмай, иш бузилди. Ҳиротдагини меъ-морлар меъмори устод Қавом раҳбарлигига, Ахмад Чалабий кўмагида курган эди...» деб гап тарқатмоқчи бўлганлар. Бу йўл билан илмпарвар Мирзо Улугбек-

ни ҳам «бизга ўхшаган шубҳалик» одамлардан ҳазар қилишга чакирмоқчилар. Ҳали жанг тугагани йўқ. Мен тирик эканман, жанг тугамайди. Жон қизим, энди ўзингга эҳтиёт бўл, кўчаларга кўп чиқма!

Бадиа хўп, дегандай бош қимирлатди. Лекин эртасига хонада ҳеч ким йўқлигидан фойдаланиб, чиройли баҳмал нимчаси ёнига латтадан билинмайдиган кичик филофча тикиб, сандиқнинг бир чеккасида ётган кичкина ханжарини солиб қўйди. Бу ишни ҳеч ким билмайди, деб ўйлади. Дарҳақиқат, уста Нусрат хонадонида бу ишни ҳеч ким билмади. Фақат Зулфиқор сездию, ўзини билмаганликка солди.

— Қўлингда ғишт бўлмаганда, қароқчи бир-икки мушт урганда, нима бўларди? — деди Зулфиқор тунда Бадиага тикилиб.

— Фақат ўша уйда ўлигим қоларди.
— Ҳиротда ҳам хушторларинг бор эди.
— Ҳа, мана! — деди у қўли билан Зулфиқорнинг ўзини кўрсатиб.

Улар эру хотин Чўли бобо берган каттакон почапўстин устида бир-бирларига хумор кўзларини тикиб, талпинишар эди...

XLIII б о б

ТАРИХГА БИР НАЗАР

Қанча йиллар ўтиб кетди...

Талон-тарож, босди-босдилар товсилиб, Самарқанд ёнида Бухоронинг ҳам бир қадар осойишта тургани туфайли йиллар тез кечаётгандай туюлар эди. Мана орадан қанча йиллар кечибди, Меъморнинг иккى невараси ва бир эвараси бор. Катта невараси Меъморбек, бобо касбини давом эттириди. Яқинда у ҳам уйланиб, ўғил кўрди. Ўғлига тоғаси — Низомиддиннинг номини кўйишиди. Иккинчи невара қиз бўлиб, унга бир кам тўқсонга кириб ўтирган бувиси — Маъсумаbekанинг исмини кўйишиди. Меъмор қариб, мункиллаб юрибди. Унинг қадрдон дўстларидан биргина Ҳусайнбекдан ташқари ҳаммалари соғ-саломат.

Меъмор қариб қолганига қарамай, уни зарбоф чо-понларга ўраб, араваларда катта маъракаларга олиб боришар, унинг бир оғиз сўзию маслаҳатига умидвор кишилар Бухорода тўлиб ётарди. У пиру бадавлат қариди, шаҳарнинг улуғлари — ҳоким қушбегию шайхулислому Жоме масжида имомию ҳамма казо-казолар улуғ ҳамшахарлари Меъморни бениҳоя хурмат қиладилар. Кечмишлари кўп аламли бўлган, донишманд Меъмор Мирзо Улугбек даврида қад кўтариб, фуқарою салтанат эҳтиромига сазовор бўлди. Унинг амали бўлмиш Мирзо Улугбек мадрасасида таҳсил кўрган қанча талабаю муллаваччалар Меъморни яхши билишар, Бухоронинг кўрки ва энг гавжум ерларидан бири бўлган Улугбек мадрасаси яркираб турар эди. Мехнат билан қаригани сабаблими, ҳар жума Меъмор кўлида ҳасса, пиёда битта-битта қадам ташлаб Жоме масжидига келарди. Унинг келаётганини кўриб, ёшлар, қариялар югуриб эшикдан чиқишар, янги гилему шолчаларини Меъморнинг оёғи остига ташлашарди, унинг шу қаторлашиб қолган гиламлар устидан босиб ўтишини, кўтариб чиқишган тўдакларига бир караб ёки унинг бошига қўл тегизиб, силаб ўтишини исташарди. Бизнинг фарзандимиз ҳам Меъмордек бўлсин, деб ирим қилишарди.

Нажмиддин Бухорий бўлса, Мовароуннахрда меъморчиликка, илму адабга, фалакиёт илмига равнақ берган жангу жадалларга ружу қилмаган, осойишталикини сақлаб турган Улугбек Мирзо номини хутбага қўшиб ўқир, у темурийзодаларнинг энг адолатлиси дерди. У Улугбек Мирзога ғоятда камоли эҳтиром билан қаради. Унинг «Зижи Кўрагоний» жадвалию китоблари хонасининг тўрида туради. Мамлакат ободлиги осойишталик, меъморчиликнинг тарақкий этиб кетгани туфайли Зулфиқору Бадиа, Заврагу Фаввос, Ҳасанбегу Абутолиблар ҳам Меъмор каби ўз нияту орзуларига етгандек, Бухорою Самарқандни дунёдаги энг адолатли шаҳар, деб хисоблардилар...

Аммо шу йиллари Мовароуннахрда ва унинг пойтахти — Самарқандда нима гаплар бўлмоқда, баъзилар билиб, баъзилар билмасди.

Гап шу ерга етганда, ҳурматли китобхон, Сизнинг диккатингизни яна тарихий саналарга тортаман:

... Улугбек Мирзо билан Дасти Қипчоқ ҳокими Бароқхон ўртасидаги муносабатлар тез орада бузилди. Бароқхон мустақил хон бўлишга ҳаракат қилиб, ўша вактда муҳим савдо шаҳари ҳисобланган Сифноқ, Сирдарё бўйидаги ерларни даъво қилиб чиқди. Бароқхон Сифноқ шаҳри унинг бобоси Ўрусхон қўлида бўлиб келганлигини ва бу шаҳарни бобоси обод қилганлигини даъвоси учун асосий важ қилиб кўрсатди.

Бунга жавобан Улугбек Сирдарё бўйида яшовчи кўчманчи Дасти Қипчоқка қарши юриш бошлади, унинг қўшинига укаси Мухаммад Жўқийнинг навкарлари ҳам келиб қўшилди. Юриш Улугбек Мирзо қўшинининг тор-мор бўлиши билан тугади. Бу мағлубиятдан кейин Улугбек Самарқанд тахтидан ва Мовароуннаҳр хукмронлигидан ажралишига сал қолди. У юзи шувут бўлиб пойтахтга қайтиб келганида, душманлари бўлмиш руҳонийларнинг фитнаси билан шаҳарда унга қарши ҳаракат бошланади. Мутаассиб руҳонийлар шаҳар дарвозасини беркитиб, Улугбекни пойтахтга киритмасликни талаб қиласилар. Бу мағлубият Улугбекка шу қадар ёмон таъсир этадики, то отаси вафотига қадар ва ҳатто қипчоқлар ҳужум қилган пайтларида ҳам уларга қарши ҳеч қандай юриш кilmайди.

Шоҳруҳнинг вафот этиши билан Хуросонда ва Мовароуннаҳрда тўполонлар бошланиб кетди. Гавҳаршод бегим невараси Алайдавлани Темур тахтига ўтқазиш ниятида бўлса ҳам, бироқ бу ниятни очиқ айттолмади, чунки одатга кўра бу тахтга Шоҳруҳнинг катта ўғли Улугбек ўтириши керак эди. Улугбек Мирзо Хуросон тахтини босиб олмоқчи эканини ҳеч кимдан яширмади. Жуда мушкул бир пайт эди. Гавҳаршод бегим Улугбек Мирзо билан аччиғлашиб, лашкарга сардорлик қилишни Улугбекнинг ўғли Абдулатифга топширди. Орани бузмасликнинг ҳеч қандай иложи йўқ эди. Чунки Улугбекка қарши, Алайдавла билан Абулқосим Бобир (бу ҳам Бойсунқурнинг ўғли) ўзича ҳарбий ҳаракат бошла-

дилар. Алауддавла Машҳадни, Абулқосим Бобир эса Мозандаронни босиб олди.

Алауддавла Абдулатиф қўшинини тор-мор келтириб, ўзини асир олди ва Ҳиротдаги Ихтиёридин қалъасига қамаб қўйди. Улуғбек ўз ўғлининг қурбон бўлишини истамай, Алауддавлага ярашишни таклиф қилди. Алауддавла бу таклифни қабул этди, чунки ҳеч кимга бўйсунмай қўйган укаси Абулқосим Бобир Ҳиротни босиб олиши мумкин эди. Тузилган битимга кўра Абдулатиф Самарқандга юборилди. Улуғбек эса Ҳиротга ва Ҳурсонга қилган даъволаридан воз кечди.

Шартноманинг қайси бир моддаси бузилганлигини важ қилиб, Улуғбек 1448 йилда Абдулатиф билан биргаликда яна уруш ҳаракатларини бошлади. Ҳиротдан 14 фарсан нарида, Тарноб деган жойда Алауддавланинг қўшини тор-мор келтирилди ва Улуғбек Мирзо ўғли билан бирга Ҳиротга киради. Ҳурсоннинг босиб олинишига амирларнинг исёни ва Абулхайрхон бошчилигида қўчманчи ўзбекларнинг Мовароуннахрга бостириб киришлари халақит берди... Улуғбекнинг Ҳурсонга юриши Самарқанд ҳокими ҳаётида бурилиш нуктаси ва унинг шухратпаст ўғли Абдулатиф билан душманлигининг бошланиши бўлди. Манбаларда ёзилишича, Тарноб ёнидаги жанг вактида Улуғбек Мирзоadolatsizlik қилиб, ғалабани ҳақли равишда иш кўрсатган Абдулатиф номидан эмас, балки иккинчи ўғли Абдулазиз номидан эълон қилган. Абдулатиф Шоҳруҳ даврида ҳурматда ва шухратда яшаган эди. Ота билан ўғли ўртасидаги бундай совуқ муносабатларнинг вужудга келишига қора кучлар сабаб бўлди, албатта. Улуғбек Абдулатифни Ҳиротнинг беги қилиб қолдириб, аҳолига бу шаҳар ва вилоят Темур даврида бўлганидек яна кичик беклигича қолади, деб кўрсатди. Фазабланган Абдулатиф отасининг душманлари билан яширин тил бириктириди. Отасининг қийин аҳволда қолганини пайқаб, унга қарши уруш бошламоқ учун кулай фурсатни кутди. Абдулатиф ўз беклигига «тамға»ни, яъни савдо-сотикдан олинадиган йигинни бекор қилди. Улуғбек Ҳиндистонга борадиган савдо йўли ўтган Балҳдаги бу йигинга катта эътибор берарди. Давлатнинг яхлитлигини сақлаб қолмок

учун ўзининг исёнкор ва маккор ўлига қарши юриш қилишдан бошқа иложи қолмади. У иккинчи ўғли Абдулазизни Самарқандда ноиб қилиб қолдирди. Аммо Абдулазиз Улуғбек қўшинидаги амирларнинг оиласа-рига нисбатан зўрлик сиёсатини юргизди ва бу эса пойтахтда катта норозиликка сабаб бўлди. Фазаблан-ган амирлар Улуғбекни Абдулатиф кўлига топширо-моқчи бўлдилар.

Кейинчалик Абдулатиф қўшинига қарши Жайҳун бўйида лашкар тузиб турган Улуғбек Самарқандда тартиб ўрнатиш учун пойтахтга қайтади ва Самарқандда Мироншоҳ қавчинни ноиб қилиб қолдирив, яна юришга чиқади. Бу вақтда Абдулатиф Амударёдан ўтиб Термизни босиб олади ва йўл-йўлакай Шахрисабзи қўлга олиб, Самарқандга қараб йўл олади. Куз кунларида Самарқандга якин Дамашқ деган қишлоқ яқинида қаттиқ жанг бўлади ва жангда Абдулатиф ғолиб чиқади. Самарқанд амири Мироншоҳ шаҳар дарвозаларини беркиттириб Улуғбекни шаҳарга қўймайди... У Шоҳруҳияга ҳам киролмайди ва Абдулатифга таслим бўлишга мажбур бўлади. Абдулатиф отаси устидан яширин суд уюштириб, ўзи суднинг чиқарган қароридан «четда туради» — ҳақиқатда эса милодий ҳисоби билан 1449 йилнинг 27 октябрида отасининг ўлдирилишини уюштиради. Орадан бир неча кун ўтгач, Абдулатиф ўз укаси Абдулазиз ва Улуғбекка содик бўлган амирларни ўлдиритириб, темурийлар тож-тахтини эгаллайди. Ўзаро тож-тахт талашлари Абдулатифни ёвуз инсонга, отасининг қотилига айлантиради. Абдулатифнинг қиска муддатли ҳукмронлиги даврида қора дарвешчилик катта имкониятга эга бўлди. Янги ҳукумат расмий мусулмон руҳонийларининг ашаддий қисми орасида ўзига мустаҳкам таянч топганидек, бу дарвешлар ҳам уни қўллаб-қувватладилар. Ўз отасини ўлдирган қотил ҳукмдорни халқ ҳам, зодагонлар ҳам жуда ёмон кўрардилар, бу эса ўтакетган шухратпаст Абдулатифнинг жигига тегар ва андаккина бўйин товлаган кимсаларни қаттиқ жазоларди. Сарой зодагонлари орасида Абдулатифга қарши фитна тайёрла-нади ва бу фитна 1450 йилнинг 8 майида катта тўнта-ришга олиб келади. Шаҳар хандаги ёнида, Бофинавдан

сал нарирокда Абдулатиф ўлдирилади. Тарихчи Мирхонд ёзганидек, қасоскорлар ҳеч кимдан яширинмай Абдулатифнинг калласини Самарқандга олиб келиб, Регистонга илиб қўядилар.

Абдулатиф ўлдирилгандан сўнг ҳокимият ИброХим Султоннинг ўғли Абдулло Мирзога ўтади...

Кирк йил ичидаги гаплар бўлиб ўтди. Қариб қолган Меъмор хаёлидан аввалги уч йилу кейинги ўттиз етти йил ҳам бир бўлди; умрга татийдиган алам чеккан Меъмор кейинги йилларни осоиишта ўтказиб, оёғини узатиб, тинч ва обрў билан фоний дунё ғалвалиридан қутулиб, бокий дунё фароғатига ўтиш, болачақасини орқада қолдириб, бу дунё билан видолашиб тараддуудида эди.

Аммо...

XLIV б о б

АБУСАЙИД ХУЖУМИ

Султон Абусайид Мирзонинг кучли қўшин билан бостириб келаётгани хабари Бухорони ларзага солди... Улуғбегу Абдулатиф, — ота-бала ўртасидаги ифвою жанжал оқибатида Абусайид Мирзо Бухорода яна ҳам куч тўплаб, Даشتி Қипчоқ ҳокими Абулхайрхон билан аҳдлашиб, бу ердан Самарқандга ҳужум бошлишни кўзда тутарди.

Жума кунидан бошлаб Бухоро дарвозалари беркитилиб, бир қисм навқару сарбозлар шаҳардан ташқарига чиқди. Тезликда Самарқандга Улуғбек Мирзога анчолар орқали нома жўнатилди. Қариб қолган Шоҳ Малик шиддаткор ва айни вактда анча тадбиркору серғайрат бу ёш темурийзодани биларди, унинг баъзи эътиборли одамлар билан тил биритиргани-ю тўсатдан ҳужум қилишини ҳам сезарди. Абусайид Мирzonинг ҳужумига бардош беролмаслик хавфи юрагига ғулгула солиб, Самарқанд олдида шарманда бўлишдан ҳам қўрқарди. «Абусайид Мирзога дарвозаларни очиб қўйиш керак, де-

ган ҳожи Мұхаммад Порсо. Бу хиёнат-ку», — деди ичида ҳоким, аммо бу сўзни тилига чиқара олмади. Шайхулисломнинг Улугбек Мирзога очикдан-очиқ тескари бўлиб олганини кўрган Тархон ёқасини ушлади, ҳазратнинг оғир кунларида бу дини ислом пешволарининг сотқинлик йўлига ўтиб олишгани ҳам тасодиф эмаслигини сезарди.

Мовароуннахру Хурсондаги танглик, амирзодалардан Алауддавла, Абулқосим Бобур ва Абдулатиф, Абдулазиз, Абдуллолар... ўртасидаги жанг ва бунинг устига Абусайид Мирзонинг катта қўшин тузгани Тархон танидаги жонни суғуриб олди. Мўғуллар яжуж-маъжуждек бостириб келгани каби яна шаҳарда қирғину вайроналиклар бошланади, Улугбек Мирзо тузган сиёсату салтанат вайрон бўлади, содик кишилар, уламою фузало қатли ом этилар эканда! Абусайид Мирзони Бухорога киритмаслик тадбир-чораларини кўра бошлади. Шаҳар ахлини каттадан кичиги қўлга курол олиб, Бухорони мудофаа этишга чақирди. Шу кезлари Абулхайрхоннинг Сайхун бўйида кипчоқларга қарши қальяга айлантирилган Яssi шаҳрини босиб олгани-ю, ундан сўнг Самарқандга келаётганидан Тархоннинг мутлақо хабари йўқ эди...

Якшанба куни шаҳарнинг Қарши дарвозасидан уч фарсаҳ нарида икки томон сарбозлари тўқнашиб, бир муддатлик тўс-тўполон жангдан сўнг бухороликлар тор-мор этилди. Ярадор Шоҳ Малик тархонни олиб, бир тўда отликлар шаҳарга қочиб кириб, қалья деворлари ва айниқса Қарши, Самарқанд, Мозори Шариф дарвозалари ёнида мудофаани кучайтиришди. Ярадор Тархон тўдасида шаҳарга қочиб кирган отликлар ичида Заврак Нишопурий ҳам бор эди. У юзбоши сардорнинг руҳсати билан от чоптириб Деггарон маҳалласига келиб, қариб колган уста Нусратга ўғли Зулфиқор билан невараси Меъморбек ҳалок бўлганини маълум қилди. Ўлганлар жуда кўп эканини шошапиша айтиб, ҳаллослаб, бир ёғлого сув ичди, отига ҳам сув тутди. Бу гапни эшитган Зулфиқорнинг онаси оҳ уриб, дод сола бошлади. Ҳовлида ўтирган Маъсума бека, Завракнинг хотини — Қорақиз, қариб қол-

ган меъмор Нажмиддин Бухорийлар саросимага тушишди. Ранги оқариб кетган Бадиа югуриб уйга кирди-да, Зулфиқорнинг этигини, устидан унинг чонини кийиб, сочини қалпок билан бостириб олди. Қалин камар билан белини танғиб боғлаб, этиги кўнжига ўзининг ўтқир ханжарини тиқди, қўлида акаси Низомиддиннинг ўша димишқий қиличини филофдан сууриб, ҳовлига чиқди.

— Сизлар энди мени йўлдан қайтаролмайсизлар! — деди Бадиа худди эри Зулфиқорга ўхшаб кийиниб, қилич яланғочлаб ҳовли ўртасида туриб. — Онажон, йиғламанг, мен ўғлимни ўлдирғанлардан ўч оламан!

У сакраб Завракнинг отига минди.

— Сиз, Нишопурый, пиёда боринг! Мен Тархон ҳазратлари хизматига пиёда борсам бўлмайди. Қани кетдик! — у отга қамчи босиб, Қарши дарвозаси томон чопди. Бадианинг орқасидан белига осиғлик қиличини қўлига ушлаб олган Заврак Нишопурый айланма тор кўчалардан ўтиб, дарвоза томон ҳаллослаб югуради.

Кўчалар жимжит. Тархоннинг қаттиқ яраланиб шаҳарга қочиб кирганини эшитганлар уй-уйларига кириб, бекиниб ўтиришарди. Шаҳар қамал қилингани бу вахимани яна ҳам кучайтириб юборди. Дарвозалар ёнидаги сарбозлар юриб туриши, бостириб кириб қолажак душманга қарши тадбир-чоралар кўрилаётганини ҳисобга олмагандан, шаҳар ўлик ҳолда эди. Фақат Минараи Калон ўттада бошини баланд кўтариб, хўмрашиб турарди. Мадрасалар ҳам жимжит, фалакиёт мударрислари, ҳандасаю риёзиёт муллолари учун сичқоннинг ини минг танга бўлиб кетган эди.

Сардор от чоптириб келган Бадиани танимай, ҳайрон бўлиб турди. Шу лаҳза Заврак Нишопурый ҳам пиёда етиб келди.

— Сен кимсен? — сўради отда турган сардор.

— Мен Бадиуззамонман!

— Бадиуззамон бўлсанг шу пайтгача қаёқда юрган эдинг?

— Суриштирадиган пайт эмас, сардор жаноблари!

Сардор пешанасидаги жароҳатни ушлаб таажжуబланиб, Заврак Нишопурийга ишора қилди:

— Бор, иним, анави отлардан бирига миниб ол!

Бир муддатдан сўнг Арк томондан от чоптириб келган сарбоз йигит сардорнинг қулогига бир нима деб шивирлади. Сардор отда турган ҳолда юзига фотиха тортди.

— Тархон жаноблари дунёдан ўтибдилар, — деди сардор ёнидаги отликقا. У ҳам юзига фотиха тортди.

Сардор йигитларга тезда дарвоза тепасига қайноқ қорамой, харсангтошлар олиб чиқиб қўйишни, қоринни тўйдириб, отларни ҳам сугориб олишни буюрди.

Қош қорайишига яқин ҳовлиқиб келган бир отлик Шайх Жалол дарвозаси очилиб, душман шаҳарга бостириб кираётганини айтди.

— Ё алҳазар! Ичимизда хоин бор экан! Дарвоза нега очилади! — деди сардор. Кейин жадаллик билан ўз сарбозларини бошлаб ўша томонга от солиб кетишиди.

Шайх Жалол дарвозасига етмасданоқ кўчада икки томон отликлари тўқнашиб, бир-бирларига ҳамла қилишди.

Титраб, от чоптириб келаётган Бадиа кўчани тўлдириб келаётган ролиб ва мағрур душман отликларидан бирига рўпара бўлиб, жон-жаҳди билан қилич солди. Отлик ялт этиб тушган ногаҳоний қиличини пайқамай ҳам қолди. У гурсса ерга қулади. Шу дамнинг ўзидаёқ Бадиа чап томонидаги отликقا ҳам қилич урди. Димишқий исфахон Абусайид сарбозининг орқа бўйнига тегдими, у салом бергандек боши ерга эгилди-ю, кўзларини ола-кула қилиб йиқилди. Бадиага қилич уришга қўл кўтараётган отликнинг орқасидан дарҳол Заврак қилич урди. Аммо отликлар орасида қолган Завракнинг елкасига ҳам қилич тушиб, ерга қулади. Бу ҳолни Бадиа кўрмади. У рўпара келган сарбозга қилич уриб қулатарди. Унинг танида қандайдир фавқулодда, файри табиий бир куч пайдо бўлиб, мушукдек олазарак, кўзлари косасидан чиқиб кетган, хеч нарсани сезмас, фақат рўпара келган душман сарбозига қилич билан човут соларди. У баъзан тагидаги отнинг бўшлигига қарамай, икки кўзи душманда, пайдарпай шарақа-шурук қилич уради. У ҳозир қиличи-

ни ҳам қўйиб, душманга сапчиб, тишлари билан томогини узиб ташлашга ҳам тайёрланарди. Душман сарбозлари рўпараларида қандайдир бир телба, эркакларга ўхшамай харакатлар қилаётган кимсага кўз ташлашиб, юракларига ваҳима тушди. Бу телба сарбоз ҳозирнинг ўзидаёқ тўрт кишини чопиб қулатди. Орқарод жанг қилиб, чекинишни мўлжаллаётган сардор «Бадиузвазон»нинг астойдил жанг қилаётганини кўриб, миясидан яшиндек бир фикр ўтди: «биров Бухоро учун жон бериб жон оляпти, бирор хоинлик қилиб дарвозани очиб беряпти...» Сардор ўз бошига қилич келиб тушмаслиги учун атрофига аланглар, бақирап, «Ур, ур!» деб ўз йигитларига қичкирарди.

Хозироқ қилич тушиб калласи узилиб кетишини хаёлига келтирмай, жуда ҳам эпчиллик қилиб, сарбозларга ҳамла қилаётган, рўпара бўлишмаган чоғда унинг ўзи отлиқлар устида бостириб бораётган, ҳеч нарсадан тан тортмай қилич солаётган «бухоролик»дан Абусайид сарбозлари чўчиди. Тор кўчага кириб келган душман сарбозидан уч киши ерга қулаб, бошқалари оти бошини қайриб, катта кўча томон қочди. Бу холни кўриб, танига жон кирган сардор: «Ҳа, ха! Қочишиди, қувиймиз!» деди. Бадиа қочиб кетаётгандарни қувиб, катта кўчага, ундан мадраса рўпарасидаги майдонга чиқиб, орқасидан етиб келган бухоролик сарбозлар билан бирга жангга қўшилиб кетди. Улуғбек мадрасаси ёнидаги жанг қисқа бўлди; бу ерга қуйилиб келган Абусайид сарбозлари бир лаҳзадаёқ бухороликларни чопиб ташлади. Отдан қулаб, ерда оғзидан қон оқиб ётган сардорга кўзи тушган Бадиа: «Мана энди, сардор ҳазратлари, мени суриштирасиз...» деди ичида. Шу лаҳза унинг қўлига тушган кучли бир зарба қилични учираиб юборди. У сўл қўлинни этиги қўнжига тикиб, ханжарини олаётган эди, отига қилич тегиб, икковлари ҳам баробар ерга кулашди. Йиқилган Бадиа узангидан оёғини чиқариб олаётганида атай уни ўртага олган уч-тўрт сарбоз отдан сакраб тушиб, қўлларини бураб ерга босишли. Қўлларини маҳкам боғлаб, бўйнига арқон ташлашди. Бадиа тор кўчадаги жангдан душманни суриб, катта

кўчага ва ундан Улугбек мадрасаси ёнидаги майдонга чиққанида узун соchlари елкасига тушиб қолган эди. Кочиб чиққан сарбозлар бухороликлар тамом саваланиб, чопиб ташлангандан кейин бу «бухоролик»нинг сочига кўзлари тушиб, таажжуб билан ишора қилиб сардорларига кўрсатиши. Унинг гайри инсоний бир куч ва жуда усталик билан жанг қилаётганига ҳайратланишарди. Уни Шоҳ Малик тархоннинг қизи хаёл қилишиб, тутиб олишди. Жанг тугаб Абусайид Мирзо кўшини ҳамма дарвозалардан кириб, шахарни босди.

Қилич яланғочлаб, от чоптириб кетган Бадиадан дарак бўлмагач, Меъмор ҳассасига таяниб, тўппа-тўғри шаҳар ўртасига — Арк томонга юра бошлади. У кўчаларда ағаниб ётган ўликлар тепасига келиб, шу Бадиа эмасмикан, деб юзига тикилиб карап эди. Назарида, фавқулодда куч кашф этган жигарпораси Бадиа ҳам мана шу одамлардек қаердадир калласи учиб ётгандек бўларди. Уни «Борма!» деб тўхтатиш асло мумкин эмас эди, унинг феълини отаси яхши биларди. Чол ҳассасига таяниб, Арк томон борарди. Кўчаларда юргурган отликлар, у ёқдан-бу ёққа кўли боғланниб олиб кетилаётган мансабдорлар... Чолни назар-писанд қилмай ўтиб кетишар, уни кўр деб ўйлашар эди. Йўқ, унинг кўзлари очик! У ҳамма нарсани кўриб борарди; у эртанги вайроналик, эртанги таъқибу таъналарни ҳам кўриб борарди. Кимга тўю кимга аза! Лекин ҳаммадан ҳам даҳшатлиси — Шайх Жалол дарвозасининг очиб берилиши бўлди. Бу ишни ким қилган экан? Кимнинг буйруғи билан дарвоза очилди экан? Абусайид Мирзонинг кучли кўшини хозирги пайтда Бухорога кириб келиши мукаррар эди ва лекин Улугбек Мирзодан жавоб олмай туриб, шаҳар дарвозаларини очиб бериш — хиёнат! Эҳтимол, Мирзо Улугбек ўз амакивачасининг ўғли Абусайиднинг катта лашкар билан интилишини билиб, бежанг Бухорога ҳоким этиб тайинларди. Йўқ, Мироншоҳнинг димоғдор ва тадбиркор, айёр невараиси Улувбекка тобе эмас, уни ағдариб, Амир Темур тахтига ўтиришни истарди. Бу мақсад кўпдан Мирзо Улувбекка, унга

содик одамларга маълум эди. Аммо Хурросон томонда Алайдавла, Абдулқосим ва Абдуллоларнинг маҳкам тургани, Сайхуннинг нарига томонида Бароқ ўғлон ва Абулхайрхонлар қиличи ярқираб турганини мунажжим подшоҳ Самарқанддан туриб яққол кўрарди.

Меъмор, орқасидан етиб келган уста Нусрат билан Арк томон бурилмай Шайх Жалол дарвозаси томон юрди; дарвоза атрофларини қарашди. Бадиа йўқ. Ундан сўнг Улуғбек мадрасаси томон юришди, бу атрофда шиддатли жанг — қиличбозликлар бўлган эди. Ерда ётган ўликлар орасида Заврак Нишопурийни таниб, Меъмор ёнидан рўмолини олиб, мурданинг энгагини таниди. Икки чол Қарши дарвозаси томон юрди; ланг очилиб, йўлларда думалаб ётган қорамай қўйилган қозонлар орасидан ўтиб, шаҳар ташқарисига чиқишиди. Биринчи тўқнашувдаёқ катта қўшин ўраб олиб чопиб ташланган ўн-ўн беш чоғлиқ сарбозлар мурдаси ёнига келишиди. Далада сочилиб ётган мурдалар ичидан Зулфиқор билан неваралари Меъморбекни ҳам топиб олишиди. Нажмиддин Бухорий неварасининг мурдасини бағрига босиб, нола қилиб йиғлади. «Э, худо, қандоқ кунларга қолдим! Гуноҳларимиз шунчалик кўпмидики, бирваракайига фарзандимни ҳам, неварамни ҳам, шогирдимни ҳам қонга беладинг! Дод, фалакнинг дастидан! Менинг қайси гуноҳларим учун бунчалик азоб берасан, фалак!!!» Уста Нусрат бўлса Зулфиқорнинг бошини тиззаси устига қўйиб, пешанасини силаб, ағрайиб жим ўтиради. Унинг хаёли оғиб гўё «ухлаб ётган ўғли» бошини силаб ўтиради.

Тунда янги ҳоким, мансабдор кишиларнинг фармони билан аланталар ёруғида мурдалар йигиб олиниб, шаҳар кўрғони четидаги қабристонга дафн этилди. Бухороликлар ўз кишиларини уйларига олиб кетишиди. Ярадор сарбозлар ҳибсга олинган баъзи мансабдорлар ҳовлисига жойлаштирилди.

Меъмор билан уста Нусрат арава топиб келиб, ота-бала мурдани, Деггарон кўчасида ётган Заврак Нишопурий жасадини йўл-йўлакай уйга олиб келиб ётқизиб, тепаларига шам ёқишиди. Эрта билан шу ҳолда кафансиз кийимлари билан дафн этишиди. Кечга яқин маълум бўлишича, кулол ўғли Абуалию Фав-

вос Мұхаммад ҳам шу жаңгда ҳалок бўлган. Аммо баъзи одамлар Деггарон кўчасида, ундан кейин мадраса олдида жуда қаттиқ жаңг қилган эркак либосидаги аёлни кўрганларини айтишди. Бу аёл ё от чоптириб шаҳардан чиқиб кетди, ё бирон хонадонга яширинди, дейишди. Бу аёл сарбозларга қоплондек ташланиб, савалаб, чопиб, мўйлов бураган неча йўғон сарбозларни отдан ағанатгану, лекин унинг қаёққа фойиб бўлганини билишмасди. Ҳозир кўчаларда керилиб юрган Абусайднинг отлик навкарлари ҳам, аёл киши ҳам шундок қиличбозлик қиласидими деб таажжубланишарди. У ё Тархоннинг қизи ва ёки Мирзо Улуғбек келинларидан бири, дейишарди. Лекин ҳамма шу аёл тафсилотини аниқроқ билишга қизиқарди.

Ўша куни якшанба оқшомида Шайх Жалол дарвозаси шайхулислом Ҳожи Мұхаммад Порсо топширифи билан очилган. Сўнг Қарши ва Самарқанд дарвозалари ҳам... Бир неча отлик уламолар билан бирга Қарши дарвозасидан ташқари чиққан Ҳожи Мұхаммад Порсо Султон Абусайд Мирзони оқ отга миндириб, шаҳар ичига олиб киришди. Абусайд тўппа-тўғри Аркка кўтарилиб, катта ҳовлидаги қадимий таҳтга ўтирди.

Шаҳарнинг ҳамма томони эгалланиб, Абусайд кишилари тили билан айтилганда, «тинчиб, саранжом» килиб олингач, саркардаларнинг бу ҳақдаги ахборотларидан кейин, шу Аркнинг ўзида «улуғлар учун» зиёфат берилиб, тўрда Абусайд Мирзо ёнида Ҳожи Мұхаммад Порсо ўтириб, кўп нарсаларни гаплашиб олишди...

Эрта билан Султон Абусайд Мирзо Бухоро шахрининг кўпгина руҳоний ва номдор кишиларини чорлаб, улар билан қисқа мулоқотда бўлди. Саркардалар томонидан кечаги жаңгда бухороликлар ичидаги хотин киши бўлгани, жуда яхши жаңг қилиб, тахминан ети-саккизта ном чиқарган сарбозни ер тишлатганини айтишди. Бу гап кечадан бери Абусайднинг диққатини тортиб, ҳайрон бўлиб ўтирган эди. Эрта билан у ўша хотинни олиб келишни буюрди. Орадан бир соатча вақт ўтга, ясовулхонада қўллари боғлоклиқ Бадиани аравага солиб Аркка олиб келишди.

Унинг кўлларини ечиб, бир коса сув ичиришди. Ўзини бир қатор тартибга солиб олгач, оёғида этиқ, белида камар — эркакча кийинган, аммо соchlари елкаси билан битта тўзилган аёлни икки қилич яланғочлаган навкар Абусайид Мирзо ёнига олиб кирди. Тахтда ўтирган Абусайид навкарларга, аёлни яқинроқ олиб келинглар, деди. Бадиани тахтга жуда яқин олиб бориб, Мирзога қамти қилишди. Абусайид Мирзо аёлга тикилиб қаради. Ўрта яшар бўлишига қарамай, қандайдир келишган, ингичка бел, елкаю кўкси кенг эканини кўрди. Унинг оппоқ юзи, тўзиган соchlари ва қонли қўлларига қарамай учиб кетаётган қалдирғочдек қошлари... аёлнинг қандайдир аслзодалар оиласиданмикан ёки бу Улуғбек Мирзонинг ё кичик қизи, ё неварасимикан, деган хаёл ҳам кўнглидан ўтди.

Ўз навбатида мағлуб Бадиа ҳам рўпарасида, тахтда ўтирган Абусайидга қаради; унинг юзлари гўштдорлигидан маккорлик билан тутиб олиб, уни зах ҳужрага қамаб қўйган қароқчига ўхшарди. Агар бошидаги жигаю тахту заррин камари бўлмаса ўша қароқчинг ўзгинаси эди.

Бир лаҳза сукутдан кейин Абусайид Бадиага савол берди:

— Кимнинг заифасисан? Нечун мардум ишига аралашдинг?

— Юртни босқинчидан ҳимоя қилиш ҳамманинг иши! — деди босиқлик билан Бадиа. — Мен, меъмор Нажмиддин Бухорийнинг қизимен!

— Меъморнинг фарзанди меъмор бўлмоғи лозим. Агар қизи бўлса, эрининг хотини бўлмоғи керак. Нечун сен илкинга қилич тутдинг!?

— Сенинг сарбозларинг фарзандимни ўлдирди. Мен — онамен! Кучим етганда ҳамма амирзодаларни қириб ташлардим!

Абусайид дарғазаб, навкарларга ишора қилди:

— Бу жангари макиённи олиб чиқиб, бошини узиб ташланглар!

Навкарлар Бадиага ёпишиб, қўлларини бураб, судраганча ташқарига олиб чиқишли. Шу фурсатнинг ўзидаёқ уни аравага босиб, Аркдан ташқаридаги бир эгасиз ҳовлига олиб киришди. Навкарлар-

дан бири қиличини филофидан чиқариб, Бадианинг бўйнига чунонам зарб билан урди-ки, унинг боши узилиб кетди. Абусайднинг бешафқат сарбозлари дунёдаги энг гўзал аёлни ўлдиришди. Улар муштипар бир онани ҳам ўлдиришди. Қисматинг ғоятда оғир бўлди Бадиа!

Уста Нусрат Бадиани Зулфиқор билан Меъморбек қабри ёнига дағн этди. Икки кун ўтгач, шу ерга Маъсума бека ҳам кўйилди...

Бухорода ўлди-ўлди кўпайиб, фуқаро орасида Абусайд Мирзонинг келиши бехосият бўлди, деган гаплар тарқалди. Лекин «қари қузғун» деб ном олган Ҳожи Муҳаммад Порсо Султон Абусайд салтанатида ҳам илгаригидай шаъну шавкат билан яшайверди. У бу ҳокимга ҳам мос келиб, Бухоронинг устунларидан бири бўлиб тураверди.

Орадан кўп ўтмай Самарқанддан юқори мансабдор бир одам келиб, подшоҳ Улуғбек Мирзо ҳазратлари Султон Абусайд Мирзона тан олганлиги, Мирзо «адолатли» темурийзодалардан эканини, бари бир яқин фурсат ичидан қариб қолган Шоҳ Малик тархонни Самарқандга чакириб олиб, ўрнига Абусайд Мирзона ҳоким этиш ниятлари ҳам бор эди, деган гапни айтди. Аркда бўлган катта зиёфатда Самарқанддан келган мансабдорга заррин тўн кийгизилиб, катта обру билан Самарқандга жўнатилди.

Бу тадбирлар тепасида Ҳожи Муҳаммад Порсо туриб, у Абусайдга: «Мана шу йўл билан, яъни бир ўқ билан икки қарғани урасиз», деди. Чунончи, фуқаро тинчийди ва Абулхайрхон, Бароқ ўғлон бир томон, ўғиллари бир томон, танглиқда қолган Улуғбек Мирзо сизга шўбҳа билан қарамайди, Бухоро унинг наздида тинч ва осойишта бўлиб туради. Бу, сиз ҳазрат учун қулайлик туғдиради, куч тўплайсиз. Лашкар қудратга тўлган бир муддатда Самарқандга юриш қилиб, бобонгизнинг таҳтини даъво қиласиз.

Бу гапларни эшитган Абусайд илжайиб шайхулисломга меҳр билан қаради. Чунки Ҳожи Муҳаммад Порсо унинг юрагидаги гапларини айтган эди.

Яна бир йил ўтди. Бухоро гўё тинчили...

Ҳар пайшанба Меъмор эвараси Низомиддинни етаклаган ҳолда қабристонга кириб, бунда ётган күёви, невараси ҳамда хотини Маъсума бека, қизи Бадиа қабрлари ёнига келиб, тиловат қиласар, ундан сўнг, «Қабристони мусофирон»га бориб, Заврак Нишопурӣ, Favvos Муҳаммад, Абутолиб, Абуали, Ҳасанбек, Ҳусайнбеклар қабри тепасида ҳам дуо ўқиб, уйига қайтиб келарди. Эртасига жума куни катта масжидга бориб намоз ўқирди. Кунлар мана шундай бир хил хафақонликда ўта бошлади. Чол жуда ҳам мункиллаб қолган, бола-чақаларидан ажралиб, ёлғиз ўзи Намозгоҳдаги ҳовлисида турарди. Амакиваччаларнинг болалари, қўшнилар чолдан ҳабар олишиб туришарди.

Шу йиллари Бухорода деярли бирон катта курилиш бўлмади. Усталар ҳам, меъморлару наққошлар ҳам ҳар томонга тўзғиб кетишиди. Меъмор ғоятда қариб, юз ёшга яқинлашган сабабли бирон одам уни иморат солишга раҳбарлик килиш у ёқда турсин, маслаҳатга ҳам чақиришмасди. Дастребаки йиллар фарзандларининг Абусайд Мирзога карши жангда ўлганини билган ҳар бир бой ёки мансабдор Меъмордан ўзини олиб қочар, бу девонасифат бўлиб қолган машҳур устага яқин йўлашмасди.

Келаси жума куни Меъмор бир қўлида хасса, бир ёнида эвараси Низомиддини соний, яна катта масжидга келди. Намози жумани ўқиб бўлгач, масжиддан чиқиб кетаётганида эшикда кутиб турган мутавалли Меъмордан бир лаҳза сабр қилишни, бугунги намозда ўзлари имомликка ўтган Ҳожи Муҳаммад Порсо зоти поклари уни ўз хузурларига, хонақоҳ меҳроби ёнига чорлаётганини маълум килди. Меъмор эварасига кўчада кутиб тура тур, деб ўзи ҳассасини дўқиллатиб, мутавалли билан бирга масжиднинг обиғиши ётқизилган кенг ҳовлисига юра бошлади. У меҳробга етиб келгач, ичкарида, гумбаз остида салқин, ярим қоронги хонада гилам устида тасбех ўгириб ўтирган уч-тўрт кишига кўзи тушди. Энг юқорида Ҳожи Муҳаммад Порсо ўтиради.

— Ассалому алайкум! — Меъмор кириши билан ўтирганларга салом берди.

— Баалайкум ассалом! — деди тўрда ўтирган Ҳожи Мұхаммад Порсо, — келинг, Меъмор, ўтириң!

Меъмор этакроққа чўкиб, қўлини фотиҳага жуфтлади...

— Саломат юрибсизми, Меъмор? — Ҳожи Мұхаммад Порсо жуда қариб қолган Меъморга, атай эшитсан деб, шанғиллаб гапирди. Уни яхши эшитмайди, деб ўйлаган эди.

— Шукур, тупрокдан ташқари...

— Чақиртирганимнинг боиси, эртагами, индингами янги лиbosларингизни кийиб келинг, сизни Аркка, Султон Абусайид Мирзо хузурларига олиб кирмоқчимен. У ҳазрат ҳам, иншоолло, ахли уламою фузалога яхши қарайдилар.

— У ҳазратга учрашадиган ҳеч юмушим қолмади энди, таксир, — деди сиполик билан Меъмор. — Мен энди факат мункар-накирга йўлиқиб, сўрок беришдан бошқа нарсани ўйламаймен.

— Ноумид шайтон, ундоқ деманг, Меъмор!

— Шу ёшгача хоинлик қилганим йўқ, энди қолган умримда мени бу ишга тортолмайсиз!

Ҳожи Мұхаммад Порсо ҳам, ўтирганлар ҳам жим бўлиб қолишиди.

— Куфр гапни айтдингиз! — деди Ҳожи Мұхаммад Порсонинг ранги ўчиб бир зумдан кейин. — Елкангизга шайтон миниби.

— Ҳақ гапни айтдим! — деди Меъмор Ҳожи Мұхаммад Порсога ўқрайиб. — Сиз хиёнат қилиб, Улуғбек Мирзо юзига оёқ тирадингиз! Бухоро дарбозаларини босқинчига очиб бердингиз! Махшар куни Мирзо Улуғбек юзига қандай қарайсиз?

— Улуғбек дини исломга зид ишлар қилди. У кофир!

— Улуғбек Мирзо жоҳил ва хиёнаткор кимсаларга зид иш қилди! — деди ўрнидан туриб Меъмор. Сўнг ҳассасини тўқиллатиб Жоме масжиди ҳовлисидан ўтиб, кўчага чиқиб кетди. Масжид дарвозасидан уни кузатиб турган эвараси Низомиддин дархол бобосининг қўлидан ушлаб, уйга бошлаб келди.

Шу воқеа сабаб бўлиб, Меъмор катта масжидга мутлақо бормай қўйди. Ўша куни масжид ахли уни

ур калтак-сур калтак қилиши ҳам мумкин эди, аммо бу ишга Ҳожи Мухаммад Порсо рухсат беролмади: «Қўяверинглар, унинг ўзи эътибордан четда қолиб, итдек ўлиб кетади...» деди.

ХОТИМА

*Сен гарчи гуҳар дўқони очдинг,
Лекин бу гуҳарни элга сочдинг.*

Навоий

Юз ёшлардан ошиб, мункиллаб қолган меъмор Нажмиддин Бухорий ҳассасига таяниб Бухоро кўчалирида юрарди. Юзини қоплаган соқол-мўйлаби, кўзлари устига ўсиб тушган бароқ қошлари оппоқ оқарған, тарам-тарам суклардан иборат кўкраги ҳам мадраса оби фишти каби сарғиш эди. Бошида эски малла ранг салла, устида кўкси очиқ оқ кўйлак-лозим, оёғида кавуш... Хеч ким билан иши йўқ, эрта билан Намозгоҳдаги ўзининг кўхна ховлисидан чикқач, харсанг ётқизилган чет роҳаларда битта-битта босиб мадрасалар ёнига келарди. Минораи Калон атрофидан ўтиб, Масжиди Калоннинг баланд деворлари остидаги соядада тўхтар, ундан сўнг қубба гумбазлар — Тоқи Заргарон остидаги одамлар ғужғон урган бозорга кирар, салқин тимлар остидан ўтиб, лимиллаб турган Тошховуз лабида бир лаҳза нафасини ростлаб оларди. Кетидан атай ирим қилиб эргашиб юрган мешкобчининг заранг косадаги сувидан мирикиб иchar, «девона чол» деб атрофини ўраган майда болаларга ҳам эътибор бермасди. У яна ўрнидан туради-да, ҳассасига тираниб йўлида давом этарди. Чолнинг келаётганини кўриб, баъзилар эшак араваларини бир дам тўхтатиб, ўтиб кетгунича қараб туришар, баъзи бесабрлар эса мункиллаб қолган Меъморни туртиб ўтиб кетишар, аммо чол бунга асло парво қилмасди. Рўпарадан келаётган аравакаш ва ёки ҳаммоллар албатта унга йўл беришарди; елкаларида оғир юқ бўлишига қарамай, бир лаҳза сабр этиб, Меъмор ўтиб кетгунича қараб туришарди.

Меъмор баъзи кунлари эрта билан Улугбек мадрасаси «гулчамбар»ига суюниб, ожизлашган хира кўзлари билан қуёшга тикиларди. Нурсиз кўзлари ёшланиб, қоронғилашиб кетганига қадар тикилиб турар, нималарнидир пичирларди: «Мадраса гумбази устидан қовар ўсиб чиқиби, уни йўқотиш керак!» дерди ўзига ўзи. Фиштин бинолардаги қовар унинг кўзига илон бўлиб кўринарди. Кўчадан ўтиб кетаётган кишиларга ҳам парво қилмас, уни бухороликлар ўзларининг улуғ ҳамشاҳарлари эканини билиб, хайратланиб, тикилиб ўтиб кетишарди. Баъзан бу табаррук чол ва улуғ мутафаккирнинг оёғи остига яҳги гиласмини уйидан олиб чиқиб ташлайдиган хотин-халажлар ҳам учраб қоларди. Аммо у бу ишни сезиб қолиб дарҳол тупроққа ўтар, одамларга бундок қилиш керак эмаслигини айтиб, йўлида давом этарди. У ёқ-бу ёқдан келганлар уни танимай девона бўлиб қолган хаёл қилишарди: баъзан айланма тор кўчаларга кириб қолганида эшикдан чиқиб турган хотин-халаж кўрса-кўрмаса ҳам чолга эгилиб салом бериб, ўз болаларига, «бу бобо дадангнинг дадасининг дадаси...» деб тушунтирас, чол уларни яхши кўрмаса ҳам озгина илжайиб, қўли тегиб кетган қай бирининг бошини силар, қай бирининг елкасига қоқиб ўтиб кетарди. Баъзан битта-битта қадам ташлаб, мадрасалар тагидан ўтиб кетаётганида майдонда варрак учираётган бир қайнави ичида болалар мутлақо бу эски кийимдаги чолни танимай, растаю тимлар орасида юрадиган девона хаёл қилиб, унга кесак ҳам отишарди. Этаги барларига, ёнларига теккан кесакларни сезган чол қайрилиб, шўх болаларга қаради-да, илжайиб қўярди. Баъзан бу холнинг шоҳиди бўлган катта ёшлик кимсалар югуриб бориб, кесак отган болани ҳайдаб, танбех бериб, уйига киритиб юборишарди. Уларни яхши кўролмаса ҳам сезиб турган меъмор, «майли, қўяверинглар, болани хафа қилманглар, — деб бир лаҳза тўхтаб, ожиз кўзларини кулдириб, у ёқ-бу ёқка қарап, — мени девона деб кесак отишяпти. Ўз замонидан ажралиб қолган шумтака чолни ҳайдашяпти. Дархақиқат мен...» дерди ўзига ўзи. Баъзи кунлари бир келин чевараси боласини кўтариб келиб, Меъ-

морнинг устбошларини ювиб, жойларини супуриб, тартига солиб кетарди. Баъзан чол ҳовлисига кириб, азим тут тагига тўкилганларини териб еяётган майда болаларни айвон ёқасидан аранг кўриб, чуғурлашишларини эшишиб, завкланиб ўтиради. У ўзига ўзи: «Мўфуллар, амирзодалар ватандошларимни шунча ўлдиргани билан авлодимни йўқотиб юборолмади. Катта тутнинг бир томонини қирқса, бир томонидан новда чиқариб ўсаверади... Меъморни ҳеч қачон йўқота олмайсизлар!» — дерди.

У баъзан ўз айвонининг ўймакор устунига суюниб, тепасида — пештоқ пирамонида «фув-фувв...» қилаётган ёввойи каптарларга тикилар, қачонлардир болалигида қурилган бу устундаги михга дўппи ва салласини иларди. Бу мих қоқилганида Шахрисабздаги барлослар уруғида дунёга келган Соҳибқирон Амир Темур уч яшар бола эди. Икки дарё оралиғида Кебакхон ҳукмдорлик қиласиди. Улар ҳам ўтди... Қирқ йил ҳукмдорлик қилган Шоҳруҳ Мирзо ва Улуғбек Мирзолар ҳам ўтди.

Жаҳонгиру Мироншоҳу Султон Суюрғотмишлар, Бароқ ўғлонлар ўтди... бир-бири билан қирпичоқ шахзода Алауддавлаю Абдулатифу Мухаммад Жўқийлар ўтди. Дунёга устун бўламан деганлар бари ўтди, аммо Намозгоҳ даҳасидаги кекса меъмор Нажмиддин Бухорийнинг кийшайган айвонию ундаги устунлар ҳамон мустаҳкам турибди. Кебакхон даврида қоқилган мих ҳамон хизмат қилиб, қалпоқни кўтариб турибди... Мана, Абусайид Мирзо ҳам абадул-абад Самарқанд таҳтида ўтираман, деяпти. Бу ҳам ўтади! Жаллод ҳам ўтади, жарроҳ ҳам ўтади — ўтмайдиган одам йўқ бу дунёда! Лекин одамлар бир-бирини ҳақорат қилмаса, бир-бирини ўлдирмаса нима қиласкин! Беш кунлик дунёда бир-бирига азоб бермаса нима қиласкин! Бир-бирига панд бериб, ҳасад қилмаса нима қиласкин!

Яна жума келди.

Чол яна ҳассасини дўқиллатиб қўчага чиқиб кетди. Бугун Бухоро осмонида улкан оқ булутлар сузарди. Фарби-жануб томондан эсаётган кучли шамол кўчаларда чанг кўтариб, мадраса бинолари бурчагида гирдибод бўлиб қоларди. Куз эртароқ тушиб, одамлар

устларига пешмат, оёқларига кавуш-маҳси кийиб олишган. Баъзи кунлари ёғин-сочин ҳам бўлиб қолар, каппонда, мева бозорларида ўтирган атрофдан келган дехқонлар ковун-тарвузлар, қоплардаги дон-дунлари устини ёпишиб, ўзларини панага уришарди. Тим тагидаги баззозлар, косибу заргару дўппидўзлар ҳам ёмғир тина бермагач, дўконлари олдидаги чийни тортиб, уйларига жўнашарди.

Ҳавонинг авзойи бузилиб, осмонда булутлар қуюқлашаётган жума куни Меъмор яна катта масжидга бормай, мадраса бинолари атрофида айланаб юрди. Унинг устида эскигина кўйлаги, оёғида кавуши... У куз салқинини ҳам сезмагандек, баъзан нимагадир сўқинар, кўзига чўқки соқол, қозон салла Ҳожи Муҳаммад Порсо билан Аҳмад Чалабий қўрингандек бўларди. Чол ҳассасини дўқиллатиб келиб, Минораи Калон тагида бир лаҳза тўхтаб у ёқ-бу ёққа аланглар, кимнидир кутгандек, бир лаҳза ҳассасига тираниб турарди-да, яна тош йўлкалардан юриб кетарди. Одамлар уни кузатаётганларига мутлақо эътибор бермасди. Ҳар куни аҳвол шу бўлгани сабабли мадраса ҳовлисию дарвоза атрофини тўлдириб юрадиган талабаю муллаваччалар чолга эътибор беришмасди. Вахоланки, улар дарс олаётган улкан мадрасани курган уста — Меъмор мана шу чол эди. Ҳатто бу майдонда — Хинд саройи атрофида тентираб юрадиган катта кўпрак итлар ҳам уни танишар, чолнинг келаётганига бир қараб қўйиб, яна бамайлихотир ухлаша беришарди. Ҳаво айниб, битта-яримта томчилаб тургани сабаблими, итлар ҳам, товуқлар ҳам ўзларини панага олишган эди.

Куннинг ўрталарига бориб, чақмоқ чақиб, момакалдироқ бўлди. Кўп ўтмай ёмғир ёға бошлади. Меъмор ҳам ўзини чеккага олди — мадраса дарвозаси ёнидаги равоқ остига ўтди. Хиралашган кўзлари билан осмонни қоплаган куюқ қорамтири булутга тикилди. Ўғишин деворга суяниб осмонга тикилар, қўлда ҳассаси, ичдан Тангрига мурожаат этгандай бўларди: «Эй, Тангрим, болаларимни олдинг, уруғ-аймогимни, ёр-биродарларимни, шогирдларимни олдинг. Замондошларимдан ҳеч кимса қолмади... — Меъмор бир лаҳза

тўхтаб, яна фалакка тикилди, у на булутни, на шамолни ва на ёмғирни сезарди. «Мен қартайдим, дунё ташвишларидан зерикдим. Ёлғизмен, ҳеч кимга керағим қолмади. Ҳеч кимга даъвойим йўқ, бир ғариб бандангдан омонатингни ол!»

«Йў-ү-ўқ! — дегандай бир товуш Меъморнинг қулоғига етиб келди, — Сен ғариб эмассен! Сен бу дунёда кўп ишлар қилдинг!»

«Эй, Тангри! Сен куч-қудрати, беадад лашкари, шаъну шавкати билан дунёни титратган Амир Темур Кўрагонни, Искандару Доро жонини олдинг. Нечун бир ғариб, ожиз меъмор кимсанинг жонини олмайсан! Шаккок сўзларим учун тавба қилдим. Мен аналҳақ йўлини танладим, Сени севдим...»

«Меъмор! Сен шундай ишлар қилиб қўйдингки, улар абадул-абад дунёда қолади. Мен сувсиз сахро яратдим, сен унда сардоба қурдинг. Мен дарё оқиздим, сен унга кўприк солиб ўтдинг. Мен тупроғу сувни яратдим, сен ундан мустаҳкам ганчу ғишт ясад, мадрасалар қурдинг. Мен сенга ақлу идрок бердим, сен эса, мислсиз тафаккуринг ила жаҳон сирларини очдинг. Сенинг ишларинг абадият!»

Меъмор Нажмиддин Бухорий буларни хаёлан эшишиб, мадрасанинг ғишин деворларига ёпишганича бақрайиб котиб қолди.

Мана, шамол ва довулларга, ёмғир ва корларга, зилзила ва оташларга бардош бериб, неча юз йилдан буён у курган бинолар ўзбек заминида қад кўтариб турибди. Шу улкан биноларнинг бири тагида ғишин деворга суюнганча меъмор Нажмиддин Бухорий ҳам тирик турибди. Шу меъморий ёдгорликларнинг яшил ва шаффоғ кошин — кўзлари билан доимо янги авлодларни кўриб, кувониб келмоқда.

(Тамом)

1971—74 йиллар.
Тошкент

МУНДАРИЖА

Биринчи қисм

I боб. Суиқасд	5
II боб. Меъмор Нажмиддин Бухорий кўтарган қайфу- аламни фил кўтарса, бели синарди	18
III боб. Ташқиб	26
IV боб. Устоз ва шогирд	35
V боб. Фариб	51
VI боб. Гўзал Бадиа	55
VII боб. Мадраса курилишида	62
VIII боб. Тутқун уста Жўржий	68
IX боб. Түядек қомат берма, тариқдек ақл бер	73
X боб. Фарғона устига босқинчилик юриши	80
XI боб. Хазиналар эшиги беркитилди	95
XII боб. Чиройли ўлим	101
XIII боб. Жанг	105
XIV боб. Наврўзи олам	118
XV боб. Йўлда	124
XVI боб. Равоч сайли	130
XVII боб. Фордаги авлиё	142
XVIII боб. Саёқ юрган таёқ ер	147
XIX боб. Оёқ остидаги фожина	149

Иккинчи қисм

XX боб. Хорун бўзчи исёни	158
XXI боб. Қатл	165
XXII боб. Меъмор телбасифат	171
XXIII боб. Ҳайдалиш	188
XXIV боб. Андхуд карвонсаройидаги рўё	198
XXV боб. Қораилон изга тушди	207
XXVI боб. Одам сафарда билинади	216
XXVII боб. Бехудуд қумликлар	229
XXVIII боб. Халач яқинидаги қум бўрони	235
XXIX боб. «Қобус» дарди	255

XXX боб. Бичилган қул	269
XXXI боб. Чукур оким	273
XXXII боб. Чўли бобо маскани	286
XXXIII боб. Сардoba	297

Учинчи қисм

XXXIV боб. Мўътадил иқлим	305
XXXV боб. Мовий гумбаз ичра яна бир гумбаз	317
XXXVI боб. Оғули ханжар	330
XXXVII боб. Бухоро	333
XXXVIII боб. Меъмор ва Мунажжим	345
XXXIX боб. Тирилиш	355
XL боб. Дастребки қувончлар	365
XLI боб. Беҳаловат кунлар	372
XLII боб. Илон қасди	381
XLIII боб. Тарихга бир назар	392
XLIV боб. Абусайид хужуми	397
Хотима	409